

E lab júu^ quiá'- Dsea` Jmáang- e cajme' MATEO

*Jaléng` 'lii~ yúu~ quiá'- Dsea` Jmáang-
(Lc. 3:23-38)*

¹ I lab jaléng` 'lii~ yúu~ quiá'- Dsea` Jmáang- i líng' siju` 'lii~ yúu~ dseata~ Daví^ cóo~ gui` 'lii~ yúu~ Abraham. ² Jo Abraham calisî tiquiá'^ Isáa' jo Isáa' calisî tiquiá'^ Jacóo^ jo Jacóo^ calisî tiquiá'^ Judá cóo~ jaléng` rúñ'. ³ Jo Judá calisî tiquiá'^ Fares cóo~ gui` Zara jo niquiá'r^ calisîr` Tamar. Jo Fares calisî tiquiá'^ Esrom jo Esrom calisî tiquiá'^ Aram. ⁴ Jo Aram calisî tiquiá'^ Aminadab jo Aminadab calisî tiquiá'^ Naasón jo Naasón calisî tiquiá'^ Salmón. ⁵ Jo Salmón calisî tiquiá'^ Booz jogui niquiá'r^ calisîr` Rahab. Jo Booz calisî tiquiá'^ Obed jogui niquiá'r^ calisî Rut. Jo Obed calisî tiquiá'^ Isaí. ⁶ Jogui Isaí calisî tiquiá'^ i dseata~ Daví^ jo íb` tiquiá'^ Salomón jogui niquiá'r^ i calíng- dseamî quiá'- Urías.

⁷ Jo Salomón calisî tiquiá'^ Roboam jo Roboam calisî tiquiá'^ Abías jo Abías calisî tiquiá'^ Asa. ⁸ Jo Asa calisî tiquiá'^ Josafat jo Josafat calisî tiquiá'^ Joram jo Joram calisî tiquiá'^ Uzías. ⁹ Jo Uzías calisî tiquiá'^ Jotam jo Jotam calisî tiquiá'^ Acáz jo Acáz calisî tiquiá'^ Ezequías. ¹⁰ Jo Ezequías calisî tiquiá'^ Manasés jo Manasés calisî tiquiá'^ Amón jo Amón calisî tiquiá'^ Josías. ¹¹ Jo Josías calisî tiquiá'^ Jeconías cóo~ jaléng` rúñ'. Jo ie~ job mi~ cató-

dsea` i seeng` fí Babilonia fíng` dsea` Israel fí` góor` e 'ñúuiñ` do.

¹² Jo mi` cangf`gui lajo, Jeconías calis` tiquiá` Salatiel jo Salatiel calis` tiquiá` Zorobabel. ¹³ Jo Zorobabel calis` tiquiá` Abiud jo Abiud calis` tiquiá` Eliaquim jo Eliaquim calis` tiquiá` Azor. ¹⁴ Jo Azor calis` tiquiá` Sadoc jo Sadoc calis` tiquiá` Aquim jo Aquim calis` tiquiá` Eliud. ¹⁵ Jo Eliud calis` tiquiá` Eleazar jo Eleazar calis` tiquiá` Matán jo Matán calis` tiquiá` Jacóó. ¹⁶ Jo Jacóó calis` tiquiá` Sé, jo i Sé do íb` i calí` dseañu` quiá`- Yá; jo i Yá do, íb` i líng` niquiá` Jesús i líng` Mesías e guóng`: Dsea` i caguíng` Fidié`.

¹⁷ Jo caliséng` guiquiú` 'lé` íng` dsea` catí` mi` caliséng` Abraham jo cartí` mi` caliséng` dseata` Daví, jo jié`gui guiquiú` 'lé` catí` mi` caliséng` dseata` Daví jo cartí` mi` cangojéng` dsea` Babilonia jaléng` dsea` Israel fí` góor` e 'ñúuiñ`, jo jiéng`gui guiquiú`gui 'lé` catí` mi` cangf` e cató` dsea` Babilonia jaléng` dsea` Israel fí` góor` jo cartí` mi` caliséng` i Mesías do i caguíng` Fidié`.

Mi` caliséng` Dsea` Jmáang`

(Lc. 2:1-7)

¹⁸ Lalab calí` mi` caliséng` Dsea` Jmáang`. Jo ie` jo seeng` jaang` simí` i sií` Yá i nininéé` júu` quiá`- cóo` jaang` siming` i sií` Sé, dsu` nu`- gui e nigüear` colíng` cangoquieeng` i Yá do yuu` la'eáang` cóo` Jmiguí` quiá`- Fidié`. ¹⁹ Jo i Sé do líiñ` jaang` siming` i dsíng`- guiúng`, joba` ja` cali`iñ` fa` e cajméer` dsee` quiá`- i Yá do fí` quini` dsea`. Joba` ca`f` dsír` e nitiúung`-neñ` do e ñm`jiu e laco` ja`

niliñí dsea. ²⁰ Jo lajee e í dsíí i Sé do e nijmér-
lajo, lajee güññ jo caquir e cajnéng jaang ángel
i líng guotii Fidiée i casíng dsea do. Jo í casí'r-
i Sé do jo cajíñ' :

—Sé, siju dseata Daví, ja jmoo 'gó e nicøn
Yá e nilíñ dseamí quí', dsuco i jiuung i
quíeeiñ na ca'uúñ cóo Jmiguí quí' Fidiée.
²¹ Jo niliseeng jaang yuu siñuu quí'r-, jo 'nu
nitó' e nilisiir Jesús, jo nilisiir lana dsuco nileáñ-
jaléng dsea quí'r- jee jalé dsee quíáñ'.

²² Jo jalé e cajíng i ángel do calí e laco caliti-
júu quí' Fidiée e café jaang dsea i café cuaiñ
quí'r malí gui eáang mi cajíñ' lala:

²³ Jaang simí nidsiquieeiñ jaang yuu siñuu,
jo mi niliseeng i yuu do, nitér e nilisiñ Emanuel
e guóng' :

Fidiée seeiñ cóo' jneaa'aa'.

²⁴ Jo mi cajné dsíí i Sé do, joba' cajmée bre
jalé e cajíng i ángel do jogui cacóm bre i Yá do
e nilí dseamí quí'r. ²⁵ Dsu' ja caquiain' cóoiñ-
do cartí mi caliséng i yuu i quíeeiñ do. Jo mi
caliséng í, joba' catée Sé e calisíñ do Jesús.

2

*Mi caguiling dsea i jmiting quí' jaléng núu
fí Jerusalén*

¹ Jo caliséng Jesús fí cóo fí e sii Belén e née lí-
se' Judea. Jo ie jo líng jaang dsea i sii Herodes
dseata dsea féng' quí' jalé fí e sea fí jo. Jo
ie job cajo caguiling fí Jerusalén tú 'ní míng-
dsea i jmiting quí' jaléng núu, jo i dsea do
huíb eáang jalíñ fí lí lí guo' iee. ² Jo mi

caguiliñ̄ fí Jerusalén, cajmingí'r̄ jaléng' i dsea` seeng` fí jō, jō cajíñ'⁻:

—¿Jnanḡ i dseatā dsea` féng' quiá'⁻ dsea` Israel i nicaliséng` do? Dsucō' nicanéenḡ naa' núú' quiá'r̄ fí lí' lí' guo' iee, joba' ne~naa' e nicaliséiñ̄ jō lana nijáa'naa' e nijmiféng' naa're.

³ Jō mī canúū dseatā Herodes e júu^ jō, dsíng'⁻ jō tiī seeiñ̄, jōguí lajobi cajo jaléng' dsea` i seeng` fí Jerusalén. ⁴ Joba' i dseatā do cató'r̄ jaléng' fiī jmidsea` quiá'⁻ dsea` Israel cóo' gui jaléng' tifa' quiá'⁻ júu^ quiu' ta~ quiá'⁻ dsea` Israel jō cajmingí' reiñ' do jō cajíñ'⁻:

—¿Jiē fí lí̄ niliseeng` i Mesías?

⁵ Joba' cañí' i dsea` do quiá'⁻ i dseatā do jō casí'⁻ reiñ'⁻:

—I dsea` í niliseeiñ̄ fí cóo' fiī e sii` Belén e née' lí' se' Judea; dsucō' lajob cajme' jaang` dsea` i café' cuaiñ̄ quiá'⁻ Fidiéé' maliī guí eáang' mī cajíñ'⁻ lala:

⁶ E fiī pí' e sii` Belén do née' fí lí' se' Judea, dsu' e fiī jō ja` 'ga' lí' niing` lajee' lajalé' fiī e sea` fí jō,

dsu' fí jōb lí̄ nigüi'ling' jaang` dseatā dsea` féng' i nicá' nifí' quiá'⁻ jaléng' dsea` quié'⁻ e, dsea` i líng' dsea` Israel.

⁷ Joba' i dseatā Herodes do cató'r̄ jaléng' i dsea` i jmitíng` quiá'⁻ jaléng' núú' do fí cóo' lí̄ ja` 'ga' lí' ní' dsea` jō cajmingí'r̄ dsea` do e` í' ngóo' mī cajnéng` i núú' do. ⁸ Jō mī cangí' jō, i dseatā do casíñ̄ i dsea` í' fí Belén jō casí'⁻ reiñ' do lala:

—Güilíng` na' fí jō, jō güijmidseáang' óo' na' lajī e lí' na' quiá'⁻ i jiuung` do; jō mī niguiéng' na're,

jmée'~na' jnea~ júu^, job cuóøng` nii'i e nijmifén'~nre cajo.

⁹ Jo mi~ cató' sí' dseata~ Herodes i dsea` do lajo, joba' catam'~tuiñ' do fí' ngolíiñ~. Jogui i núu' i cangáiñ~ jéeng' do, ngóo'biñ' do laco' ngolíiñ~, jo coob` mi~ caje' i núu' do fí' yú'^ 'núu' li~ guing~ i jiuung~ do. ¹⁰ Jo i dsea` do eáam' iáang` dsíir' dsu' e níiñ~ i núu' do. ¹¹ Jo mi~ caguiliñ~ fí' e 'núu' do, dsifí' ladob cangotáaiñ~ e fí' dsíi' sinúu^ do jo cangáiñ~ i jiuung~ do cóo'~ niquiáiñ'^ Yá^. Jo casí'r' uó~ jnir~ fí' quini~ i jiuung~ do jogui canaaiñ` e jmiféng'~neiñ' do cajo. Jo mi~ calí~ e cajmér~ e jo, jo caneáar' guóo' quiár~ e quier' do, jo cacuø'r' i jiuung~ do cunée~ cóo'~gui sù' e 'mo'^ eáang' cóo'~gui cuií' e jlo'^ jmeafii cajo. ¹² Jo mi~ cangî jo, caquim'~tu i dsea` do fí' góor`. Dsu' fí' li~ jieb^n caquiñ'~ do dsuco' Fidiée~ cajmea'breiñ' júu^ lajee~ güiñ' do e ja' cuóøng` niqing'~tuiñ' do fí' li~ guing~ i dseata~ Herodes do.

Mi~ cacuií' Sé^ cóo'~ Yá^ cóo'~gui i jiuung~ do e cangolíiñ'^ fí' Egipto

¹³ Jo mi~ cangî e nicangolíng` i dsea` i jmitíng` quiá'~ jaléng' núu' do, jo lajee~ güing` i Sé^ do, caleáb'tu caquiñ' jaang` ángel quiá'~ Fidiée'. Jo i ángel do casí'r~ i Sé^ do jo cajíiñ'~:

—iSé^, ráan'~ jo jéeng` i jiuung~ na cóo'~gui niquiá'r^ jo cuií~na' fí' Egipto! Jo fí' job nijá^na' cartí' mi~ nijmée'~e 'nú' júu^, dsuco' i dseata~ Herodes do ni'náiñ' i jiuung~ na e nijngám'~bre.

¹⁴ Joba' caráam~ i Sé^ do ladsifí' lado, jo uóø` job cataiñ'~ fí' e cangojéeiñ` i jiuung~ do cóo'~gui niquiáiñ'^ do fí' Egipto. ¹⁵ Jo dob cajeiñ' cartí' mi~

cajúng` i dseata` Herodes do. Jo cangojée` e la e lí` laco` caliti` lajii` júu` e cajíng` Fidiée` la'eáang` cóo` jaang` dsea` i café` cuaiñ` quiá'r` malii` gui eáang` mi` cajíñ` lala: "Catóøø` Jóo` e nigüi`fir` fi Egipto."

Mi` cajnga` dsea` quiá` jaléng` jiuung` ping`

16 Jo mi` calilí` i dseata` Herodes do e cajmigóøm` i dsea` i jmitíng` quiá` jaléng` núu` do ír, joba` dsíng` caliguiñ`; jo caquiá'r` ta` jaléng` léé` quiá'r` e nidsijngáaiñ` jaléng` jiuung` i ping`gui laco` tú` jí` i seeng` fi` Belén cóo` gui jaléng` jiuung` ping` i seeng` fi` fi` e née` lacúng` lajíng` e fi` jo i ngolíng` í` lajo cajo. Jo cajngam`bre lí` laco`gui jí` jii` e cajíng` i dsea` i jmitíng` quiá` jaléng` núu` do. 17 Jo cóo` e nab caliti` e júu` e cajme` jaang` dsea` i café` cuaiñ` quiá` Fidiée` malii` gui eáang` i calisí` Jeremías mi` cajíñ` lala:

18 Jo caná` óo` jaang` dseamí` fi` cóo` fi` e sii` Ramá, jo dsíng` qui`r` jogui` óor`;
Raquéeb` sii` i dseamí` do jo qui`r` uí` jiuung` quiá`r` dsuco` nicajúm`bing`,
jo ja` iin` nimíñ` co` dsíng` lijiuung` dsíir`.

19 Jo mi` cangi` e cajúng` i dseata` Herodes do, fi` Egipto táang` i Sé` do lajee` jo. Jo cóo` ya` lajee` e güiñ, caquím`tur jaang` ángel quiá` Fidiée`, jo í` casí`r` Sé` jo cajíñ` lala:

20 —Sé`, ráan`, jo quíng`tu` cóo` i jiuung` na cóo`gui niquiá`r` fi` lí` se` Israel, co` lana nicajúm` i lamí` iing` jngáng` i jiuung` na.

21 Joba` lajob cajmée` Sé`, caráam`bre jo cató`bre i jiuung` do cóo`gui niquiáñ` do fi` lí` se` Israel.

22 Jo dsu' mi~ caliñir' e Arquelao niguiiñ~ líiñ' dseata~ dseá' féng' quiá'- lí' se' Judea eáang^ quiá'- i tiquiá'r^ dseata~ Herodes do, joba' eáam' cafóñ' jo jo` cangáiñ'- fí' jo, co' Fidiée~ cajme'tureiñ' júu^ lajee~ güiñ' e ja` cuóøng` nidsiliñ' fí' jo. Joba' fí' lí' se' Galileab cangoliñ'. 23 Jo mi~ caguiéng'- Sé' fí' lí' se' Galilea, jo cangogüear' fí' coo' fiñ' e sii' Nazaret e néé' fí' jo. Jo calí- e na e laco' caliti~ jalé' júu^ e café' dsea' i café' cuaiñ~ quiá'- Fidiée~ malii~gui eáang' mi~ cajíñ'- e Jesús nilisiir` jaang` dsea` nazareno.

3

Mi~ canaang` Juan i seáang` dsea` jmii` e guiar` júu` quiá'- Fidiée`

(Mr. 1:1-8; Lc. 3:1-9, 15-17; Jn. 1:19-28)

1 Jo mi~ cangí'gui jmiguiú' jii` lajo, jo ie~ jo cangí' jaang` dsea' i sii' Juan i seáang` dsea` jmii' fí' ni~ guóo'~ uó^ quiú' fí' lí' se' Judea, 2 jo guiar' júu^ jo fé'r' lala:

—Qui'~ jíng'~ yaang~na' fí' quini~ Fidiée~ uii'~ dsee~ quiá'na', dsuco' nijaquiéem'ba' e nicá' dsea' do nifí' quiá'- lajaang` lajaang` dsea` jmigüí'.

3 Jo malii~gui eáang' caliséng` jaang` dsea' i calisí' Saíi^ i café' cuaiñ~ quiá'- Fidiée~, jo íb` i café' uii~ quiá'- i Juan do mi~ cajíñ'- lala:

Ngí' jaang` dsea' i fé'~ teá' fí' ni~ guóo'~ uó~ quiú' jo fé'r' lala:

“Jmeáang'~na' guíú' fí' jogui' nea~na' condsée',
co' lana tí' lí' nijáab' Fii'naa'.”

Jo jalé' e na cajíng'~ Saíi^ fí' ni~ jì' quiá'- Fidiée~ do.

4 Jo sí'^ i Juan i seáang` dsea` jmii` do lí' cóo'~ layaang~ jñú^ loo~ jó' camello, jogui' 'ñúú' tu'r' coo' 'ñtu' e lí' cóo'~ loo~ jó', jogui' jmítaang~ 'ñia'r' cóo'~

sini¹ i cóong¹ cóo¹gui ta¹ e dsé¹r¹ fí¹ jee¹ mó¹. ⁵ Jo jaléng¹ dsea¹ i seeng¹ fí¹ Jerusalén cóo¹gui jaléng¹ dsea¹ i seeng¹ fí¹ lí¹ se¹ Judea cóo¹gui jaléng¹ i neáang¹ quiá¹ gua Jordán dsiliñ¹ e dsinúur¹ jalé¹ júu¹ e guiá¹ i Juan do. ⁶ Jo jaléng¹ i dsea¹ do jmóor¹ júu¹ lajii¹ dsee¹ e nica'éer¹ quiá¹r¹, jo lí¹ jo i Juan do seáaiñ¹ jmii¹ jaléng¹ i fí¹ é¹ gua Jordán.

⁷ Jo mi¹ cangá¹ i Juan do e fíim¹ dsea¹ Israel i líng¹ dsea¹ fariseo cóo¹gui dsea¹ Israel i líng¹ dsea¹ saduceo jalíñ¹ e iñ¹ nisáiñ¹ jmii¹, joba¹ cajín¹ casí¹r¹ jaléng¹ i dsea¹ do lala:

—jÓó¹ mi¹ guíng¹ 'ná¹! ¿I¹ nicasí¹ 'ná¹ e nileáng¹na¹ jee¹ iihuí¹ e nijaquíéeng¹ e nicuó¹ Fidiéé¹? ⁸ Jo ee¹na¹ røø¹ fí¹ quini¹ dsea¹ jo jmiliing¹ yaang¹na¹ e laco¹ nililí¹ jaléng¹ dsea¹ rúng¹na¹ e já¹ba¹ e nicaquí¹ jíim¹ yaang¹na¹ fí¹ quini¹ Fidiéé¹. ⁹ Jo ja¹ jmijløng¹ yaang¹na¹ e fó¹na¹: “Jnea¹ lí¹naa¹ dsea¹ siju¹ 'lí¹ yáa¹ Abraham”; co¹ jnea¹ jmítáa¹ óo¹na¹ e Fidiéé¹ cuóø¹m¹ lí¹ jmér¹ e cuu¹ née¹ na e ni'uíng¹ dsea¹ siju¹ 'lí¹ yáa¹ Abraham faco¹ iñ¹ lajo.

¹⁰ Jo cajíng¹gui Juan casí¹r¹ jaléng¹ i dsea¹ do lala:

—Ninéeb¹ guiá¹ ñigui¹ quiá¹ Fidiéé¹ e niquíá¹r¹ jalé¹ 'ma¹ catí¹ jmó¹ quiá¹. Co¹ jalé¹ 'ma¹ ofii¹ e ja¹ cuø¹ ofii¹ e guiá¹ nihuí¹b¹ jo nidsitoo¹ fí¹ ni¹ jì. ¹¹ E já¹, jnea¹ seáan¹ 'ná¹ jmii¹ jii¹ cóo¹ layaang¹ jmii¹b¹ e laco¹ cuø¹ lí¹ e nicaquí¹ jíim¹ yaang¹na¹ fí¹ quini¹ Fidiéé¹; dsu¹ i dsea¹ i nijáa¹ mi¹ ningúng¹ jnea¹ niseáiñ¹ 'ná¹ jmii¹ cóo¹ Jmiguí¹ quiá¹ Fidiéé¹ jogui cóo¹ jì cajo. Jo i dsea¹ i dsíng¹gui 'gøiñ¹ laco¹ jnea¹ e jii¹ jnea¹ ja¹ catín¹ n co¹ sí¹ capí¹ ñí¹ 'ñúu¹ lomii¹r¹. ¹² Jo quier¹ coo¹ e jmáíñ¹ ta¹ quiá¹ e nisíñ¹

micui'iee, jo nisér- ca' e qui' quiá'- do. Jo dsu' e micui'iee do ni'meár- fí' dsí' sinúu^ jogui e qui' do quiá'- nijí-bre fí' lí' coo' jí' e ja' tóo' jmíi~ yu'.

*Mi~ cajgáang- Jesús jmíi~
(Mr. 1:9-11; Lc. 3:21-22)*

¹³ Jo mi~ cangí jo, cagüi'íí' Jesús fí' lí' se' Galilea jo cangór- fí' lí' táang` i Juan do fí' gua` Jordán e laco' dsea` í' nisé- jmíi~ quiá'r-. ¹⁴ Dsu' i Juan do ja' lamí~ iiñ~ e niseáíñ- dsea` do jmíi~, jo lalab cajíñ'- casí'- reiñ':

—'Nu' b` dsea` catín'- e niseáan'- jnea~ jmíi~; jo zjalí' ñi' e iin'- e jnea~ niseáan~ n 'nu' jmíi~?

¹⁵ Joba' cañí' Jesús jo casí'- reiñ':

—Lí'^ jmee- laco' e fíi- i 'nu' lana; co' la guím` 'né- jmití'ii' jalé' ta~ quiu' Fidiéé~ e 'né- jmó'oo'.

Joba' ca'íb- dsí' i Juan do e niseáíñ- dsea` do jmíi~. ¹⁶ Jo dsifí' mi~ cajgáang- Jesús jmíi~, jo cagüi'íí'bre fí' dsí' jmíi~. Jo ladsifí' lanab cana' fí' yú'^ jmigüi~, jo cangá- Jesús e cajgó- Jmiguí' quiá'- Fidiéé~ fí' yú'^ moguir~ e líing~ jaang` mee~. ¹⁷ Jo guicanú' coo` luu~ e jáa' fí' yú'^ jmigüi' jo guicajíng'- lala:

—I nab Jóo'o i 'neáan`n eáang', jo dsíng'- iáang` dsii- cóo'r~.

4

*Mi~ cajmée' fíi' i 'líng'^ quijí- jial ni'é- Jesús dsee-
(Mr. 1:12-13; Lc. 4:1-13)*

¹ Jo mi~ cangí e cajgó- Jmiguí' quiá'- Fidiéé~ fí' yú'^ moguí~ Jesús, jo e Jmiguí' do cangojéeng` dsea` do fí' coo` guóo'~ uó- quiú' e laco' fíi' i 'líng'^ nijmér- quijí- jial e ni'é- dsea` do dsee-.

² Jo fí job cateáang` Jesús lajee` tuló` jmíi` jogui tuló` uø` jo ja` e cagø`r` jii` coo` lajee` jo. Jo mi` cangf`gui lajoba` cadseá` jmi`aaiñ`. ³ Jo lajee` job cangoquiéeng` i fii` i `ling`^ do fí li` sing` Jesús e jmóor` quiij` jial ni'é` dsea` do dsee`, joba` casí`r` dsea` do lala jo cajíñ`-:

—Song já` e `nà` lin` i Joo` Fidié` camíng` do, quiúu` ta` e ni`uíng` iñi`^ e cuu` e néé` na.

⁴ Jo dsu` dsifí` lajob cañi` Jesús quiá`- i fii` i `ling`^ do jo cajíñ`-:

—Dsu` lalab fé` fí` ni` jì` quiá`- Fidié`: “Ja` niliseeng` jaléng` dsea` jmigüi` juguiá` e lico` ni`i` nidø`r` jalé` e sea` fí` jmigüi`, co` `né` e nijmitir` jalé` ta` quiu` fí` ni` jì` quiá`- Fidié`, jo lajoguiba` niliseeiñ` juguiá`.”

⁵ Jo mi` cangf` jo, i fii` i `ling`^ do cangojéeiñ` Jesús fí` fii` güeang`^ quiá`- dsea` góor` dsea` Israel e sii` Jerusalén, jo caseáaiñ` dsea` do cartí` yú`^ guá`- fé` e si` fí` jo. ⁶ Jo lajee` niteáaiñ` fí` jo, lalab casí`r` Jesús jo cajíñ`-:

—Song já` e lin` i Joo` Fidié` camíng` do, bíng` uø` cartí` uii` quiá`- e guá`- la; dsuco` fí` ni` jì` quiá`- Fidié` fé` lala:

Fidié` niquiá`r` ta` jaléng` ángeles i líng` guotii`r` e nijmér` í` `nà`,

jo nisáiñ` `nà` cóo`~ guoor` lajee` guiáng`~ guo` guiá` güi` e laco` ja` nititaan`~ cartí` ni` uø`^.

⁷ Joba` cañi` Jesús jo casí`-reiñ`:

—Dsu` lala fé` gui fí` ni` jì` quiá`- Fidié` cajo: “Ja` jmoo` jial ni'é` Fíi` Fidié` dsee`.”

⁸ Jo mi` cangf` e jo, i fii` i `ling`^ do cangojéeiñ` Jesús fí` coo` yú`^ mó` e ñi` eáang`, jo ca`e`r` dsea`

do jalé^h fii^h e sea^h fi^h jmigüü^h jogui jial niing⁻ laco^o laco^o; ⁹ jo i fii^h i 'ling^h do casí^r Jesús jo cajíñ^h:

—Jnea^h nicuøøø^h 'næ^h lajalé^h e móo^h na song nisi^h uø^h jní^h fi^h quini^h jogui nijmifén^h jnea^h.

¹⁰ Joba^h cañí^h Jesús jo casí^h reiñ^h:

—Güihuíng⁻ cáanⁿ, Satanás, dsuco^h fi^h ni^h jì quiá^h Fidié^h fé^hgui: “Jí^h Fidié^h dsea^h guing^h ñifí^h bing^h nijmifén^h, jo jí^h ta^h qui^h íbre e nijmití^h cajo.”

¹¹ Jo dsifi^h lajob cajmí^h náng^h 'ña^h i fii^h i 'ling^h do fi^h lí^h sing^h Jesús, jo lí^h jo caguilíng⁻ tú^h 'ní^h míng^h ángeles fi^h lí^h sing^h Jesús e cangoto^h fiiñ^h dsea^h do.

Mí^h canaang^h Jesús jmóor^h ta^h quiá^h r^h fi^h lí^h se^h Galilea

(Mr. 1:14-15; Lc. 4:14-15)

¹² Jo mí^h cangí^h jo, jo caliñí^h Jesús e 'næñíb^h ni^h uung⁻ Juan i seáng^h dsea^h jmí^h, joba^h caquim^h tur fi^h lí^h se^h Galilea. ¹³ Dsu^h ja^h cajer^h fi^h Nazaret, co^h dob cangogüear^h fi^h Capernaum fi^h 'ni^h guié^h Galilea, fi^h lí^h se^h lí^h neáng^h dsea^h Israel i líng^h dsea^h siju^h Zabulón cóo^h gui Neftalí. ¹⁴ Jo cangojé^h jalé^h e jo e laco^h caliti^h lají^h júu^h quiá^h Fidié^h e cajme^h Saí^h, jaang^h i café^h cuaiñ^h quiá^h Fidié^h mali^h gui eáng^h mí^h cajíñ^h lala:

¹⁵ E guóo^h uø^h quiá^h dsea^h siju^h Zabulón cóo^h gui Neftalí

née^h cáang^h gua^h Jordán fi^h 'ni^h guié^h Galilea fi^h dsí^h lí^h se^h Galilea cajo.

Jo fi^h job lí^h seeng^h dsea^h i ja^h cuíng^h Fidié^h.

¹⁶ Jo lafa^h i seeng^h fi^h lí^h nuu^h sò^h líng^h jaléng^h i dsea^h í,
dsu^h cangár⁻ coo^h jì e jlo^h niing⁻ 'gøng^h.

Jō jaléng' ì dsea` î líiñ' lafa' sijúuiñ` uíi` dsee`
 quiá'r`,

dsu' nicajneá` e jì do jee` ír`.

17 Jō lajee` e niguing` Jesús fí Capernaumba'
 canaaiñ` guiar` júu` quiá'r` jō fé'r`:

—Quí`- jíng' yaang`na' fí quini` Fidié` uíi`
 dsee` quí`na', dsuco' nijaquíém'ba' e nicá` dsea`
 do nifí quiá`- lajaang` lajaang` dsea` jmigüf`.

*Mi` cató`- Jesús quiúung` dsea` ì jmóo` ta` sáang` 'ñu`
 (Mr. 1:16-20; Lc. 5:1-11)*

18 Jō mi` cangî jō, lajee` e ngóo' Jesús ngir' fí 'ni`
 guiéé Galilea, cangáin` gáng` dsea` ì la'ó` rúng',
 jaang` ì siì Simón jō siì bir Tú` cajo, jō jaang`gui ì
 siì Dí. Jō lajì huáaiñ`- do taaiñ` ta` feá' 'máa' fí
 dsí' jmî quiá`- e sáin` 'ñu`. 19 Jō Jesús casí`- reiñ` jō
 cajín`-:

—'Nú` ñilíng`na' cóo`~ jnea~, jō jnea` nicuóøø`
 'nú` ta` e guiá`na' júu` quiá`- Fidiéé` fí jee` dsea`
 jmigüf`, jō líb`jiu e ta` jō la lí' ta` sáang` 'ñu`.

20 Jōba' ì dsea` do dsifí ladob catúr` 'máa' quiá'r`
 jō cangolím`bre cóo`~ Jesús.

21 Jō tí dobijiu ningóo' Jesús cóo`~ ì dsea` do mi`
 cangáin` jíéng`gui gáng` dsea` ì la'ó` rúm' cajo, jō
 jaiñ` do siir` Tiáa` jō jaang`gui ì siì Juan. Jō lajì
 huáaiñ`- do líiñ` jóo' jaang` dseañu` ì siì Zebedeo.
 Jō teáaiñ` fí cóo` dsí' móo' colüing` cóo`~ tiquiá'r`
 e jmo'r` jalé' 'máa' quiá`- e sáin` 'ñu`. Jō Jesús
 cató`- reiñ` do, 22 jō dsifí lajob ca'uøøiñ` do e fí dsí'
 móo' lí` teáaiñ`- do jō cangolím`bre cóo`~ Jesús, jō
 dob caseáaiñ` ì tiquiá'r` do.

*Mi` ca'e' Jesús fñng` dsea` jalé' júu` quiá`- Fidiéé`
 (Lc. 6:17-19)*

23 Jo mi~ cangî jo, cangi' Jesús fí la'úng- fí lí se' Galilea e e'r' jaléng' dsea` Israel júu^ quiá'- Fidiée' fí dsí' guá'- quiá'r- e téé- laco` fíi. Jo guiar' júu^ quiá'- Fidiée' e nijaquíem'ba' e nicá dsea` do nifi' quiá'- lajaang` lajaang` dsea` jmi'güi. Jogui jmi'leáam` bir jaléng' dsea` i ling' lí^ doñí ee` jmohuí' osi lí^ doñí jíe' lí cu' quiáiñ'- é. 24 Jo eáam' nini' júu^ quiá'- Jesús quiá'- jalé' e guiá- e jmóor` do fí la'úng- fí lí se' Siria. Jo jaléng' dsea` i seeng' fí jo dsilíiñ- fí lí táang` Jesús e dsijéeiñ` jaléng' dsea` dsée' quiá'r- lí^ doñí ee` jmohuí' líiñ'; jo quiéeng' i jée' i 'ling'^ quiá'- cóo'~ gui jaléng' i joñíing` jogui jaléng' i caang` guotii` jogui jaléng' i ja` lí ngí-, lí^ lajaléng' i na dseáng'- jmi'leáam` Jesús.

25 Jo eáam' fíing' jaléng' dsea` i ningí cóo'~ Jesús; jo jaléng' i dsea` i seeiñ` do i seeng' fí lí se' Galilea jogui seem`bi i jalíng- fí jalé' fíi e téé' fí lí se' Decápolis jogui seem`bi i jalíng- fí Jerusalén jogui seem`bi cajo jaléng' dsea` i jalíng- fí lí se' Judea cóo'~ gui jaléng' dsea` i jalíng- lí^ lí 'ngóo'~ laco' iá` gua` Jordán.

5

Jalé' júu^ e ca'e' Jesús dsea` quiá'r- fí cóo` yá'^ mó' (Lc. 6:20-23)

1 Jo mi~ cangá- Jesús e fíing' dsea` ngolíng- caluur' laco' ngóor', joba' cajgóor- fí cóo` yá'^ mó' jo fí job caguár. Jo jaléng' i dsea` quiá'r- do cangoquíeiñ' fí lí guíing~ dsea` do, 2 jo Jesús canaaiñ` e' reiñ' do jo cajíñ'-:

3 —Juguiá-jia quiá'- jaléng' dsea` i ñí' e 'neaiñ- Fidié', co' dsea` íb` dsea` i quie' nifí' quiá'r-.

4 'Juguiá-jia quiá'- jaléng' dsea` i dsíng'- lijjuung~ dsí', co' Fidiéeb' nijmi'iaaiñ` dsí' jaléng' i dsea` í.

5 'Juguiá-jia quiá'- jaléng' dsea` i 'neáng- Fidié', co' ñíir' e jíí'~ coo` ja` e quí'r~ jmí~ jmér- yaaiñ~; jo Fidié'bing' i nicuø' jaléng' i dsea` í jalé' e catíiñ- lí^ laco' jíí'~ júu^ e nicacuø'reiñ' lamí~ jéeng'gui.

6 'Juguiá-jia quiá'- jaléng' dsea` i dsíng'- iing~ jmé- jalé' e iing~ Fidié', co' dsea` í'bing' i nijmicoo'~ quiá'r- e nilí'bre jmér- jalé' e jo.

7 'Juguiá-jia quiá'- jaléng' dsea` i fíi- líng- jaléng' dsea` rúng', co' Fidiéeb' nilí' fíi- líiñ- jaléng' i dsea` í.

8 'Juguiá-jia quiá'- jaléng' dsea` i guing~ dsí' e jmóor` jmang'- jalé' e guiá-, co' jaléng' dsea` í'bing' i niníng- Fidié'.

9 'Juguiá-jia quiá'- jaléng' dsea` i jmóo` quijí- jial niliseeng` dsea` juguiá- coo'~ dsea` rúíñ', co' Fidié'bing' nijíng'- e dsea` í'bing' líng' jóor'.

10 'Juguiá-jia quiá'- jaléng' dsea` i dsingúng- e jmó'- dsea` ga` quiá'r- uí'~ e jmóor` jalé' e iing~ Fidié', co' i dsea` i dsingúng- jalé' e jo, Fidié'bing' i quie' nifí' quiá'r-.

11 'Juguiá-jia quíi- 'nú' mí' fé' dsea` ga` uii' quíi' na' jogui jmáiñ' 'nú' jogui sí'r' 'nú' jalé' júu^ e o' já'- uí'~ e líng'na' dsea` quie'-e. 12 Jmi'iaáng` óo'na' jogui güiliseeng'na' juguiá-, co' dsíng'- niguo'^ e ni'íng'~na' quiá'- Fidié' e sí'má'r^ quíi- na' fí' ñíí'. Dsaco' jaléng' dsea` i café' cuaiñ-

quíá' Fidiéé malii~gui eáang', lajob cajmeáng' dsea`ír`cajo.

'Nú' líng'na' laco' la lí' ñi~ cōo' gui la lí' jì' fí' jee~ jaléng' dsea`jmigüü'

(Mr. 9:50; Lc. 14:34-35)

¹³ Jo casí' gui Jesús i dsea`quíá'r- do lala:

—'Nú' líng'na' la lí' ñi~ jee~ jaléng' dsea`jmigüü', dsu' fíng cajéng' e ñii~ e ñi~ do, joba' jo`quí' jmi~ jóng fa' e niliñii~tu calé' catú'. Jo cō' jo` e ta` íng` jíí' cōo` e ñi~ do, joba' nibib~ fí' guíá'^ fí' jóng, jo jaléng' dsea` i ngí' fí' jo niso'óm'bre.

¹⁴ Jogui 'nú' líng'na' la lí' cōo` jì' jee~ jaléng' dsea`jmigüü'. Cofa' cōo` fii' e née' fí' cōo` yá'^ mó' ja` quí'~ jmi~ fa' e ni'méng' 'ñia' e ja` cuóøng` lí' jøø` dsea'. ¹⁵ Jogui cajo ja` 'gui' dsea` cōo` candíí' jo nisí'r' fí' cōo` lí' cøøng'~, cō' 'né' nisí' dsea` cōo` lí' ñí'ba' do, jo lajoba' cuø` jì' e jné' dsea` i neáang' fí' dsíí' sinúú'. ¹⁶ Jo lajob 'nú' cajo, dsea` nilíng'na' lafa' jì' fí' quini` jaléng' dsea` jmigüü', jmi'úung'na' e nijmee`na' jalé' e guíá' fí' jee~ jaléng' dsea` rúng'na', cō' mi~ niní' dsea` e jmoo`na' jalé' e jo, joba' lajii~bre nijmiféiñ' Tiquí'ii' dsea` guíing` ñifí' jóng.

Mi~ ca'e' Jesús cuaiñ~ quiá' júu^ quiú' ta~ quiá' Fidiéé e cajme' Moi

¹⁷ Jo lí' jo, lalab casí' gui Jesús i dsea`quíá'r- do jo cajíñ' :

—Ja` í' óo' 'nú' e cagá`a fí' jmigüü' la e caga'ín'n jalé' júu^ quiú' ta~ quiá' Fidiéé e cajme' Moi, o'gui e caga'ín'n jalé' júu^ e ca'e' jaléng' i dsea` i café' cuaiñ~ quiá' Fidiéé malii~gui eáang'. Cō' ja` cagá`a fa' e caga'ín'n jalé' e jo, cō' jnea` cagá`a

fi' jmigüi' la e li' laco' niliti' jalé' e júu' job. 18 Jo jmitaa' óóna' e lajee' róob' guóol' uó' jmigüi', ja quí' jmí' fa' e nijé' jii' camí' e júu' quiu' ta' do carti' mi' nidsijé' jalé' e nisi'í' e nidsijé' do. 19 Joba' i dsea' i ja' jmóo' núu' fa' camí' júu' quiu' ta' quiá' Fidié' e cajme' Moi, doñi' fa' ja' 'ga' lí niing' e júu' camí' do, o'gui e'r dsea' rúin' jial e nijméin' do núu'r' e júu' jo, joba' i dsea' í ni'uiin' jaang' i ja' niing' jii' capí' fi' quini' Fidié' mi' tí lí nicá' dsea' do nifi' quiá' lajaang' lajaang' dsea' jmigüi'. Dsu' jaléng'gui dsea' i núu' jalé' e júu' quiu' ta' do jogui e'r jaléng' dsea' rúin' e nijméin' do lajo, joba' i dsea' í ni'uiin' dsea' i niim' fi' quini' Fidié' mi' tí lí nití' í' e dsea' do nicár' nifi' quiá' lajaang' lajaang' dsea' jmigüi'. 20 Joba' fí' i 'nú' e song ja' nijmi'úung'na' e nijmee'na' núu'na' jalé' júu' quiá' Fidié' røø'gui laco'gui i tifa' quiá' júu' quiu' ta' quiá' dsea' góonaa' dsea' Israel jo cóo'gui jaléng' dsea' góonaa' i líng' dsea' fariseo, joba' ja' quí' jmí' jóng fa' e Fidié' nicár' nifi' quí'na' mi' tí lí nití' e í' jo.

Mi' ca'e' Jesús jial lí' mi' guíng' dsea'
(Lc. 12:57-59)

21 Jo mi' cangí' jo, Jesús ca'er' e júu' la jo cajíin':

—Jo 'nú', nicanúu'ba' lajii' júu' e calíng' dsea' áang' quí'naa', jo e lab e jo: “Ja' jngán' dsea' rún', dsuco' i i' jmóo' lajo, joba' fi' quini' dseatab' catíng' dsér' e nitidsí' í' quiá'r' laco' catíng'.”

22 Dsu' jnea'gui fí' i 'nú' e doñi' i dsea' i líguíng' quiá' jaang'gui dsea' rúng', joba' fi' quini' dseatab' catíng' dsé' i dsea' í' e laco' nitidsí' í' quiá'r'. Jo i dsea' i jmineang' jaang' dsea' rúng',

jōba' i dseá' í, dseá' cóong' i quiá' ta~ quiá'- dseá' Israel catíng- niquidsí' í' quiá'r-. Jōgui i dseá' i cuóong' júu^ 'lí' jaang'gui dseá' rúng', jōba' fí' lí' 'lib' catíng- i dseá' í' fí' lí' coo' jí' e ja' tóo' jmí~ yá'.

23 Jō mí~ güilíng-na' fí' guá'- e líng~ eē' güicuóo' na' Fidié' fí' nife', jō lajee' jō niguiéng' óo'na' e seeng' jaang' dseá' i jmoo'na' mí~ cóo', 24 jōba' dob 'né' sée'na' e quié'na' do, jō nigüilíng-na' e nijmití' óo'na' la'uü' cóo' i dseá' rúng'na' i jmoo'na' mí~ cóo' do. Jō mí~ ningí, jōguiba' nicuóong' e güicá'na' fí' nife' jalé' e quié'na' do jóng.

25 Jō song i dseá' 'náng' 'nú' lajü' dsee- e nica'ee-na', jōgui iñ~ e nidsijéiñ' 'nú' fí' quini' dseata~, jōba' guiú'-gui jmí'úung'na' jóng e nisiing'na' røø' cóo' i dseá' do la'uii~, ná'-gui e nijáiñ' 'nú' fí' jaguó' dseata~; dsucō' song ja' nijmee-na' lajō, jōba' i dseata~ do nijáiñ' 'nú' fí' quini' jaléng' í' quiá'r- jō 'nũí' nitáiñ' 'nú' jóng. 26 Jō jmitaa' óo'na' e ja' ni'uóong'na' e fí' dsí' 'nũí' do cartí' niquí'na' jalé' cuu- e nimí'- i dseata~ do 'nú'.

Mí~ ca'e' Jesús e ja' dseeng' e güiing' dseá' cóo' dseá' i o' quiá'r-

27 Jō mí~ cangí' jō, ca'e'gui Jesús e júu^ la jō cajíñ'-:

—Nicanáb- 'nú' e júu^ la malí'gui eáang': "Ja' lee' e nigüín' cóo' dseañ' osi dseamí' i o' qui'."

28 Dsü' jnea~ fí' i 'nú' e doñí' i i suung' jaang' dseamí' jō í' dsír' e iñ~ güíñ' cóoiñ' do, jōba' lí' lafa' nicajmée'bre e jō mí~ ca'í' dsír' lajō cóo' i dseamí' do, jō dseeb- nica'éer' fí' quini' Fidié' jóng.

29 J̄o lajob líí, song jminíˆna' dsée' jmóo` e niténgˆna' fí ni˜ dseeˉ, j̄oba' guiá-gui e guíˆba' j̄o nigüibíˆna' fí lí huíiˉ laco' seengˆna' yaangˆna'; dsuco' guiá-gui quíiˉna' e ni'íngˉ capíˆ ngúú táangˆna' e laco'gui e nibíngˆna' latøøngˉna' fí lí ˆlíˆ. 30 J̄ogui song guóoˆna' dsée' jmóo` e niténgˆna' fí ni˜ dseeˉ, j̄oba' guiá-gui quíiˉna' e quiuˆba' j̄o nigüibíˆna' huíibˉ laco' seengˆna' yaangˆna'; dsuco' guiá-gui e ni'íngˉ jíiˆ guóoˆna' e laco'gui e nibíngˆna' latøøngˉna' fí lí ˆlíˆ.

Mi˜ ca'e' Jesús quiáˆ mi˜ tiúungˆ dsea` rúíñˆ

(Mt. 19:9; Mr. 10:11-12; Lc. 16:18)

31 J̄o mi˜ calí j̄o, cajíngˆgui Jesús e júuˆ la:

—Lalab júuˆ sea` maliˆgui: “Doñí iˆ dseañuˆ iˆ tiúungˉ dseamˆ quiáˆ, j̄oba' 'néˉ cuøˆbre iˆ dseamˆ do coo` mají lí féˆ quiáˆ e nicatiúungˉ rúíñˆ.” 32 Dsuˆ jneaˆgui fíiˆi 'núˆ e song jaangˆ dseañuˆ tiúuiñˉ dseamˆ quiáˆr e ja` mí calíeˆ iˆ dseamˆ quiáˆr do e güiñˆ cóoˆ dseañuˆ jíéngˆ, j̄oba' iˆ dseañuˆ do jmóor` e dseáangˆ e ni'lebˉ iˆ dseamˆ do cóoˆ dseañuˆ jíéngˆ, j̄o laj̄oba' ni'eiñˆ do dseeˉ fí quiniˆ Fidiééˆ; j̄o iˆ dseañuˆ iˆ nicúngˆ guó` cóoˆ jaangˆ dseamˆ iˆ nicatiúungˉ rúngˆ, j̄oba' dseebˉ éer` cajo.

Mi˜ ca'e' Jesús quiáˆ mi˜ éengˆ dsea` fiiˆ

33 J̄o mi˜ cangˆ j̄o, cajíngˆgui Jesús e júuˆ la:

—'Núˆ nicanuuˆba' lajíiˆ júuˆ e féˆ dsea` áangˆ quiˆnaa', j̄o e lab e júuˆ j̄o: “Ja` se' jíiˆ coo` fa' e ja` nijméeˆ e nicafeeˆ e nica'eenˆ fiiˆ.” 34 Dsuˆ jneaˆ fíiˆi 'núˆ: Ja` éengˆna' fiiˆ quiáˆ líˆ doñí eeˆ: ja` éengˆna' ñífiˆ, dsuco' fí j̄ob lí líí éeˆ quiáˆ Fidiééˆ; 35 o'gui éengˆna' guóoˆ uøˆ, dsuco' j̄ob lí jmi'íngˆ

tiī Fidiéē; o'gui éeng'na' fī Jerusalén, dsuco' job lī lí' fī güeang' quiá' Fidiéē i quiu' tā fi' la'úng' fi' jmīgüī. ³⁶ Jogui ja' éeng' 'nú' moguí'na', dsuco' ja' lí'na' jmisíng'na' i' jiī camí' jñu' guí'na' e tee' osi e uí' é. ³⁷ Jo song fo'na' e nijmee'na', joba' jmee'na' jóng; jo song fo'na' e ja' jmee'na', joba' ja' jmoo'na' jóng; dsuco' song jmoo'na' e jie'gui, joba' nijmoo'na' nñu'na' júu' quiá' i' 'lim' jóng.

Mi' ca'e' Jesús quiá' e ja' 'né' cóo' dsea' quiá'r' (Lc. 6:29-30)

³⁸ Jo mī cangí jo, ca'e'gui Jesús e júu' la:

—Nicanáb' 'nú' e júu' la malī'gui eáang': “Song jaang' dsea' ca'iiñ' cóo' jminí', joba' lajob 'né' jme' cóo' i' dsea' í; osi jaang' dsea' cafiñ' camí' majá', joba' lajob 'né' jme' cóo' i' dsea' í cajo.” ³⁹ Dsu' jnea' fī-i 'nú': Ja' cóo'na' quí'na' mī ii' jmáng' 'nú' ga'; dsu' fíng song ii' caquiú' cataang' moní'na', joba' cuøø'na'r e cataang'gui do güiquiú' cajo. ⁴⁰ Jogui song ii' iing' ni'níng' 'nú' fi' quini' dseata', jogui iñ' niguír' 'mi'quí'na', joba' cuøø'na'r jóng la quie'gui 'mi'guié' quí'na' güiquié' cajo. ⁴¹ Jo song ii' quiu' 'nú' ta' e nigüicá'na' cóo' lee' e ngí'na' cóo' kilómetro, joba' güica'na' jóng tú' kilómetro. ⁴² Jo fíng mi' dsea' 'nú' lí' doñí' ee', joba' cuøø'na'r jóng; jogui song ii' mi' 'nú' e liing' ee' nijmi'øøng'na're cateá', joba' jmi'øøng'na'r jóng.

'Né' jmi'neáang'naa' jaléng' i' 'ní' níng' jneaa'aa' (Lc. 6:27-28, 32-36)

⁴³ Jo mī cangí jo, ca'e'gui Jesús e júu' la jo cajíñ':

—Nicanáb' 'nú' cajo e júu' la malī'gui eáang': “Jmi'neáang' jaléng' dsea' i seeng' røø' cóo' jo

jmee⁻ e 'ní' man' jaléng' i 'ní' níng⁻ 'nú'." ⁴⁴ Dsu' jnea[~]gui fíi' 'nú': Jmi'neáang[~]na' jaléng' i 'ní' níng⁻ 'nú' jogui féeng[~]na' Fidié[~] uii⁻ quiá⁻ jaléng' dsea⁻ i jmáng[~] 'nú' ga, ⁴⁵ jo lajoba' ni'uíng⁻na' jóo' Tiquí[^]na' Fidié[~] dsea⁻ guiing[~] ñiff⁻. Dsuo[~] dsea⁻ do jmóo[~]bre e guo[~] iee⁻ lí⁻ seeng⁻ jaléng' dsea⁻ i jmóo[~] jalé[~] e ga⁻ jogui lí⁻ seeng⁻ jaléng' dsea⁻ i jmóo[~] jalé[~] e guiá⁻ cajo; jogui sím[~]bre jmí[~] cajo lí⁻ seeng⁻ jaléng' dsea⁻ i ée⁻ e guiá⁻ cóo[~]gui fí⁻ lí⁻ seeng⁻ jaléng' dsea⁻ i ja⁻ ée⁻ e guiá⁻. ⁴⁶ Dsuo[~] song 'nú' jmi'neáang[~]na' lajii[~] dsea⁻ i jmi'neáang[~] 'nú', joba' ja⁻ ni'íng[~]na' jóng lajii[~] e si'íng[^]na' quiá⁻ Fidié[~]; co' lajob cajo jmóo[~] jaléng' nodsicuu⁻ quiá⁻ Roma. ⁴⁷ Jogui song fóng[~]na' lajii[~] dsea⁻ rúng[~]na', ¿e[~] e jié[~]gui jmoo[~]na' laco[~] doñí[~] i[~] dsea? Co' lajob jmóo[~] jaléng' dsea⁻ i ja⁻ cuíng[~] Fidié[~] cajo. ⁴⁸ Jo jmi'neáang[~]na' jaléng' dsea⁻ dseáng⁻ laco[~] si'í[^] lí[^] laco[~]gui la jmóo[~] Tiquí[^]na' dsea⁻ guiing[~] ñiff⁻.

6

Mi[~] ca'e' Jesús quiá⁻ mi[~] jaang[~] dsea⁻ jmicóo[~]r[~] jaang[~]gui i 'né⁻ quiá⁻ lajo

¹ Jo mi[~] cangí[~] jo, ca'e'gui Jesús e júu[^] la jo cajíñ⁻: —Ja⁻ jmoo[~]na' jalé[~] e guiá⁻ e quí⁻ tíng[~]na' jmoo[~]na' e lí[^] laco[~] nijóø⁻ jaléng' dsea⁻; co' song jmoo[~]na' lajo, joba' Tiquí[^]na' Fidié[~] dsea⁻ guiing[~] ñiff⁻ ja⁻ nicuó[~]r⁻ 'nú' jalé[~] e niguo[^] e sea⁻ quiá⁻r⁻ fí⁻ ñiff⁻ quiá⁻r⁻.

² Joba' mi[~] jmicóo[~]na' jaléng' dsea⁻ i 'né⁻ quiá⁻ lajo, ja⁻ jmoo[~]na' lí⁻ cuóøng[~] jóø⁻ dsea⁻ fíng[~] lí[^] laco[~]gui la líng[~] dsea⁻ i jmicaang[~] e jmóor[~] jalé[~] e

iing~ Fidiée˘, dsu' o' já' e jmoór` lajo. Co' jaléng' i dsea` î jmicaaĩ~ e jmicóo'r~ jaléng' dsea` i 'né- quíá'- lajo fí dsí' sinúu^ guá'- cóo'~ gui lacaang` jee~ 'núu' e lí^ laco' nifé' dsea` guíá- uii~ quíá'-bre. Jo dsu' jnea~ jmitaa^ óó'na' e cóo'~ jalé' e jmicang~ i dsea` do, nicalí'-bre lajii'~ e 'nó'r' do, co' jo` ee` ni'íng' guir jii'~ coo` quíá'- Fidiée˘. ³ Jo dsu' mi~ jmicóo'v 'nú' jaléng' dsea` i 'né- quíá'- lajo, ja` 'né- jmée'~na' dsea` júu^ quíá'- lajii'~ e nijmee~na' do, doñí' fa' jaang` dsea` i cúing`na' eáang'; ⁴ jo jmee~na' e jo e ja` ñí' dsea`. Jogui Tiquíi^na' dsea` guing~ ñiffi~ jøø~bre lajii'~ e jmoo`na' do, jo lajoba' nicuó'r- 'nú' lajii'~ e si'má'r^ quíi~na' fí ñiffi~ quíá'r-.

Mi~ ca'e' Jesús jial féeng'~naa' Fidiée˘
(Lc. 11:2-4)

⁵ Jo mi~ cangfi jo, ca'e'gui Jesús e júu^ la jo cajíiñ'-:

—Jo mi~ siing~ 'nú' cóo'~ Fidiée˘, ja` jmoo`na' laco'gui la jmoo` i dsea` i jmicang~. Co' i dsea` î tí dsí' síng' yaaiñ~ e síiñ` cóo'~ Fidiée˘ fí dsí' sinúu^ guá'- jogui lacaang` lí seáng' dsea` fíng' i jøøng` ír` cóo'~ jalé' e jmoór` do. Jo dsu' jnea~ jmitaa^ óó'na' e cóo'~ jalé' e jmicang~ i dsea` do nicalí'-bre lajii'~ e 'nó'r' do, joba' jo` ee` ni'íng' guir jii'~ coo` quíá'- Fidiée˘. ⁶ Dsu' 'nú'gui, mi~ siing~na' cóo'~ Fidiée˘, güitáng'~na' fí dsí' sinúu^ quíi~na' jo jniing~ yaang~na' 'núu' jo siing~na' cóo'~ Tiquíi^na' dsea` guing~ ñiffi~ i seeng` cóo'~ 'nú' fí jo. Jo co' Tiquíi^na' dsea` guing~ ñiffi~ jøø~bre jalé' e jmoo`na' do, joba' nicuó'r- bre 'nú' lajii'~ e si'má'r^ quíi~na' fí ñiffi~ quíá'r-.

7 J_og_ui mi~ s_ing~na' c_oo'~ Fidiée~, ja' fó'na' j_mig_uiá' ya' jalé' j_uú^ e ja' u_ing~ sea' lí^ laco'gui la j_moo' d_esea' i ja' cúing' Fidiée~; co' jaléng' i d_esea' í' í' dsíir' e song j_mig_uiá'gui nifé'r', j_oba' já'~gui ninú~ diée~ quiá'r~ jalé' j_uú^ quiá'r~. 8 J_o jie~ mí' j_meáang'~ yaang~ 'nú' laj_o lí^ laco'gui la j_moo' i d_esea' í', co' Tiquí'na' Fidiée~ jéem' níñir' jalé' e 'né~ quí'na' nú'~gui e nimí'~na're. 9 J_oba' lalab 'né~ s_ing~na' c_oo'~ Fidiée~:

Tiquí'íi', d_esea' guin'~ ñiff~,
güijmifém' jaléng' d_esea' j_migüi' 'nú',
co' 'nab' d_esea' fén' fí' la'úng~ fí' j_migüi'.

10 J_og_ui güijáng' yaang~ d_esea' fí' quini'~
e laco' nicá' nifí' quiá'r~ lajaang' lajaaiñ.
J_og_ui güijmitib~ jaléng' d_esea' j_migüi' jalé' e iing~
'nú' fí' j_migüi' la,
lí^ laco'gui líti' fí' ñiff~ quí'~.

11 J_og_ui cuøø'~ jnea'^ jalé' e 'né~ niquiee~naa' e
jmí'~ lana.

12 J_og_ui íng' d_esee~ uii~ quí'naa' quiá'~ jalé' e ja'
d_eseeng' e nicajmó^naa',
lí^ laco'gui jnea'^ íng'naa' d_esee~ quiá'~ jaléng'
d_esea' rú'naa' d_esea' j_migüi' mi~ ee'g_o
nica'léer' quí'naa'.

13 J_og_ui j_mee~ í^ jnea'^ lacaang' lí~ ngí'naa'
e laco' ja' nijiá'naa' fí' ní~ d_esee~,
j_og_ui j_mee~ í^ jnea'^ cajo
e laco' ja' nijmeáng' jaléng' i 'ling'^ jnea'^.
Co' 'nab' i quí' ta~ røø' fí' la'úng~ fí' j_migüi'
j_og_ui i 'gøng' j_og_ui i niing~ eáang' cajo car' ngongí'
jmí'~.
J_o laj_ob nilí'.

Jō lanab ca'e' Jesús ie~ jō jial féeng'~naa' Fidiéé'.

¹⁴ Jō mi~ calí~ jō, cajíng'~gui Jesús:

—Jō song 'nú' íng'na' dsee~ quiá'~ jaléng' dsea` rúng'na' mi~ ee'gō 'léer' quí'na', jōba' lajōb Tiquí'na' dsea` guíng~ ñiff~ cajo ni'ím~bre dsee~ quí'na'. ¹⁵ Dsü' song 'nú'gui ja` íng'na' dsee~ quiá'~ jaléng' dsea` rúng'na' mi~ ee'gō 'léer' quí'na', jōba' lajōb Tiquí'na' dsea` guíng~ ñiff~ cajo ja` ni'íñ~ dsee~ quí'na'.

Mi~ ca'e' Jesús quiá'~ mi~ jmóo` dsea` ayuno

¹⁶ Jō mi~ cangí'gui lajō, ca'e'gui Jesús e júu^ la jō cajíñ'~:

—Jō mi~ jmoo` 'nú' ayuno, ja` jmeáang'~ yaang'na' e l'íng'na' fí'í' l'í' laco'gui la jmóo` jaléng' dsea` i jmícaang~ e jmóor` jalé' e iing~ Fidiéé', dsü' o' já'~ e jmóor` lajō; cō' jmóo` jaléng' i dsea` í' lajō e l'í' laco' nijōø~ dsea` quiá'r~ e jmóor` ayuno. Jō dsü' jnea~ jmítaa^ óo'na' e cōo'~ jalé' e jmícaang~ i dsea` do, nicalí'~bre lajii'~ e 'nó'r' do, jō jō` ee` ní'íng'~guir jii'~ cōo` quiá'~ Fidiéé'. ¹⁷ Jō dsü' 'nú'gui, mi~ jmoo`na' ayuno, rúu'~na' ní'na' jogui jmeáang'~na' guiú~ yaang'na', ¹⁸ jō lajōba' ja` nilí'í' dsea` e jmoo`na' ayuno. Jō jii'~ Tiquí'na' Fidiéé' i seeng` cōo'~ 'nú', jii'~ í'bing' i nilí'í' e jō, jō dsea` íb` i nicuó'~ 'nú' lajii'~ e sí'má'r^ quí'na' fí' ñiff~ quiá'r~.

Jalé' e jlo' e sea` quiá'~ Fidiéé' fí' ñiff~

(Lc. 12:33-34)

¹⁹ Jō mi~ cangí' jō, ca'e'gui Jesús e júu^ la jō cajíñ'~:

—Ja` jmoo`na' e síl'í'na' eáang' cuu~ fí' jmígüí' la, dsüco' fí' jmígüí' la íim~ jalé' e óo` dsea` jogui seeng` cajo jaléng' guisí' i 'léé', jogui seem` ñi~ cajo

ḡ dsitáañ' i 'lée' fí' dsí' sinúú^ quiá'- dsea. 20 Jo guíá- guib e nijmee- na' e nilísea` quí- na' fí' ñífí- jalé' e jlo^, co' fí' job lí- ja` seeng' jaléng' guisí' i 'lée', o'gui dsitáang' jaléng' ḡ i 'lée' cajo. 21 Co' lí- sea` jalé' e lí' ó'na' do, e jobi eáang' guing~ ó'na' jóng.

*Mí- ca'e' Jesús quiá'- coo` jì' cóo` e cuø' e jné' dsea`
(Lc. 11:34-36)*

22 Jo mí- cangí' jo, ca'e'gui Jesús e júu^ la jo cajíñ'- :
—Jalé' jminí' dsea` lí' la lí' coo` jì' cóo` e cuø' e jné'r` lacaang' fí' lí' ngír'; joba' song jlo^ jminí' na', joba' guíá- jné' na' lacaang' fí' lí' ngí' na' jóng; 23 jo dsu' song ja` dseeng' jminí' na', joba' ja` jné' na' jóng lacaang' fí' lí' ngí' na'. Jo song lajee` e jneá' røø` jminí' na' ni'uíng- e ja` jné' na' jjí' capí', jo song lajob lí', joba' dseáng'- nuu` guib ni'uíng- jminí' na' jóng.

Ja` cuøøng' e guing~ dsí' dsea` Fidié` mí- eáang' gui guing~ dsír' cuu-

(Lc. 16:13)

24 Jo mí- cangí' jo, ca'e'gui Jesús e júu^ la jo cajíñ'- :
—Jjí' jaang' dsea` quí' r~ jmí' fa' e nijmér- ta` fí' quini' gáng- fíir- colíng~, dsuco' song cajméer` lajo, joba' nilí' 'ní' níim- bre jaang' jogui nijmití- bre ta` e níquiá'- i jaang' gui do. Jo co' lajob lí', joba' ja` quí' jmí' fa' e 'nú' nijmití' na' colíng~ jalé' ta` quiu' Fidié` jogui nijmití' na' cajo jalé' ta` seáng' jmigui' cuu-.

To' fím` Fidié` jaléng' dsea` quiá' r-

(Lc. 12:22-31)

25 'Jo uí' joba' fí- i 'nú' e ja` jmee- na' fí' í^ uii~ quiá'- jalé' e u'^ cø'^ na' e laco' cuø' e seeng' na',

o'gui quiá'- jalé' sí'na' cajo. Co' eáang'gui lani-
ing- e seeng' dsea' laco'gui jalé' e gø'r do, jogui
eáang'gui laniing- ngúu' táaiñ` cajo laco'gui jalé'
sí'r^ e qui'r'. ²⁶ Quié'na' cuente quiá'- fíing' ta' i
ngí' fí' guiá'^ güû; ja' e jní're' o'gui e sitíng'ne' o'gui
'mea're' jalé' e nidó'-re' fí' dsí' sinúu^ quiáa-re'.
Dsú' Tiquíí' 'nú' dsea' guing~ ñiff- hém'breiñ' do.
Jogui 'nú', jeáang'gui quíing'na' laco'gui e fíing' ta'!
²⁷ Jo lajòb lí' cajo, doñí' ii' i jmóo' fí'í^ quiá'- jalé'
e jo, ja' quí'r~ jmí~ cajo fa' e nijmér- e seeiñ`
huøø-gui laco'gui jí'~ e sí'í^ quiá'r- fa' jialgui la lí'
dsíir'.

²⁸ 'Joba' ja' 'né- jmee-na' fí'í^ quiá'- jalé' sí'na'.
Co' quié'na' cuente jial cuaang` jalé' lí' e sea' fí'
jee~ mó'; ja' jmóo' ta~ o'gui jmíing~ sí'^ yaang~.
²⁹ Jo dsú' jnea~gui fíi-i 'nú' e jí'gui i dseata~ dsea'
féng' Salomón do, dsea' i eáang' sea' cuu-, dseáng'-
ja' caquím' 'ñia'r' 'mí' e niguó'^ lí'^ laco'gui la
niguó'^ coo' lí'. ³⁰ Jo song Fidiéé~ jmóor` e eáang'
niguó'^ sí'^ jalé' lí' e sea' lacaang` fí' jee~ mó',
jo dsú' lajee~ cateá'ba' e ee~ e jlo'^ do, co' dsa'ó'
iée' fí' ní' jib` nidsitoo'~, jo dsú' jeáang'guib` nijmé-
Fidiéé~ í' 'nú' laco'gui e lí' do, 'nú' dsea' i ja'
'ga' lí' já'- líng` e tíng` Fidiéé~ jmér- lí' doñí'
ee! ³¹ Joba' 'nú' ja' 'né- jmee-na' fí'í^ e fo'^na':
“¿E~ niquiee~naa'? osi ¿E~ ní'né'^naa'? osi fo'^b#'
é ¿E~ 'mí' niquí'^naa'?” ³² Co' jaléng' dsea' i
ja' cúing` Fidiéé~bing' i jmóo' fí'í^ quiá'- jalé' e
lajo. Jo dsú' 'nú', seem` jaang` Tiquíí'na' i guing~
ñiff-, jo í'bing' i ní'í' e 'né-na' jalé' e jo. ³³ Co'
e laba' 'né- e jmee-na'; la'uii~ e nijmí'úung'na'
e seeng'na' e Fidiéé~ quier' ní'í' quí'-na', jogui

e jmoo`na' dseáng'~ lajii~ ta~ quiu`bre cajo, co' lajoba' e nicuø'r~ 'nú' jalé' e 'né~na'. ³⁴ Joba' ja` 'né~ jmee~na' fi'í^ quiá'~ jalé' e nidsijée' quí~na' e jmii~ dsa'ó', co' dsa'ó' jie`gui e líí' quí~na'. Dsaco' nitéb' jii~ fi'í^ dsíí' e sea` lacoo` jmi~.

7

Ja` cuø'na' dsee~ dsea` rúng'na'

(Lc. 6:37-38, 41-42)

¹ Jo lalab cajíng'~ gui Jesús:

—Ja` cuø'na' dsee~ jaléng' dsea` rúng'na', jo lajoba' ja` nicuø'~ Fidiée' 'nú' dsee~ cajo. ² Dsaco' Fidiée' nicuø'r~ 'nú' dsee~ lí^ laco'gui la cuø' 'nú' dsee~ jaléng' dsea` rúng'na'; jogui jial tíí dsee~ e cuø' 'nú' dsea` rúng'na', joba' lajob nicuø'~ Fidiée' 'nú' dsee~ cajo. ³ Joba' çjialí' ca'` cuente lajii~ quí` iu~ jmini' jaang` dsea` rún', jogui ja` ca'` cuente uø' e jie' ja` latøng~ coo` 'mab` iu~ jminí'^? ⁴ Jo song latøng~ coo` 'mab` iu~ jminí'^ uø', joba' çjial niteá` o' e nifí'^ jaang` dsea` rún': "Rú`uu', nea`du ne`ee', jo nigui`duu e quí` iu~ jminí'^"? ⁵ j` jmicaang~ 'nú'! Jang'~ gui`du e 'ma` e iu~ jminí'^ uø', jo lajoguiba' nicuøng` e jóø'^ guiá~ e niguí^ e quí` e iu~ jminí` j` dsea` rún' do.

⁶ Ja` cuø'na' jalé' e güeang'^ quiá'~ Fidiée' jaléng' dsea` líng'^ j` soo` dsíí, dsaco' j` dsea` la'í líiñ' la líng' dsii` osi la líng' cú^ é, e niso'ø'bre' jalé' e güeang'^ quiá'~ Fidiée' do, jogui dseám'~ e nilí` 'ní' níñ~ 'nú' jogui e nijmeáñ' 'nú' ga` cajo.

Mí~na' Fidiée' jalé' e 'né~na' jo nicuø'bre

(Lc. 11:9-13; 6:31)

⁷ Jo mi~ cangí jo, lalab cajíng'~ gui Jesús:

—Míi~na' Fidiée~ jalé" e 'né~na', jo nicuó~bre; jogui mi~ 'nó~na', niguié~ba' jalé" e 'nó~na' do; jogui mi~ tø~na' fí' o'nú^, joba' nineab' e 'núú' do. ⁸ Dsuo' i~ dsea` i mi' Fidiée~ jalé" e 'né~r, ngúim~bre; jogui i~ dsea` i 'nó', dsé~bre e 'nó~r' do; jogui i~ dsea` i tø' fí' coo` o'nú^, nineab' e 'núú' do.

⁹ Jo jnea~ lí^ dsii~ e jii~ jaang` 'nú', dsea` seeng` jaléng` joo~na', e mi~ nimí~r~ 'nú' ir~, nicuó~na'r cuu~; ¹⁰ osi mi~ nimí~r~ 'nú' capí^ ngúu' 'ñu, jo nicuó~na'r ngúu' mi'. ¹¹ Jo 'nú', dsea` jmoo~na' jalé" e 'lí^, tii~ba' cuó~na' jaléng` joo~na' jalé" e guiá~, jo dsu' eáang`gui b jlo^ jalé" e nicuó~ Tiquí~na' Fidiée~ dsea` guing~ ñifi~ mi~ nimí~naa'r.

¹² Jo lajob lí', joba' jmee~na' jmang~ e guiá~ cóo~ jaléng` dsea` rúng`na' lí^ laco~gui iing`na' e nijmé~ dsea` cóo~ 'nú'; co' lajob ta~ quíu' júu^ quíu' ta~ quíá~ Fidiée~, jogui lajobi fé^ fí' ní' jì quíá~ jaléng` dsea` i café^ cuaiñ~ quíá~ Fidiée~ malii~gui eáang'.

Mi~ ca'e' Jesús quíá~ e o'nú^ e dsuu`

(Lc. 13:24)

¹³ Jo mi~ cang^ jo, ca'e'gui Jesús e júu^ la jo cajíñ~: —Güitáang~na' fí' o'nú^ e dsuu`. Dsuo' e fí' o'nú^ e ú` cóo~gui fí' guiá^ fí' e ú', fí' job lí~ dsitáang~ fíng`gui dsea` i niteáang~ fí' e ngolíng` fí' lí~ 'lí^; ¹⁴ dsu' e o'nú^ jogui e fí' e ngo' fí' lí~ guiá^, dsuab` jogui huím' eáang' cajo, joba' ja` leáang~ dsea` i dsilíng` fí' jo.

Jalé" 'ma` ofi~ cuí~ dsea` la'eáang' cóo~ ofi~ e #b`

(Lc. 6:43-44)

15 J̄o f̄h̄-gūh̄ 'nú' e júu^ la: Ñiing̃ óo'na' cóo'~ jaléng' dsea` i jmicang~ e er' júu^ quíá'- Fidiéé~, dsu' o' já'- jalé' e júu^ e fé'r' do. J̄o mi~ ngir' fí jee' 'nú', jnéeiñ- lí'- caluu' la jnéeng- dsea` guiúng- i cuiing' Fidiéé~, j̄o dsu' caniing- j̄i' e 'lé-bre í dsíir' fí dsíí'. 16 J̄o cóo'~ jalé' e jmóob' i dsea` la'í cuøng' jmicuíng'na'r. J̄o lajob lí' cajo, 'nú' lí'na' jmicuí'na' cóo' 'ma` ofi' la'eáang' cóo'~ ofi' e íb'; dsuco' cóo' 'matóo' ja` cuøng' fa' e ni'í- mi'^ huíng' j̄o' yá', o'gui cóo' 'matóo' fí' ja` cuøng' fa' e ni'í- güñí' yá'. 17 J̄o lajob jalé' 'ma` ofi' e guiá-, jmang' ofi' e guiáb- cuø; j̄o dsu' e 'ma` ofi' e ja` dseeng', ja` dseeng' jalé' ofi' e cuø. 18 J̄o lajob jalé' 'ma` ofi' e guiá-, ja` cuøng' fa' e nicuø- ofi' e ja` dseeng'; jogui jalé' 'ma` ofi' e ja` dseeng', ja` cuøng' fa' e nicuø- ofi' e guiá-. 19 J̄o nihuib' jalé' 'ma` ofi' e ja` cuø ofi' e guiá- j̄o fí ni' jib' nidsitoo'~. 20 J̄o co' lajob lí', joba' cóo'~ jalé' e jmóob' i dsea` i jmicang~ e er' júu^ quíá'- Fidiéé~ do lí'na' jmicuíng'na'r.

Ja` laj̄ng' dsea` lí'r' e Fidiéé~ nicá' nifí' quíá'r- lata` (Lc. 13:25-27)

21 J̄o mi~ cang' j̄o, cajíng'-gui Jesús e júu^ la:

—Ja` laj̄ng' dsea` i sí' jnea~: “Fí'í, Fí'í”, nilí'r' e Fidiéé~ nicá' nifí' quíá'r- lata~, dsu' i dsea` i nijmé- jalé' e iing~ Tiquié'e dsea` guíng~ ñifí-, j̄i' í'bing' i nilí' e j̄o. 22 J̄o mi~ nití- e í' j̄o mi~ niquidsí' Fidiéé~ í' quíá'- lajaléng' dsea` jmigüi, f̄im' dsea` nisí'r' jnea~ ie~ j̄o: “Fí'í, Fí'í, jnea' café'naa' júu^ quíá'- la'eáang' 'nu, jogui la'eáang' 'nu ca'uøng- naa' jaléng' i 'líng' i jée' quíá'- dsea~, j̄o jmiguiab' jalé' e quí'~ jm̄ e dsigá' dsíí' dsea` cajmó'naa' la'eáang' 'nu cajo.” 23 Dsu' jnea~ ninḡh̄-

quiá'- i dsea` î ie~ jo: "Jéeng'-na' fí lí~ sín'n la; jdo güilíng-na' lí^ do, co' dseáng'- ja` calicuím`baa 'nú', dsea` i sitíng` 'lée'!"

*Mi~ ca'e' Jesús quiá'- laji` tú- tñ- fh`
(Mr. 1:22; Lc. 6:47-49)*

²⁴ Jõba' fh`-guíi` 'nú' e jaléng' dsea` i núu` jogui jmóor` lajii` ta~ quiá`u` líiñ' laco' jaang` dsea` i í dsíi` guiá- jalé' e nijmér-. Jõ i dsea` î cajme'r` 'nar~, jõ ab' tñ- fh` catá'r- quiá'- e 'núu' do. ²⁵ Jõ mi~ cajá- jmí` dsiing~ jõ cacuáng- jalé' gua` jõ dsíng'- caqui`u` guí` fí lí~ sí' e 'núu' do, dsu' e 'núu' do ja` caquí'-, co' ab' iu~ tñ- fh` quiá'- . ²⁶ Jõ dsu' i dsea` i lico' núu` júu^ quié- e jõ ja` jmóor` lajii` ta~ quiá`u`, jõba' i dsea` î líiñ' laco' jaang` dsea` i ja` í dsíi` guiá- e nijmér-. Jõ cajme'r` 'nar~, dsu' ja` catá'r- tñ- fh` quiá'- e 'núu' do. ²⁷ Jõba' mi~ cajá- jmí` dsiing~ jõ cacuáng- jalé' gua` jogui dsíng'- ca'íi- guí, jõba' caquíb'- e 'núu' do, jõ dseáng'- conguiab' ca'íng- quiá'- i dsea` î.

²⁸ Jõ mi~ calí- fé' Jesús jalé' e júu^ na, lajim` dsea` i siseáng' do dsíng'- cangogá` dsíir' laco' e' dsea` do, ²⁹ dsuco' dsíng'- 'gøng' jalé' júu^ quiá'r- jogui dsíng'- tñiñ` er` cajo, co' ja` er' laco' e' i tifa' quiá'- júu^ quiu' ta~ quiá'- dsea` Israel.

8

*Mi~ cajmi'leáng- Jesús jaang` dsea` i líng`
jmohuí` 'lí^ fh` ngúu` táang`
(Mr. 1:40-45; Lc. 5:12-16)*

¹ Jõ mi~ cangí jõ, cajgám- Jesús e fí yá^ mó' do, jõ fhím` dsea` ngolíng- caluur` laco' ngóor'. ² Jõ lajee` jõba' cangoquiéeng` jaang` dseañu` i nilíng` jmohuí`

li' fí ngúu' táang' fí quini' Jesús, jò casí'r' uó' jnir' fí quini' dsea` do jò cajíñ' casí'-reíñ':

—Fí'i, cuøm` lí jmi'leáan'^ jnea` lajii'~ jmohuí' e lán'n song iin'~ lajò.

³ Joba' Jesús cagüiñ' capí'^ dsea` do jò cajíñ' casí'-reíñ':

—Iim'baa jmi'leáan^n 'nå, jò lana ca'láam`ba' lajii'~ jmohuí' e lin'.

Jò dsifí lajòb ca'láang` i dsea` dsée'~ do lajii'~ jmohuí' líiñ'.

⁴ Joba' Jesús casí'-guir dsea` do jò cajíñ'-:

—Ja` fí'^ jii'~ jaang` lajii'~ e cajmé` e cóo'~ 'nå, lico' gua` güijéeng` uø' fí quini' jmidsea` e laco' niliñ' i jmidsea` do e nica'láam`ba' lajii'~ jmohuí' e lamí~ lin'. Jò mi~ nilí jò, joba' güica` lajii'~ e feá' e 'né` cuó'^ Fidiée` lí'^ laco'gui e ta` e caquiá' Moi~ ie~ malí~ gui do. Jò e job cuø' lí' fí quini' jaléng' dsea` e nica'láam`ba' lajii'~ jmohuí' e lamí~ lin'.

Mi~ cajmi'leáng` Jesús jaang` dsea` 'léeng'` quiá'- jaang` fi' 'léé` romano (Lc. 7:1-10)

⁵ Jò mi~ cangí jò, cagüéng'- Jesús fí Capernaum, jò fí jò jaang` fi'~ 'léé` romano cangoquiéiñ' fí lí ngang' dsea` do jò camí'r' dsea` do jmi'ee' ⁶ jò casí'-reíñ':

—Fí'i, dob ráang` dsea` 'léeng'~ quié` e dsée'r' fí quié` e, jò jii'~ ja` lí jí'~ jóiñ' joguí dsím'- cu' líiñ' cajo.

⁷ Joba' cañí' Jesús jò casí'-reíñ':

—Nii'baa nijmi'leáan^nre.

⁸ Joba' cañí' i fi'~ 'léé` do quiá'- Jesús jò casí'-reíñ':

—Fíi'i, ja` catáing- jnea~ e 'nu` ni'ú'^ fí' dsíí' sinúú^ quié-e; lico' féel' e ni'leáang- i dsea` 'léeng'~ quié-e do, joba' lajob nilí jóng. ⁹ Dsuo' seem` dsea` i teáang- nifi'gui i quiu' ta~ quié-e, jogui seem` 'lée- i quiú'u ta~ cajo. Jo mi~ fíi-i jaang` 'lée- quié-e e dsér-, joba' dsé-bre jóng; jogui mi~ fíi-i jaang'gui e jáar', joba' jáa-bre jóng; jogui mi~ fíi-i dsea` 'léeng'~ quié-e e líng~ e jmér-, joba' jmóo-bre cajo.

¹⁰ Jo mi~ canúu- Jesús e júu^ na, eáam' cangogá dsíir' jo cajíñ'- casí'r- jaléng' i dsea` i ngolíng- cóo'r~ do:

—E já'- e fíi-i 'ná' e jíi'~ coo` ya' ja` mí cajín'n jaang` dsea` góo`o dsea` Israel i dseáng'- já'- líng' júu^ quié-e lí'^ laco'gui la líng' i fii~ 'lée- romano na. ¹¹ Jo fíi-i 'ná' e jmiguiab' íng'~ lí~ nijalíng- fíng' dsea` i ja` líng' dsea` Israel jo nigüear` e nidó'r- cóo'~ jaléng' 'líi~ dsea` cóong'~ qui-i' i sii` Abraham jogui Isáa' cóo'~gui Jacóo^ mi~ tí' lí~ nití- í' e nicá Fidiée' nifi' quiá'- lajaléng' dsea` jmigüí. ¹² Jo dsu' Fidiée' nibíim-bre fí' caluu' fí' lí~ nuu' só' fíng' dsea` Israel i lamí~ si'í^ catáing- seeng` cóo'r~ fí' lí~ guiá- fí' lí~ quiu'r ta~, jo i dsea` í' dob nijeár- qui'r jogui tur' majar~ uíi'~ jalé' iihuí' e ni'íñ' do.

¹³ Jo lí- jo, Jesús casí'-guir i fii~ 'lée- romano do jo cajíñ'-:

—Guóng' fí' quií'- jo güilitib~ lajíi'~ ta~ cañí'^, co' jáb'- nicalín'- júu^ quié-e.

Jo dsifí' lajob ca'láang- i dsea` 'léeng'~ quiá'- i fii~ 'lée- romano do.

*Mi~ cajmi'leáang- Jesús iemisé' Tú' Simón
(Mr. 1:29-31; Lc. 4:38-39)*

14 Jō mi~ cangî jō, Jesús cangór- fí quíá- Tú[^] Simón. Jō mi~ caguiér- fí jō, dob ráang` iemisé[^] Tú[^] Simón e dsíng!- iu~ guíiñ[^]. 15 Jō Jesús cagüi'r' guoo` i dseamî do, jō dsifí lajōb caguá- e iu~ guíiñ[^] do. Jō mi~ cangî jō, i dseamî do caróor- jō cajméer` e cagób' jaléng' i dsea` do.

Mi~ cajmi'leáang- Jesús fñing' dsea` dsée~

(Mr. 1:32-34; Lc. 4:40-41)

16 Jō mi~ canuu` lajō, fñim' dsea` caguiliñ- fí li~ guing~ Jesús e jéeiñ` jaléng' dsea` i teáang[^] i 'ling[^] dsí'; jō cóo~ 'ñia' camí[^] júu[^] e fé' Jesús, uøøm` jaléng' i 'ling[^] i teáang[^] dsí' dsea`, jōgui 'láam` bi lajaléng' dsea` dsée~ la'eáang' cóo~ e júu[^] jō cajo. 17 Jō cangojée' e la e laco' caliti` jalé[^] júu[^] e cajíng'- jaang` dsea` i café` cuaiñ~ quíá- Fidiée~ malii~ gui eáang' i calisî Saií[^] mi~ cajíñ'- lala: "Íbre ca'íñ[^] jalé[^] iihuá' quí-naa' jōgui cacór- jalé[^] jmohuí' e lí-naa' cajo."

Jaléng' dsea` i iing~ dsilíng- cóo~ Jesús

(Lc. 9:57-62)

18 Jō mi~ cangî jō, cangá- Jesús e dsíng!- fñing' dsea` caseáng' fí lacúng' lajíng` li~ siñ', jōba' caquiur' ta~ dsea` quíá'r- e ningíiñ- fí li~ 'ngóo~ cataang` e guiée' do. 19 Jō lajee` jōb, cangoquiéng' fí li~ siñ' jaang` tifa' quíá- júu[^] quiu' ta~ quíá- dsea` Israel jō cajíñ'- casí'r- dsea` do lala:

—Tifa', iim~baa nii~i cóo~ 'nu` lí[^] doñí' jíé' fí guó[^].

20 Jōba' cañíi` Jesús quíá- i dseañu' do jō casí'-reiñ':

—Jaléng' güí' seab` too` li~ güing`ne', jō lajōbi jaléng' tá' seab` sñ-re' cajo; dsu' jnea~, dsea` gáa'a

fi' ñiff- e lín'n jaang` dsea` jmigüí, jíi~ lí~ quiee~ e moguii~ ja` sea`.

²¹ Jo mi~ cangí jo, jaang` lajee` i dsea` quiá'- Jesús do casí'- ír` lala jo cajíñ'-:

—Fíi, cuø~ jnea~ fi' jang'- ni'áan`n tiquié`e, jo mi~ ningí jo, joguiba' ninii~i cóo~ 'na`.

²² Joba' lalab cañí` Jesús quiá'- i dsea` do jo casí'-reiñ':

—Nea~ cóo~ jnea~ lana jo cuø' fi' e jaléng` i dsea` i líng` lafa' 'líng~ ni'áaiñ` tiquíi` mi~ nití oor~ quiá'r`.

Mi~ cajmé` Jesús e ca'uáang- e róo- jmí` jogui ca'uáang- e í' guí`

(Mr. 4:35-41; Lc. 8:22-25)

²³ Jo mi~ cangí jo, ca'íb- Jesús fi' cóo` dsíi' móo' colíng` cóo~ jaléng` dsea` guitúung` quiá'r`. ²⁴ Jo lajee` guiáang` e ningoliñ` ni~ jmíb` mi~ canaang` íi' guí la huíng` jogui canaang` e róo- jmí` cajo, jo mifíng` ninaang` dsi'ab~ jmí` fi' dsíi' e móo' do. Jo lajee` jo, güím` Jesús ngóor'. ²⁵ Joba' i dsea` quiá'r` do cañím`bre dsea` do jo cajíñ'- casí'-reiñ':

—Fíi'ii', leaang- jneaa`aa', có' ningóo' dsi'am`baa'.

²⁶ Joba' cañíi' Jesús quiá'- i dsea` do jo casí'-reiñ':

—¿Jialí' dsíng'- 'gó'na'? Jo ¿jialí' ja' 'ga' lí já- líng`na' e jnea~ quíi~i jmí` e nijmee~ e lí^ doñí ee'?

Jo mi~ calí- fé'r` lana, jo caráaiñ` jo caquiur` ta` e guí do cóo~ guí e jmí do, jo dsifí lajob caquiung` e íi' guí jogui caquium`bi e róo- jmí` cajo, jo tiib` caí. ²⁷ Jo dsíng'- cangogá` dsíi' i dsea` quiá'r` do mi~ cangár- lado, jo canaaiñ` jmíngí'- rúñ' lajee` la'ó` yaaiñ`:

—¿I~ guí i dseañu' na e quiu'r' ta~ jo núu'~ jalé' guí cóo'~ jalé'~ jmi~ júu^ quiá'r'~?

*Dsea` i seeng` fi` Gadara i niteáang` i `ling`^ dsí`
(Mr. 5:1-20; Lc. 8:26-39)*

²⁸ Jo mi~ tí li~ caguié~ Jesús fi' lí^ lí' 'ngóo'~ cataang` e guiéé' do e fi' guóo'~ uó~ li~ se' Gadara, jo fi' codsi~ ca'uøøng` gáng~ dsea` i niteáang` i `ling`^ dsí' jo cangoquíeíñ' fi' li~ sing' Jesús. Jo eám' soo` dsíñ' do e jíi~ jaang` dsea` cuøøng` lí` ngíñ~ e fi' jo.

²⁹ Jo lalab canaiñ` do áíñ' Jesús:

—Ja` jmiguín^ jnea'^, Jesús, có' ne~baa' guiá~ e 'nub` dseáng'~ lin' Jóo' Fidiéé~. Jo ¿su cañí' e ñicuøø'~ jnea'^ iihuú' e jíi~ ja` mí catí í' lajo?

³⁰ Jo e quiá'~ job nitaang~ i fíing` cú^ i taang~ ta` gø'. ³¹ Jo i `ling`^ do camí'r' jmi'ee~ Jesús jo casí'r' dsea` do lala:

—Song ni'uøøñ'~ jnea'^ li~ tée'~naa' la, cuøø'~ jnea'^ fi' e nidsitoo'~naa' fi' dsí' i cú^ i taang~ do.

³² Joba' lalab cañí' Jesús jo casí'~reíñ' do:

—Güiling~ na' güitáang~ na' fi' jo.

Jo ladsifí lajob ca'uøøm` i `ling`^ do fi' dsí' i dsea` do jo cangotáaiñ'~ fi' dsí' i cú^ i nitaang~ do. Jo dsifí lajob canaang` i cú^ do cuíi're' cartí cajiúng` yaang~ne' fi' dse'~ jíáá, jo casojiúng`ne' fi' dsí' jmi' jo fi' job cajgó're' jmi~.

³³ Jo i dsea` i nijmóo` í^ i cú^ do cacuíi`bre cangolíñ^ fi' jee` fi~. Jo mi~ caguilíñ' fi' jo, canaiñ` guiar' júu^ quiá'~ lajíi'~ e calí~ do cóo'~ i dsea` i teáang'~ i `ling`^ dsí' do. ³⁴ Joba' lajím` i dsea` i seeng` e fi~ do cangolíñ~ fi' li~ táang` Jesús. Jo mi~ cangáiñ~ dsea` do, jo camí'~reíñ' jmi'ee~ fa' e nigüi'hib` dsea` do e fi' guóo'~ uó~ li~ táaiñ` do.

9

Mi~ cajmi'leáng- Jesús jaang` dsea` i caang~ tñ-
(Mr. 2:1-12; Lc. 5:17-26)

¹ Jo mi~ cangf jo, cajgóob-tu Jesús fi' dsí' coo` móo' jo canghiñ' fi' lí' 'ngóo' cataang` e guiée' do jo caguiém'-tur fi' fi' lí' guiiñ'. ² Jo mi~ caguiéñ'- fi' jo, jo caguiling- dsea` i jéeng` jaang` dsea` i caang~ tñ- i dsíng- ni~ coo` 'ma' e silíng'. Jo mi~ cangá- Jesús e jo, jo co' niñi'bre e jáb'- líng` jaléng' i dsea` do júu^ quiá'r-, joba' lalab casí'r- i dsea` dsée'~ do:

—Joo`o, cuø bî uø', co' lana nica'ím- dsee- quií'-.

³ Jo ie~ jo dob niteáang- tú- 'ni' máng'~ tifa' quiá'- júu^ quiu' ta~ quiá'- dsea` Israel. Jo mi~ canúur- e cajíng'- Jesús lajo, joba' ca'f dsír' lala: “Lajíi~ e nicajíng'- i dseañu' na, gab` fé'r' uii~ quiá'- Fidiée'.”

⁴ Jo co' ñib' Jesús lajii'~ e í dsí' i dsea` do, joba' cajmíngi'reiñ' do lala:

—¿Jialí' jmang' e ga'ba' í óo' 'nú'? ⁵ ¿E~ e líng-na' e ja'gui huíng' e nife'ee', su e “Ni'ím~baa dsee- quií'-”, o'si e nifé'^naa' é: “Ráan'- jo ngí'”? ⁶ Jo dsu' lana jnea~ ni'ée^e 'nú' e jneab~ dsea` cagáa'a fi' ñiff- e lín'n jaang` dsea` jmigüi jo oo~baa ta~ fi' jmigüi la e ni'ín~n dsee- quiá'- dsea`.

Joba' casí'- Jesús i dsea` caang~ tñ- do jo cajíñ'-:

—Ráan'- jo sée'~ lí' ráan' jo guóng' fi' quií'-.

⁷ Jo dsifí' lajob caráang- i dseañu' do jo cangám'-bre fi' quiá'r-. ⁸ Jo mi~ cangá- i dsea` i teáang- do e ca'láam- i dsea` dsée'~ do, dsíng'- cangogá` dsír'. Jo lajim'bre canaaiñ` jmiféiñ'

Fidiéẽ dsuço' dsea` do cacuø'r' dsea` jmiḡüü` jalé' e quíiñ'~ jmiñ' do.

*Mi~ cató'~ Jesús jaang` dseañu` i sii` Mateo
(Mr. 2:13-17; Lc. 5:27-32)*

⁹ Jo mi~ cangî jo, cagüi'í' Jesús e fí fíi` li~ guiiñ'~ do. Jo lajee` ngóor' guiá'^ fib' cangáiñ` jaang` dseañu` i sii` Mateo i niguiing~ mí cuu~ e catíng~ dseata~ i guuing~ fí Roma. Jøba' lalab casí'~ Jesús i dseañu` i` jo cajíñ'~:

—Mateo, nea` cóo'~ jnea~.

Jøba' caróob~ Mateo e li~ niguiiñ'~ do jo cangó~bre cóo'~ Jesús.

¹⁰ Jo mi~ cangî jo, e jmiñ' job cagó' Jesús fí quiá'~ Mateo. Jo lajee` guiiñ' gø'r' colíng~ cóo'~ jaléng' dsea` quiá'r~, caguilíng~ i fíng' nodsicuu~ i jmóo` ta~ cóo'~ i Mateo do cóo'~ gui jaléng' dsea` i sea` júu^ e dsíng'~ røøiñ` dsee~, jo caguár` colíng~ cóo'~ Jesús e cagó'r' ni~ mes~ li~ guiiing~ dsea` do. ¹¹ Jo mi~ cangá tú~ 'ní míng'~ dsea` Israel i líng' dsea` fariseo e guiiing~ Jesús gø'r' cóo'~ i dsea` do, jøba' i dsea` fariseo do cajmingí'r~ dsea` quiá'~ Jesús jo cajíñ'~:

—¿Jialí' gø'r' tifa' quií~na' cóo'~ jaléng' nodsicuu~ jogui cóo'~ dsea` i sea` júu^ e dsíng'~ røøiñ` dsee~?

¹² Jo nicanúub~ Jesús lajíi'~ e cajíng'~ i dsea` do, jøba' lalab cañiir' quiáiñ'~ do jo casí'~ reiñ':

—Jaléng' dsea` i guíung~ ja` 'neáiñ` tímí', dsu' 'neám~ jaléng' dsea` dsée'~. ¹³ Güilíng'na' jo güijmitíng'na' e júu^ la e fé' Fidiéẽ fí ni` jì quiá'r~: “Jnea~ Fidiéẽ iin~n e 'nú' nifíi~ líng'na' jaléng' dsea` rúng'na', jo o' lico' cuø'na' feá'~ fí quinií~.” Jo jnea~ fíi~ i 'nú' e ja` cagá~a fí jmiḡüü` la fa' e

caga'nén'n jaléng' dsea` i ée` guiá-, dsuco' jnea~
caga'nén'n jaléng' dsea` dsee- dsea` quib'.

*Mi~ cajmingi'- dsea` Jesús cuaiñ` quiá'- ayuno
(Mr. 2:18-22; Lc. 5:33-39)*

¹⁴ Jo coo` jmii~ cangoquiéeng' jaléng' dsea` quiá'-
i Juan i seáng` dsea` jmii` do fí' lí~ sing' Jesús jo
cajmingi'r' dsea` do lala:

—Jnea'^ colíing~ cóo'~ jaléng' dsea` góo`naa' dsea`
Israel i líng' dsea` fariseo contøøm- jmoo`naa'
ayuno, jo ¿jialí' jaléng' dsea` quií' 'na` ja` jmóor`
lajo?

¹⁵ Joba' cañí' Jesús quiá'- i dsea` do jo casí'- reiñ':

—Ja` cuøøng` nijmé- ayuno jaléng' dsea` i
simíng` quiá'- coo` lí~ cung' guoo` dsea` lajee~
seeng` i siming' i cung' guó` do cóo'r~. Jo dsu'
niguiéeb' jmii~ mi~ nisáng' dsea` i siming' do,
joguiba' nijmé- ayuno jaléng' i dsea` do.

¹⁶ Jo jíi~ jaang` dsea` to'r' coo` 'mi' e yúu~ cóo'~
ca'ná'^ 'mi' e 'mii~, dsuco' song cajméer` lajo, joba'
nijøm' e 'mi' 'mii- do jogui ni'gui'bi e 'mi' yúu~ do
cajo, joba' lí'^ lí' jmigui'gui ni'gui'b` jóng. ¹⁷ Jo lajjobi
cajo ja` guié' dsea` méé' e laco' gui'ná'^ có' fí' coo`
dsíí' loo~ jó' e yúu~, dsuco' song cajméer` lajo, joba'
ni'gui'ba' do jo nidsi'íib' e méé' do jogui ni'íim- e
loo~ jó' do cajo. Jo co' lajjob líí', joba' guiá-gui e
niguié' dsea` e méé' laco' gui'ná'^ có' do fí' coo` dsíí'
loo~ jó' e 'miiib-, jo lajjoba' ja` dseáng'~ fa' e ni'gui'
e loo~ jó' do o'gui fa' e nidsi'íí' e méé' do cajo.

*Mi~ cajmi'leáng- Jesús jóo' Jairo
(Mr. 5:21-43; Lc. 8:40-56)*

¹⁸ Jo lajee~ sing' Jesús e gui'ná'^ sím`bir cóo'~ i
dsea` i caguilíng- jmingii` do, mi~ caguié- jaang`

fiĩ féng' quiá'- dsea` Israel i siĩ Jairo fí' lí̃ sing' dsea` do. Jo casí'r` uø̃- jnir̃ fí' quinĩ` dsea` do jo casí'-reiñ':

—Tifa', 'micú'- nabi cajúng- jaang` simí' quié-e; jo fa' nijgiéè` o' guó'^ güiquidsi' guóo' fí' moguir̃ jo nijib'tur.

¹⁹ Jo dsifib' cangó- Jesús fí' jo colüing~ cóo' i dsea` quiá'r- do. ²⁰ Jo lajee` e iuuiñ- fí' ngóo'bre mĩ cangoquiéeng' jaang` dseam' lí'- caluur` i nilüing' jmohuü' e tuuiñ` lajüi' nängóo' mí' guitu' jüi'. Jo i dseam' do catüiñ- capi'^ 'ni' si'^ dsea` do; ²¹ co' í' dsíir' e fa' capíb'^ si'^ dsea` do catüiñ-, joba' ni'leáam-bre lajüi' jmohuü' e lüiñ'. ²² Jo dsifí' mĩ cajmée` i dseam' do lajo, caji' Jesús nir̃ fí' caluur` jo cangáiñ- i dseam' i catüing- si'r^ do jo casí'-reiñ':

—Cuøø' bî uø', jóo; nica'láam-ba' lajüi' jmohuü' e lamí' lin' uí' e jáb'- calín'- júu^ quié-e.

Jo ladsifí' lajob ca'láang- i dseam' do lajüi' jmohuü' e lüiñ'.

²³ Jo mĩ tí' lí̃ caguié- Jesús fí' quiá'- i fiĩ féng' quiá'- dsea` Israel do, cangár- e niteáang' dseati' jüüer- lúu' quiá'- 'lî̃ co' tí' lí̃ ni'ám- i simí' 'lî̃ do, jogui jaléng' dsea` eáang' niteáaiñ' ta~ qui' óo'. ²⁴ Joba' caquiü' Jesús ta~ quiá'- jaléng' i dsea` do jo casí'-reiñ':

—Uøøng'na' lajüing'na' e la, co' ja' lüing~ i simí' na, co' lico' güüm-bre.

Dsu' mĩ canúu- jaléng' i dsea` do lajo, lico' cangüüm-bre Jesús, ²⁵ dsu' Jesús ca'uøøm-bre jaléng' i dsea` do fí' lí̃ teáaiñ'. Jo mĩ cang' jo, calí-bre fí' dsí' sinüu^ jo mifüing' catüiñ- guoo' i simí' 'lî̃ do, jo dsifí' lajob caráaiñ'- do. ²⁶ Jo latøøm- lí̃ se' Galilea cani'- júu^ quiá'- lajüi' e calí- do ie~ jmü̃ jo.

Mi~ cajmi'leáng- Jesús gáng- dsea` tiuung-

27 Jo mi~ cangí e cajmijí' Jesús i simí' 'lii~ do, cagüi'í' dsea` do fí jo; jo lajee` ngóor' fí guiá'^ fí, cangoquíéeng' gáng- dsea` tiuung- fí lí~ ngóor', jo i dsea` í áiiñ^ Jesús lala:

—iFíi~ güilín'^ jnea'^, Jóo' dseata~ Daví'!

28 Jo mi~ tí lí~ caguié- Jesús fí coo` lí~ si' 'núú', jo ca'í-bre fí dsí', jo cangotáam~bi i dsea` tiuung- do fí jo cajo, jo Jesús cajmingí'r- dsea` do:

—¿Su já'- líng' 'nú' e quíi~baa jmíi~ jmee~e e nilijné'tu'?

Joba' cañíiñ^ do:

—Dseáng'- jáb'- lí'naa', Fí'ii'.

29 Jo dsifib' cagüi' Jesús jminiñ^ do jo casí'- reiñ':

—Nijmee~baa e nilijné'tu', co' jáb'- calíng-na' e quíi~baa jmíi~.

30 Jo dsifib' cana' jmini` i dsea` gáng- do. Dsu' Jesús ca'íir- 'goo` quiáiiñ^- do e ja` ii` nisíiñ^ jii~ jaang` quiá'- lajii~ e calí- do. 31 Dsu' i dsea` do, jobi lico' nica'uøøiñ` fí lí~ si' e 'núú' do mi~ canaaíñ` ni'r júu^ fí lacaang` fií e néé' lí~ se' Galilea quiá'- lajii~ e cajmée` Jesús cóo'^ ír` do.

Mi~ cajmi'leáng- Jesús jaang` dsea` i ja` fé'

32 Jo lajee` e uøøng` i dsea` gáng- i lami~ tiuung- do, jo lajee` jo, tú- 'ní m'íng' dsea` cangojéeiñ` fí quini~ Jesús jaang` dsea` i ja` fé' uíi~ e iuung- i 'líng'^ dsíur'. 33 Jo mi~ calí- e cajmihuíng- Jesús i 'líng'^ i iuung- dsíur` i dsea` i ja` fé' do, joguiba' canaaíñ` do café'r'. Jo jaléng'^ dsea` i siseáng' do ie~ jo dsíng'- cangogá` dsíur` jo fé'r' lala:

—Dseáng'- jii~ coo` yá' ja` mí cane'ee' fí góo'naa' Israel lajii~ e nicalí- na jmíi~ na.

³⁴ Jo dsu' jaléng' dsea` Israel i líng' dsea` fariseo i siseáng' do ie~ jo fé'r' lala:

—La'eáang' cóo'~ bí quiá'- fi~ i 'lim'^ba' tting` i dseañu` na e jmihuíñ` i 'ling'^ i teáang'~ dsí' dsea`.

Eáam' fñ- líng- Jesús jaléng' dsea`

³⁵ Jo mi~ cangí jo, cangí Jesús lacaang` jalé' fñ fé' cóo'~gui jalé' fñ pí' e er' júu^ quiá'- Fidié~ fí laco~ lí té~ guá'- quiá'- dsea` góor` dsea` Israel. Jogui guiar' júu^ e nijaquíem'ba' e nicá' dsea` do nifí quiá'- lajaang` lajaang` dsea` jmígüi, jogui jmi'leáaiñ` jaléng' dsea` i líng' lí'^ doñí' ee' jmohuí' osi lí'^ doñí' jíé' lí' cu' quiáiñ'- é.

³⁶ Jo mi~ cangáng- Jesús i dsea` 'leáang- i siseáng' do ie~ jo, eáam' calí- fñ- líng- neiñ', co' dsíng'- jmiquíng'- dsíñ' do jogui dsíng'- lijjuung~ dsíñ' cajo. Co' líñ' do laco' líng' jaléng' jo'se' mi~ ja` seeng` fi~re' i quie' nifí quiáa-re'.

³⁷ Joba' cajíng'- Jesús cas'r- jaléng' i dsea` quiá'r- do lala:

—E já'- e dsíng'- fñng' jaléng' dsea` i iing~ ni-jmicuíng` jnea~, dsu' ja` ii` 'ga' lí dsea` seeng` i niguiá- júu^ quié'-e. ³⁸ Joba' 'né- nimí'~ 'nú' Fidié~ e nicuóng- guir dsea` i niguiá- jalé' júu^ quié'-e, jo e jo lí' lafa' mi~ caroo' jalé' e cajní' jaang` dsea` jo dsu' jo` ii` 'ga' lí' seeng` i nijmicóo'~ quiá'r- e ni~ ta~ do.

10

Mi~ cagúng' Jesús dsea` guitúung' quiá'r-
(Mr. 3:13-19; Lc. 6:12-16)

¹ Jo mi~ cangí jo, cóo' jmi~ cató'- Jesús lajñng` i dsea` guitúung' quiá'r- do, jo cacuø'reiñ' e óoiñ'

do ta~ e t̄iĩñ` e ni'uóĩñ`- jaléng` ì `ling`^ ì teáng`- dsí` dsea`, joguì e t̄iĩñ` nijmi`leáaiñ`- jaléng` dsea` dsée`~ lí` doñí` ee` jmohuí` líiñ`` osi lí`^ doñí` jíe` lí` cu` quiáĩñ`- é.

² Jo lalab sii` jaléng` ì dsea` apóo` ì ni` júu` quiá'r`- do: ì sing` nifí` do siir` Simón, joguì sii`bir` Tú` cajó, joguì jaang` rúĩñ` do ì sii` Dí`; joguì Tiáa` cóo`~ jaang` rúĩñ` ì sii` Juan, jo lajì` huáaiñ`- na líiñ` jóo` jaang` dseañu` ì sii` Zebedeo; ³ joguì Lii` joguì Bartolomé joguì Mó` joguì Mateo, jaang` ì lamí` jmóo` ta` mí` cuu`- e catíng`- dseata` ì guíng` fí` Roma; joguì Tiáa~, jóo` jaang` dseañu` ì sii` Alfeo; joguì Tadeo; ⁴ joguì jaang` ì sii` Simón ì líng` dsea` celote; jo jaang`guì ì sii` Judas Iscariote, dsea` ì ca`nínng` Jesús fí` quini` dseata`.

*Mi` casíng` Jesús dsea` guitúung` quiá'r`- e nidsigui-
iaiñ` júu` quiá`- Fidié`*

(Mr. 6:7-13; Lc. 9:1-6)

⁵ Jo mi` cangí` jo, jo lajee` e ná`- guì e nisíng`- Jesús ì dsea` guitúung` quiá'r`- do e nidsiguiaiñ` do júu` quiá`- Fidié`, la`uii` jang`- casí`- reiñ` jalé` ta` e nidsijméeiñ` do jo lalab casí`- reiñ`:

—Jie` mí` güilíng`- na' fí` guóo`~ uó`- quiá`- dsea` ì ja` líng` dsea` Israel, o`guì nigüitáng`- na' fí` jalé` fii` quiá`- dsea` Samaria. ⁶ Jo lajii`~ ta` e nigüilíng`- na' e güiquí`- jíng`- na' jaléng` dsea` Israel jial laco` nilicuiñ` Fidié`, có` ì dsea` í` líiñ` laco` jo`se` ì si`líng`. ⁷ Jo güilíng`- na' güigua`- na' júu` jee` jaléng` ì dsea` í` e nicatb` í` e Fidié` nicá` nifí` quiá'r`. ⁸ Jo lajee` jo, jmi`leáang`- na' jaléng` dsea` dsée`, joguì jmee`- na' e nijí`~ tu jaléng` `líi`~, joguì jmi`leáang`- na' jaléng` dsea` ì líng` jmohuí` `lí`^ fí` ngúu` táang`,

jogui uøøng-na' jaléng' ì 'ling' ì teáang' dsi' dsea`. Jo ja cá'na' e 'léeng'na' quiá' lajii~ e nijmee-na' do, co' ja ee` cuu- cacøng- qui-na' e cangíng'na'.

⁹ Jo ja 'né- cá'na' jii~ ca'íng' cuu- quiá' e 'né-na' ¹⁰ o'gui nosúu' quiá'na'. Jogui jii~ sí'na' e quií'ba' 'né- cá'na', co' ja 'né- cá'na' e co' cá'na'; lajobi lomii~na' cajo, lajii~ e ø'ba', o'gui 'né- cá'na' 'ma'u, cofa' jaléng' dsea` jmóo' ta~ ngím'bre jalé' e gø'r'.

¹¹ Jo mi~ niguilíng-na' fí coo` fii' pí' osi fí coo` fii' fé' é, 'néng'na' jaang` dsea` ì li~ ì ni'íng' 'nú' fí sinúu^ quiá'r', jo fí job nijá'na' carta~ taang-na' fí e fii' jo. ¹² Cuøø'ba' guicá'^ jaléng' dsea` ì neáang' fí jo mi~ nigüitáang'na' fí sinúu^ . ¹³ Jo song guiáb- ni'íng' 'nú' ì dsea` li~ niguilíng-na' do, joba' juguiá- niliseeiñ; dsu' song ja` ni'íñ' 'nú' cóo'~ e guiá-, joba' lajob ja` juguiá- niliseeiñ` yaaiñ~ cajo. ¹⁴ Jogui song ja` ni'íñ' 'nú' guiá- o'gui iin~ e ninúr- júu^ quiá'na', joba' uøøng'na' lajminá- e fí sinúu^ jo osi e fí fii' jo é, jo bó'na' 'lee` tóo` tii~na'. ¹⁵ Jo jnea~ jmitaa^ óo'na' e mi~ nití- í' e niquidsí Fidiéé' í' quiá'- lajaang` lajaang` dsea` jmigüí, eáang'guib nicuø'r- iihuí' ì dsea` ì ja` calijí' 'nú' do laco'gui iihuí' e ca'íng' jaléng' dsea` ì caliséng' fí Sodoma cóo'~ gui fí Gomorra.

Mi~ cajíng'- Jesús e` jalé' iihuí' ni'íng' dsea` guitúung` quiá'r-

¹⁶ Jo mi~ cangí jo, lalab casí'- gui Jesús ì dsea` quiá'r- do:

-¡Téé' áa'na! Jnea~ nisín^n 'nú' jee~ dsea` ì 'ní' níng- 'nú' lafa' jaang` jo'se' ì ni'iuung- jee~ ie'dsinúu^ . Jogui jmee-na' lí'na' laco'gui la lí'

jaang` mi', jo 'né~bi cajo e ja` 'lee~na' dsuco' fa' jaang` mee~ ja` 'léé're'. ¹⁷ Jo ñiim` áa'na', co' nisám' dsea` 'nú' jo nidsijeáaiñ` 'nú' fí' quini` dseata~ quí~ii' dsea` Israel, jogui nijmihuññ` 'nú' fí' dsí' sináú` guá'~ quiá'r` ¹⁸ jo jì'gui cartí' nidsijeáaiñ` 'nú' fí' quini` dseata~ dsea` cøøng` uí'~ e cuíng`na' jnea~. Dsa' mi~ nijmeáaiñ` 'nú' lajo, joba' cuøøng` e nifo`^na' fí' quinir` cóo`~gui fí' quini` jaléng` dsea` i ja` cuíng` Fidiéé` jial mi~ ca'uíng`na' dsea` quié`-e. ¹⁹ Jo dsa' mi~ nijáiñ` 'nú' fí' quini` dseata~, ja` jmee~na' fí'í' jial nifí`^na'r osi jial ningñ`na' quiá'r` é, co' Fidiéé` dsea` nicuó'r` 'nú' e ñí'na' e~ júu` e ningñ`na' quiá'r` mi~ tí' lí' nití`- í' e líng` ee` nijming`r` 'nú'. ²⁰ Co' ie~ jo, Jmiguí' quiá'~ Tiquí`naa' Fidiéé` dsea` guíng` ñiff`- e nifé'` cuaiñ` quí`na' mi~ nití`- e í' jo, jo o' yaang` 'nú' dsea` nifo`^na'.

²¹ Jo mi~ tí' lí' jo, seem` dsea` nijáiñ` jaléng` rúíñ` e nijúuiñ`, jogui seem`bi tiquiá`^ dsea` nijmér` lajo cóo`~ jóor', osi jóor' é nijmér` lajo cóo`~ tiquiá`r` e nijngáng`- rúíñ`. ²² Jo lajñm` dsea` jmigüí' nilí' 'ní' níñ` 'nú' uí'~ e cuíng`na' jnea~; jo dsa' i dsea` i nité' e siñ` teá' fí' guiá` contøøng` cóo`~ jnea~, joba' i dsea` í'bing' i nileáng` jee~ jalé` dsee~ quiá'~ mi~ nití`- í' lajo. ²³ Jo mi~ ni'øng` dsea` 'nú' fí' cóo` fñ, guiá`-gui e cuí`^ba' jo nigüíling`na' fí' jié'gui cóo` fñ. Jo dsa' jmitaa` óo'na' e jnea~ i cajá` fí' jmigüí' la e lín`n jaang` dsea` jmigüí', nigáab`túu calé` catú`-nú'~gui e niteáng`na' ngí'na' ta` guia' júu` quié`-e fí' la'úng` jalé` fñ e tée` lí' se' Israel.

²⁴ Co' jíí'~ jaang` dsea` i jmitúng`, tñng`guir laco' tifa' quiá'r`, o'gui jaang` dsea` 'léeng` fa' ni-

ing⁻guir laco' fiir[~]. ²⁵ Co' i dsea` i jmitáing` do 'néb⁻ nijmitáin` cartí nilitáin` røø, jo lajoguiba' røøb` nicóin⁻ cóo[~] tifa' quiá'r⁻ jóng. Jogui i dsea` 'léeng[~] do mi[~] ningóo' jmóor` ta[~], ni'uúim⁻ bre laco' i fiir[~] do cajo. Jo song fé[~] dsea` e fiir[~] i 'ling[^] i sii` Beelzebú quier' nifí sinúú[^] quíi⁻ na', joba' ga`guib nifé[~] dsea` jóng uú[~] quiá⁻ dsea` sinúú[^] quíi⁻ na'.

Jial 'né- nijmi'gó` dsea` Fidiéé`

(Lc. 12:2-7)

²⁶ Jo mi[~] cangí jo, casí⁻ gui Jesús jaléng[^] i dsea` quiá'r⁻ do jo cajín⁻:

—Ja` fòøng[~] na' quiá⁻ jaléng[^] dsea` i 'ní[^] níng⁻ 'nú[^], co' ja` sea` jíi[~] coo` júu[^] e ja` ní[^] dsea` fa' ja` tóo` jmí[~] e niliñí dsea`, o'gui coo` e si'ma[^] fa' ja` tóo` jmí[~] e niguié[~] dsea` cajo. ²⁷ Jogui jalé[^] e fíi⁻ i 'nú[^] e ñng[^], guia[~] ba' júu[^] jee[~] jaléng[^] dsea`; jogui jalé[^] e fíi⁻ i 'nú[^] fí oo⁻ loguá[^] na', féé⁻ ba' teá[^] jee[~] jaléng[^] dsea`. ²⁸ Jo ja` fòøng[~] na' quiá⁻ jaléng[^] dsea` i iing[~] nijngáng[^] 'nú[^], co' ja` e ta[~] íng[^] quiá'r⁻ lico' lír[^] jíi[~] ngúu` táang[^] na'; co' Fidiéeb[~] dsea` 'né⁻ i nijmi'goo[^] na', co' jíi[~] dsea` íbing[^] cuóøng[^] nijngáng[^] dsea` jogui ni'íiñ⁻ dsea` congua' fí lí[~] 'lí[^] car` ngongí[~] jmí[~].

²⁹ 'Co' cuóøm[^] nilóng⁻ dsea` gáng⁻ ta` cóo[~] coo` tú⁻ í[^] lajo, jo dsu' jíi[~] jaang[^] i ta' do qui⁻ jmí[~] nidsi'íng[^] ne' e ja` mí caquiú[^] Tiquíú[^] na' Fidiéé[~] ta' lajo. ³⁰ Jogui jaléng[^] 'nú[^], jìgui ññguí[^] na' si'í[^] Fidiéé[~] jó[^] mí[^] tíí. ³¹ Joba' ja` fòøng[~] na' jíi[~] coo`, co' lí[^] gui quíng[^] 'nú[^] fí quini[~] Fidiéé[~] laco'gui i fíng[^] tá[^].

Jaléng[^] dsea` i jíng⁻ e cuiñ` Dsea` Jmáang⁻ fí quini[~] jaléng[^] dsea` jíéng[^]

(Lc. 12:8-9)

32 Jo cajíng'⁻ guí Jesús casí'r⁻ dseá` quiá'r⁻:

—Song ii dseá` jíng'⁻ e cuíiñ` jnea` fí' quini` dseá` jiéng'⁻, jōba' lajōb nifá'⁻ jnea` cajo e cuím`baa i dseá` í fí' quini` Tiquié` e dseá` guíng` ñiff⁻; 33 jo dsu' ii guí i jíng'⁻ e ja` cuíiñ` jnea` fí' quini` dseá` jiéng'⁻, jōba' lajōb nifá'⁻ jnea` cajo e ja` cuín`nre fí' quini` Tiquié` e dseá` guíng` ñiff⁻.

Nijíng` dseá` lajee` la'ó'` rúíñ'` uí'` quiá'` Jesús

(Lc. 12:51-53; 14:26-27)

34 'Ja` í` áa'na' fa' jnea` cagá`-a fí' jmigüí` la e cagajmée` e seeng` dseá` juguíá` júu` røø, cō' jnea` ja` cagajmée` e lajō, dsuco' uí'` jnea` nijíng` dseá` lajee` la'ó'` rúíñ'. 35 Jo jōō' dseá` dseañu'` nijíñ` cōō'` tiquiá'r`⁻, joguí jōō' dseá` dseamf` nijíñ` cōō'` níquiá'r`⁻, joguí dseá` mīloo` quiá'` dseá` nijíñ` cōō'` iemisér`⁻; 36 jo lajee` la'ó'` dseá` sinúu` quiá'r`⁻ nilí` 'ní'` níng` rúíñ'.

37 'Joguí song jaang` dseá` eáang`guí 'neáaiñ` tiquiá'r`⁻ ośi níquiá'r`⁻ é laco'guí jnea`, jōba' ja` quí'` jmí` e líiñ` dseá` quié`-e jóng; ośi jaang` sejmí` dseá` eáang`guí 'neáaiñ` jōōr` dseañu'` ośi jōōr` dseamf` é laco'guí jnea`, jōba' lajōb cajo ja` quí'` jmí` e líiñ` dseá` quié`-e. 38 Joguí ii dseá` i ja` niseáng` lafa' crúu` quiá'r`⁻ e laco' cuø` lí` e guíá` dsír' e ní'íñ'` iihuí` uí'` e líiñ` dseá` quié`-e, ja` quí'` jmí` e líiñ` dseá` quié`-e. 39 Joguí ii dseá` i í` dsí' e lí'bre nileáng` 'ñia'r` jee` jalé'` dsee` quiá'r`⁻, jōba' i dseá` í` conguiab` nibíiñ` fí' lí' 'lí' jóng; jo dsu' ii dseá` i júung` uí'` e líiñ` dseá` quié`-e, jōba' i dseá` í` conguiab` nitíiñ'` fí' quini` Fidié` jóng.

Lajíi'` e catáng` dseá` íñ'` quiá'` Fidié`

(Mr. 9:41)

40 Jo lalab casí'⁻ gui Jesús dsea` quiá'r⁻:

—Ii` dsea` i` íng'ⁿ 'nú'ⁿ lacoᵒ` lí~ guilíng⁻na', joba' ím'bre jnea~ cajo; jogui ii` dsea` i` íng'ⁿ jnea~, joba' ím'bre i` dsea` i` casíng` jnea~ fí' jmigúí' la. 41 Jogui ii` i` íng'ⁿ i` dsea` i` fé' cuaiñ~ quiá'⁻ Fidiéé⁹, co' dsea` íb` casí' quiá'r⁻, joba' i` dsea` i` ni'íng'ⁿ i` dsea` í røøb` ni'íñ'ⁿ cajo laco'gui e cuø' Fidiéé⁹ i` dsea` i` fé' cuaiñ~ quiá'r⁻ do; jogui ii` i` íng'ⁿ jaang` dsea` i` ée` guiá⁻, co' guiúm⁻ i` dsea` do, joba' røøb` ni'íng'ⁿ i` dsea` í quiá'⁻ Fidiéé⁹ lí' laco'gui la íng'ⁿ i` dsea` i` ée` guiá⁻ do. 42 Jogui doñí' ii` dsea` i` cuø' fa' capí'ⁿ jmíi` i` dsea` quié⁻ e i` doñí' fa' ni'lé'ⁿ cuíng` jnea~, joba' jnea~ jmitaa` óó'na' e catím⁻bre ni'íñ'ⁿ lajii'⁻ e sí'íñ'ⁿ quiá'⁻ Fidiéé⁹ cajo.

11

Mí~ casíng` Juan i` seáang` dsea` jmíi` dsea` quiá'r⁻ fí' lí~ táang` Jesús

(Lc. 7:18-35)

1 Jo mí~ tí' lí~ cató' e cacuø' Jesús ta~ jaléng'ⁿ i` dsea` guitúung` do quiá'r⁻, joba' cangó⁻bre e cango'er` jogui e cangoguiar⁹ júu^ quiá'⁻ Fidiéé⁹ fí' jalé'ⁿ fíi` e téé'ⁿ lí~ se' Galilea.

2 Jo ie~ jo, 'nañí'ⁿ iuung⁻ i` Juan i` seáang` dsea` jmíi` do. Jo lajee⁹ iuuiñ⁻ fí' job mí~ caliñir' jalé'ⁿ e quíi'ⁿ jmíi` tíng` Dsea` Jmáang⁻ e jmóor', joba' casíñ' coᵒ` tú⁻ máng'ⁿ dsea` quiá'r⁻ fí' lí~ táang` dsea` do³ e cangojmingíi'⁹ reiñ' su íb` dsea` i` sijeeng⁹ dsea` Israel i` sí'íng'ⁿ e nigüéeng⁻ fí' jmigúí' la, osi nijém⁻bir jaang`gui i` jíéng'ⁿ é.

4 Joba' lalab cañí'ⁿ Jesús quiá'⁻ i` dsea` do:

—Güiling`na' güicoo`na' júu` quiá'- i Juan do lajúi` e nicanúu`na' jogui nicañí`na' e quií` jmií` e jmóo`o. ⁵ Síi`gor e lijnéb`tu jaléng` dsea` tiu-ung-, jogui e ngib`tu jaléng` dsea` jlúung`, jogui e 'láam- jaléng` dsea` i líng` jmohuí` 'lí` fí` ngúu` táang, jogui e núub`tu jaléng` dsea` güing-, jogui e jíb`tu jaléng` 'lí`, jogui cajo e guiaa- júu` quiá'- jial nileáng` jaléng` dsea` jmigüi` jee` jalé` dsee- quiá'r-. ⁶ Juguiá`jiu quiá'- jaléng` dsea` i ja` litúng- dsíi' lajúi` fí` lí` nisiñ`' cóo`- jnea`!

⁷ Jo mi` tí` lí` caquing`-tu i dsea` i casíng` Juan i seáng` dsea` jmií` do, joba' Jesús canaaiñ` sí'r jaléng` i dsea` i taang` cóo`r- do jalé` juguiá- uii` quiá'- i Juan do, jo lalab casí`-reiñ` jo cajíñ`-:

—¿E` caguijòø` 'nú` mi` canúu`na' e ningí` i Juan do fí` jee` guóo`- uó`- quiú`? ¿Já` leáa`~?, ja` caguijòøng` 'nú` jaang` dsea` i uaang` júu` quiá'- i jmóo` lí` doñí` ee` ta` quiú` dsea` jiéng` i líng` la lí` cóo` cuiñí` e dsée` cataang` lí` doñí` jié` fí` lí` íi` guí`;
⁸ o`gui caguijòøng`na' jaang` dseañu` i jlo` sí`^, co` niñí`^ 'nú` e i dsea` la'í` neáaiñ` quiá'- dseata` dsea` féng', co` í`bing` sea` jalé` e jlo` quiá'-.
⁹ Jo ¿i` í` óo`na' i caguijòøng`na'? Jo e jáb`-, 'nú` caguijòøng`na' jaang` dsea` i laniing`-gui laco' i dsea` caguaang` i café` cuaiñ` quiá'- Fidiée` malí`-gui eáang'.
¹⁰ Jo nab nicaliti` laco' fé` fí` ni` jì` quiá'- Fidiée` cuaiñ` quiá'- i Juan i seáng` dsea` jmií` do mi` cajíng`- Fidiée` e casí`r- Dsea` Jmáang` lala:

Nisín`n jaang` dsea` i niguiá- júu` quié`-
 nú`-gui e niguó`^ fí` jmigüi`
 e laco' niguiár- guiá- fí` lí` ningí`^.

11 Jo lalab cajíng' gui Jesús casí'r i dseá teáang` cóo'r do ie~ jo:

—Jo jnea~ jmitaa^ óo'na' e lajee~ lajaléng' dseá i nicafé' cuaiñ~ quiá' Fidiéé~, ja` mí caliséng` jaang` i niing` gui ta~ quiá' laco' i Juan i seáang` dseá jmíi do. Jo dsu' i dseá i ja` niing` fí jmigüü la dsu' Fidiéé`bing' i quie' nifí quiá'r, joba' í'bing' i niing` gui laco' i Juan do.

12 'Co' ie~ latí mi~ canaang` Juan i seáang` dseá jmíi e guiar' júu^ e nijáa Dseá Jmáang` jo cartí lana, eáang` huñng` nicangojéé' cóo' júu^ quiá' Fidiéé' e quiá' e quier' nifí quiá' dseá jmigüü; jogui jaléng' dseá i 'ní' ní~, cuø' bî yaaiñ~ e laco' iñ~ nijmigüíeíñ` cóo' e júu^ jo. 13 Jo ná' gui e cagüéng` Juan i seáang` dseá jmíi fí jmigüü la, jalé' e júu^ e cagua' i dseá i café' cuaiñ~ quiá' Fidiéé~ jogui e júu^ quiu' ta~ quiá' Fidiéé' do, jalé' e jo lico' jmita~ dsíi e Fidiéé~ iñ~ nicár' nifí quiá' lajaang` lajaang` dseá jmigüü. 14 Jo song 'nú' iing` na' ni'ling' na' e júu^ jo, joba' i Juan do líiñ` laco' Líi' i café' cuaiñ~ quiá' Fidiéé~ maliñ` gui eáang` i sí'í nijáa tu calé' catú'. 15 Jo jaléng' 'nú', dseá sea' loguá' na', núu` na' jalé' e júu^ e nicafá' a na.

16 'Jo lana nifá' duu jial líng' jaléng' i dseá seeng` jmíi na, co' jaléng' í líiñ` la líng' jiuung` i táang` tacóo' fí 'móo', jo mi~ niti'áng' rúíñ' fé'r lala: 17 “Cajiúú jnea^ lúu, dsu' 'nú' ja` cad-seeng` na'; jogui ca'ó'naa' e ø dseá lí ráang` 'líi, dsu' 'nú' ja` caquíi' na'.” 18 Co' lalab caféé' 'nú' mí cajá i Juan i seáang` dseá jmíi do, ca'eeng` na'r e iuung` i 'ling' dsíir dsu' uíi~ e ja' leáang` gø'r jogui jíi~ capí' méé' ja' í'r. 19 Jogui mi~ cagüéng` jnea~

fi' jmigüi' la, jnea~ dsea` i jaa' fi' ñifi~ e lín'n jaang` dsea` jmigüi' e gó'baa jíi'~ laco' gø' dsea`, jo uíi'~ e lajob líi', joba' jaléng' 'nú' ca'eeng-na' jnea~ e lín'n jaang` dsea` cúng` i gø' contøøng- jogui e lín'n jaang` dsea` íng' i ngí' cóo'~ jaléng' dsea` i ga` fé' dsea` uii~ quiá'r- osi cóo'~ jaléng' 'ná' nodsicuu- i jmóo' ta~ mí' cuu- e catíng- dseata~ quiá' Roma é. Jo dsu' cóo'~ jalé' e jmóo' Fidié~ jmiñéiñ' jial tí' tñiñ' ngáiñ'.

Dsea` i ja` ja'- calíng- júu^ quiá'- Dsea` Jmaang-
(Lc. 10:13-15)

²⁰ Jo ie~ jo, canaang` Jesús 'gaam`bre quiá'- jaléng' dsea` i seeng` fi' fñi' lí~ nicajméer` jalé' e quíi'r~ jmñi~ e dsigá' dsíi' dsea', co' jaléng' i dsea` í ja' caquí'- jíng' yaaiñ~ fi' quini~ Fidié~. Jo lalab cajíng'- Jesús ie~ jo:

²¹ —iE ngí' fñi' ^ 'nú', dsea` seeng`na' fi' Corazín cóo'~gui 'nú' dsea` seeng`na' fi' Betsaida, cofa' mí' fi' Tiro cóo'~gui fi' Sidón cajmé- e lajalé' e guiá- e quíi'~i jmñi~ laco'gui jíi'~ e nicajmé- e jee~ 'nú', joba' i dsea` í ladsifi' lajo caquí'- jíng' yaaiñ~ fi' quini~ Fidié~ faco' mí' lajo, jo catíng- e nineáaiñ' fi' íb^ uii~ quiá'- jalé' e dsee- e nicarøøiñ'! ²² Joba' fñi' i 'nú', dsea` seeng`na' fi' Corazín cóo'~gui fi' Betsaida, ie~ mí' nití- í' e niquidsí' Fidié~ í' quiá'- lajaang` lajaang` dsea` jmigüi', eáang`gui nicuø'r- 'nú' iihuí' laco'gui e iihuí' e ni'íng' dsea` i seeng` fi' Tiro cóo'~gui fi' Sidón. ²³ Jogui jaléng' 'nú', dsea` seeng`na' fi' Capernaum, ¿su líng-na' e 'nú'bing' i nisáng' cartí' yú'gui jee~ jaléng' dsea'? Jo o' lajo, co' 'nú'bing' i nijgiáang` tí' lí' 'lí' ^ mí' nití- í' lajo. Cofa' mí' fi' fñi' Sodoma calí- lajalé' e quíi'-

jmíh̃ laco'gui jiĩ~ e nicajmé~ e jee~ 'nú', joba' ja' ca'íng~ e fiĩ jo, jo siji'bi latí lana. ²⁴ Joba' fiĩ-túu 'nú', dsea` i seeng` fí Capernaum, e mĩ nití~ í" e niqidsí' Fidié~ í" quíá~ lajaang` lajaang` dsea` jmigüî, eáang`guib ni'íng~ 'nú' iihuúí' laco'gui jiĩ~ iihuúí' e ca'íng` jaléng` i dsea` i seeng` fí Sodoma.

Jaléng` dsea` i óo' fí'í' dsú' né~ nijaquíééñ' fí' quini' Jesús

(Lc. 10:21-22)

²⁵ Jo lalab cajíng`-gui Jesús ie~ jo:

—Teaa~, lana jmifén' n 'nu, dsea` Fii~ ñiff~ cóo'~ jmigüî la, dsuco' lana nicajmee'~ e ngám' jaléng` dsea` dsee~ dsea` quí jalé' júu^ quí'~, jogui ca-jmee~ba' e ja` cangáng' júu^ quí'~ jaléng` dsea` i tüng` eáang` i jmicóøng'~ yaang~ fí jee~ jaléng` dsea` rúng'. ²⁶ E jáb'~, lajob líí, Teaa~, co' lajob nicali'íng~ 'nu e calí~.

²⁷ Jo mĩ cangí jo, lalab casí'~ Jesús dsea` quíá'r~:

—Tiquié~e Fidiéeb~ dsea` nicacuø'r' jnea~ e née' nii~ lajalé' e sea` fí la'úng~ fí jmigüî. Jo jiĩ~ jaang` dsea` dseáng'~ mí cuíñ` jnea~, dsea` lín'n Joo' Fidié~ camíng'~, co' lajiĩ~ Tiquié'baa dsea` cuíñ` jnea~; jogui jiĩ~ jaang` dsea` dseáng'~ mí cuíñ` Tiquié~e dsea` guíng~ ñiff~, co' lajiĩ~ jneab~ dsea` cuíñ`nre cóo'~gui lajaléng` dsea` i nisí'íng` quíé~ e e nilicuíñ` dsea` do. ²⁸ Jo jaléng` 'nú', dsea` i óo' fí'í', cóo'~gui jaléng` 'nú', dsea` dsingíng~na' iihuúí, quí'~ jíng' yaang~na' fí' quini~, co' jneab~ dsea` quí'~i jmíh̃ nijmee~e e nití'~ áa'na' quíá'~ jalé' e jo. ²⁹ Jogui íng'~na' jalé' júu^ quíé~ e e guiaa~ jee~ 'nú', jogui ee~ba' guíá~ laco'gui jnea~, dsea` lín'n jaang` dsea` féng' dsí' cóo'~ doñí' i~ jogui e

ja` jmiféng' 'ñiá'`a cajo. Jo song nijmee`na' lajo, joba' nilí'ba' jóng e nití'~ áa'na' uii~ quiá'~ jalé' e dsingúng`na' do. ³⁰ Co' song ii` dsea` i` iing~ nijmitúng` júu^ quié`-e jogui` nijmitir~ lajúi'~ júu^ quiu' ta~ quié`-e, ja` huíng' quiá'r`- e nijmér` lajo, co' ja` ii` e ta~ jo.

12

*Mi~ ca'éeng` dsea` quiá'~ Jesús láa' quiá'~ cui'iee`
(Mr. 2:23-28; Lc. 6:1-5)*

¹ Jo ie~ jo, coo` jmi~ lajee` e títng` dsea` Israel e jmi'íñ', cangúng' Jesús colúng` cóo'~ dsea` guitúung` quiá'r`- fí' coo` guóo'~ uó^ lí~ sijnea` cui'iee`. Jo lajee` ngúñ' fí' jo, cadseá` jmi'aang` i` dsea` quiá'r`- do, jo canaaiñ` do éem`-bre láa' quiá'~ cui'iee` e sea` do jo canaaiñ` gø'bre mí'^ quiá'-. ² Jo ie~ jo, co' quiá'~ dob nitaang` coo` tú`-múng'~ dsea` Israel i` lúng' dsea` fariseo jo cangá`-bre e ca'éeng` i` dsea` quiá'~ Jesús do cui'iee`, joba' lalab casí'r` Jesús:

—Ja` catúng`- jmé` i` dsea` quií'~ na lana lajee` jmi~ e jmi'íng'naa', jneaa`aa' dsea` lí'í' dsea` Israel!

³ Jo lalab cañí' Jesús quiá'~ i` dsea` do:

—Téé' óo'na' e nica'l'ba' fí' ní` jì` quiá'~ Fidiéé` lí` fé' jial cajmée` dseata` Daví'^ mi~ cadseá` jmi'aaiñ` colúng` cóo'~ jaléng' dsea` quiá'r`. ⁴ Co' ie~ jo cangúñ' cartí' dsí' sinúu^ guá'~, jo cagó'r` íñí'^ e güeang'^ quiá'~ Fidiéé` e júi'~ jmidsea`bing' sí'í^ cuóong` dó'~, dsu' cagó'bre colúng` cóo'~ i` dsea` quiá'r` do. ⁵ Jogui` téé' óo'na' cajo jial fé' fí' ní` jì` quiá'~ Fidiéé` e cajme' Moi~, co' fí' ní` jo fé' e ja` dsee`-ée` jaléng' jmidsea` nañí' fa' jmóor` ta` fí'

dsíí sinúú[^] guá'⁻ fé'^l lajee[~] jmíí[~] e jmi'íng'^l jneaa[~]aa', dsea^l lííí'^l dsea^l Israel. ⁶ Jò dsu'^l jnea[~] fíí⁻i 'nú'^l e niing⁻gui júu[^] quié⁻e laco'gui e guá'⁻ do. ⁷ Dsu'^l latí lana ja^l mí cangám^l'bi 'nú'^l e[~] guóng^l' lajii[~] e fé'^l fí' ní[~] jí^l quiá'⁻ Fidiée[~] lí[~] fé'^l lala: “Jnea[~] Fidiée[~] iin[~]n e nilí[^] fíí⁻ líng⁻ rúng^l'na', jò o^l e cuø⁻na' feá'⁻ fí' quini⁻.”

Jò casí'⁻gui Jesús í dsea^l fariseo do:

—Faco^l mí[~] cangáng^l'na' e júu[^] jò latí mí[~] uing[~], joba' ja^l e ta[~] e cuø^l'na' dsee⁻ jaang^l dsea^l í ja^l mí calée^l jii[~] coo^l. ⁸ Jò dsu'^l e já'⁻, jnea[~] dsea^l cagá⁻a fí' jmígüí^l la e lín^l'n jaang^l dsea^l jmígüí^l, oo⁻baa ta[~] e niquiá^l'u ta[~] mí[~] jmíí[~] e jmi'íng'^l jneaa[~]aa', dsea^l líí'naa' dsea^l Israel.

Mí' cajmi'leáang⁻ Jesús jaang^l dsea^l í caang[~] guoo^l (Mr. 3:1-6; Lc. 6:6-11)

⁹ Jò mí[~] cangí^l jò, cangó⁻ Jesús fí' coo^l dsíí sinúú[^] guá'⁻ quiá'⁻ dsea^l góor^l dsea^l Israel. ¹⁰ Jò mí[~] caguiér⁻ fí' jò, dob ni'iuung⁻ jaang^l dseañu^l í caang[~] coo^l guoo^l. Jò ie[~] jò, dob niteáang⁻ coo^l tú⁻ máng^l' dsea^l Israel í líng^l dsea^l fariseo e siteeíñ[^] Jesús e iin[~] ninír^l su nijmi'leáang⁻ dsea^l do í dsea^l í caang[~] guoo^l do 'ñia'^l ie[~] jmíí[~] e jmi'íng'^l dsea^l Israel, jò lajoba' e niguié^l'r jial e ni'núíñ⁻ dsea^l do fí' quini[~] dseata[~]. Joba' cajmingí^l'r Jesús lala:

—¿Su seab^l fí' e nijmi'leáang⁻ jaang^l dsea^l dsée^l' lajee[~] mí[~] jmíí[~] e jmi'íng'^lnaa'?

¹¹ Jòba' cañí^l Jesús quiáíñ⁻ do jò casí'⁻ reiñ^l lala:

—Faco^l 'nú'^l aang⁻na' jo'se^l jò calingíng[~]na' e catóng^l' jaang^l fí' dsíí^l íí^l 'ñia'^l ie[~] jmíí[~] e jmi'íng'^lnaa', ja^l lí[^] dsii⁻ fa^l lí[^] niseáang[~]na're' lajò, co^l nigüiseám^l'ba're'. ¹² Joba' fíí⁻i 'nú'^l, jial tíí

laniing̃-gui quíng' jaang` dsea` fí quini` Fidié`
laco'gui jaang` jo'se". Jo lajob líí, seab` fí e jmé`naa'
cōo` e guiá- 'ñia' mi~ jmí~ e jmi'íng'naa'.

¹³ Joba' lalab casí- Jesús i dsea` caang` guoo` do:
—Níi~ guóo', dseañu'.

Jo lajob cajmée` i dsea` do, jo ladsifí lanab ca'lóo-
guóor` jo caliguiáb- e guóor` do lí^ laco'gui e cōo` do.
¹⁴ Jo mi~ tí lí~ ca'uøøng` jaléng' i dsea` fariseo do e
fí dsíí sinúu` guá- do, jo canaaiñ` sñiñ` quiá- jial
niguié'r e nijngáiñ- Jesús.

Júu` e cajme' Saí` cuaiñ` quiá- Jesús

¹⁵ Jo mi~ calilí^ Jesús e jo, cagüi'íbre e fí jo, jo
cangór- fí lí~ jíe', jo fím' dsea` cangolíng- cóo'r-
ie~ jo. Jo laco' ngolíñ- teáaiñ~ fí lado, jmi'leám-
dsea` do jaléng' dsea` dsée~, ¹⁶ jogui quiu'r ta~
quiá- jaléng' i dsea` i jmi'leáaiñ- do e ja` niguiáiñ-
do júu^ quiá- jalé' e quí~ dsea` do jmí~ jmóor`.
¹⁷ Jo cajmée'r jalé' e jo e laco' calit~ lajii~ júu^
quiá- Fidié` e cajme' Saí^, jaang` dsea` i café'
cuaiñ` quiá- Fidié` malí~gui eáang' mi~ cajíñ-
lala:

¹⁸ I lab i dsea` i nicaguín~n,

i jmóo` lajii~ e iin~n,

jo eáam' 'neáan`nre jogui iáang` dsii- cóo'r`.

Jogui eáam' nili'gøiñ'

la'eáang' cóo'~ Jmiguí quié- e e nicuøø-øre,

jogui niguiár- júu^ jee~ jaléng' dsea` jmigüí

e dseáng'- røøb` ni'ír- í' quiá- lajaang` la-
jaang` dsea`.

¹⁹ Dsu' ja` nijmér- ta~ jíng` o'gui ta~ ta' mí~;

jo jíi~ jaang` dsea` ja` ii` ninú- júu^ quiá'r- jee~ 'núu'
e jmiféng' 'ñia'r'.

- 20 Jō nijmicóo'~bre jaléng' dsea`
 i'í dsí' e ja` seeng` i'ij nijmicóo'~ quiá'r-.
 Jogui nijmicóo'~bir cajo jaléng' dsea`
 i'í dsí' e ja` niquí'r~ jmií~.
 Jogui niguiár- júu^ jee~ jaléng' dsea`
 car` nilita~ dsíñ' e dseáng' røøb` ñ` í' quiá'-
 lajaang` lajaang` dsea`.
 21 Jō la'eáang' íb` nijá'- líng`
 jaléng' dsea` jmiigüi júu^ quiá'- Fidiée`.
 Jō lanab cajíng'- Saíi^ ie~ malií~gui do.

*Mi~ cacuø' dsea` dsee- Jesús e jmóor` ta` la'eáang`
 cóo'~ i` líng'^*

(Mr. 3:20-30; Lc. 11:14-23; 12:10)

22 Jō mi~ cangí jō, cangojéeng` dsea` fí' quini`
 Jesús jaang` dsea` tiuung- jogui i ja` fé' cajo. Jō
 i` 'lim'^ jmóo` e nilíng` i` dsea` do lado. Jō dsu'
 Jesús cajmi'leáam~bre i` dsea` do, jō calijnéb'tuiñ'
 do jogui café'tuiñ' cajo. 23 Jō jaléng' dsea` i` teáang-
 do ie~ jō, eáang` cangogá` dsíir' jō canaaíñ` sí' rúíñ'
 lajee` yaaiñ` jō fé'r` lala:

—Jangám- song Jóo' dseata~ dsea` féng' Daví'^ i`
 na.

24 Jō ie~ jō, dob niteáang- coo` tú- míng'~ dsea`
 Israel i` líng' dsea` fariseo. Jō mi~ canúur- síng` i`
 dsea` do lado, joba' cajíñ'-:

—La'eáang` cóo'~ bí quiá'- Beelzebú i` líng' fii~
 jaléng' i` 'líng'^, la'eáang' í'bing' tíng` i` dseañu` na
 e uøøiñ` i` 'líng'^ i` teáang' dsí' dsea`.

25 Jō co' ñib` Jesús lajúi~ e í' dsí' i` dsea` fariseo do,
 joba' cajíñ'- casí'-reiñ':

—Fa' coo` fii` jō jaléng' dsea` i` seeng` fí' jō 'ní'
 níng- rúíñ', joba' sí'ím^ e fii` jō jóng, co' ja` seeíñ`

røø. Jo lajobi cajo fa' coo` fii` pí`^ osi coo` sináú` lí`
 'ní` níng` rúng` dsea, si'ím`^ cajo. 26 Jo lajob lí`
 cajo cóo`~ Satanás i líng` fii` i 'ling`^ do, song nijmi-
 huíñ` i 'ling`^ quiá'r-, joba' nilí` e 'ní` níim` rúíñ`
 jo lajoba' ni'ím` bí` quiá'r-. 27 Jo 'nú`gui fó`na`
 e jnea` tñn` jmihuín`^n jaléng` i 'ling`^ i teáng`
 dsíí` dsea` la'eáang` cóo`~ bí` quiá'- fii` i 'ling`^ i sií`
 Beelzebú; co' faco' lajo, ¿i` i í` óo`na` i jmicóo`~
 quiá'- jaléng` dsea` i ngí` cóo`~ 'nú` e tñm`bre jmóor`
 lajo faco' lajo? Co' Fidiéé`bing` i jmicóo`~ quiá'- i
 dsea` í` e tñíñ` jmóor` lajo. Joba' lajii` e tñíñ` do cuø`
 lí` e ja` dseeng` laco' jii` e í` áa`na`. 28 Co' lajii` e
 jmóo` jnea` e jmihuín`^n jaléng` i 'ling`^ i teáng`
 dsíí` dsea, la'eáang` cóo`~ Jmiguí` quiá'- Fidiéé`ba`
 e jmóo`o lajo. Jo e jo cuø` lí` e nicatíb` í` e Fidiéé`
 nicár` nifi` quií`na` lajaang` lajaang`na`.

29 Jo jíng`-gui Jesús:

—Jo ja` nilí` jaang` dsea` ni'ír` fí` dsíí` coo` sináú`
 quiá'- jaang` dsea` i bí`gui dsíí` laco' ír` e ni'uø`r`-
 jalé` e sea` quiáíñ`-, dsuco' la'uii` jang`- 'né`
 ni`ñúm`bre i dsea` bí` dsíí` do, jo lajoguiba` cuøøng`
 e nijmér` lajo.

30 'Jo ii` dsea` i ja` sing` uii` quié`-e, joba' 'ní`
 níim`bre jnea`; jogui ii` i ja` jmicóo`~ jnea` e laco`
 nilicuíng` dsea` jnea~, joba' ja` siñ` uii` quié`-e cajo.

31 'Joba' fii`-i 'nú` e íim`-bi Fidiéé` dsee` quiá'-
 jaléng` dsea` jmigüi` mi` ee`gø` júu` ga` fé'r` uii`
 quiá'- dsea` do, osi lí` doñí` ee` dsee` e éeiñ` é; dsu`
 jo` ni'ííñ` dsee` fíng song ii` café` ga` uii` quiá'-
 Jmiguí` quiá'r-. 32 Joba' fii`-túu` 'nú` e Fidiéé` íim`-bir
 dsee` quiá'- jaléng` dsea` jmigüi` mi` ee`gø` ga` fé'r`
 uii` quié`-e, jnea` dsea` gáa`a fí` ñifi` e lín`n jaang`

dsea` jmiḡüí; dsu' song iḡgui café' ga` uii~ quiá'-
 Jmiḡüí quiá'- Fidiée~, joba' jo` tóo` jmiḡ fa' ni'ling-
 dsea` do dsee- quiá'- i dsea` í lata~ seeiñ' fi' jmiḡüí
 la o'gui fi' jmiḡüí coo` cajo.

*Jalé' 'ma` ofiḡ` cuí' dsea` la'eáang' cóo'~ ofiḡ` e íb`
 (Lc. 6:43-45)*

³³ Jo lalab cajíng'- gui Jesús e éeiñ` i dsea` teáang-
 do ie~ jo:

—Fa' 'ná' ta'na' o^ fi' i' 'ma` ofiḡ` quií-na', joba'
 jlob'^ ofiḡ` nicuó-; jo song ja` jmoo'na' lajo, joba'
 ja` 'goo` ofiḡ` nicuó-. Co' jaléb' 'ma` ofiḡ` cuí' dsea`
 la'eáang' cóo'~ ofiḡ` e íb`. ³⁴ jjó' mi' guíim- 'ná'!
 Ja` cuóong` e nifo'^na' jmang'- juguiá-, co' jmang'-
 jalé' e ga'ba' í áa'na'. Dsuco' lajji~ e í dsíib' dsea`,
 jji~ joba' fé'r'. ³⁵ Jo jaang` dsea` i guíung-, jmang'-
 júu^ guíab- fé'r', co' jmang'- e guíab' ba' í dsír'; jogui
 jaang` dsea` i soo' dsíi, jmang'- júu^ gab' fé'r', co'
 jmang'- e ga'ba' í dsír'. ³⁶ Joba' fiḡ-i 'ná' e mi~
 niguiée' jmiḡ e niquidsí Fidiée' í' quiá'- lajaang`
 lajaang` dsea` jmiḡüí, ie~ job mi~ niguiée' dsea` júu^
 fi' quini~ dsea` do jalé' e ja` íng^ ta~ e café'r' lajee~
 cateáaiñ' fi' jmiḡüí la. ³⁷ Jo cóo'~ lajji~ júu^ e café'
 dsea`, cóo'~ jji~ job nija'^ í' su røøiñ` dsee- o'si ja`
 røøiñ` é mi~ tí li~ nití' í' e nitidsí' í' quiá'r-.

*Mi~ camí' dsea` Jesús e nijmér- coo` li~ e quí'r`
 jmiḡ e dsigá' dsí' dsea`*

(Mr. 8:12-13; Lc. 11:29-32)

³⁸ Jo mi~ cangí jo, coo` tú- m'íng'~ tífa' quiá'-
 júu^ quiu' ta~ quiá'- dsea` Israel cóo'~gui coo` tú-
 m'íng'~ dsea` Israel i líng' dsea` fariseo cango-
 quíeeiñ' fi' li~ sing' Jesús jo casi'r- dsea` do lala:

—Tifa', ii~naa' ne~naa' e nijme'^ coo` li~ e quii'~ jmii~ e dsigá` dsí' dsea`.

³⁹ Jōba' cañí' Jesús quiá'~ i dsea` do:

—Jaléng' dsea` seeng` jmii~ na dsíng'~ nirøøiñ` dsee~ jogui ja` jmitir~ júu^ quiá'~ Fidiéé', co' lico' mi'r' jnea~ e nijmee~ e coo` e li~ e quii'~ jmii~ e dsigá` dsí' dsea`. Dsu' ja` nijmee~ e jii'~ coo` e jo fi' quinir', co' nicaliseáb` e jo lami~ jéeng'gui e cangongíng~ Jonás, jaang` dsea` i café' cuaiñ~ quiá'~ Fidiéé' malii~ gui eáng'. ⁴⁰ Jo laco' ca'í~ Jonás 'ni' jmii~ jogui 'ni' uøø' fi' dsí' tu' jaang` ñu` dsée~, lajōb jnea~ cajo, dsea` cagá~ a fi' ñifi~ e lán'n jaang` dsea` jmigüi, ni'ú'u 'ni' jmii~ jogui 'ni' uøø' fi' ná'~ uø. ⁴¹ Jo mi~ nití~ jmii~ e niquidsí' Fidiéé' í' quiá'~ lajaang` lajaang` dsea` jmigüi, i dsea` seeng` fi' fii' Nínive do nicuó'r~ dsee~ jaléng' dsea` i seeng` jmii~ na; co' mi~ canúu~ i dsea` i júu^ e cagua' Jonás, dsifi' lajōb caqui'~ jíng' yaaiñ~ fi' quini' Fidiéé' uii'~ jalé' dsee~ quiá'r~. Dsu' jnea~ gui fá'a e jnea~ niing~ gui laco'gui i Jonás do. ⁴² Lajōbi cajo ie~ malii~ do caliséng` jaang` reina i caqui' ta' fi' li~ huíi^, jo cajar~ cajanúur^ jalé' júu^ e tiiing` jaang` dseata~ dsea` féng' i sii' Salomón. Jo lajōb lí', i dseamf í' nicuó'~bre dsee~ cajo jaléng' i dsea` seeng` jmii~ na mi~ nití~ jmii~ e niquidsí' Fidiéé' í' quiá'~ lajaang` lajaang` dsea` jmigüi. Dsu' júu^ quie~ e niing~ gui laco'gui júu^ quiá'~ i dseata~ Salomón do.

*Jial lí' mi~ dsitáng'~ tu i 'líng' fi' dsí' dsea`
(Lc. 11:24-26)*

⁴³ Jo mi~ cali~ cajíng'~ Jesús lana, jo casí'~ guir jaléng' i dsea` do jo cajíñ'~:

—Mi~ güi'ñí jaang` i 'ling'^ i iuung` dsíí jaang` dsea, ngir' fí lí~ quié` e 'nór' fí lí~ nijmi'íñ'. Jō song ja` niguié'r' lí~ nijmi'íñ', jōba' í dsír':
 44 “Niním'^túu fí dsíí dsea` e lí~ cajú`-u do, cō' ja` lí~ sea` lí~ nijmi'ín'n.” Jō mi~ niguieng'tur dsíí i dsea` do, niguiéiñ' lafa' cōo` sínúu^ lí~ joo` jogui siquiáng` jogui silíi` jlo'^. 45 Jō mi~ ninír' e dsíngl` jlo'^ dsíí e lí~ niguiéiñ' do, jōba' nidsér` nidsitéer` guiáng` i 'ling'^gui laco' ír` e nidsitáaiñ' fí dsíí i dsea` do, jōba' ga'gui nilíng` i dsea` do laco'gui lamí~ iuung` jaang` i 'ling'^ do fí dsír'. Jō lajōb nidsingíng` jaléng` i dsea` i røøng` dsee` i seeng` jmí~ na.

Mí~ cajíng`- Jesús i~ niquiá'r^ jogui i~ jaléng` rúíñ'
 (Mr. 3:31-35; Lc. 8:19-21)

46 Jō lajee` gui'nang' sím`bi Jesús cōo` jaléng` i dsea` teáng` do ie~ jō, mi~ caguié` niquiá'r^ cōo`gui jaléng` rúíñ', cō' iñ~ nisíñ` cōo` dsea` do. Dsú' ja` cangíiñ' do cartí lí~ iuung` dsea` do.
 47 Jō jaang` dsea` jiém'bing' cangojmée' júu^ Jesús e niteáng` i dsea` sínúu^ quiá'r` do fí caluu`, jō lalab júu^ quie` i dsea` do:

—Nab nicagüéng` niquíi'^ cōo`gui jaléng` rún' e iñ~ síñ` cōo` 'nú, jō nab teáiñ` fí caluu` lana.

48 Jō lalab cañíi' Jesús quiá'` i dsea` quie` júu^ do:

—Jneab` nifíi' 'nú i~ niquié`e jogui i~ jaléng` rún'n.

49 Jō dsifib' ca'éeiñ` i dsea` quiá'r` do jō cajíñ'`:

—I dsea` nab niquié`e cōo`gui jaléng` rún'n.

50 Cō' doñí` ii` dsea` i jmiti~ lajii' e iing` Tiquié`e dsea` guíng` ñifí~, jaléng` dsea` íbing' líng` rún'n jogui dsea` íbing' líng` niquié`e cajo.

13

Coo`júu^já!- e lafa' júu^ cuento quiá!- mi~ bí dsea` mijú`

(Mr. 4:1-9; Lc. 8:4-8)

¹ Jo 'ñia' ie~ jmii~ jo cagüi'íib' Jesús fí' jo, jo cangór- cangogüear` fí' 'ni' guiée' Galilea. ² Jo co' i 'leáam-bi dsea` caseáng' fí' jo, joba' Jesús cajgóor- fí' yá^ coo` móo' e nisi' e fí' 'ni' e guiée' do jo fí' job caguár. Jo dob teáng- jaléng' dsea' fí' 'ni' jmii` lajee` jo. ³ Jo catí' job canaang` e' Jesús jaléng' i dsea` do jmiguiab' jalé' júu^ quiá'r-, jo casí'-reñ' coo` júu^ já!- e lafa' júu^ cuento jo cajíñ!-:

⁴ —Coo` née!~ jaang` dsea` cangór- cangobíir` mijú` quiá'r-. Jo mi~ tí lí canaañ` bír' e mijú` do, e liing'~ do cajiá' lí ngúing' fí', jo tab' cagó' jalé' e jo. ⁵ Dsu' e liing~gui e mijú` do cangotóo!~ jee~ cuu~ fí' lí ja` leáang- guóo!~ née', jo e mijú` jo lajmináb- caliáang, co' nib~ guóo!~ uó- cangotóo!-. ⁶ Jo dsu' mi~ tí lí cangíng- iee, lajmináb- caliquiú, co' ja` a' cangotóo!~ jmó^ quiá!-. ⁷ Jo e liing~gui e mijú` do cangotóo!~ jee~ mijú` 'matóo', jo dsu' mi~ cacuáng- e mijú` 'matóo' do cajmée` niúm' quiá!- e mijú` e guiá- do. ⁸ Jo e liing~gui e mijú` do cajiá' lí jlo^ uó- jo jlob^ cacuø e mijú` do mi~ cacuáng-; jo e liing~ e mijú` do cacuø lí^ lí cien mí^ lacamí^, ⁹ jogui e liing~gui do cacuø jii!~ sesenta, jo e liing~gui jii!~ treinta. Joba' fíi- i 'nú' jaléng' na' e ii' 'nú' dsea` sea loguá na!, ináa- na' jalé' júu^ quié- e!

E~ uiing~ e cajíng!- Jesús jalé' e júu^ do
(Mr. 4:10-12; Lc. 8:9-10)

10 Jo mi~ cató' e café' Jesús jalé' e júu^ na, jo cangoquiéeng' i dsea` quiá'r- do fí' lí' guiiñ~ jo cajmingí'r- dsea` do lala:

—¿Jialí' fí' jaléng' i dsea` i caseáng' na cóo'~ jalé' júu^ já'- e lafa' júu^ cuento?

11 Jo lalab cañí' Jesús quiá'- i dsea` quiá'r- do jo casí'- reiñ':

—Jo 'nú' nicangíng'na' quiá'- Fidiéé' e ngáng'na' jalé' e ja` mí' ní' dsea` jéeng'gui e dsea` í' iñ~ cãr` nifí' quiá'- lajaang` lajaang` dsea` jmigüf, jo dsu' jaléng' i dsea` na ja` cangíiñ` e ngáiñ' e jo. 12 Co' i dsea` i nicangíng` e ngáng'jiar júu^ quié' e jmiguiá'guib niñíiñ` e ningáiñ' e jo, joba' lalím` nilisea` quiá'r-; jo dsu' i dsea` i ja` niñíng` e ngáiñ' júi'~ capí' e jo, joba' nigüeáb` lajúi'~ capí' e ngáiñ` e ngáiñ' do. 13 Jo uii~ e lajob lí', joba' fíi- i jaléng' i dsea` na cóo'~ júu^ já'- e lafa' júu^ cuento; co' jaléng' i dsea` na lím-bre e jné'bre, dsu' ja` jné'r'; jogui lím-bre e núu'bre, dsu' ja` núur` o'gui ngáiñ' cajo. 14 Jo cóo'~ i dsea` na liti~ laco' júi'~ júu^ e cajíng'- Saí', jaang` i café' cuaiñ~ quiá'- Fidiéé' malí'~gui eáang' mi~ cajíñ'- lala:

Jial fa' jialgui la núur` dsu' ja` e ningáiñ',
jogui fa' jialgui la jóør- dsu' ja` e ninír`.

15 Dsucó' jmang'- e ja` dseem'ba' í' dsí' i dsea` seeng' fí' la;

jogui jnái'bre loguar~ co' ja` iñ~ ninúr-,
jogui jnái'bre jminir~ cajo co' ja` iñ~ nijóør-,
jo lajobi ja` cuóøng` ningáiñ' júi'~ cóo',
jo lajobi cajo ja` niquí'- jíng' yaaiñ~ fí' quinií-
e laco' jnea~ nijmi'leáan^re.

16 'Joba' fíi- i 'nú', dsea` nilíng'na' dsea` quié'e, juguíá'~jiu quí'na', co' seab` jminí'na' cóo'~ e

cuóong` jóó^na', jogui seab` loguá^na' cóo~ e cuóong` núu^na'. ¹⁷ Jogui jnea~ jmitaa` óo^na' e fíim` dsea` i café` cuaiñ~ quiá^- Fidiée` malii~ gui eáang` cóo~ gui jaléng` dsea` i ée` guiá^- cali'iiñ~ ninír` lajii~ e cangíng` 'nú^' e móo~ na' jmii~ na, dsu' ja` cangár^-; jogui cali'iiñ~ e ninúr^- lajii~ e núu` 'nú^' lana, dsu' ja` canúur^- cajo.

Mi~ cajíng` Jesús e` guóng` e júu^ quiá^- i dsea` bí mijú` do

(Mr. 4:13-20; Lc. 8:11-15)

¹⁸ 'Núu~na' júu^ quié~e, lana nijmée~duu 'nú^ júu^ e` guóng` e júu^ quiá^- i dsea` bí mijú` do. ¹⁹ Jaléng` dsea` i núu` jalé^ júu^ quiá^- jial quie` Fidiée` nifi` quiá^- dsea` jo dsu' ja` ngáiñ~ e júu^ jo, joba' jaléng` i dsea` íbing` i líng` lacó' e mijú` e ca'líng^- fí` guiá^ fí` do; có' dsifí` lanab guiée` fii~ i 'líng` jo íim~bre lajii~ e nicangáng` i dsea` do. ²⁰ Jogui e mijú` e cajiú^ fí` jee~ cuu~ do guóng` quiá^- jaléng` dsea` i tí` dsíí` núu` júu^ quiá^- Fidiée` jogui tí` dsíí` íñ~ cajo; ²¹ jo dsu' lacó' e mijú` do ja` lí` sea` lí~ nisó^ jmó^ quiá^- jmiguiá, joba' lajob líí` cóo~ i dsea` í, cateá'ba' e té'r` e siñ^ teá` cóo~ e júu^ jo; jo dsu' mi~ dsingíiñ~ e huíng` uíi~ e já^- líiñ~ e júu^ do, joba' ladsifí` lanab tú'tur e já^- líiñ~ e júu^ jo. ²² Jogui e mijú` e cajiú^ fí` jee~ mijú` 'matóo` do guóng` quiá^- jaléng` dsea` i núu` júu^ quiá^- Fidiée~, jo dsu' eáang`gui guiing~ dsíí` jalé^ ta` lí` cuu^- fí` jmigüi` la, jogui eáam` jmigóo` e cuu^- do quiá'r-. Jo có' lajob líiñ~, joba' íim^- dsíí` lajii~ e júu^ do; jo lajoba' íim^- quiá'r-, có' ja` cuør` fí` fa' e nidsicuáng` e júu^ do quiá'r- e lacó' teá`gui nisíñ^- fí` guiá^- cóo~ Fidiée`. ²³ Jo dsu' e mijú` e cangotóo^

li~ jlo^ uó̄- do guóng^ quiá^- jaléng^ dsea`i núu` júu^ quiá^- Fidié~ jogui ngám^bre jalé^ e júu^ jo, joba' eáam' dsicuáng^ quiá'r~ cóo^~ e júu^ jo. Jo i liing~ i dsea` í líiñ' laco' e mijú` e cacuø' laji` cien mí^ lacamí^ do, jogui i liing~gui i dsea` do líiñ' laco' e mijú` e cacuø' jíi^ sesenta mí^ lacamí^, jogui i liing~gui líng' laco' e mijú` e cacuø' jíi^ treinta mí^ lacamí^.

Coo` júu^ já^- e lafa' júu^ cuento quiá^- onuu` guíi^-

²⁴ Jo mí~ cangí jo, cajíng^ gui Jesús casí'r~ jaléng^ i dsea` ngí cóo'r~ do coo`gui júu^ já^- e lafa' júu^ cuento jo cajíñ^-:

—Lalab líí mí~ Fidié~ quier' nifí quiá^- dsea`: Jo e jo líí laco' jaang` dseañu^ i cangojni^ micui'iee` jlo^ fí lí~ nicajír~; ²⁵ jo dsu' lajee` uóøb` caguié~ jaang` i 'ní' ní~ quiá^- i dseañu^ í jo cangoteá'r^ mijú` onuu` guíi^- fí jee~ mijú` cui'iee` quiá^- i dsea` do, jo mí~ cangí jo caquim^-tur. ²⁶ Jo mí~ tí lí~ canaang` cacuáng~ e mijú` cui'iee` do jo canaang` ca'ia` láa' quiá^-, jo mifíng` cajném^-bi cajo e onuu` guíi^- do. ²⁷ Joba' i dsea` jmóo` ta~ quiá^- e cui'iee` do caguijmée^bre júu^ i dsea` fii~ do cuaiñ~ quiá^- e onuu` guíi^- e nica'iaang` do, jo lalab casí^-reiñ' do: “Fíi'ii', jmang^- mijú` jlob^ e caguijni^ 'nu` fí ni~ guóo^~ uó̄ quiá^- do. Joba' ¿jie` lí~ cajá^- jú` quiá^- e onuu` guíi^- e nica'iaang` do?” ²⁸ Jo lalab cañíi` i dsea` fii~ do quiá^- i dsea` 'léeng^~ quiá'r~ do: “Dsea` i 'ní' ní~ quié^-baa, íb` lí^ dsii~ i cajmée` lajo.” Joba' cañíi`tu i dsea` 'léeng^~ do quiá^- fii~ jo casí^-reiñ': “Cuø` 'nu` júu^, fíi', e nidsisé^naa' jalé^ e onuu` guíi^- do.” ²⁹ Joba' cañíi`tu i dsea` fii~ do quiá^- i dsea` 'léeng^~ quiá'r~ do: “U~, co' fíng song

cagüitøø¹ e onuu` do, jo la quie¹ tí e cui'iee` dob dseáang¹ nigüitøø¹ jóng. ³⁰ Jøba' guiá¹-gui güisée¹ lado jo güicuaang` coliang` cartí mi¹ nití¹ í¹ e nihuí¹ e cui'iee` do; jo i dsea` i nisín¹ n i nisítang` e jo, nifí¹ ire e nisø¹r- la'uii¹ e onuu` guí¹- do jo niguiár¹ tá¹- có` nibøø` jo ngí jo nitó¹r` jì; jo mi¹ ningí, joguiba' nisítíiñ¹ e cui'iee` do jo nitá¹r- ée` quiá¹."

Coo` júu` já¹- e lafa' júu` cuento quiá¹- coo` mijú` e sii` mostáa¹

(Mr. 4:30-32; Lc. 13:18-19)

³¹ Jo casí¹-gui Jesús jaléng¹ i dsea` quiá¹r- do cóo¹- e júu` lajob cajo jo cajín¹':

—Lalab líí mi¹ Fidiée¹ quier¹ nifí quiá¹- dsea`: Jo e jo líí la líí coo` mijú` e pí¹ e éang¹ e sii` mostáa¹ e jní dsea` fí guóo¹ uó¹ quiá¹r-. ³² Jo e já¹- e mijú` jo pí¹gui eáang¹ lajee¹ lajalé¹ mijú`, jo dsu¹ mi¹ nicuáng¹, latí coo` 'ma` féb¹ tí, jo cuø` quiá¹- jaléng¹ tá¹ e jmo¹'re' sií¹-re' fí lacaang` guo¹ quiá¹-.

Coo` júu` já¹- e lafa' júu` cuento quiá¹- quie¹ iñí¹

(Lc. 13:20-21)

³³ Jo casí¹-gui Jesús jaléng¹ i dsea` quiá¹r- do cóo¹- e júu` lajob cajo jo cajín¹':

—Jo lalab líí mi¹ Fidiée¹ quier¹ nifí quiá¹- dsea`: Jo e jo líí la líí quie¹ e cáng¹ jaang` dseamí fí jee¹ ca¹ iñí¹ quiá¹r-. Jo cóo¹- jíí¹ capí¹ e quie¹ dob jmóo¹ e róo¹- jalé¹ e ca¹ iñí¹ do.

E uing` e café¹ Jesús cóo¹- júu` já¹- e lafa' júu` cuento

(Mr. 4:33-34)

³⁴ Jo jmang¹- cóo¹- júu` lanab caféng¹ Jesús jaléng¹ i dsea` ingí cóo¹r- do, jo jíí¹- coo` júu` quiá¹r- fa' ja` café¹r- cóo¹- e júu` lajo. ³⁵ Jo e júu` na caliti¹

lí^ laco'gui la júu^ e caguaí Saíi^ maliñ~gui eáang',
jaang`dsea`i café' cuaiñ~ quiá'- Fidiée` mi~ cajíñ'-
lala:

Nifá'^a jmang'- júu^ já'- e lafa' júu^ cuento,
jogui nijmijnéem`baa jalé' júu^ e si' maang` lami~
jéeng`gui
latí júi'^ ie~ mi~ cajmée` Fidiée` jmigüí.

*Mi~ cajíng'- Jesús e` guóng` e júu^ já'- e lafa' júu`
cuento quiá'- e onuu` guí- do*

³⁶ Jo mi~ cangí jo, ca'ib- Jesús júu^ jaléng` i dsea`
ngí cóo'r~ do jo ca'ír- fí cóo` dsíí sinúu^ . Jo fí job
cangoquiéeng` i dsea` guitúung` do quiá'r- jo casí'r-
dsea` do e fa' nijméiñ'- do júu^ e` guóng` e júu^ e
cajíñ'- do cuaiñ~ quiá'- e onuu` guí- e cajní dsea`
fí lí liing~ ee` sijnéel' dsea`.

³⁷ Jo lalab cañí Jesús quiá'- i dsea` quiá'r- do:

—I dsea` i jni` e mijú` jlo'^ do, íb` i dsea` i jáa' fí
ñif- e líiñ` jaang` dsea` jmigüí, ³⁸ jo e fí ni` guóo'^
uó- do guóng` lafa' fí jmigüí. Jo e mijú` e jlo'^
do guóng` lafa' jaléng` dsea` i núu` jalé` ta~ quiu'
Fidiée`, jogui e onuu` guí- do guóng` lafa' jaléng`
dsea` i líng` dsea` quiá'- fi~ i 'ling'^ i 'ní' níng-
Fidiée`. ³⁹ Jogui i fi~ i 'ling'^ i 'ní' níng- Fidiée`
do, íb` i cajní e onuu` guí- do. Jogui cuaiñ~ quiá'-
e sitíng` lajii~ e cangojneã do guóng` lafa' mi~ tí
lí ni'ling- jmigüí. Jogui jaléng` i sitíng` lajii~ e
caroo` do, íb` jaléng` ángeles i líng` guotii~ Fidiée`.
⁴⁰ Jogui lí^ laco' sitíng` e onuu` guí- do jo nidsitoo'^
fí ni` jí e nicó, lajob cajo nidsijée` mi~ tí lí ni'ling-
jmigüí. ⁴¹ Co' jnea~, dsea` i cagüéng` fí jmigüí la
e lín'n jaang` dsea` jmigüí, nisín`n jaléng` ángeles
quíe- e jee~ jaléng` dsea` i quiá'- u ta~ quiá'- e laco'

nisitáiiñ' do jaléng' i dsea` i jmóo` e niténg' jaléng' dsea` rúng' fí' ni` dsee` jogui jaléng' gui i qui' t'ing` jmóo` jalé' e ja` dseeng'. ⁴² Jo jaléng' i dsea` í nitáiiñ' fí' lí' coo` jì' e ja` tóo` jmí` yu' jo fí' job ni'íñ' iihuí' e eáang' cartí' niquí'r` jogui nitár` majar`. ⁴³ Jo dsu' jaléng' gui dsea` i núu` jalé' ta` quiu' Fidiéé', dob ninír' e guiá' fí' lí' guing` Tiquí'ii' Fidiéé' i quiu' ta` fí' la'úng` fí' jmigüí'. Jo jaléng' i dsea` í, mí' niguilíiñ' fí' jo, nilíjiñ' lí' laco'gui la jing' iee'. Joba' fí' i 'nú', jaléng' na' dsea` sea` loguá' na', jnúu` na' júu` quié` e!

Coo` júu` já' e lafa' júu` cuento quiá' coo` e 'mo' eáang' e si'ma`

⁴⁴ Jo casí' gui Jesús jaléng' i dsea` quiá'r` do coo` gui júu` já' e lafa' júu` cuento jo cajíñ' lala:

—Jo mí' Fidiéé' quier' nifi' quiá' dsea`, lí' lafa' coo` e 'mo' eáang' e si'ma` lí' nú' uó'. Jo fíng jaang` dsea` cadsé'r' e si'ma` do, jo mí' cadsé'r' e jo, ní' dsír' e dob ni'meá` tuj` calé' catú` dseáng' e lí' cadsé'r' do; jo co' dseáng' eáam' cali'iaang` dsír' dsu' e cadsé're' do, joba' mí' niguieíñ' fí' quiá'r`, ni'ní` bre lajalé' e sea` quiá'r`, jo nilár` e uó' lí' cadsé'r' e 'mo' eáang' e si'ma` do.

Coo` júu` já' e lafa' júu` cuento quiá' coo` cuu` e 'mo' eáang'

⁴⁵ Jo casí' gui Jesús jaléng' dsea` quiá'r` coo` gui júu` lajo jo cajíñ' lala:

—Jo mí' Fidiéé' quier' nifi' quiá' dsea`, lí' lafa' jaang` dsea` i jmóo` ta` láa` jogui ta` 'nii' cuu` e jlo' jogui e 'mo'. ⁴⁶ Joba' mí' tí' lí' nijíñ' coo` cuu` e jlo' jogui e 'mo' eáang', joba' nidséiñ'

nidsi'nñi-bre lajalé" e sea` quiá'r-, jo lajoba' nilí'r`
 cuu- e nilár- e cuu~ do.

*Coo`júu^já'- e lafa'júu^ cuento quiá'- coo`'máa' e
 sáng'`ññ`*

⁴⁷ 'Lalab lí' cajo mi~ Fidiée` quier' nifi' quiá'-
 dsea: Jo e jo lí' laco' coo' 'máa' e sáng'` 'ññ` e bí
 dsea' fí' é" jmiñ jo lí'r' langúng- íng'~ 'ññ`. ⁴⁸ Jo mi~
 caróng- e 'máa' do e teáng'~ 'ññ`, joba' i dsea' jmóo`
 ta~ sáng'` 'ññ` do ni'óm-bre e 'máa' do fí' 'ni' jmiñ,
 jo fí' job ni'uóññ- jaléng'` i 'ññ` i calí'r- do jo nitáññ'
 fí' dsí' 'matá' la lí~ i guiúng-gui jogui nibíim-bre
 jaléng'` i ja' dseeng'. ⁴⁹ Jo lajob nidsijéé' cajo mi~ tí
 lí~ nití' í" e ni'íng- jmiñ; co' ie~ jo nisíng- Fidiée`
 jaléng'` ángeles i líng' guotir- e laco' ni'náññ' ca'
 jaléng'` i dsea' i ca'ée' ga' i seeng' jee~ jaléng'` i dsea' i
 ca'ée' guiú-. ⁵⁰ Jo jaléng'` i dsea' i ca'ée' ga' do nitáññ'
 fí' dsí' lí~ coo' j' e ja' tóo` jmiñ yá', jo fí' job ni'íññ'
 iihuñ cartí' niquí'r- jogui cartí' nitár- majar~ uí'~
 jalé" e nidsingúññ- do.

Júu^ e 'mñ- jogui júu^ e yáñ~

⁵¹ Jo cajmingí'- gui Jesús jaléng'` i dsea` quiá'r- do
 jo casí'- reiñ' lala:

—¿Su nicangáng'` 'nú' jalé" e júu^ e fñ- i 'nú' na?

Joba' cañí' i dsea` do:

—¡Ngám'baa', Fí'ii'!

⁵² Jo cajíng'- gui Jesús jo casí'- reiñ':

—Mí~ jaang` tifa' quiá'- júu^ quiñ' ta~ quiá'- dsea`
 Israel jmitíññ' e quiá'- mi~ Fidiée` quier' nifi' quiá'-
 dsea`, joba' íb' tifa' i líng' laco' jaang` dsea` fii~ coo`
 'núu' e guiar' líng' langúng- íng'~ e dsé'r' e fí' sinúu^
 quiá'r- do, doñí' si 'mñ- osi yáñ~ é, co' dseáng'-
 sití'bre lajalé".

*Mi~ caguiéng'-tu Jesús fi' góor'e sii Nazaret
(Mr. 6:1-6; Lc. 4:16-30)*

⁵³ Jo mi~ catáng' Jesús e fé'r` jalé` e júu^ já'-do e lí' lafa' júu^ cuento, joba' cagüi'í'bre fi' jo,
⁵⁴ jo caquim'-tur fi' góor` lí~ sii Nazaret, jo fi' job canaang'tur e'r` jaléng'` dsea` júu^ quiá'- Fidiéé` fi' dsí' sinúu^ guá'- quiá'- dsea` góor` dsea` Israel e si' fi' jo. Jo lajalém'` i dsea` i núu` e júu^ quiá'r- do, eáam' dsigá` dsíiñ'` jo fé'r` lala cuaiñ~ quiá'- dsea` do:

—¿Jie~ fi' lí~ cajmitúing` i dseañu'` na lajalé` e tiiñ` na? ¿Jial tiiñ` jmóor` jalé` e lí` e quí'r~ jmí~ e dsigá` dsí' dsea'? ⁵⁵ Jo ¿su o' i nabi jóo` Sé^ i líng'` tí'ma` i seeng` fi' la, jogui niquiá'r^ sii Yá^? Jogui i nabi rúng'` Tiáa~ cóo'`gui Sé^ jogui Simón cóo'`gui Judas, ⁵⁶ jogui labi neáang` i rúñ` dseamf` do jee~ jneaa~aa' cajo. Jo i dseañu'` na ja` ñí` jial jmóor` e tá' tting`lir.

⁵⁷ Jo jaléng'` dsea` i teáang- do lajob fé'r`, joba' ja` iñ~ fa' já'- calíñ- dsea` do. Jo dsu' Jesús cajíñ'- casí'-reiñ' lala:

—Doñí` jiéb'` jmi'gó` dsea` jaang` dsea` i fé'` cuaiñ~ quiá'- Fidiéé`, dsu' fíng catí` fiñ` góor`, jíi'~ jaang` jo` ií` jmi'gó` ír` jogui lajobi fíng catí` fi' quiá'r- cajo.

⁵⁸ Jo e fi' jo ja'`leáang- jalé` lí` e quí'r~ jmí~ e dsigá` dsí' dsea` cajmée` Jesús, dsuco'` ja` já'- calíng- dsea` ír`.

14

*Mi~ cajúng- Juan i seáang` dsea` jmí`
(Mr. 6:14-29; Lc. 9:7-9)*

¹ Jo ie~ jo niseeng` jaang` dseata~ dsea` féng'` i sii Herodes i quiu'` ta~ latøøng- lí` se' Galilea. Jo i

dseata` í, mi~ caliñir` lajii~ júu^ e fé` dsea` quia`-
Jesús, ² joba' lalab casí'r- i dsea` i jmóo` ta~ quia`r-
do ie~ jo:

—Jangám- i nab i Juan i lami~ seáng` dsea` jmi~
jo e nicajib`tur calé` catú-. Joba' eáam` quí`r~ jmi~
côo` jalé` e lí~ e dsigá` dsí` dsea` e jmóor`.

³⁻⁴ Jo ie~ lami~ jéeng`gui do i dseata~ Herodes
do 'nañib` cataiñ'- i Juan do. Jo caquiur` ta~ e
cañung` dsea` do cóo` ñí` cadena fí` dsí` 'nañí`
uí` i dseamí` i sii` Herodías i calí` dseamí` quia`-
Lii` rúng` dsea` ngáang` cóo` i dseata~ Herodes do.
Co` ie~ jo i Juan do cajím` bre dseata~ Herodes jo
casí'r- e ja` catíng- e jmóor` e jéeiñ` lafa' dseamí`
quia`r- oo~ dseañu` rúñ` i ngáang` cóo`r~ i sii` Lii`
do.

⁵ Jo mi~ canúu- dseata~ Herodes e júu^ jo, joba'
dseáng` lami~ iñ~ nijngám`-bre i Juan do, jo dsu'
ja` cajméer` lajo co' 'góm`-bre jaléng` dsea` fi~; co'
lajim` dsea` já` líiñ` e i Juan do líiñ` jaang` dsea` i
fé` cuaiñ~ quia`- Fidié~. ⁶ Jo jo` huóø- ngó- mi~ ngí`
jo mi~ catí` jmi~ quia`- dseata~ Herodes e cadsí'r-
jii`. Jo i Herodías do niseeng` jaang` simí` quia`r-,
jo i simí` í` cagui`ur` e cadséiñ` dseáng`- fí` quini`
lí` neáng` i dsea` simíng` do. Jo co' eáam` catí` dsí`
i dseata~ Herodes do lajii~ e cajméé` i simí` do,
⁷ joba' casí`-reiñ` do e dseáng`- nicuø`-bre lí` doñí`
e mí`-biñ` do. ⁸ Jo i simí` do, co' niteáaiñ` júu^ quia`-
niquia`r~, joba' casí'r- i dseata~ Herodes do lala:

—Cuóø` jnea~ mogui~ Juan i seáng` dsea` jmi~ e
iu~ fí` dsí` cóo` huí`.

⁹ Jo dsu' i dseata~ Herodes do fi`ib` eáang` calíiñ`
mi~ canúur- e júu^ jo lifa' jo` ñir` e~ jmé`-bre, co'
jéem` nicacuø` júu^ quia`r- fí` quini` i dseamí` do

jogui fí' quini' i dseá`simúng' do e nicuó'`breiñ' do lí' doñí' ee` mí`biñ'. Joba' jo` e m'í' caliseá' quiá'r` jo jíi'~ lajob cajméer`. ¹⁰ Jo caquiá'r' ta` dseá' quiá'r` e caquiá'`biñ' mogui' i Juan do catí' lí' iuuiñ` dsí' 'nuñí'; ¹¹ jo iá' fí' coo` dsí' huíb' cacór` jo cacuø'r' i dseam' do, jo í'guib cangúng' fí' jaguó` niquiá'r' e huí' do.

¹² Jo mi~ cangí' jo, caguilíng` jaléng` dseá' quiá'- i Juan do e fí' jo, jo cató`bre i 'líi~ do e cango'áang`neiñ'. Jo mi~ cangí' e ca'áaiñ` dseá' do, jo cangolíim`bre cangojmée'r' júu^ Jesús quiá'- lajíi'~ e nicalí' do.

*Mi~ cahéng' Jesús 'ñiá`mil dseá`
(Mr. 6:30-44; Lc. 9:10-17; Jn. 6:1-14)*

¹³ Jo mi~ caliñí' Jesús e nicajngam' dseá' Juan i seáang` dseá' jmíi` do, joba' cagüi'í'bre 'ñia'r' e fí' lí' táaiñ` do jo cangór` fí' coo` lí' ja` ii` 'ga' lí' dseá' seeng` e iuuiñ` fí' dsí' coo` móo'. Jo dsá' mi~ caliñí' jaléng` dseá' i seeng` có` quiá'- do e ningóo' Jesús, joba' dsifib' cangolíiñ` fí' lí' lí' ngóo' dseá' do lifa' la tóo` guóo'~ uób`. ¹⁴ Jo mi~ tí' lí' cagüi'í' Jesús e fí' dsí' móo' do, dob niteáang` i dseá' 'leáang` do, jo calí' fíi` líim`bre jaléng` i dseá' do jo cajmi'leáam`bre lajaléng` dseá' dsée'~ i jéeiñ' do. ¹⁵ Jo co' ie~ jo ningóo' canuub`, joba' i dseá' quiá'- Jesús do cangoquiéeiñ' fí' lí' sing' dseá' do jo lalab casí'`reiñ':

—Fí'ii', nicanuub` la, jo jíi'~ jaang` dseá' neáaiñ' có` quiá'- la, fa' ni'í'`ba' júu^ jaléng` i dseá' na e güiguilíiñ` fí' lí' lí' neáang` dseá' jo fí' job nidsileáar' capí'` e nidó'r`, co' ja` e sea` fí' la.

16 Dsu' mi~ canúu~ Jesús lajō, lalab cañír` quiá'-
i dsea` quiá'r~ do:

—Ja` 'né- dsilíng~ i dsea` na e nidsi'néer~ e dór~,
co' 'núb` 'né- cuó`^na'r e jō.

17 Jōba' cañíi` i dsea` quiá'r~ do lala:

—Jíi~ 'ñiá` iñí`^ cóo`~gui gáng~ 'ñu, jíi~ jōba' sea
quí-naa' lana.

18 Jōba' lalab cañíi`tu Jesús quiáiñi~ do:

—Cuóó`~du' jnea~ e jō fí' la.

19 Jōba' caquiú` Jesús ta~ i dsea` fñng' do e
nigüeáiñ` tá~ có` nibøø~ fí' jee~ ñii. Jō mi~ cangí
jō, catíng~ Jesús laji` 'ñiá` e iñí`^ do cóo`~gui laji`
huáang~ i 'ñu do jō cajóør~ fí' yú`^ jmigüi, jō lajōb
cacuó'r~ gui'máang`^ Fidiéé` quiá'- jalé` e do. Jō
ngí jō, cafiim`bre e iñí`^ do jō cacuó'r` i dsea` quiá'r~
do, jō íguib cajmée` guiée`^ jee~ jaléng` i dsea` i fñng'
do. 20 Jō lajüü` i dsea` do cagó'r` guiú`^ ie~ jō car`
calitaaiñ~. Jō mi~ calí` gó'r`, caseám~bi guitu`gui
'matá` jalé` 'ná`^ iñí`^ cóo`~gui jalé` 'náng`^ i 'ñu do.
21 Jō lajee` lajüüng` dsea` i cagó` do ie~ jō tíir` 'ñiá`
mil yaang~ dseañu`, jō ja` li'íng`^ dseamí cóo`~gui
jaléng`^ jiuung~.

Mi~ cangí` Jesús fí' ni~ jmü`

(Mr. 6:45-52; Jn. 6:16-21)

22 Jō mi~ cangí jō, caquiú` Jesús ta~ i dsea` quiá'r~
do e cangotáaiñ~ do fí' dsí' móo' jō nicuá'r~ e guiée`
do jéeng`guir laco` dsea` do, lajee` e táaiñ` e i'r` júu`
jaléng` i dsea` i caseáng` do ie~ jō. 23 Jō mi~ catáiñ`
e i'r` júu` jaléng` i dsea` do, jōguiba' cajgóor~ fí' cóo`
yú`^ mó' 'ñia'r` lado e cangoféeiñi~ Fidiéé`. Jō coob`
mi~ tí' lí' ca'í~ núu`, jō dobi táaiñ` 'ñia'r` e fí' yú`^
mó' do, 24 jōgui e móo' e lí' teáng`~ i dsea` quiá'r~

do ningo' huim̄ laco'gui 'ni' guóo' uó̄. Jo lajeē jo, dsíng' niroō jmī jogui ni'lea' jmī e móo' do, co' lí' lí' jiéb' í' guí laco' la ngóo' e móo' do. ²⁵ Jo ningóo' nijneáb' mī cangoquiéeng' Jesús fí' nī jmī fí' lí' ningo' e móo' e lí' teáng' i dsea' quiá'r- do jo e ngi'bre cangáin'- e fí' nī jmī do. ²⁶ Jo mī tí' lí' cangá' i dsea' do e ngí' Jesús nī jmī, joba' ladsifí' lanab ca'óor' e cafóin' jo cajín'-:

—iJaang` dsea` guíb` do!

²⁷ Dsu' Jesús cañir` quiá'- i dsea' quiá'r- do jo casí'-reñ':

—iTeá' teáng' óona', co' jneab~ la, jo ja' fóong'~na'!

²⁸ Joba' cañí' Tú^ Simón quiá'- dsea' do jo cajín'-:

—Fí'i, song já'- e 'nu', joba' sí'~ jnea~ e ningii- fí' nī jmī cartí' nijín'n 'nu'.

²⁹ Joba' cañí' Jesús quiá'- dsea' do:

—Nea~ fí' la jo.

Jo lajob cajmée' Tú^ Simón, jo cajgám-bre lí' dsiín^ fí' yú^ e móo' do jo cangoquiéeiñ' fí' lí' sing' Jesús. ³⁰ Jo dsu' lajeē ngóor' ngir' nī jmīb' mī calilí'r^ e dsíng'- bíng- guí e í' do, joba' cafóm'bre; jo mifíng' ninaang' dsi'am'bre jóng, joba' ca'óor' jo cajín'-:

—iLeang- jnea~, Fí'i!

³¹ Jo dsifí' lanab catíng- Jesús guoo' Tú^ Simón e laco' ja' nidsi'aiñ' do jo casí'-reñ':

—iJialí' dseáng'- ja' 'ga' lí' já'- lín' júu^ quié-e, jogui jialí' tú- ca'í' o'!

³² Joba' mī tí' lí' cajgóor- laji' huáaiñ- do e fí' yú^ móo' do, ladsifí' lanab ca'uáang- e í' guí. ³³ Jo jaléng' dsea' quiá'- Jesús i caguiaang- do i teáng'-

dsíí e móo' do canaaíñ` s'í'r` uó` jnir` fí' quini` dsea` do e jmiféng'` neiñ' jō cajíñ`-:

—Dseáng'` e jáb'` e 'nab` lán'` i Jōó' Fidiéé` dsea` guiiñ` ñíí'`.

Mi` cajmi'leáang` Jesús jaléng'` dsea` dsée'` fí' Genesaret

(Mr. 6:53-56)

³⁴ Jō cacua'bre e guiéé' do e teáng'` tur fí' dsíí móo', jō caguiliñ` fí' cōó' lí' sií Genesaret. ³⁵ Jō mi` calilí'` jaléng'` dsea` i seeng` fí' jō e dob táang` Jesús, dsifí' lanab cani'r` júu` fí' la'úng` fí' lí' se' e fí' jō jalé' e júu` jō. Jō jaléng'` i dsea` í` cangolíñ` cangojéiñ` jaléng'` dsea` dsée'` i seeng` quiá'r` fí' lí' táang` Jesús, ³⁶ jō camí'r` dsea` do fí' e fa' capí'` 'ni'` s'ib'` dsea` do nigü'r`-; jō jaléng'` i dsea` i lí'` güi'` fa' capí'` 'ni'` s'í'` dsea` do, dseáng'` 'láam` bre lajii'` jmohuí' e líiñ'.

15

Jial lí' mi` jmíróng` dsea` dsee` yaaiñ`

(Mr. 7:1-23)

¹ Jō mi` cangí' jō, cangoquiéeng' fí' lí' sing'` Jesús cōó' tú` m'íng'` dsea` Israel i líng'` dsea` fariseo cōó'` guí' tú` 'ní' m'íng'` tifa'` quiá'` júu` quiu'` ta` quiá'` dsea` Israel, jō jaléiñ` do jalíiñ` fí' Jerusalén, jō cajmingí'r` dsea` do lala:

² —¿Jiali'` jaléng'` dsea` quí'` ja` ru'r'` guóor` laco'` quí'` t'íng` 'líi'` dsea` áang'` quí'` naa'` mi` ná'` guí' e nidó'r` ir`?

³ Jō guí' Jesús cajmingí'r` i dsea` do lala:

—Jō ¿jiali'` 'nú'` cajo ja` jmí'goo`na' lajii'` ta` quiu'` Fidiéé', cō' lico'` jmití`na' lajii'` e quí'` t'íng`na' yaam`ba'? ⁴ Cō' lalab jíng'` Fidiéé': “Jmí'goo`

tiquíi' cōo' guí niquíi'~", jōgui "I dsea` i cuø' júu`
 'lí' tiquíi' osi niquíi' é, ni'í- í" e 'nē- nijúum`
 i dsea` í." ⁵ Jō dsu' 'nú' fó'na' e jaang` dsea`
 cuøøm` nisí'r` tiquíi'r` osi niquíi'r` é: "Ja` cuøøng`
 lí jmicōo'`o` 'nū` lana, cō' lajib` e sea` quié` e
 nicacuøø`-ø Fidiéé~"; ⁶ jōgui fó'na' cajo e lí` doñí`
 i` i` i` café' e júu` la jō` catíng` fa' e nijmicōo'`guir`
 tiquíi'r` osi niquíi'r` é. Jō lajōb` lí' cōo'` 'nú',
 cō' jō` jíi'~na' fa' jmití'guí' lajii'~ júu` quiá'~ Fidiéé~
 e cajme' dsea` malii'gui, jō jíi'~ e quí'~ t'ing`na'
 yaam`ba' jmití'na'. ⁷ i` jmicāang` i` la 'nú' cōo'`
 jalé' e fó'na'! Cō' jáb'~ laco' jíi'~ júu` e café' Saíi',
 jaang` i` café' cuaiñ` quiá'~ Fidiéé~ malii'gui eáang`
 mi` café'r` uii` quií'na' lala:

⁸ Jaléng' i` dsea` na lico' fé'l`bre e jmi'gór` jnea` jíi'`
 cōo'` layaang` júu` quiá'~bre,
 dsu' huím` seeng` jalé' e í dsír' do
 e jmi'gór` jnea`.

⁹ Jō dsu' jíi'~ cōo'` ja` e ta` íng` quiá'r` jial e jmi'féiñ`
 jnea` ,
 cō' lajii'~ ta` quiu' dsea` jmigüi'ba' jmóor`.

¹⁰ Jō mi` cangí` jō, cató'~ Jesús jaléng' i` dsea` i`
 siseáng' do jō casí'~reiñ' lala:

—Náu`na' jōgui jmee`na' úung` e ningáng'na' e
 júu` la: ¹¹ Jíi'~ cōo'` e í'` gø' dsea` ja` cuøøng` lí` jmé`
 e nili'liiñ` fí` quini` Fidiéé~, cō' lajii'~ júu` e uøø`
 fí` mo'oob` dsea`, jíi'~ e jōba' cuøøng` lí` jmé` e
 nili'liiñ` fí` quini` Fidiéé~.

¹² Jō cangoquíeng' i` dsea` quiá'~ Jesús do fí` lí`
 sing' dsea` do jō cajmingí'~reiñ' lala:

—Fíi'naa', ¿níi' e 'nib' catíng` dsea` fariseo e júu`
 e café'~ na 'micú'~?

13 Jōba' cañi' Jesús quiá' i dsea` quiá'r- do jō cajíñ' lala:

—Lí' doñi' ee` onuu` e sea` fi' guóo' uø` e o' Tiquié` e dsea` guing` ñifí` cajní'r, nigütøb' e jō catí' jmó` quiá'-. 14 Jōba' fí-i 'ná', ja` jmijíng` na' jaléng` i dsea` fariseo do; cō' i dsea` í líiñ' lafa' dsea` tiuung` i jeeng` jaang` gui dsea` tiuung`. Jō ja` lí' jíi` jaang` dsea` tiuung` nijéiñ` jaang` gui dsea` tiuung`, cō' fíng song cajméer` lajō, jōba' lajī huáam` bre dseáng` nijiúñ' fí íí jóng.

15 Jō mĩ` cangí' jō, cajíng' Tí` Simón casí'r- Jesús:

—Fíi, ¿já` jíe` o' jmée' jnea' júu` e` guøng` e júu` e café' na' micú'?

16 Jōba' cañi' Jesús quiá' Tí` Simón:

—Jō ¿su o'gui 'ná' mĩ` ngám' bi' júu` quié` e cajo?

17 ¿Su ja` ñi` na' e lajalé' e í' gø' dsea` ngíng' fí dsí' tu'r, jō mĩ` jō ee` ta` íng`, jōba' uøb` jóng fí lí' caluu`? 18 Jō dsu' jalé' júu` e uøb` fí mo'oo` dsea`, fí dsíib' dsea` lí` jalí` jalé' e jō, jō e jōba' jmóo` e jmíøng` dsee` yaang` dsea`. 19 Cō' fí dsí' dsea` lí` jalí` jalé' e ga` e í dsír', jō e jō quiéng` e jngang' dsea` rúñ', osi e 'lee` dsea` e güññ' cōo' dsea` i o' quiá'r-, osi e jmóo` dsea` jalé' e ja` tí' ta` e lí dsí' ngúu` táaiñ, osi jmóor` íí é, osi ngír' ta` quié' júu` e o' já', osi jmíneiñ' dsea` rúñ' é. 20 Jō jalé' e 'lí' lanab e jmóo` e jmíøng` dsee` yaang` dsea`, jō o' uí' e ja` jmitir` lajii' e quí' tíng` dsea` e ru'r guóor` ná' gui e nidø'r- ir~, cō' e jō ja` jmóo` e lírøng` dsea` dsee`.

*Mĩ` já' calíng` jaang` dseamí` i ja` líng' dsea` Israel júu` quiá' Jesús
(Mr. 7:24-30)*

21 Jò mĩ cangî jò, cagüi'îb' Jesús fí jò, jò cangór- fí lí se' Tiro cóo'~guí fí lí se' Sidón. 22 Jò mĩ caguiér- fí jò, jaang`dseamî cananea ì niguiing~ fí jò cangoquiéeiñ' fí lí sing' dsea` do e áiñ` teá lala:

—jFíi'ì, siju`dseata~dsea`féng' Daví'^, fíi- güilín'^ jnea` jò jmi'leáang- ì simí' quié'e, cò' jaang` ì 'ling'^ iuung- dsíir'!

23 Jò dsu' jii'~ camí'^ júu^ ja` e cañí' Jesús quiá'- ì dseamî do. Jò ì dsea` quiá'r- dob cangoquiéeng' fí lí siñ' jò camí'r' dsea` do jmi'ee` jò casí'r- dsea` do lala:

—Fíi'naa', síi'~go ì dseamî na güiguiéiñ', cò' jáar ta` óo` lí'^ caluu'naa'.

24 Jòba' cañí' Jesús quiá'- ì dsea` quiá'r- do jò casí'-reiñ':

—Lajii'~ ta` e casíng` Fidié` jnea~ fí jmi'güi' la e quiá'- nilaan- jaléng'^ dsea` góo'o dsea' Israel jee~ jalé' dsee- quiá'r-, cò' í líiñ' lafa' jo'se' ì sí'íng^.

25 Jò dsu' mĩ canúu- ì dseamî do lado, dsifí' lajòb cangór- cangosí' uó- jnir~ fí quini` Jesús jò casí'r- dsea` do lala:

—jFíi'ì, jiéé` o' jmicóo'~ jnea~!

26 Jòba' cañí' Jesús quiá'- ì dseamî do lala:

—Ja` dseeng` e nigui' dsea` iñí'^ e gó' jiuung~ quiá'r- jò nicuó'r- jaléng' dsii`.

27 Jòba' cañí'tu ì dseamî do quiá'- Jesús:

—Jáb', Fíi'naa', lajòb lí'; dsu' e já'- cajo e jìgui dsii' sitíng'ne' jalé' e cuí'~ iñí'^ e sojiú' fí ná'- mes~ quiá'- fii're'.

28 Jòba' cañí'tu Jesús quiá'- ì dseamî do jò casí'-reiñ':

—jDseamî, dseáng^l- lajam^l já^l- lín^l júu[^] quié⁻ e!
 Jò güilíb^l jíí^l- laco^l fó^l na.

Jò dsifi^l lajòb ca^lláang⁻ ì jòó^l ì dseamî do.

Mi[~] cajmi^lleáang⁻ Jesús ì fíing^l dsea^l dsée^l-

²⁹ Jò mi[~] cangî jò, cagüi^lñíb^l Jesús fí jò, jò caguiér⁻ fí 'ní^l guiée^l Galilea jò fí jòb cajgóor⁻ fí còó^l yá^l mó^l, jò fí jòb caguár^l. ³⁰ Jò lajee^l jò, ì fíing^l dsea^l caseáng^l e fí lí[~] guiiñ^l- do e jéeiñ^l jaléng^l dsea^l dsée^l- quiá^l-r ì líng^l doñí^l ee^l jmohuí^l; do dsea^l jlúung^l, do dsea^l tiuung⁻, do dsea^l bóøng^l- còó^l-gui jaléng^l dsea^l ì ja^l lí^l fé^l, jogui quiéem^lbi ì líng^l lí^l doñí^l ee^l jmohuí^l e jíé^l-gui, jò dob cajmi^lleáang⁻ Jesús lajaléng^l î. ³¹ Jòba^l dseáng^l- lajím^l dsea^l cangogá^l dsíir^l ie^l jò mi[~] cangár⁻ e caféb^l jaléng^l dsea^l ì ja^l lamí^l fé^l, jogui jaléng^l dsea^l bóøng^l- ca^lláam⁻bre, jogui jaléng^l dsea^l jlúung^l- cangí^lbre, jogui jaléng^l dsea^l tiuung⁻ calíjné^l-bre. Jò lajím^lbing^l do canaaíñ^l jmiféiñ^l Fidiée^l quiá^l- dsea^l Israel.

*Mi[~] cahéng^l Jesús quiá^l mil dsea^l
 (Mr. 8:1-10)*

³² Jò mi[~] cangî jò, cató^l- Jesús dsea^l quiá^l-r jò casí^l-reiñ^l:

—Eáam^l fíi⁻ lín⁻n jaléng^l ì dsea^l la, cò^l na ningóó^l 'ní^l jmíib[~] e taaiñ[~] fí la còó^l-jneá[~] jò ja^l sea^l jíí^l-còó^l e nidó^l-r. Jò ja^l iin[~]n fa^l lí^l niguiéen^l-nre lajò fí quiá^l-r e ja^l mí^l gó^l-r, cò^l dseáam^l fíng ca^luó^l-r guiá^l fí.

³³ Jòba^l lalab cañí^l dsea^l quiá^l-r Jesús jò casí^l-r dsea^l do lala:

—Jo ¿jial nijmó^oo' jóng? ¿Jie~ li~ nidsilé^ee' e nidó'~ i dsea`fñng` na? Co' tí' lab la ja` i` dsea` seeng` có~ quiá'~ la fa' i ni'ní'.

³⁴ Joba' cajmingí'~ Jesús i dsea` quiá'r~ do lala:

—¿Jó' jii'~ tí' e iñí'^ e si'mang'^ 'ná' na?

Joba' cañí' i dsea` quiá'r~ do:

—Jii'~ guiéb~ iñí'^ tí', jogui jii'~ coo` tú~ mñng'^ ñub`.

³⁵ Jo Jesús caquiur' ta~ i dsea`fñng` do e caguáin' do fí' ni~ uó'. ³⁶ Jo mifñng` catíin~ casá'r~ e guié~ iñí'^ do cóo'~gui i coo` tú~ mñng'^ ñu` do jo mifñng` cacuø'r' gui'máng'^ Fidié'. Jo lí~ jo cañim`bre e iñí'^ do jo cangíin' fí' jaguó' i dsea` quiá'r~ do, jo íguib cajmée' guié^ jee~ lajaléng' i dsea` do. ³⁷ Jo lajim` i dsea` do cagó'r' ie~ jo car` calitaaín~ guiá'. Jo carøm~bi guié~gui 'matá^ mi~ cangí jo e téel' 'ná' e caseáng'. ³⁸ Jo jaléng' i dseañu' i cagó' ie~ jo tí'bre la quiú` mil, jo ja` lí'íng^ dseamí cóo'~gui jaléng' jiuung'. ³⁹ Jo mi~ cangí jo, ca'fb` Jesús júu^ jaléng' i dsea` i caseáng' do, jogui mifñng` ca'ír~ fí' dsí' móo' jo cangór~ fí' guóo'~ uó^ lí~ se' Magdala.

16

Mi~ cali'íing~ dsea` Israel e Jesús nijmér~ coo` e li` quiá'r~ jmí`

(Mr. 8:11-13; Lc. 12:54-56)

¹ Jo mi~ cangí jo, coo` jmí~ cangolíng^ jaléng' dsea` Israel i líng` dsea` fariseo cóo'~gui i líng` dsea` saduceo fí' lí' táang` Jesús, co' iin~ e niguié'r' jial e ni'níin~ dsea` do fí' quini~ dseata~. Joba' camí'r' dsea` do e fa' nijméin~ coo` e lí~ e quiá'r~ jmí~, jo lajoba' nicuø~ lí~ e Fidiéb~ dsea` i casí' quiá'r~.

² Jo dsu' lalab cañí' Jesús quiá' i dsea` do:

—Mi~ nica'lóo~ lalab fó' 'nú': “Lana ja` jmíí nitú, co' coo` jní' fí yú^ jmigüí”; ³ jogui mi~ la'ee' fó'na' lala: “Nágujiu jmíib' nitú, co' eáang' nuu` jní' téel' fí yú^ jmigüí.” Jo song ngám'ba' guiú~ lajii~ e lí' fí yú^ jmigüí, joba' ¿jali' ja` ngáng'na' e~ nidsijéé' jmíi~ na? ⁴ Jo jaléng' dsea` seeng' jmíi~ na dsíng'~ nirøøiñ dsee~ jogui ja` jmitir~ júu^ quiá'~ Fidiéé', jogui mi'r' jnea~ e nijmee~e jalé' e lí' e quíi'~i jmíi~; dsu' ja` nijmee~e jíi~ coo` e jo fí quinir', co' nicaliseáb` e jo lamí~ jéeng'gui e cangongíng~ Jonás, jaang` dsea` i café' cuaiñ~ quiá'~ Fidiéé' malií~ gui eáang'.

Jo dob caseáaiñ' i dsea` do, jo fí lí' jiéb'` cangór~.

Jial líng' dsea` fariseo

(Mr. 8:14-21)

⁵ Jo mi~ catáng~ Jesús cóo'~ i dsea` quiá'r~ do lí' lí' 'ngóo'~ cataang` e guiéé' do, jo cadseng'~ dsíi' i dsea` quiá'r~ do e ja` iñí^ quier'. ⁶ Jo casí'~ Jesús i dsea` quiá'r~ do lala:

—Ñiing~ óo'na' cóo'~ jalé' e e' dsea` Israel i líng' dsea` fariseo cóo'~ gui i líng' dsea` saduceo, co' jalé' e e' i dsea` í lí' lafa' quie'^ iñí^.

⁷ Joba' canaang` i dsea` quiá'~ Jesús do síiñ` lajee` la'ó' yaaiñ~ jo sí' rúíñ':

—Uíi~ e ja` iñí^ lée'naa', joba' jíng'~ Fí'naa' lana.

⁸ Jo co' calilíb'^ Jesús lajii~ e síng' i dsea` quiá'r~ do, joba' casí'~ reiñ' lala:

—¿Jialí' fó'na' e ja` iñí^ quie'na'? ¿Su dseáng'~ ja` já'~ mí lím'bi' jalé' e quíi'~i jmíi~ jmóo'o? ⁹ Jo ¿su latí' lana ja` mí cangám'bi' 'nú' o'gui tóo' óo'na' cajo quiá'~ e 'ñiá' iñí^ e cajmítaan`n laji' 'ñiá' mil

dsea, jogui e jmiguiꝰbi 'matá^ caseáng- e téé~ 'ná^ quiá'- e jo? ¹⁰ Jo ¿su ja` tóo` óóna' cajo quiá'- e guié- iñí'^ e cafin-, jo cagó^ quiú` mil dsea, jogui e jmiguiꝰbi caseáng- ie~ jo? ¹¹ ¿Su dseáng'- ja` cuante ca`ba' e o' cuaiñ~ quiá'- iñí'^ e júu^ e fá'a na? Joba' fíi- i 'nú'^ e jmeáng'- í^ yaang~na' cóo~ jalé' e e' dsea` fariseo cóo~gui dsea` saduceo, co' jalé' e jo lí' lafa' quie'^ quiá'- iñí'^.

¹² Joguib mi~ calilí'^ i dsea` quiá'- Jesús do lajii~ e guóng'^ e júu^ e café' dsea` do quiá'- quie'^ iñí'^, co' e laba' sí' Jesús i dsea` quiá'r- do e nijméiñ'- do í^ yaaiñ~ e ja` niligøøiñ` cóo~ jalé' júu^ e e' dsea` fariseo cóo~gui dsea` saduceo.

*Mi~ cajíng'- Tú^ Simón e Jesús líiñ' i dsea` i sijeeng` dsea` Israel i nicá` nif' quiá'r-
(Mr. 8:27-30; Lc. 9:18-21)*

¹³ Jo mi~ tí' lí' caguié- Jesús fí' lí' se' Cesarea quiá'- Filipo, lalab cajmingi'r' i dsea` quiá'r- do jo cajíñ'-:

—¿E~ fé' dsea` uii~ quie- jnea~, dsea` i cajá- fí' ñifí- jo cagüén- n fí' jmigüi la e lín'n jaang` dsea` jmigüi?

¹⁴ Joba' cañí' i dsea` quiá'r- do jo cajíñ'- lala:

—I líing~ dsea` fé'r' e i Juan i lami~ seáng` dsea` jmib` 'nú', jo i líing~gui fé' e Líí'^ 'nú', jogui i líing~gui dsea` éeiñ` 'nú' e Jeremías osi lí'^ jaang`gui lajee` dsea` i café' cuaiñ~ quiá'- Fidiée` malí'gui eáng'.

Jo ngí jo, joba' cajmingi' Jesús i dsea` quiá'r- do jo cajíñ'-:

¹⁵ —Jogui 'nú', ¿i~ fó'na' e lín'n?

¹⁶ Joba' cañí' i Tú^ Simón do lala:

—'Nub` i dsea` i sijeeng` jnea`^, dsea` Israel, i nicá` nifí` quí`-naa', jogui` 'nub` cajo` lin` i Joo` cam`ngl`-` quíá`-` Fidiée` i seeng` lata` do.

17 Joba` cañi`tu` Jesús quíá`-` Tú` Simón jo` cajíñ`-` casí`-`reiñ`:

—Juguiá`-`jiu` quí`-`, Tú` Simón, joo` jaang`gui` dseañu` i sii` Jonás, dsuco` jii`-` jaang` dsea` jmigüi` ja` ii` mí` ca'e` 'nu` e júu` na, co` Tiquié`e dsea` guing`-`ñiff`-`bing` i nica'e` 'nu` e na. 18 Jo` jnea`-` fii`-` i 'nu` e cuu` guong` e sii` 'nu` cajo, jogui` 'nub` dsea` i niling`-` lafa' coo`-` cuu` quíá`-` tii`-` fii` quíá`-` guá`-` quíe`-e. Jo` e guá`-` e ni'uíng`-` do quíe`-e lí` lafa' jaléng` dsea` i ni'uíng`-` dsea` quíe`-e, jo` ja` sea` bí` quíá`-` 'mó`-` fa' nijmé`-` e ni'íng`-` e jo. 19 Jo` jneab`-` nicuóó`-` 'nu`, Tú` Simón, coo`-` lafa' joñi` quíá`-` ñiff`-` fí` lí` guing`-` Fidiée` i quíu`-` ta` quíá`-` lajaang`-` lajaang` dsea` quíá`-`. Joba' jalé` e ja` nicuó`-` fí` jee`-` jaléng` dsea` quíe`-e fí` jmigüi` la, ja` nicuó`-` Fidiée`-` fí` quíá`-` e jo` cajo. Jogui` lajalé` e nicuó`-` 'nu` fí` jee`-` jaléng` dsea` quíe`-e fí` jmigüi` la, joba' nicuó`-` Fidiée`-` fí` quíá`-` e jo` cajo.

20 Jo` mi`-` cang` jo, caqui`-` Jesús ta`-` i dsea` quíá`-`r` do e ja` ii`-` nisiñ` do jii`-` jaang` e íbre` líiñ` i dsea` i sijeeng` dsea` góor` dsea` Israel i nicá` nifí` quíá`-`r`.

*Mi`-` cajmée` Jesús júu` e tí` lí`-` nijngáng`-` dsea`-` ír`
(Mr. 8:31-9:1; Lc. 9:22-27)*

21 Jo` latí`-` ie`-` job` canaang` Jesús jma`-`r` júu` jaléng` i dsea` quíá`-`r` do e fí` Jerusalén` 'né`-` dséng`-`-`tur` calé`-` catú`-`, jo` fí` job` jaléng` i dsea` cóong`-` i quíu`-` ta` quíá`-` dsea` góor` dsea` Israel cóo`-`gui` jaléng` fii`-` jmidsea` quíá`-`r` cóo`-`gui` jaléng` tífa` quíá`-` júu` quíu`-` ta` quíá`-`r`, jo` jaléng` íbing` i nicuó`-` ír`

iihuí e eáang cartí nijngáin¹- dsea` do. Jo dsu¹ mi[~] nidsing⁻ 'ní jmi[~] e cajúin⁻, nijib¹tur calé¹ catú⁻.
 22 Joba¹ Tú[^] Simón cajéin[~] dsea` do lí[~] coo[~] yaain[~] jo cajim⁻ jiar dsea` do jo casí¹r⁻:

—Ja` güli¹iing[~] dsí¹ Fidié[~] e nilí lajo, Fí¹naa¹!
 Ja` catíng⁻ 'nu[~] e nilín¹- lajo!

23 Jo Jesús cangoquíein¹ calé¹ catú⁻ fí¹ quini[~] Tú[^] Simón jo casí¹- rein¹ do:

—Jéeng¹ cáanⁿ, Satanás! Ja` jnín¹~ jnea[~] fí¹. Co¹ 'nu[~] ja` ngáng¹ laco¹ jí¹ e í dsí¹ Fidié[~], co¹ lají¹ e lí¹ quía¹- dsea` jmigüí¹ba¹ ñí¹ 'nu[~].

24 Jo mi[~] cangí¹ jo, casí¹-tu¹ Jesús jaléng¹ i¹ dsea` quía¹r⁻ do lala:

—Song jí¹ dsea` iing[~] ni¹uíng⁻ dsea` quíe⁻e, joba¹ güitár¹ jalé¹ e lí dsír¹ 'ñia¹r¹ jo güiseain¹ lafa¹ crúu[^] quía¹r⁻ e laco¹ cuó¹ lí[~] e guía¹ dsír¹ e nidsingüin⁻ jalé¹ e huíng¹ uí¹ e líin¹ dsea` quíe⁻e, jo lajoguiba¹ ningír⁻ cóo¹~ jnea[~] jóng. 25 Co¹ lí[^] doñí¹ jí¹ dsea` i¹ í dsí¹ e lí¹bre nileáng⁻ 'ñia¹r¹ jee[~] jalé¹ dsee⁻ quía¹r⁻, joba¹ i¹ dsea` í¹ conguiab¹ nibíin[^] fí¹ lí[~] 'lí[^]; jogui lí[^] doñí¹ jí¹ dsea` i¹ nijúung⁻ uí¹ e líin¹ dsea` quíe⁻e, joba¹ i¹ dsea` í¹ nitím¹~bre fí[~] quini[~] Fidié[~] jóng.

26 Jo jí¹ coo[~] ja` ee[~] ta[~] íng[^] quía¹- dsea` jmigüí¹ e silí¹r¹ latøong⁻ jmigüí¹ song ja¹gui cuíin[~] jnea[~], co¹ ni¹ím⁻ quía¹r⁻ mi[~] tí¹ lí[~] nití¹ í¹ e nijúuin⁻, jogui ja¹ cuøong¹ lí¹ quír⁻ cuu⁻ e laco¹ nitíin⁻ fí¹ quini[~] Fidié[~]. 27 Dsaco¹ jnea[~], i¹ Joo¹ Fidié[~] i¹ cagüéng⁻ fí¹ jmigüí¹ la e lín¹n jaang¹ dsea` jmigüí¹, nigáab¹túu¹ e niniing⁻ 'gøng¹ quía¹- Tiquié[^]e colíng[~]gui cóo¹~ jaléng¹ ángeles i¹ líng¹ guotír⁻ mi[~] tí¹ lí[~] nití¹ e í¹ jo. Jo ie[~] job¹ mi[~] nicuøø[^] dsea` lají¹ e catíng⁻ lajaang¹ lajaain[~] lí[^] jialco¹ jí¹ lí¹ ta[~] e nicajméer¹

fí j̄m̄igüüˆ la. 28 Jo f̄iˆ-i 'núˆ' lana e i l̄iingˆ 'núˆ' la'óˆ' teáangˆ-na' la j̄m̄iˆ na ja' m̄í júungˆ-na' cartí nimóˆ-na' e nigáa' j̄neaˆ, i d̄seaˆ i cagüéngˆ fí j̄m̄igüüˆ la e l̄ínˆ'n jaangˆ d̄seaˆ j̄m̄igüüˆ, e n̄il̄ínˆ'n jaangˆ d̄seataˆ d̄seaˆ féngˆ' i quiá' taˆ.

17

Miˆ calis̄ingˆ j̄ial j̄néengˆ Jesús

(Mr. 9:2-13; Lc. 9:28-36)

1 Jo m̄iˆ canḡiˆ j̄ñáˆ j̄m̄iˆ lajo, catóˆˆ Jesús T̄úˆ Simón cóoˆ' gui Tiáaˆ j̄ogui Juan i l̄iingˆ r̄ungˆ' Tiáaˆ, jo lajeeˆ la'óˆ' yaamˆ bre cangol̄iñˆ fí cóoˆ yáˆ' móˆ' e ñíí' eáangˆ. 2 Jo lajeeˆ teáaiñˆ fí jo, i d̄seaˆ do cangárˆ j̄ial calis̄ingˆ j̄ial j̄néengˆ Jesús. Jo cangárˆ e j̄iingˆ j̄iˆ' n̄iˆ d̄seaˆ do lafa' j̄iˆ ieeˆ, j̄ogui s̄iˆ'rˆ d̄seángˆ' calité lafa' j̄iˆ e teeˆ j̄loˆ'. 3 Jo lajeeˆ j̄ob cangáñˆ Moiˆ cóoˆ' gui Lííˆ e teáaiñˆ s̄iñˆ' col̄iingˆ cóoˆ' d̄seaˆ do. 4 J̄oba' lalab caj̄ingˆ' T̄úˆ Simón e cas̄iˆ'rˆ Jesús:

—Fíiˆ, juguiáˆ o' e taangˆ naa' col̄iingˆ fí la, fa' na nijm̄éeˆ' e 'n̄iˆ 'núáˆ j̄iˆ cóoˆ' máˆ' 'maˆ, cóoˆ quiíˆ' 'n̄iˆ, cóoˆ gui quiáˆ' Moiˆ j̄ogui cóoˆ quiáˆ' Lííˆ.

5 Jo lajeeˆ gui'náˆ' fé'bi T̄úˆ Simón lado, miˆ caḡóˆ cabøøˆ j̄n̄íí' e j̄iˆ' j̄loˆ' fí l̄iˆ teáangˆ d̄seaˆ do, jo fí j̄eeˆ e j̄n̄íí' do guicanáˆ' e l̄iingˆ iˆ' guicaféˆ' jo guicaj̄iñˆ'ˆ:

—I lab j̄óoˆ' i 'neáanˆ' eáangˆ jo eáamˆ iáangˆ dsiiˆ cóoˆ'rˆ. J̄meeˆ-na' náˆ-na' júuˆ quiáˆ'rˆ.

6 Jo miˆ canúuˆ i d̄seaˆ gaangˆ quiáˆ' Jesús do lajo, dsifí lanab cas̄iñ̄iˆ' fí n̄iˆ uóˆ' j̄ogui catúˆ guirˆ, cóˆ' eáamˆ cafó̄iñˆ'. 7 Jo cangoquiéengˆ Jesús fí l̄iˆ s̄iñ̄iˆ i d̄seaˆ quiáˆ'rˆ do jo caquidsirˆ guóorˆ quiáñˆ'ˆ do jo cas̄iˆ' reiñˆ'ˆ:

—Ráang-na'; ja` f00ng'~na'.

⁸ Jo mi` caséè ì dsea` quiá'- Jesús do nir~, jii'~ jaang` ì dsea` gáng- do jo` ii` seeng` e fí do; 'ñiab' Jesús sing'gui.

⁹ Jo ngî jo cajgám-bre e fí yá^ mó' do. Jo lajee` jo caquiá' Jesús ta~ quiá'- ì dsea` quiá'r- do jo casí'-reiñ' lala:

—Ja` fí^na' jii'~ jaang` lajii'~ e cañí-na' e fí yá^ mó' la cartí mi~ nití- í' e nijí'tu jnea~, dsea` cagá-a fí ñiff- e lán'n jaang` dsea` jmigüî.

¹⁰ Jo mi~ cangî jo, cajmingî ì dsea` quiá'- Jesús do cajmingí'r- dsea` do jo cajíñ'-:

—Fíinaa', çjialí' fé' ì tifa' quiá'- júu^ quiá' ta~ quí-ii' dsea` Israel e Líi^bing' ì nijáa' nifí'gui?

¹¹ Joba' cañí' Jesús quiáñ'- do lala:

—E jáb'- e Líi^bing' ì nijáa' nifí', jo í'bing' ì niguiá-guiá- lajalé'. ¹² Jo dsu' jnea~gui fíi- i 'nú' e nicajáb- Líi^, dsu' ja` calijíi'~ dsea` ír, jo cajméeb` dsea` la tíí e já- dsíir' cóo'~ dsea` do. Jo lajob jnea~ cajo, ì dsea` ì cagüéng- fí jmigüî la e lán'n jaang` dsea` jmigüî, niñíim`baa ihuá' cajo e nicuø- jaléng' ì dsea` í.

¹³ Job mi~ calilí^ ì dsea` quiá'- Jesús do e dsea` do fé'r uii~ quiá'- ì Juan ì lamí~ seáang` dsea` jmî.

Mi~ cajmi'leáang- Jesús jaang` siming' ì iuung- ì 'ling'^ dsú'

(Mr. 9:14-29; Lc. 9:37-43)

¹⁴ Jo mi~ caguiéng'- Jesús cóo'~ ì dsea` quiá'r- do fí lí~ teáang- dsea` fíing', jo fí job cangoquiéng' jaang` dseañá' fí quini~ Jesús jo casí'r- uø- jnir~ fí quini~ dsea` do ¹⁵ jo casí'-reiñ' do lala:

—Fíi, fíi- güilín' jóo`o, co' contøom- dsea` e joñíñ, jo seab` mi~ quiñ' fí ni~ jî osi fí ni~ jmî é,

jō dseáng' eáam' íñ' iihuí'. ¹⁶ Jō nicagajéem-baa'r fí quini' dsea` quí'⁻, dsu' ja` mí cali' í fa' e nicajmi'leáang-neíñ'.

¹⁷ Jōba' cañí' Jesús jō cajíñ'⁻:

—Dsíng' ja` já'⁻ líng'na' júu^ quié⁻e, jō jmang'⁻ fí gab` iing'na' cá'na'. ¿Jial nité' lí'i e niliseen` cóo'⁻ 'ná'? Nijéeng'na' i siming' do fí la.

¹⁸ Jō mí caguilíñ' fí lí' sing' Jesús, jōba' cajíng⁻ dsea` do i 'líng'^ i iuung⁻ dsí' i siming' do jō lajōb cangohuíng⁻ i 'líng'^ do ladsifí lana, jō ca'láam⁻ i siming' do. ¹⁹ Jō mí cangí jō, i dsea` quiá'⁻ Jesús do casíñ' cóo'⁻ dsea` do lajee` la'ó' yaaíñ' jō casí'r⁻ dsea` do lala:

—¿E` uiing` quiá'⁻ e ja` cali'⁻ jnea'^ fa' e cajmi-huíng⁻ naa' i 'líng'^ i lamí' iuung⁻ dsí' i siming' do?

²⁰ Jōba' cañí' Jesús quiáíñ'⁻ do:

—Cō' ja` 'leáang⁻ já'⁻ líng'na' júu^ quié⁻e, jō uí'⁻ e jōba' e ja` cali'⁻na' cajmee⁻na' lajō; jō dsu' jnea~ jmítaa` óóna' e fa' capí'^ba' já'⁻ líng'na' júu^ quié⁻e fa' lacō' jí'⁻ e tí' cōo' mijú` mostáa^, jōba' cuøøm` lí quiu'^na' ta~ cōo' mó' e nilisíng⁻ ée^ quiá'⁻ lí' sí', jō nidsíng' 'ñia' fí lí' jié' faco' lajō. Jō song lajō, jōba' doñí' eeb` quí'⁻na' jmí~ jmee⁻na' jóng. ²¹ Cō' la'leáang' cóo'⁻ e féng' dsea` Fidié` joguí jmóor' ayuno, quí'⁻ jmí~ e ni'uøng' i 'líng'^ lado.

*Mí cajméetú Jesús júu^ e nijnga'⁻ dsea` quiá'r⁻
(Mr. 9:30-32; Lc. 9:43-45)*

²² Jō mí cangí jō, lajee` e ngí Jesús cōlíng⁻ cóo'⁻ dsea` quiá'r⁻ fí lí' se' Galilea, lalab cajíñ'⁻ casí'r⁻ i dsea` quiá'r⁻ do:

—Tí' lí' niguiéeb' í' e jnea~, dsea` i cajá⁻ fí ñiff⁻ e lín'n jaang` dsea` jmígüí, tí' lí' nitén'n fí jaguó

dsea` jmigüí²³ jo cartí nijngám' bre jnea~. Jo dsa' mi~ nití' 'ní jmí~ lajo nijíb'túu calé' catú'.

Jo mi~ canúu~ i dsea` quiá'- Jesús do lajo, joba' dsíng' fí'í calíñ'.

Mi~ caquí' Jesús cuu~ e catíng' guá'-

²⁴ Jo mi~ cangí jo, caguié tu Jesús fí Capernaum colíng~ cóo' i dsea` quiá'r do. Jo i dsea` i jmóo ta~ mí cuu~ e catíng' guá'- caguilíñ' fí lí' sing' Túsímon jo cajmingí'r dsea` do jo cajíñ':

—¿Su ja` quí' tifa' quí' lajii~ cuu~ e catíng' niquí' fí' guá'-?

²⁵ —Quíñ' dsea` do e jo —cañí' Túsímon.

Jo mi~ tí lí' calí' Túsímon fí dsí' sínáú, cuóong' Jesúsbi canaaiñ' sí'r dsea` do jo cajíñ':

—Janú', Túsímon, ¿jal í' o' cuaiñ' quiá'- e júu' la? Jo jee~ jaléng' dseata~ i quiá' ta' fí jmigüí la, ¿i' quiá'- jaléng' catíng' nicár' cuu~ e 'né' qui' dsea` jogui e cuu~ e íng' dsea'? ¿Su quiá'- jaléng' dsea` góor` osi quiá'- jaléng' dsea` i jalíng' fí caluub' é?

²⁶ Joba' cañí' Túsímon jo cajíñ':

—Mó' quiá'- jaléng' dsea` i jalíng' fí caluub'.

Joba' cañí' tu Jesús quiá'- dsea` do jo cajíñ':

—Joba' lajii~ e catíng' 'nua, ja' 'né' qui' jii~ coo'.

²⁷ Jo lico' ja' í' dsí' i dsea` do ga` uii~ qui' ii', gua' fí lí' néé' guiéé', jo güibí' 'máa' qui' jo guíng' i la'uii~ 'ñu' i nilí'; jo fí' mo'oo~ i 'ñu' í' nisícu' coo' cuu~, jo cóo' jii~ e job nitíng' guíá' quiá'- e nigüiquí' qui' ii' quiá'- lajii~ cuu~ e catí' naa' niquí' ii' quiá' guá'-; joba' quie' e cuu~ do jo güiquí' jóng.

18

¿I' i niing-gui fi' quini Fidié'?

(Mr. 9:33-37; Lc. 9:46-48)

¹ Jo ie~ job cajo jaléng' dsea` quiá'- Jesús cango-quiéeiñ' fi' li~ sing' dsea` do jo cajmingí'r- lala:

—Fii'naa', ¿i~ líng- 'nu' i niing-gui mi~ Fidié' quier' nifi' quiá'- dsea` jmiǵüí'?

² Joba' Jesús cató'r- jaang` jiuung~ jo casíñ' i jiuung~ do fi' guiá'^ jóo` laco' la teáng- i dsea` quiá'r- do ³ jo casí'-reiñ' do lala:

—E jáb'- e fii'-i 'nú' e song ja` nijmisíng^na' lajii'- e í' óo'na' jogui song ja` ni'uíng- na' laco'gui la líng' jiuung~, joba' ja` nilí'na' jóng e Fidié' nicár` nifi' quíi'-na'. ⁴ Jo lalab fii'-i 'nú'; ii' dsea` i ja` jmiféng' 'ñia' jogui ni'uíng-tur laco'gui la líng' i jiuung~ i sing' la, joba' í'bing' i niing-gui mi~ Fidié' quier' nifi' quiá'- dsea`. ⁵ Jo ii' dsea` i íng' i dsea` i líng' laco' i jiuung~ la la'eáang' cóo'~ jnea~, joba' güiliñir' guíá- e jneab~ íñ' cajo.

Jial dseáng' e niíuung' dsea` fi' ni~ dsee-

(Mr. 9:42-48; Lc. 17:1-2)

⁶ Jo fii' guíi' 'nú' e doñi' ii' dsea` i nijmé- e niténg' fi' ni~ dsee- jaang` jiuung~ i nijá'- líng' júu^ quié-e, joba' guíá-gui quiá'- i dsea` í' e nidsibíng' 'ñia'r' fi' é' jmiñí'^ e guineaang~ cóo` cuu~ 'loo' fi' moluur~ e laco' nineáiñ'- cartí' uii'. ⁷ Jo gab' líí' quiá'- jaléng' dsea` jmiǵüí' e sea` cóo'~ jalé' e jmiróng' yaaiñ~ dsee-, có' cóo'~ jalé' e job e tóíñ' fi' ni~ dsee-. Jo dsu' e ngi~ fii'b^ i dsea` i jmóo` e niténg' dsea` rúíñ' fi' ni~ dsee-.

⁸ Joba' fii'-i 'nu' e doñi' si guóo' osi tii'~ nijmé- e nitén' fi' ni~ dsee-, joba' jmeáng-gui quíi'- e

niquiá'ba' jo nigüibi' cartí lí huíí. Co' guiá-gui quíí' e niguøñ' fí lí guiá- e ja'sea' guóo' osi tíí' é e laco'gui niguøñ' e la'ieb' guotíí' fí lí coo' jí e ja' tóo' jmíí' yu'. ⁹ Jogui song jminí' nijmé- e nitén' fí ní' dsee-, joba' jmeáng-gui quíí' e niguí'ba' jo nigüibi' cartí lí huíí. Co' guiá-gui quíí' e niguøñ' fí lí guiá- e coo' jminí' e laco'gui niguøñ' cōo' laj'í tú- jminí' fí lí coo' jí e ja' tóo' jmíí' yu'.

Coq' júu^ já'- e lafa' júu^ cuento quiá'- jaang' jo'se' i si'íng^

(Lc. 15:3-7)

¹⁰ 'Joba' fíí-guúí 'nú' e ja' jmi'uóng'na' jíí' jaang' i jiuung~ na. Co' jnea' fíí' 'nú' e fí' ñifí' seeng' ángeles quiá'r- i neáng' colíng' cōo' Tiquié'e dsea' guíng' fí jo. ¹¹ Co' jnea', i dsea' i cajá' fí' ñifí' e lín'n jaang' dsea' jmigüí, cagá'a e laco' nilaan- jaléng' dsea' i si'íng' uíí' dsee' quiá'r-.

¹² 'Jogui ¿jial líng' 'nú' e júu' la? Facō' jaang' dsea' áaiñ' cien jo'se', jo calíng'íííñ' e cango'íng' jaang' i jo'se' do quiá'r- fí' jee' mó', ¿su ja' nitiúung'-tear i noventa y nueve do cateá' la- jee' nidsér- e nidsi'néiñ' i jaang' i cango'íng' do quiá'r'? ¹³ Jo song cadséiñ' í, joba' eáng'gui nili'íáng' dsír' uii' quiá'- i jo'se' i cadséiñ' do laco'gui quiá'- i noventa y nueve i caseáaiñ' do. ¹⁴ Jo lajob cajo, co' Tiquí'íi' dsea' guíng' ñifí' ja' iíñ' fa' e nidsi'íng' jíí' jaang' i jiuung~ na.

Jial 'né- íng- dsea' dsee- quiá'- jaang' dsea' rúíí'
(Lc. 17:3)

¹⁵ 'Jo fíí-guúí 'nú', song jaang' dsea' rúng'na' calíng'íííñ' e cajmeáiñ' 'nú' ga', joba' guiá-gui e síng'na' røø' lajee' co' gáng'na', jo nifí'na're e~

uuing~ quíá'- e cajméer` e ga` do quíi~na'. Jo song canuub` júuiñ^ quíá'- lajii~ e cajméer` do, joba' røøb` niliseeng`tu' cóo'r~. ¹⁶ Jogui dsu' song ja` ni'f` júuiñ^ lajii~ e nifí`re do, joba' nitó`na' jóng gáng- gaang` dsea` jiéng` i tíi` ni~ i nija'- júu^ røø` quíá'- lajii~ e nisiing`na' do. ¹⁷ Jogui song la lám`bre líiñ` e ja` ni'f` júuiñ^ cóo` i dsea` í, joba' cóo` dsea` quíá'- Dsea` Jmáam` 'né-` ngíng- e júu^ jo. Jogui song o' cóo` dsea` í` ni'f` júuiñ^, joba' 'né- e nita~ óo`na' e i dsea` í` ja` cuiñ` Fidiéé` jogui líiñ` laco' jaang` dsea` i jmóo` ta~ mí` cuu- e catíng- dseata~ guing~ fí` Roma.

¹⁸ Joba' jnea~ jmitaa^ óo`na' e jalé` e ja` nicuó`na' fí` jee~ jaléng` dsea` quíé- e fí` jmigü` la, ja` nicuó` Fidiéé` fí` fí` ñifí- cajo. Jogui lajalé` e nicuó`na' fí` jee~ jaléng` dsea` quíé- e fí` jmigü` la, joba' nicuób` Fidiéé` fí` cajo.

¹⁹ Lalab fíi` guí` 'nú` cajo, fa' gám- 'nú` fí` jmigü` la nisiing`na' røø` quíá'- lajii~ e nimí`na' Fidiéé`, joba' Tiquié` e dsea` guing~ ñifí- nicuó`bre 'nú` lajii~ e nimí`na'r do. ²⁰ Cofa' gáng- osi gaang` dsea` siseáiñ` e jnea~ quíé- nifí` quíá'r~, joba' dob seeng` jnea~ jee~ ír` fí` lí~ siseáiñ` do cajo.

²¹ Jo ie~ jo cangoquíéeng` Tú^ Simón fí` lí~ sing` Jesús jo cajming`r~ dsea` do:

—Fíi`, ¿jó` ya' 'né-` ín`n dsee-` quíá'- jaang` dsea` rún`n song cajmeáiñ` jnea~ ga? ¿Su jii~ guíé-` néeb` jii~?

²² Joba' cañí` Jesús quíá'- Tú^ Simón jo casí`-reiñ`:

—Ja` fíi`-i 'nu, Tú^ Simón, e jii~ guíé-` néel~, co' cartí` setenta ya' siete néel~ 'né-` ín`n dsee-` quíá'- i dsea` rún` do song lí~ 'né-` lajo.

*Coo`júu`já'- e lafa' júu` cuento quiá'- jaang` dsea`
'léeng`~*

²³ Jo cajíng'~gui Jesús casí'r~ i dsea` quiá'r~ do e júu` la:

—Jo mi~ Fidiéé` quier` nifí` quiá'- dsea`, líí laco' mi~ jaang` dseata` dsea` féng' i niseeng` dsea` 'léeng`~ i nirøøng` quiá'r~. Jo mi~ catí` í' e camíí` i dseata` do cuu` quiá'r~ lajíí'~ e nirøøng` i dsea` 'léeng`~ quiá'r~ do, ²⁴ joba' i dseata` dsea` féng' do cató'r~ jaléng' i dsea` 'léeng`~ i nirøøng` quiá'r~ do e laco' nidsicóoíñ` do lajíí'~ e røøíñ`. Jo la'uii~ cató'r~ i dsea` 'léeng`~ i nirøøng` jmiguiá' cuu` quiá'r~. ²⁵ Jo co' ja` ee` cuu` sea`gui quiá'- i dsea` 'léeng`~ do fa' e nija'r` i fiir~ do, joba' i fiir~ do caquiá'r` ta` e nidsi'nim~ i dsea` 'léeng`~ do colíng` cóo'~ dseamí` quiá'r~ cóo'~gui jaléng' jóor` cóo'~gui lajalé' e sea` quiá'r~ e laco' niquír~ lajíí'~ e røøíñ` do. ²⁶ Jo dsu' i dsea` 'léeng`~ do dsifí` lanab casí'r` uó` jnir~ fí` quini` i fiir~ do jo camí'r` dsea` do jmi'ee` jo casí'r` dsea` do lala: “Fíí`i, míí`i jmi'ee` 'nu` e nijmée'` féng' a' uii~ quié` e e ja` mí` seeng` quié` e lana e cuu` e røøñ` quií'~, dsu' niquí`baa lajalé' e røøñ` do quií'~ mi~ niliseeng` quié` e.” ²⁷ Jo i fií` do calí`b` fíí` líííñ` i dsea` 'léeng`~ i røøng` quiá'r~ do, joba' jo` camíí`guir` cuu` quiá'r~ jo caleáam`breiñ` do cóo'` júu` røø`.

²⁸ Jo cangám'~ i dsea` 'léeng`~ do, jo lajee` ngaiñ'` guiá'` fib' mi~ cajíñ'` jaang`gui dsea` 'léeng`~ rúíñ'` la'ó'` røø` nijmóor` ta` quiá'- fiir~, jo i dseañu` í` nirøøng` capí'` cuu` quiá'r~. Jo casam'~bre dsea` do jo canaaíñ` güi'r` luuiñ'~ jo casí'r` dsea` do lala: “iQui~ quié` e lajíí'~ e røøñ'!” ²⁹ Jo i dsea` 'léeng`~

rúinʰ do casíʳ uó⁻ jnir⁻ fí quiniñ⁻ do jō camíʳ dsea` do jmiʳ ee⁻ jō casíʳ lala: “Faʳ nijméé⁻ baʳ féngʳ oʳ e røøm⁻ bái cateá⁻ quí⁻, dsuʳ niquí⁻ baa lajalé⁻ mi⁻ niliseeng⁻ quié⁻ e.” 30 Jō dsuʳ i dsea` léengʳ i cajmiʳ øø⁻ cuu⁻ do jō e canúu⁻ júuiñ⁻ jí⁻ coo⁻, jō 'nuñí⁻ b̂ cangojéeiñ⁻ i dsea` léengʳ rúinʰ i carøøng⁻ quiáʳ do cartí caquíñ⁻ do e cuu⁻ do. 31 Jō mi⁻ caliñí i dsea` léengʳ rúinʰ i caguaang⁻ gui do e júu⁻ jō, jō baʳ cangosi⁻ bre fiir⁻ lají⁻ e cajmeáng⁻ i dsea` léengʳ rúinʰ i jaang⁻ gui do. 32 Jō ée⁻ jō iing⁻ i fiir⁻ do mi⁻ caliñíʳ e júu⁻ jō, jō baʳ caquíuʳ ta⁻ e calitéb⁻ i dsea` i caʳ léé⁻ do jō lalab casí⁻ reiñ⁻ do: “iʳ Nuʳ linʳ jaang⁻ dsea` léengʳ i soo⁻ dsí⁻! Jō jnea⁻ jō camí⁻ i lají⁻ e røøn⁻ quié⁻ e do dsuʳ uí⁻ e camí⁻ jnea⁻ jmiʳ ee⁻. 33 Jō lajōb catíng⁻ faʳ mi⁻ cajmee⁻ cóo⁻ i dseañuʳ rún⁻ do mi⁻ camíʳ 'nuʳ jmiʳ ee⁻ lí⁻ laco⁻ gui cajmé⁻ jnea⁻ cóo⁻ 'nuʳ.” 34 Jō dseáng⁻ la huím⁻ eáang⁻ caligúing⁻ i dsea` fi⁻ do quiá⁻ i dsea` léengʳ quiáʳ i cajméé⁻ ga⁻ do co⁻ jiguí cartí caquíuʳ ta⁻ e cangúin⁻ do iihuí⁻ cartí caquíʳ lají⁻ e røøin⁻ do. 35 Jō cajíng⁻ gui Jesús casíʳ jaléng⁻ i dsea` quiáʳ do:

—Lanab cajo nijmé⁻ Tiquié⁻ e dsea` guing⁻ ñifi⁻ cóo⁻ jaléng⁻ 'nú⁻ song jaʳ niʳ íng⁻ naʳ dsee⁻ dseáng⁻ lajang⁻ uii⁻ quiá⁻ jaang⁻ dsea` rúng⁻ naʳ!

19

Mi⁻ caʳ e Jesús quiá⁻ mi⁻ tiúung⁻ dsea` rúinʰ
(Mr. 10:1-12; Lc. 16:18)

1 Jō mi⁻ cangí e cajíng⁻ Jesús jalé⁻ e júu⁻ na, jō cagüi⁻ í⁻ bre fí lí se⁻ Galilea jō cagüé⁻ tur fí lí se⁻ Judea e née⁻ lí⁻ 'ngóo⁻ cataang⁻ laco⁻ iu⁻ gua

Jordán. ² Jo ì 'leáam̄ dseá` ngolínḡ laco' ngóor', jogui cajmi'leáam̄ bre jaléng' dseá` dsée' iē` jo.

³ Jo lajee` táang` Jesús fí' jo, cangoquiéeng' fí' li` siñ' cōo` tú` m̄ing' dseá` Israel ì líng' dseá` fariseo e lico' iñ' do e niténg' dseá` do fí' ni` dsee` , joba' cajmingí'r- dseá` do lala:

—¿Su cuóøm` quiá'- jaang` dseañu' e nitiúuiñ` dseam̄ quiá'r- fíng lí' doñí' ee` cajmiquíng'- jiu dsí' rúíñ'?

⁴ Joba' cañí' Jesús quiá'- ì dseá` fariseo do lala:

—Nica'íb' 'nú' fí' ni` jì' quiá'- Fidiée` li` fé' lala: “Jíi' latí' mi` uing` cajmeáang` Fidiée` dseañu' jogui dseam̄.” ⁵ Jogui fé' cajo: “Uíi' e cúng' dseañu' guóor', joba' 'naaiñ` quiá'- tiquiá' niquiá'r e laco' niliseeiñ` colíng` cōo' dseam̄ quiá'r, jo lajoba' lafa' jaam`bre ni`uúíñ` lajee` lajì huáaiñ` do.” ⁶ Jo lajob fí' i' 'nú', jo` tí' guir gáíñ` , co' lafa' jaam`bre nica'uúíñ` . Co' Fidiée` bing' caguiá' uing` e cúng' dseá` guóor', joba' jo` cuóøng' fa' e nitiúung`-gui dseá` rúíñ' mi` cangí'gui e cacúíñ' guóor`.

⁷ Jo cajmingí'-tu ì dseá` fariseo do Jesús:

—Jo ¿jialí' caquiú' Moí` ta` e cuóøm` tiúung` dseá` rúíñ' song caráang` cōo` mají' li` fé' lajo, jo lajoba' dseáng'- e cuóøng' e tiúung` ì dseañu' do dseam̄ quiá'r?

⁸ Jo cañí'tu Jesús quiáíñ` do:

—Jo ì Moí` do cacuør' fí' e catiúung'na' dseam̄ quií' na' dsu' uíi' e 'nú' dseáng'- eám' ue' óóna'. Co' jíi' latí' mi` uing` ja' lajo cali'íing` Fidiée` e nilí. ⁹ Jo jnea`gui fí' i' 'nú' e doñí' ì tiúung` dseam̄ quiá'- e jíi' ja' ca'lée' ì dseam̄ quiá'r- do e güíiñ` cōo' dseañu' jíéng', jogui e nicúng'tur

guóor` cóo`~ jaang`gui dseam` jiéng`, joba' dseeb` éer` jóng fí quini` Fidié`.

¹⁰ Jogui `i dsea` quiá'- Jesús do casí'r- dsea` do lala:

—Song lajob lí' quiá'- jaléng` dseañu` cóo`~gui dseam` quiá'r-, joba' guiá`-gui líng` jnea` e ja` nicúin` guóor`.

¹¹ Joba' cañi`tu Jesús quiáin`- do:

—Ja` lajing` dsea` catiin` e ngáin` jalé` e júu` na, có' laji`~ dsea` `i nicang`ng` quiá'- Fidié`, jii` í`bing' `i ngáng` e jo. ¹² Jo jmiguiub` uing` sea` e jmóo` huíng` quiá'- jaléng` dseañu` e ja` cuøng` e nicúin` guóor`: có' seem` dseañu` e latí` mí` ngáam`~bre ja` si`iín` fa' e nicúin` guóor`, jogui seem`bi cajo e dseañu` rúm`bre nicajmí`léng` ír`, jogui seem`bi `i ja` cuø' fí` yaang`~ fa' e nicúin` guóor` dsu' uí`~ e Fidié` quié` nifí` quiá'r-. Jo jaléng` dsea` `i quiá'~ jmí`~ nijmé`~ lajo, joba' güijmé`bre lajo.

*Mí` cajmigüeang` Jesús jaléng` jiuung`
(Mr. 10:13-16; Lc. 18:15-17)*

¹³ Jo mí` cang` jo, caguilíng` jaléng` dsea` e jéiin` jiuung`~ quiá'r- fí` lí` sing` Jesús e laco' niquidsí` dsea` do guóor` fí` yá`~ mogui`~ lajaang` lajaang` `i jiuung`~ do jogui e niféin` Fidié` uii`~ quiáin`- do, jo lajoba' niligüeaiñ` do. Jo dsu' `i dsea` quiá'- Jesús do cajním`bre quiá'- jaléng` sejmii` `i jiuung`~ do jogui cajím`brein` do cajo. ¹⁴ Joba' cajíng`- Jesús casí'r- `i dsea` quiá'r- do:

—Cuø`~na' fí` jaléng` `i jiuung`~ na güijalíin` fí` la jo ja` jni`na' quiá'r-, có' jaléng` dsea` `i líng` laco' `i jiuung`~ la, í`bing' catíng` e Fidié` quié` nifí` quiá'r-.

15 Jø caquidsib' Jesús guóor' fí' yú¹ mogui~ la-
jaang' lajaang' i jiuung~ do, jø ng¹ jø, cagüi¹ñ'bre fí'
jø.

*Mi~ casing~ Jesús cóo~ jaang' siming' i sea` cuu~
(Mr. 10:17-31; Lc. 18:18-30)*

16 Jø mi~ cang¹ jø, caguié~ jaang' siming' fí' lí~
sing' Jesús jø cajmingí'r~ dsea` do:

—Tifa' i guiú~ dsíí', ¿e~ e guiú~ 'né~ jmee~ jnea~
e laco' nilí'i e niliseen~ cøøng' cóo~ Fidié~ car'
ngongñ' jmñ'?

17 Jøba' cañíi' Jesús quiá'- i siming' do:

—¿Jialí' jnea~ jmingñí'~ cuaiñ~ quiá'- jalé' e guiú~?
Co' jaam` i guiúng~ seeng` jø jíí~ Fidié~bing'
líng' lajo. Jø dsu¹ song 'nu`gui iin~ e niliseen'
cøøng' cóo~ Fidié~ car' ngongñ' jmñ~, jøba' 'né~
nijmití^ba' lajalé' júu^ quiu' ta~ quiá'- Fidié~ jóng.

18 Jøba' cañíi' i siming' do quiá'- Jesús:

—¿E~gui e júu^ 'né~ lití~ do jóng?

Jø cañíi'tu Jesús quiáíñ'- do jø casí'r~ lala:

—Lalab líí' jalé' e júu^ 'né~ lití~ do: Ja` jngán'
jíí~ jaang' dsea` rún'; jogui ja` lee~ e nigüín' cóo~
dseañu' dseamí i o' quíi'-; jogui ja` jmoo' ñ; o'gui
cuø' dsea` dsee~ e ja` uing~ sea; 19 jogui jmi'goo`
tiquíi^ cóo~gui niquíi^; jogui jmi'neáan' jaléng'
dsea` rún' lí^ laco'gui jmi'neáan' uø'.

20 Jøba' cañíi'tu i siming' do quiá'- Jesús jø casí'r~
dsea` do:

—Lajib' e júu^ e fó'na' nicajmitii~; jøba' ¿e~ jíí~ e
'né~ nijmití'guñ'?

21 Jøba' cañíi'tu Jesús quiáíñ'- do jø cajíñ'-:

—Song 'nu` iin~ e niliguiún' laco' síí' fí' quini~
Fidié~, jøba' guøng' fí' quíi'- jø güi'nñ~ lajalé' e

sea` quíi'⁻, jo jaléⁿ e cuu⁻ e nilíⁿ quía'⁻ e jo jmee⁻
 guíeéⁿ jeeⁿ jaléngⁿ dsea` tiñíng⁻, jo lajoguiba' nilíⁿ
 e nilísea` juguíá⁻ quíi'⁻ fí ñíff⁻ fí lí⁻ guíngⁿ Fidiééⁿ.
 Jo miⁿ ningíⁿ jo, nea` cóoⁿ jnea` jóng.

22 Jo dsu' miⁿ canúu⁻ i simingⁿ do jaléⁿ júuⁿ e
 cajíngⁿ Jesús, joba' fí'íbbⁿ cangáiñⁿ, co' eáam' sea`
 cuu⁻ quía'r⁻.

23 Joba' casíⁿ Jesús i dsea` quía'r⁻ do jo cajíñⁿ
 lala:

—E jáⁿ e fíi⁻ i 'núⁿ e huím' líí' quía'⁻ jaang` dsea`
 sea` cuu⁻ e nijángⁿ 'ñia'r' fí quiniⁿ Fidiééⁿ e laco'
 dsea` do nicá' níff' quía'r⁻. 24 Joguí fíi⁻ túu' 'núⁿ caléⁿ
 catú⁻ e ja'gui huíng' quía'⁻ jaang` jóⁿ camello e
 ningíng⁻ ne' fí dsíi' too` jminiⁿ mocuu⁻ e laco'gui
 jaang` dsea` sea` cuu⁻ nijángⁿ 'ñia'r' fí quiniⁿ Fidiééⁿ
 e laco' dsea` do nicá' níff' quía'r⁻.

25 Jo miⁿ tí lí⁻ canúu⁻ i dsea` quía'⁻ Jesús do lajo,
 joba' eáang'guib cangogá' dsíir' jóng, jo canaaiñⁿ
 jmingí' rúíñⁿ:

—Jo song lajob líí', joba' ¿i⁻ nilíⁿ nijmé⁻ e nileáiñⁿ
 jeeⁿ jaléⁿ dsee⁻ quía'r⁻?

26 Jo lico' cajóøm⁻ Jesús i dsea` quía'r⁻ do, jo
 cañírⁿ quíaíñⁿ do lala jo cajíñⁿ:

—Jíiⁿ jaang` dsea` jmigüiⁿ quíi'rⁿ jmíiⁿ nileáng⁻
 'ñia'r' jeeⁿ jaléⁿ dsee⁻ quía'r⁻, co' jíiⁿ Fidiééⁿ bing'
 quíiⁿ jmíiⁿ jmé⁻ lajo.

27 Joba' cañíiⁿ Túⁿ Simón quía'⁻ Jesús jo casí'r⁻
 dsea` do lala:

—Fíi'íiⁿ, jnea'ⁿ nicatá'baa' lajaléⁿ e sea` quí-naa'
 jo cóoⁿ 'nub` ningí-naa' lana. Joba' ¿eⁿ jíiⁿ e
 catí-naa' ní'íng'naa'?

28 Joba' lalab cañíiⁿ Jesús e casí'r⁻ i dsea` quía'r⁻
 do jo cajíñⁿ:

—E laba' jmitaa' óóna' e mi~ nití' í' e nili'mí~tu latøng~ jmigüí, job mi~ nimáang~na' jnea~, dsea` i cajá' fí' ñifi' e lín'n jaang` dsea` jmigüí, e niní'i e niquiá'^u ta~ fí' ée^ lí~ niing~ jlo^ quié~e e sea` fí' ñifi'. Jo ie~ jo jaléng' 'nú', dsea` líng'na' dsea` quié~e, niliseab` cajo guitú' ée^ quií~na' fí' jo lí~ niní'na' colíng~ cóo!~ jnea~ e laco! niquidsi'na' í' quiá'- lajì' guitú' 'lé' dsea` góo'naa' dsea` Israel. ²⁹ Jogui jaléng' dsea` i nilíng' dsea` quié~e, jo uí!~ e jo nicatúr' jalé' 'nur~, osi nica'naaiñ` quiá'- jaléng' rúíñ' é, osi nica'naaiñ` quiá'- tiquiá'^ niquiá'r^ é, osi quiá'- jóo'bir é, osi nicatúr' uó~ quiá'r~ é, joba' jaléng' í'bing' i niíng` cien ya' e jmiguiá'gui e laco! e catúr' do jogui niíim`bir cajo e niliseeiñ` cøng` cóo! Fidiéé' car` ngonghí' jmí~. ³⁰ Jo i líng~ dsea` i líng~ e niíñ~ eáang' fí' jmigüí la, dsu' í'bing' jíí~ capí'^ ja' ee' niíñ~ mi~ nití' e í' jo; jo dsu' i líng~ dsea` i líng~ e ja' ee' niíñ~ jíí~ capí'^ fí' jmigüí la, joba' í'bing' i eáang'gui niliniing~ mi~ nití' e í' jo.

20

Coo' júu^ já' e lafa' júu^ cuento quiá'- dsea' jmóo' ta~ quiá'- mí'^ huñg' jó'^

¹ Jo café'gui Jesús coo'gui júu^ já' e lafa' júu^ cuento jo cajíñ'- lala:

—Jo mi~ Fidiéé' quier' nifi' quiá'- dsea`, lí' laco! mi~ jaang` dsea` fií~ coo` uó~ lí~ sijnea' mí'^ huñg` jó'^, jo i dsea` í' cagüi'íir' coo` ya' e la'ee' e cango'néeiñ` dsea` 'léeng!~ i nijmé~ ta~ quiá'- e mí'^ huñg' jó'^ do. ² Jo casí'-reiñ' do e niquí-bre e 'léeiñ!~ do quiá'- coo` jmí~ ta~. Jo mi~ cangí' jo, casím`breiñ' do fí' jee~ ta~. ³ Jo i fií~ do calé' catú~

cagüi'ñir' fí jee' 'núu' mi~ catí la ii- ñiá- e la'ee' jò cangáin- jién'gui dsea` i neáng' jøng- e ja` ta` jmóor`. 4 Jò lalab casí'r- í: “Song ja` ta` sea` jmée' 'nú', güiling-na' güijmee-na' ta` quiá'- mí'^ huing` jø'^ quié'-e, jò niquí'baa quií'na' lacó' sí'í.” Jò cangolíim^ i dsea` do cangojmée'^ ta`.

5 'Jò mi~ catí guieñí'-, cagüi'ñib'tu i dsea` fii~ do fí jee' 'núu' e ngojmée'guir quií'- dsea` i nijmé- ta` quiá'r-, jò caléb' catú- cagüi'ñir' mi~ catí la ii- 'ní' e ca'lóo- cajo. 6 Jò coob' mi~ catí la ii- 'ñiá' e ca'lóo-, jò caléb' catú- cagüi'ñir' jò cangór- fí 'móo'~, jò fí job cangár- e neáng' jién'gui dsea` i ja` ta` sea` jmé-, joba' cajmingí'r- dsea` do: “¿Jialí' ngüing~ 'nú' jmí~ quií'na' fí la e ja` ta` jmoo'na'?” 7 Joba' cañí' i dsea` do quiá'- i fii~ do: “Co' jíí'~ jaang` dsea` ja` mí' cali'neáin- jnea'^ ta`.” Joba' cajíng'- i fii~ do casí'-reiñ': “Güiling- 'nú' güijmee-na' ta` cajo fí lí' sea` mí'^ huing` jø'^ quié'-e.”

8 'Jò mi~ tí lí' canuu, i fii~ do caquiá'r' ta` i dsea` née' ni~ dsea` 'léeng'~ do e nitøø` jaléng' i dsea` jmóo` ta` do jò casí'-reiñ' do lala: “Tee- lajaang` lajaang` i dsea` 'léeng'~ na jò quií' quiá'r-, dsu' la'uii- ningíng- i dsea` i cangotáang'~ jee~ ta` la ii- 'ñiá' e ca'lóo- do jò lajob cartí i cangotáang'~ la'ee' do.” 9 Jò lajob cajmée' i dsea` do; jò la'uii- cangíng' i dsea` i cangotáang'~ la ii- 'ñiá' e ca'lóo-, jò lajaang` lajaam` i dsea` í ca'íñ' e 'léeiñ'~ quiá'- latøøng- jmí~. 10 Jò mi~ cató' quiá'- í, joguiba' cangíng' i dsea` i cangotáang'~ la'ee'gui do, jò i dsea` í ca'í dsír' e jmiguiá'gui nilí'r' e 'léeiñ'~. Jò dsu' o' lajo, co' røøb' ca'íñ' còo' i nifí'gui do cajo. 11 Jò mi~ tí lí' cangí' e ca'íñ' do e 'léeiñ'~, joba' canaain`

fé'r` ga` uii~ quiá'- i dsea` fií~ do ¹² jo casí'-reiñ' do lala: “I dsea` 'léeng'~ quíi'- i caguilíng- cøøng`gui na, jii~ coo` oor~ba' cajméer` ta~; jogui røøb` caquí'^ quiá'- dsea` do laco'gui jnea'^, dsea` cataang~naa' lajee` latøøng- jmi~ e guíi- iee.” ¹³ Jo dsu' i fií~ do cañíir` quiá'- jaang` lajee` i dsea` 'léeng'~ do jo casí'-reiñ': “Ruu'^, ofa' jnea~ jmóo`o jløn'^n cóo'~ 'nø. ¿Su ofa' casí~naa' røø` jial tíí 'léeng'~ dsea` lacoo` jmi~? ¹⁴ Joba' fii- i 'nø` lana, nab róo` e 'léen'~ jo nicuøøm` guón'^. Jo song jnea~gui iin~n quíi` quiá'- i dsea` 'léeng'~ i ca'í- cajméé` ta~ cøøng`gui do røø` laco' jii~ e nicaquíi` quíi'-, ¹⁵ joba' cuøøm` lí jmee~ e lajo, co' cuu- quié`baa e cacuøø-øre do, o' cuu- quiá'- dsea` jiéng'. ¿Ofa' dsihu~m`ba' é dsu' uii~ e cajmé- e e guíi- cóo'~ i dsea` í?”

¹⁶ Jo cajíng'~ gui Jesús lala:

—Jo i líng~ dsea` i líng- e niiñ- eáang' fí jmiçúî la, dsu' í'bing' e jii~ capí'^ ja` ee` niing- mi~ nití- e í' jo. Jo dsu' i líng~ dsea` i líng- e ja` ee` niiñ- jii~ capí'^ fí jmiçúî la, joba' í'bing' i eáang`gui niliniing- mi~ nití- e í' jo.

Mi~ cajméé` Jesús júu^ e catí` 'ni' ya' e tí lí~ ni-jngám'- dsea` ír`

(Mr. 10:32-34; Lc. 18:31-34)

¹⁷ Jo coo` jmi~ , lajee` e ni'iuung- Jesús fí ngaiñ' fí Jerusalén, jo cató'r- i dsea` guitúung` quiá'r- do coo` lico' yaaíñ~ jo casí'-reiñ' do:

¹⁸ —Jo lí'^ laco' jii~ e móo- 'nú' jmi~ na, lana ningóo`naa' fí Jerusalén, jo fí job lí~ nisáng' dsea` jnea~, dsea` i cajá- fí ñífi- e lín'n jaang` dsea` jmiçúî. Jo nijaiñ' jnea~ fí jaguó` jaléng' fií~ jmidsea` quiá'- dsea` góo`naa' dsea` Israel cóo'~ gui

jaléng^l tifa^l i e' júu[^] quiu^l ta[~] qui⁻naa' cajo. Jo jaléng^l i dsea[^] íb[^] i nicuø[^] júu[^] quiá⁻ e nijúung⁻ jnea[~]. ¹⁹ Jogui nijáin^l jnea[~] fí jaguó[^] jaléng^l dsea[^] i ja[^] cuíng[^] Fidié[~], jo jaléng^l íb[^] i niløø⁻ quié⁻e, jogui nijmihuúin[^] jnea[~] cajo jo jiguí cartí niteáin⁻ jnea[~] fí dse^l crúu[^], jo fí job[^] nijúun⁻n; dsu^l mi[~] nití⁻ 'ní jmí[~] lajo, nijíb^l túu^u calé^l catú⁻.

Lajíi[~] e camí niquiá^l Tiáa[~] cóo^l gui Juan e camí'r Jesús

(Mr. 10:35-45)

²⁰ Jo mi[~] cangí jo, i dseamí quiá⁻ jaang[^] dseañu^l i sii[^] Zebedeo cajaquíeein[^] fí lí[~] sing^l Jesús, colíing[^] cóo^l gáng⁻ jóor[^], jaang[^] i sii[^] Tiáa[~] jogui jaang[^] i sii[^] Juan, jo laj^l huáain[^] do quiín^l jee[~] dsea[^] guitúung[^] quiá⁻ Jesús, jo casí^r uø⁻ jnir[~] fí quiniín[^], co^l iin[~] líing[~] ee[^] nimí^l-bre dsea[^] do. ²¹ Joba^l cajmingí^l Jesús i dseamí do jo casí^l-rein^l:

—¿E[~] iin^l?

Joba^l cañí^l i dseamí do quiá⁻ Jesús jo casí^r-dsea[^] do:

—Jiéé^o e nicuø^l fí e laj^l gáng⁻ i jóo^o la nigüear[^] cóo^l 'nu[^] fí lí[~] quiu^l ta[~] mi[~] niguiing[~] tu^l fí jo, jo jaain^l la nigüear[^] lí[^] lí[^] dsée[^] jogui jaang[^] guir lí[^] lí[^] tuung[~].

²² Joba^l cañí^l Jesús quiáin^l do lala:

—'Nú^l jíi[~] ja[^] ní[^]na' laj^l e mi[^]na' na. ¿Su líing⁻na' e nité^lna' laj^l iihu^l e nijaquíéng[^] quié⁻ jnea[~]?

Joba^l cañí^l i jóo[^] i dseamí do jo cajín^l:-

—Nité^l lí[^]baa^l.

²³ Jo cañí^l tu Jesús quiá⁻ i dsea[^] do:

—E jáb^l e 'nú^l nimó[^]ba' iihu^l cajo lí[^] laco^lgui nimoo[~] jnea[~]; jo dsu^l e nigüea[^] dsea[^] lí[^] lí[^] dsée[^] osi

lí' lí' tuung~ é laco' guiin~n, ja` jnea~ catáin~n e jo fa' e nicuøø, co' lajii~ dsea` i nicaguíng` Tiquié'e, jii~ í'bing' i catáing~ e jo.

²⁴ Jo mi~ tí' lí' canúu~ i dsea` quiá'- Jesús i guíng~gui do lajii~ e júu^ jo, joba' caliguíim~bre quiá'- i gáng~ do. ²⁵ Jo dsu' Jesús cató'r~ jaléng' i dsea` guitúung` do quiá'r~ jo casí'r~ lala:

—Niñib^ 'nú' guiá~ e jee~ jaléng' dsea` i ja` cuíng` Fidiéé~ seeng` jaléng' dseata~ i quiu' ta~ quiá'- jaléng' dsea', jo jaléng' i dsea` i quiu' ta~ do eám' sili'r' cóo~ e ta~ líiñ' do. Jo lajob lí' cajo cóo~ jaléng' dseata~ dsea` féng' i quie' nifi' quiá'- jaléng' dsea', co' laguidseam^ quiu'r' ta~ quiáñ' do. ²⁶ Jo dsu' ja` cuøøng` e nidsijéé' lajo jee~ 'nú', co' ii~ i iing~ i nicá' nifi' jee~ 'nú', í'bing' i 'né~ nijmé~ ta~ jmicoó~ quiá'- i caguiaang~gui. ²⁷ Jogui ii~ i iing~ i nijmé~ e niing~guir jee~ 'nú', í'bing' i 'né~ jmé~ jalé' ta~ huí' jee~ jaléng' i caguiaang~gui e ja` jmiféng' 'ñia'r'. ²⁸ Jo lajob 'né~ jmér~, co' lajob ta~ cagá~ jnea~ cajo, jnea~ dsea` cagá~ a fí' ñifi~ e lín'n jaang` dsea` jmigüí. Co' jnea~ ja` cagá~ a fa' e jmóo` dsea` ta~ fí' quini~, co' jnea~ cagá~ a e laco' nijmicoó~o jaléng' dsea` jmigüí jogui e nijáng' 'ñiá'a e nijúun~n e laco' nileáng` fíing` dsea` jmigüí jee~ jalé' dsee~ quiá'r~.

Mi~ cajmi'leáng~ Jesús gáng~ dsea` tiuung~
(Mr. 10:46-52; Lc. 18:35-43)

²⁹ Jo mi~ cangí jo, mi~ tí' lí' ca'uøøng` Jesús cóo~ jaléng' dsea` quiá'r~ fí' Jericó, eám' cango'leáng' dsea` laco' ngóor'. ³⁰ Jo lajee~ laco' teáiñ~ fí' lado, coob` mi~ cangíiñ' lí' neáang` gáng~ dsea` tiuung~ i neáang` 'ni' fí'. Jo mi~ tí' lí' calilí^ i dsea` tiuung~ do e cangíng` Jesús fí' jo, joba' ca'áiñ' dsea` do lala:

—Fíi'ii', sijǔ dseata~ Daví'^, fñ- güilín'^ jnea'^!

³¹ Jo dsu' jaléng'^ ì dsea` ì ngolíng- cóo'~ Jesús do ca'gaam`bre quiáañ'- do e laco' jo` áng'guiñ' do dsea` do. Jo dsu' lí'^ lí' teá'gui canaang` óo' ì dsea` tiuung- do e áañ' dsea` do jo fé'tur lala:

—Fíi'ii', sijǔ dseata~ Daví'^, fñ- güilín'^ jnea'^!

³² Jöba' cajeab' Jesús laco' fí' iuuiñ- do jo cató'r- ì dsea` tiuung- do jo cajmingí'- reiñ' do:

—¿E~ iing`na' e nijmee`e quí'-na'?

³³ Jöba' cañí' ì dsea` tiuung- do quiá'- Jesús lala:

—Fíi'ii', ii~naa' e nijmé'e e nilijnéb'túu'!

³⁴ Jöba' calí- fñ- lám- Jesús ì dsea` tiuung- do jo lico' cagüi'r' jmini`biñ' do lajaang` lajaañ'. Jo dsifí' lajób ca'láang- ì dsea` tiuung- do, jo calijné`bre. Jo mi~ cangí' jo, cangolím`bre cóo'~ Jesús.

21

Mí' ca'tí- Jesús fí' jee~ fñ' Jerusalén

(Mr. 11:1-11; Lc. 19:28-40; Jn. 12 :12-19)

¹ Jo lajee` nú'-gui e niguieng' Jesús fí' Jerusalén colíng- cóo'~ jaléng'^ dsea` ì ngí cóo'r~ do, jo caguilíñ- fí' cóo' fñ' e sii` Betfagé e née' quiá'- cóo' mó' e sii` Olivos. Jo tí' jób caguiéng' Jesús gáng- lajee` ì dsea` quiá'r- do e jéeng'guiñ'² jo casí'-reiñ' do lala:

—Güilíng-na' e fí' fñ'jiu e née' quini` na, jo fí' jób niguiéng'na' jaang` bú'^ iee~ ì 'ñúung'~ colíng- cóo'~ jaang` yuu' quiáa-re'. Jo síng'na're' jogui tee-na're' fí' la. ³ Jo song ii' casí'- 'nú' jialí' jmoo`na' lana, jöba' nifí'-na'r lala: “Lana 'neáng- fíi'ii' ì bú' la. Dsu' mi~ ningí' jo nijajeaam`túure'.”

4 Jo cangojée' e na e laco' caliti~ jii~ laco' júu^ e cajíng'~ jaang` dsea` i café' cuaiñ~ quiá'- Fidiée' mali~ gui eáang' mi~ cajme'r' lala:

5 Síi~na' jaléng` dsea` i seeng` fi' Sión:

“Lab nijáa` i dseata~ dsea` féng' i quie' nifi' qui-ii',
jo jaang` dsea` i ja` jmiféng' 'ñiab' lhiñ',
jogui guiiñ~ fi' mocóo~ jaang` bú'^ jiuung~.”

6 Jo mi~ cangî jo, cangolíim^ i dsea` gáng~ quiá'- Jesús do jo cajmiti~bre laco' jii~ ta~ caquiú' dsea` do quiá'r-. 7 Jo cató~bre i bú'^ iee` do colíing~ cóo~ yuu` quiáa-re' do fi' li~ sing' Jesús, jo canaaiñ` sífir` sí'r^ fi' mocóo~ i bú'^ jiuung~ do jo mifíing` caguáb` Jesús fi' mocóo~ i jó^ do. 8 Jo fíim` dsea` ni'r` jalé` sí'r^ lacuee` guiá'^ fi' li~ cangíng` Jesús; jo i líing~ gui dsea` tã'r` guo` 'ma` e tiì` jo guiar` fi' guiá'^ fi' li~ ningíng~ dsea` do cajo. 9 Jo jaléng` i dsea` i ngolíing~ nifi' cóo~ gui i jalíng~ cati' cøøng` óor` lala:

—iMajmiféng'naa' i Jóo' dseata~ dsea` féng' Davi'^! jJogui juguiá~jiu quiá'- i dsea` i casíng` Fidiée' fi' jmigüi` la cuaiñ~ quiá'r-! jJo majmiféng'naa' Fidiée' dsea` guing~ ñifi'-!

10 Jo mi~ tí` li~ ca'í- Jesús fi' dsíi' fi` Jerusalén, lajím` dsea` canaaiñ` ta'r` má~ jo jmíngi'^- rúíñ':

—¿I~gui i dsea` na?

11 Jo i líing~ i dsea` do ngíir`:

—Mó'^ Jesús i dsea` i fé' cuaiñ~ quiá'- Fidiéeb` na, i nabi i seeng` fi' Nazaret do fi' li~ se' Galilea.

Mi~ ca'uøøng` Jesús jaléng` dsea` i jmóo` ta` 'nã` fi` dsíi' guá'-

(Mr. 11:15-19; Lc. 19:45-48; Jn. 2 :13-22)

12 Jo mi~ cangî jo, jo cangó~ Jesús fi' dsíi' guá'- fé' quiá'- dsea` góor` dsea` Israel e si' fi' Jerusalén do.

Jō mi~ cangár- e lafa' 'móob' lí' e fí' jō, cō' teáng' dsea' ta~ 'nñ' joguì ta~ láa', jōba' cajmiquím'- dsí' Jesús mi~ cangár- lajō, jō canaaiñ' jíim`bre jalé' mes~ quiá'- ì dsea' ì jmóo` ta~ jmíshing- cuu- joguì jalé' 'masii~ quiá'- ì dsea' ì jmóo` ta~ 'nñing` jaléng' mee~. ¹³ Jō cajíñ'- casí'r- jaléng' ì dsea` do lala:

—Lalab fé' Fidiée' fí' ni~ jì quiá'r-: “E 'nñu- la nilisii' 'nñu' lí' nisíng- dsea` cōo`~ jnea~”; jō dsu' 'nú' nicajmi'uíng^na' cōo` 'nñu' lí' teáng' jaléng' ñ'.

¹⁴ Jō lajee' táang' Jesús e fí' dsí' guá'- do, jōb caguilíng- jaléng' dsea` tiuung- cōo`~guì jaléng' dsea` jlúung'~, jō cajmi'leáang- Jesús jaléng' ì dsea` î. ¹⁵ Jō mi~ tí' lí' cangá- jaléng' fii~ jmidsea` quiá'- dsea' Israel cōo`~guì jaléng' tifa' quiá'- júu^ quiu' ta~ quiá'r- lajii'~ e quí'~ Jesús jmí~ jmóor' e dsigá' dsí' dsea' joguì canúu- guir e óo` jaléng' jiuung~ e fí' guá'- do lala: “¡Güijmiféng' jaléng' dsea' jmigüi' ì JÓO` dseata~ dsea` féng' Daví'!”), jōba' jaléng' ì dsea` î eáam' caligüiñ- ¹⁶ jō casí'r- Jesús:

—¡Nuu' lajii'~ e fé' jaléng' ì jiuung~ na!

Jōba' cañí' Jesús quiá'ñ'- do:

—Núu`baa, joguì ¿su ja` mí' ca'í' 'nú' lajii'~ e tōo` fí' ni~ jì quiá'- Fidiée' lí' fé' lala?:

'Nu), Fidiée', nicajmee'-

e cōo`~ jalé' e ø' jaléng' jiuung~ cōo`~guì jaléng' yñuñ' nijmiféñ' 'nu`.

¹⁷ Jō mi~ calí- casí'- Jesús ì dsea` do lala, jō cagüi'ñ'bre fí' fii' Jerusalén jō cangó-tur fí' cōo` fii' lí' sii` Betania, jō fí' jōb cangongñiñ' e uóo` jō.

Mi~ caliqui' cōo`'ma` güiñí'
(Mr. 11:12-14, 20-26)

18 Jo mi~ cangf̂ jo, cōo` e la'ee` lajee` e ni'iuung` Jesús fí e ningáin` fí Jerusalén, cadseá` jmi'aaín`.
 19 Jo cōo` cangá`bre e gui~ cōo` 'ma` güñí` ca' fí lana, jo cangoquíeein` fí li~ gui` do, dsu' cadsér` e jíi~ cōo` güñí` ja` íi~, dseáng`- yaang` má` quiáb`- dsi~. Joba' lalab casí`r` e 'ma` güñí` do:

—Jo` nicuó`gui' jíi~ cōo` güñí` latí` lana!

Jo ladsifí lanab caliquiú` e 'ma` güñí` do. 20 Jo mi~ tí` li~ cangá` i dsea` quiá`r` do e calí` lado, joba' eáam` cango`gá` dsíir` jo cajmingí`r` dsea` do lala:

—Fí`naa', ¿e` uing` quiá`- e caliquiú` ladsifí` lana e 'ma` güñí` na?

21 Joba' cañí` Jesús quiáin` do:

—E já`- e fí`-i 'nú` e song dseáng`- já`- líng`na' e quí`~baa jmi~ jmee` lí`- doñí` ee` jo ja` jmitúng`- áa`na', jo o' jíi~ e na niquí`~na' jmi~ nijmee`-na' jóng` lí`^ laco`gui` jíi~ e cajmé`- jnea` cóo`~ e 'ma` güñí` na. Co' song dseáng`- já`- líng`na' e quí`~baa jmi~ jmee` lí`- doñí` ee`, joba' cuóom` lí` quiú`^na' ta~ e mó` si' la e nijéng`- 'ñia' li~ si' jo nidsisíng` 'ñia' fí 'ni` jmiñí`, joba' lajob nilí` jóng. 22 Joba' fí`-i 'nú` lajñing`na' na e mi~ fóng`na' Fidiéé`, mí`~ba're car` ngocáng` óo`na' jogui` já`- líng`na' e quí`b`~ dsea` do jmi~ nijmér` lí`^ doñí` ee`, joba' nicuó`~bre 'nú` jóng lajii~ e mi`na' do.

I` quiú` ta~ Jesús e jmóor` jalé` e jmóor`

(Mr. 11:27-33; Lc. 20:1-8)

23 Jo mi~ cangf̂ e cajíng`- Jesús lajo, jo ca'í`-bre fí` dsíi` sinúú` guá`- fé` e er` júu` quiá`- Fidiéé`. Jo lajee` iuuiñ` fí` job, mi~ cangoquíeéng` jaléng` fí` jmidsea` quiá`- dsea` góor` dsea` Israel fí` li~ siñ`

colihng~ cóo!~ jaléng` dsea` cóøng` quiá'r- cajo, jo cajmingí'r- dsea` do lala:

—¿I~ i quiu' ta~ quí'- e jmoo` jalé` e na? Jo ¿i~ i cacuø' 'nu` fí' e cuøøng` jmee'- jalé` e na?

²⁴⁻²⁵ Joba' cañí' Jesús quiáin'- do jo casí'-rein':

—Jnea~ cajo seab` coo` e nijmingí'í' 'nú'. ¿I~ casí' quiá'- Juan e niseáin- dsea` jmí? ¿Su Fidié~ ofa' dsea` jmigüib` é? Jo song nijméel~na' jnea~ júu^ i casí' quiá'r-, joba' nijméel~ jnea~ 'nú' júu^ i~ quiu' jnea~ ta~ e jmóo`o lajalé` e la.

Jo i dsea` do canaain` sáin` lajee` la'ó` yaain~ jo sí' rúin' lala:

—Song nisí'~naa'r e Fidiéeb` dsea` casí' quiá'- i Juan do, joba' nijíin'- nisí'r' jneaa~aa': “¿Jialí' ja` já'- calíng~na' i dsea` í` jóng?” ²⁶ Jo ja` cuøøng` nisí'~naa'r e dsea` jmigüib` casí' quiá'- i Juan do, co' fíng song casí'~naa'r lajo, dseáam~ fíng ee` cajmeáng` dsea` jneaa~aa'; co' lajim` dsea` ñir` e i Juan do café'r` cuain~ quiá'- Fidiéé`.

²⁷ Joba' cañír` quiá'- Jesús lala:

—Ja` ne~naa' jí' coo`.

Jogui Jesús casí'-tur i dsea` do jo cajíin'-:

—O'gui jnea~ cuøøng` jméel~e 'nú' júu^ cajo i~ i quiu' jnea~ ta~ e jmóo`o jalé` e la.

Coø` júu^ já'- e lafa' júu^ cuento quiá'- gáng- jóo` dsea`

²⁸ Jo cajmingí'-gui Jesús jaléng` i dsea` do lala:

—¿E~ í` óo' 'nú' cuain~ quiá'- e júu^ la? Coø` née'~ nicaliséng` jaang` dseañu`, jo i dseañu' í` nicaliséng` gáng- jóor'. Jo coø` née'~ casí'r- i jóor' la'uii~ do: “Jóo`o, fa' jgiéé` o' güijméel~ coø` jmí~ ta~ fí' lí' sijnea~ mí' huñng` jó'` quí'-ii' do.” ²⁹ Joba' cañí' i

jóor' do: “¡U~, dseáng' fím'-baa nii'i!” Jo dsu' mi~ cangí'guijiu lajo, ca'lb- dsír' cangór-. ³⁰ Jo dsu' ngí' jo i jóor' i catí' tú- gui do casí'- tiquiá'r^ laco' casí'r- i jóor' la'uii~ do; joba' i jóor' í cañí' bre ladsifí' quiá'- tiquiá'r^ jo cajín'- e nidsé- bre. Dsu' mi~ ngoyúung'- jo ja cangór-.

³¹ Joba' cajmingí'- Jesús i dsea` do:

—¿I~ lajee~ laji` gáng- i jóor' do líng- 'nú' i calinúu~ júu^ quiá'- tiquiá'r^?

Joba' cañí' i dsea` do quiá'- Jesús jo cajín'-:

—I jóor' la'uii~ do, íbing' i calinúu~.

Jo Jesús casí'r- i dsea` do lala:

—E já'- e fíi'-i 'nú' e jaléng' i dsea` i jmóo` ta~ mí' cuu- e catíng- dseata~ dsea` féng' i guiing~ fí' Roma jogui jaléng' dseamí' i jmóo` ta~ 'núng` yaang~, jéeng'guir nijáng' yaaiñ~ laco'gui 'nú' fí' jaguó' Fidiéé~ e laco' dsea` do nicár` nifí' quiáíñ'-.

³² Co' mi~ cajá- Juan i caseáng` dsea` jmíi jo ca'e'r' 'nú' jial niliguiúng-na' fí' quini~ Fidiéé~, dsu' ja` já'- calíng- 'nú' jalé' e jo ie~ jo. Jo dsu' jaléng'gui i dsea` i jmóo` ta~ mí' cuu- cóo'gui jaléng' dseamí' i jmóo` ta~ 'núng` yaang~ jáb'- calíñ- ie~ jo. Jo dsu' 'nú'gui, nañí' fa' cañí'-ba' jalé' e jo, dsu' ja` caquí'- jíng'- yaang~na' fí' quini~ Fidiéé~, jogui dseáng'- ja` já'- calíng-ba' júu^ quiá'- Fidiéé~.

Coo`gui júu^ já'- e lafa' júu^ cuento quiá'- dsea` 'léng' i soo`dsí'

(Mr. 12:1-12; Lc. 20:9-19)

³³ Jo mi~ cangí' jo, cajíng'-gui Jesús e júu^ la:

—Núu-na', la nifíi' 'nú' coo`gui júu^ já'- e lafa' júu^ cuento: Coo` néel~ jaang` dseañu' ni'óor' coo` uó- jo nicajme'r' iá' lacúng' e uó- quiá'r- do, jo

cajnír` mǎ` huǎng` jǒ` fí dsí'. Jǒ cajmilíiñ` coo` lí`
ni`uó`r- jmǎ`, jogui caséer` coo` 'nú` ní' fí` quiá'- jo
e laco' cuóøng` tí' nir` fí' la'úng` e fí' ni` guóo` uó`
quiá'r- do lí` síjnea` mǎ` huǎng` jǒ`.

'Jǒ mi` cangf`guijia lajo, ca'náaiñ` coo` tú` mǎng`
dsea` i nijmé` ta` uó` quiá'r-. Jǒ mi` cangf` jo,
cagüi'í`bre cangór` fí' lí' huí'. ³⁴ Jǒ mi` tí' lí' catí`
í' e caroo` e mǎ` huǎng` jǒ` do, jo caguiém` i dsea`
fií` uó` do coo` tú` mǎng` dsea` 'léeng` quiá'r- i
cangoquié` lajii` e catíiñ` do. ³⁵ Dsa' mi` tí' lí`
caguilíng` i dsea` 'léeng` do fí' lí` taang` i dsea`
jmóo` ta` uó` do, dsíng` ga` cacóøiñ` e caquié` i
dsea` i jmóo` ta` uó` do; i líng` cacóøng` cóo` cuu` ,
jogui i líng`gui dseáng` cajngam`bre. ³⁶ Jǒ mi`
cangf` jo, i fíng`gui dsea` 'léeng` caguiéng` tu` i fií`
do laco'gui i caguiéiñ` lami` uii` do. Jǒ dsa' lajob
cajmée`tu` i dsea` i jmóo` ta` uó` do, cajmeám`tur
jaléng` i dsea` 'léeng` i caguiéng` i dsea` fií` uó` do.

³⁷ 'Jǒ mi` cangf` jo, jóo'gui i dsea` fií` uó` do
caguiéiñ', co' ca'f` dsíir` e í`guib fíng` nijmí'gó` i
dsea` jmóo` ta` uó` do. ³⁸ Jǒ mi` tí' lí` cangáng` i
dsea` jmóo` ta` uó` do i jóo' i dsea` fií` uó` do jo
canaaiñ` síiñ` lajee` yaaiñ`: "I siming` nabíng` i
nijmé`- guiáa` e uó`- la mi` tí' lí` nijúung`- tiquiá'r`;
majngáng`- naa're lajminá` , jo jneaa`aa' nilí'naa'
nijé`ee' cóo` e uó` la." ³⁹ Jǒ røøb` casíng` i dsea`
jmóo` ta` uó` do e nijmér` lajo, jo cangojéeiñ` i
siming` do catí' 'ni' guíee` lí` síjnea` e mǎ` huǎng`
jǒ` do jo fí' job` cajngam`neiñ` do.

⁴⁰ Jǒ cajíng`-gui Jesús casí'r- i dsea` do:

-Joba' fíi` i 'nú' e mi` niguiéé` i fií` uó` do, ¿e`
líng`- 'nú' e nijmeáiñ` i dsea` jmóo` ta` uó` i ca'lee`

do?

41 Jōba' cañíi' i dsea` do:

—E nijngám' i fiĩ uó̄ do lajaléng' i dsea` jmóo` tā uó̄ do, jogui dsea` jiém' nitáin' i nijmé` tā e uó̄ do lalī i lí^ dsíir' i nija' lajii' e catáin` quiá' e niró` do quiá'r̄.

42 Jōba' cañíi' Jesús quiá' i dsea` do:

—¿Su ja` mí ca'í 'nú' fi' nī ji` quiá' Fidié` lī fé' lala?

E cū̄ e ja` caljii' dsea` jmigüi quiá' tiī fiĩ quiá' 'nur̄,

lanagui dseáng' cū̄ laniim` nica'uíng` quiá' 'nú'.

Jō 'ñiab' Fí'naa' dsea` cajméer` e la,

jōba' dseáng' eáam' dsi'gó` dsi'naa' lana.

43 Jō uii' jōba' fiĩ i 'nú' jmiī na e nigüeáb' lajii' e si'í niñíng`na' e Fidié` nicár` nifi' qui`na' jō dsea` jiém' niñíng` e jō, cō' í'bing' já' nilíng` jogui nilér` røø` fi' quini` dsea` do. 44 Jōgui doñi' iī dsea` i nititaang` fi' nī e cū̄ e julí na, dseáng' táub' nilíin̄; jogui song iī dsea` cajlíng` e cū̄ do, dseáng' congua' leeb` nilíin̄.

45 Jōba' mī tí lī canúu` i fiĩ jmidsea` quiá' dsea` Israel do cóo' gui jaléng' dsea` i líng` dsea` fariseo lajii' e júu` e cajíng' Jesús do, jōba' calilí'r̄ e jaléng' í'bre éeng` dsea` do cóo' e júu` quiá'r̄ do.

46 Jōba' iē jō lamiī iin̄ nisám' bre Jesús, dsu' ja` cateá dsíir' fa' cajméer` lajō, cō' fiim' dsea` teáng` i já' líng` e dsea` do líin̄ jaang` i fé' cuaiñ` quiá' Fidié`.

22

*Coo` júu^ já^- e lafa' júu^ cuento quiá^- mi~ cung'^
guó` dsea`*

(Lc. 14:15-24)

¹ Jo mi~ cangf̄ jo, jo cóo'^ júu^ lanab canaangtu Jesús sí'r jaléng^n i dsea` do jo casí^-reiñ':

² —Jo lalab lí' mi~ Fidiée' quier' nif' quiá^- dsea`. Co' e jo lí' laco' mi~ jaang` dseata~ dsea` féng'^ cajméer` cóo` jmii~ fe^n quiá^- e nicúng^n guó` jóor'.

³ Jo mi~ tí' lí' ninée' guiá^- e jmii~ do, joba' i dseata~ do casíñ` jaléng^n dsea` 'léeng'^ quiá'r^- i cangoté'^ jaléng^n dsea` simúng^ e laco' nidó'r^- coling~. Dsa' i dsea` simúng^ do ja` cali'iiñ~ fa' cangoliñ^. ⁴ Jo mi~ cangf̄ jo, i jiéng'gui dsea` 'léeng'^ quiá^- i dseata~ do casíñ` i cangoté'^ i dsea` nisimúng^ do jo casí^-reiñ' do jial júu^ nicáñ' do jo cajíñ^- lala: “Güijmée'^na' júu^ i dsea` nisimúng^ do e ninéeb' guiá^- lajaléb' e niquiee~naa', co' nicaquiá'^ ta~ e nicaingam' dsea` güitá^ quié^- e cóo'^ gui jaléng^n jó' caguaang-gui i jlo'^ úung~, jo lajib` ninée' guiá^- lana. Síi~gor güijalíñ-, co' lana nidsitoo'^ jmii~ quiá^- e nicúng^n guó` jóo`baa.” ⁵ Dsa' dseáng'^ ja` cajmijib^- i dsea` simúng^ do lajii'^ júu^ quie' i dsea` 'léeng'^ do. Jo jaaiñ' do cajíñ^-: “Síi~go fii' e ja` lí' nii'i lana, co' nabi 'né^- nii'i ni'ée'e uó^- quié^-e.” Jo jaang'gui do cajíñ^-: “Síi~go fii' e ja` lí' nii'i lana, co' nabi 'né^- nijóø^ø lajii'^ e 'ni'baa.” ⁶ Jogui i dsea` simúng^ caguaang-gui do caquiém'bre i dsea` 'léeng'^ quiá^- i dseata~ do cartí cajngam'breiñ' do. ⁷ Job mi~ caliguíng^- i dseata~ do e eáang' jo caqui'ra' ta~ 'lée^- quiá'r^- e cangojngáam'biñ' do jaléng^n dsea` i ca'lee' do jogui

cajɪbre fɪi̯ góoiñʰ do cajo. ⁸ Jo mi̯ cangɪ̯ jo, i̯ dseata̯ dsea̯ féngʰ do casíʰr- i̯ dsea̯ 'léngʰ quiáʰr- caguaang- gui do jo cajíñʰ: “Lana ninéé' guiá- lajúi̯ jmiñi̯ e niquiee~naa', dsu' i̯ dsea̯ i̯ lami̯ si'í^ simúngʰ do ja` catúiiñ- fa' e nijalíiñ- e niquiee~naa' colúing~ cóoʰr~. ⁹ Jo lanagui fɪi̯ i̯ 'núʰ e güilíng-na' lacaang' jee~ 'núu' fí jaléʰ fí e laniing- jo güite'na' líʰ doñí i̯ dsea̯ i̯ nijíng'na' jee~ 'núu' do jo síi'na'r e niquiee~naa' colúing~ cóoʰr~, co' i̯ dsea̯ i̯ lami̯ si'í^ simúngʰ do ja` cali'iiñ- fa' cajalíiñ-.” ¹⁰ Joba' ca'uøøm i̯ dsea̯ 'léngʰ quiá'- i̯ dseata̯ dsea̯ féngʰ do e cajmitir~ laco' júi̯ ta~ caquiúʰ fiir~, jo i̯ fím' i̯ dsea̯ do catóʰr-, do i̯ guiúng- jogui dogui i̯ soo` dsíi'; lifa' dseángʰ- caróm- dsíi' sinúu' quiá'- i̯ dseata̯ do e catangʰ- jaléngʰ i̯ dsea̯ í.

¹¹ Jo mi̯ tí lí ca'í- i̯ dseata̯ do fí lí niteáangʰ i̯ dsea̯ fíngʰ do, job cangáiiñ- jaang' dseañuʰ i̯ niquíngʰ jee~ do i̯ ja` qui' si'í^ laco' catúing- quiá'- mi̯ tí jmiñ e cungʰ guó dsea̯. ¹² Joba' i̯ dseata̯ do casíʰr- i̯ dsea̯ í: “Ruuʰ, ¿jial ca'í o' ca'u' fí la ja'gui si'í^ quií~ quiá'- lí cungʰ guó dsea̯?” Jo tiib- cajé' i̯ dsea̯ i̯ ja` quie' si'í^ laco' si'í^ do. ¹³ Joba' i̯ dseata̯ do casíʰr- jaléngʰ i̯ dsea̯ 'léngʰ i̯ guia' guiá- mes~ do: “Ñu'na' guotii- i̯ dseañuʰ na jo güibíng-na'r cartí lí nuu' só' fí caluuʰ, jo fí job lí nijmér- ta~ qui' jogui ta~ tu' maja~.” ¹⁴ Dsaco' tó' Fidiéé' i̯ fím' dsea̯ e nijángʰ yaaiñ- fí jaguór', lifa' júi̯ tú- 'ní múngʰ-bing' i̯ guíñʰ.

Mi̯ cajmingʰ- dsea̯ Jesús cuaiñ~ quiá'- e catúing- dseata̯

(Mr. 12:13-17; Lc. 20:20-26)

15 Jo mi~ cangf̂ e la, caseáng' coo` tú- m̄ng' dsea` Israel i l̄ng' dsea` fariseo jo cas̄ng- tur røø` jiallaco' nicuø'r- Jesús dsee- fí' quini~ dseata~. 16 Jo cas̄im`biñ' do fí' l̄i~ táang' Jesús coo` tú- m̄ng' dsea` i la'ó' ír` cóo' gui dsea` quiá'- dseata~ Herodes, jo lalab júu^ quieñ' do quiá'- Jesús jo casí'r-:

—Tifa', ne~baa' guiá- e jmang' júu^ já'-ba' fó' 'nu` jogui e dseáng'- lajam'^ba' já'- e' jialco' iing~ Fidiéé' e see~naa'. Jogui ne~b̄i' cajo e ja' 'gó' 'nu` cóo'~ jalé" e í dsí' dsea` osi jalé" e fé" dsea` uii~ quí' é, co' ja' jøø- 'nu` jí' jialco' l̄ng' dsea` lí^ caluu~. 17 J̄oba' ii~naa' nijm̄ng' 'nu` e~ nifo' cuaiñ` quiá'- e júu^ la: ¿Su 'né- niquí'naa' cuu- e cat̄ng- dseata~ i guing~ fí' Roma osi ja' 'né- quí'naa' é?

18 Jo dsu' Jesús calilí'^bre laj̄i' e ga' e í dsí' i dsea` do, j̄oba' cajíñ'- casí'-reiñ':

—i j̄m̄icaang~ i la 'nú'! ¿Jialí' 'nó'na' e iing~na' niguié'na' jial e ni'n̄ng~na' jnea~ fí' quini~ dseata~? 19 Ée'na' jnea~ e cuu- e 'né- niquí' quiá'- i dseata~ do.

J̄oba' i dsea` fariseo do cacuø'r' dsea` do coo` cuu- laj̄o. 20 Jogui Jesús casí'-reiñ' do lala:

—¿I~ i táang' fí' ni~ e cuu- la jogui jial siir'?

21 J̄oba' cañí' i dsea` fariseo do quiá'- Jesús:

—Dseata~ dsea` guing~ fí' Roma táang' fí' na.

J̄oba' cañí'tu Jesús quiáñ'- do jo casí'-reiñ':

—Cuøø'na' dseata~ i guing~ fí' Roma laj̄i' e cat̄ng- í, jogui laj̄o: cajo cuøø'na' Fidiéé' laj̄i' e cat̄ng- Fidiéé'.

22 Joba' mi~ tí li~ canúuiñ'- do lajo, eáam' cangogá' dsír' e jii' o' ñir' e~ niñi' guir. Jo cangolím' bre mi~ cang' lajo, jo 'ñiab' Jesús caje' guir.

Mi~ cajming' dsea' jial lí' mi~ nijí'tu dsea' calé' catú'

(Mr. 12:18-27; Lc. 20:27-40)

23 Jo 'ña' ie~ jm' jo caguilíng' coo' tú~ m'ng' dsea' Israel i líng' dsea' saduceo fí' lí' táang' Jesús. Jo co' jaléng' i dsea' saduceo do ja' já' lí' e jii'tu 'li~, joba' ca'f' dsír' e cangojming'r' Jesús jo casí'r' dsea' do lala:

24 —Tifa', lalab cajíng'— Moi~ mali~gui eáang' e song cajúng' jaang' dseañu' e jii' ja' jóor' caliséng', joba' i rúng' dsea' ngáang' coo' i 'li~ dob 'né' nicúíñ' guóor' coo' i dseam'f' quiá' i 'li~ do e laco' niliseeng' jóor' coo' ír'. Joba' lafa' jóob' i dseañu' la'uii~ do ni'uíng' i jiuung' i niliseeng' do. 25 Jo lalab calí' jee~ jnea'^; coo' née' caliséng' guiáng' dseañu' i la'ó' rúng'. Jo i dseañu' la'uii~ do cacúm' guóor', jo ja' huóø' ngó' cajúm-bre, lifa' jii' jaang' jóor' ja' caliséng' coo' dseam'f' quiá'r'. Joba' i dseañu' rúíñ' i catí' tú~ do cacúm'bre guóor' coo' i dseam'f' í', 26 jo dsu' lajob calí-tu, cajúm-biñ' do jo ja' jóor' caliséng' cajo. Jo lajob i rúíñ' i catí' 'ní' do cajo, cacúm'bre guóor' coo' i dseam'f' í', dsu' lajobtu ca'uíng' quiá'r', cajúm-bre e jii' ja' jóor' caliséng'. Jo lajob calíng' lajì guiáng' i dseañu' do, cajúm-bre e jii' ja' jóor' caliséng' coo' i dseam'f' do. 27 Jo ja' huóø' ngó' jo cajúm' i dseam'f' do cajo. 28 Joba' jming' jnea' 'nu' lana e mi~ nití' í' e nijí'tu dsea', çí~ dseáng' i dseañu' do lajee' lajì guiáíñ' nicúng' guóor' coo' i dseam'f' do? Co'

lajalém'bre cacúin' guóor' lajee' seein' fí' jmigüü' la.

²⁹ Jöba' cañí' Jesús quiáin' do:

—Sijgiém' áa' 'nú', cō' ja' ñí'na' jial laco' fé' fí' ni' jì' quiá' Fidié', jogu' dseáng' ja' ñí'ba' cajo jial tí' 'gøng' dseá' do. ³⁰ Cō' ie' jō, mi' ñití' í' e' nijí'tu jaléng' 'lii', jaléng' dseañu' cō'gu' jaléng' dseamí' jō' tō' jmi' fa' e' nicúng' gu' guór', dsaco' lafa' ángeles quiá' Fidié' i' neáng' fí' ñifib' niliñ' ie' jō. ³¹ Jogu' 'nú' jmingi'na' su jí'tu jaléng' dseá' mi' ningí' e' júuin', jō' ¿su ja' mí' ca'í' 'nú' lí' tō' lajii' júu' quiá' Fidié' e' cajín' malii'gui mi' café'r' lala?: ³² “Jneab' lín'n Fidié' quiá' Abraham cō'gu' quiá' Isáa' jogu' quiá' Jacóo.” Jöba' fí' i' 'nú' lana e' Fidié' ja' líiñ' Fidié' quiá' jaléng' 'lii', cō' Fidié' quiá' jaléng' dseá' jib' líiñ'.

³³ Jō' mi' tí' lí' canúu' jaléng' i' dseá' do lajii' júu' e' cajíng' Jesús, jöba' dsíng' cango'gá' dsír' jō' cangolím'bre jóng.

E lab júu' quiu' ta' e' laniing'gui quiá' Fidié'
(Mr. 12:28-34)

³⁴ Jō' mi' tí' lí' cangí' e' casíng' Jesús cō' dseá' saduceo, jō' caseám' rúng' dseá' fariseo mi' tí' lí' caliñir' e' cateá' lanab cañí' Jesús lajii' júu' e' cajmingí' i' dseá' saduceo do. Jō' i' dseá' í' cangolím'bre fí' lí' táang' Jesús. ³⁵ Jō' jaang' lajee' la'ó' í' i' líng' tifa' quiá' júu' quiu' ta' quiá' dseá' góor' dseá' Israel e' lí' laco' iin' e' niténg' Jesús fí' ní' dsee', jöba' cajmingí'r' dseá' do lala:

³⁶ —Tifa', ¿e' e' júu' quiu' ta' quiá' Fidié' e' niing'gui?

³⁷ Jöba' cañí' Jesús quiá' i' dseá' do:

—E lab e júu^ e niing-gui do: “Jmi'neáng` Fíi` Fidié` car` ngocáng` o` jogui cóo!~ jalé` bî seeng` jmiguí` quíi`- jogui cóo!~ jalé` e í o`.” 38 Jo e lab e júu^ e laniing-gui jogui e la'uii~ do cajo jee~ lajalé` júu^ quiu` ta~. 39 Jogui e júu^ quiu` ta~ e cati` tú- do røb`jiu lí` cóo!~ e la, jo lalab fé`: “Jmi'neáng` jaléng` dsea` rún` lí`^ laco'gui jmi'neáan` uø`.” 40 Jo cóo!~ e tú- júu^ quiu` ta~ nab lí` júu^ tii- fi` quiá- lajalé` e caguiee-gui júu^ quiu` ta~ quiá- Fidié` jogui lajalé` júu^ e ca'e` i dsea` i café` cuaiñ` quiá- Fidié` malii`gui eáang`.

*I` dsea` siju` líng` Dsea` Jmáang`
(Mr. 12:35-37; Lc. 20:41-44)*

41 Jo lajee` e teáam-bi jaléng` i dsea` fariseo fi` do,
42 mi~ cajmingi`- Jesús ír` lala:

—Jo e` í oó`nú` cuaiñ` quiá- i dsea` i sijeeng`na` do i nicá` nifi` quíi`-na` do? ¿Jial laco' jáa` sijur`?

Joba' cañi` i dsea` do quiá- Jesús jo cajíñ`-:

—Dsea` siju` dseata~ dsea` féng` Davíb`^ í.

43 Joba' cañi` Jesús quiáñ`- do:

—Jo ¿jial lí` jóng? Co' ie~ lami~ cateáang` dseata~ Daví`^ fi` jmigüi` la, cajíñ`- la'eáang` cóo!~ Jmiguí` quiá- Fidié` e Dsea` Jmáang` líng` Fiir~, co' lalab cajíñ`- ie~ jo:

44 Lalab cajíng`- Fidié` casí`r- Fíi`:

“Ní` lí`^ lí` dsée` laco' guiin`n

carti` nijmee` e e jaléng` dsea` i `ní` níng`- `nu` nisí`r` uø- jni~ fi` quini`^ e laco' nijmi`gór` `nu`.”

45 Jo cajíng`-gui Jesús e júu^ la:

—Jo song `ñia`bi dseata~ Daví`^ sí`r` Fíi` i dsea` i sijeeng`na` do i nicá` nifi` quíi`-na` do, joba' ¿jial cuøng` e í líiñ` dsea` siju` dseata~ Daví`^ jóng?

46 Jo jaléng' i dsea` i teáng- do ie~ jo jíi~ camí' júu^ ja` cadsé'r` fa' cañír` quiá'- Jesús, jo latí' ie~ job jíi~ jaang` dsea` fa' cateá-gui dsír' ee` nijmingí'r` dsea` do.

23

Mi~ cajíng'- Jesús jalé' e ga' e jmóo` jaléng` dsea` fariseo

(Mr. 12:38-40; Lc. 11:37-54; 20:45-47)

1 Jo mi~ cangí' e jo, casí' Jesús jaléng' dsea` i teáng- do ie~ jo cóo'~gui jaléng' dsea` quiá'r- jo cajíñ'- casí'- reiñ':

2 —Jaléng' tifa' quiá'- júu^ quiu' ta~ quiá'- dsea` góo`naa' dsea` Israel cóo'~gui jaléng' dsea` góo`naa' i líng' dsea` fariseo óor` ta~ e er' e~ guóng' lajíi~ júu^ quiu' ta~ quiá'- Fidiéé. 3 Joba' fíi- i 'nú', jmee`ba' núu`na' lajíi~ júu^ quiá'r- jogui jmití'ba' lajíi~ e sí'r' 'nú', jo dsu' jie~ mí' jmoo`na' laco'gui la jmóor', dsuco' i dsea` í ja` jmitir~ lajíi~ e júu^ quiá'r- do. 4 Dsuco' i dsea` í lico' tiiñ` jmér- lafa' léé` dsea` cóo'~ jalé' e jíñ'- e 'né- nijmiti~ dsea` e jíi~ ja` quiá'- dsea` jmí~ jmitir~, jo dsu' ja` jmicóo'r~ dsea` jíi~ cóo'~ camí'^ niguóor` e laco' niróo- e lee' do. 5 Jo lajíi~ e jmóor` do lico' iñ~ e jøø- jaléng' dsea` jiém'. Jogui tí dsír' e quier' lí tóo` júu^ quiá'- Fidiéé fí guiaquíur' osi fí dse' cuéer' é, jo e jo tóo` cóo'~ júu^ e líng~ guíá- laco' jnéeng- huíi-. Jo lacaang` fí dse' sí'r` tí dsír' e í'r' lo'^ e cuee'. 6 Jo tí dsír' e guar' fí lí jlo'gui fíng dsilíñ- lacaang` lí tí jmí~ osi lí niing- gui é fíng dsilíñ- fí sinúu^ guá'- quiá'- dsea` góo`naa'. 7 Jogui iñ~ e jmí'gó` dsea` ír' mí' jíñ' rúíñ' jee~ 'núu', jogui tí dsír' e fa' jalém' dsea` sí' ír' tifa'.

8 'Jo dsu' 'nú' ja` catíng`-na' fa' e nisí' dsea` 'nú' tifa', dsuco' jaam` tifa' i` dseáng'` seeng` quí`-na', jogui lajaléng' 'nú' líng`na' laco' rúm`ba'. 9 Jogui 'nú', ja` catíng`-na' e nifí`-na' teaa` jíi` jaang` dsea` fí' jmigüi` la, dsuco' jaam` Tiquí`na' i` seeng`, jo íb` Fidié` i` guing` fí' ñifí`; 10 o'gui catíng`-na' fa' e nisí' dsea` 'nú' fii~, co' jaam` Fii`na' seeng`, jo íb` i` dsea` i` sijeeng`na' do i` nicá` nifí' quí`-na'. 11 Jogui song` ii` lajee` la'ó' 'nú' líiñ` e niing`guir, joba' íbing' i` 'né` nijmé` ta` jmicóo` jee` jaléng' 'nú'. 12 Co' doñi` ii` dsea` i` jmiféng' 'ña' jee` jaléng' dsea`, joba' i` dsea` í` eáam` nijgiáaiñ` mi` nití` í' lajo. Jo doñi` ii` dsea` i` ja` jmiféng' 'ña' jee` jaléng' dsea` rúng', joba' íbing' i` eáang`gui niliniing` mi` nití` í' lajo.

13 'iE ngi` fñib` 'nú', jaléng' tifa' quiá`- júu` quiu' ta` quiá`- dsea` Israel cóo`gui jaléng' 'nú', dsea` Israel i` líng` dsea` fariseo, co' jmang`^ i` jmicaam` 'nú'! Co' jní`ba' fí' e laco' dsea` jíéng' ja` nijáng' yaaiñ` fí' jaguó` Fidié` e laco' dsea` do nicá` nifí' quiá`r`. Jogui jíi` 'nú' ja` jáang` yaang`na' fí' jaguó` Fidié` o'gui cuø`na' fí' jaléng' dsea` i` iing` nijmé`- lajo.

14 'iE ngi` fñib` 'nú', jaléng' tifa' quiá`- júu` quiu' ta` quiá`- dsea` Israel cóo`gui jaléng' 'nú', dsea` Israel i` líng` dsea` fariseo, co' jmang`^ i` jmicaam` 'nú'! Co' jmoo`na' ii` 'nu` jaléng' dseam` 'ní` i` tiñíng`, jogui jmicaang`na' e ja` lí' lajo, jogui jmoo`na' e cuee` fa' quí`-na' mi` güilíng`na' fí' guá`. Jo uí` e lajob` jmoo`na', joba' 'nú'bing' i` ga`gui eáang` ni'íng' iihuí` mi` nití` í' lajo.

15 'iE ngi` fñib` 'nú', jaléng' tifa' quiá`- júu` quiu'

ta~ quiá'- dsea` Israel cóo'~gui jaléng' 'nú', dsea` Israel i líng' dsea` fariseo, có' jmang'^ i jmicam~ 'nú'! Có' jmoo'na' ta~ ngí' lacaang' fí' ni~ guóo'~ uó- quiú' cóo'~gui lacaang' fí' ni~ jmiñí'^ e laco' nilí'na' jaang' dsea` i nidsitáang- cóo'~ 'nú'. Jogui mi~ tí lí~ calí'na' i dsea` í, dseáng'- lico' síng'guina'r e catáññ- tú- née'~ fí' lí~ 'lí'^ laco'gui la líng' 'nú' yaang~na'.

16 'iE ngí' fiib^ 'nú', dsea` líng'na' lafa' dsea` tiuung- i jéeng' jaang'gui dsea` tiuung-! Có' 'nú' fó'na' e mi~ jmoo` dsea` promes e éeiñ` guá'- fé', ja` 'né- nijmitir~ e jo; jo dsu' 'nú' fó'na' e mi~ éeng` dsea` e cunée~ e sea` fí' guá'- do, joba' dseáng'- 'né- e jmiti~bre jóng. 17 'i'Nú' líng'na' lafa' dsea` tiuung- i jí'! ¿E~ e quíng'gui quí'na' eáang' líng-na'? ¿Su cunée~ ofa' e guá'- e jmigüeang'^ e cunée~ dob é? 18 Jogui fó'bi' 'nú' cajo e doñí' jí' dsea` i jmoo` promes e éeiñ' fí' nife', ja` catíng- fa' e nijmitir~ lají'~ e ca'éeiñ' do. Jo dsu' 'nú' fó'na' e song ca'éeng` dsea` lají'~ e tíng` dsea` e cuø'r' Fidiée~ fí' nife', joba' dseáng'- 'né- e nijmiti~bre jóng lají'~ e ca'éeiñ' do. 19 'i'Nú' líng'na' lafa' dsea` tiuung-! ¿E~ e quíng'gui quí'na' eáang' líng-na'? ¿Su lají'~ e tíng'na' cuø'na' Fidiée~ fí' nife' do ofa' e nife' e lí~ ligüeang'^ dob é? 20 Jo dsu' jnea~gui fá'a e i dsea` i éeng` e nife' do, o' jí'~ quiá'- e jo jmóor` lajo, có' lajob jmóor` cajo quiá'- lajalé' e sea` e fí' ni~ do. 21 Jogui i dsea` i éeng` guá'- fé', o' jí'~ quiá'- e guá'- do jmóor` lajo, có' lajob jmóor` cajo cóo'~ Fidiée~ i seeng` fí' jo. 22 Jogui i dsea` i éeng` ñifí-, lajob éeiñ` 'ña' Fidiée~ cajo jogui fí' lí~ lí' ée^ quiá'- dsea` do fí' jo.

23 'iE ngi~ fñib^ 'nú', jaléng^ tifa' quiá^- júu^ quiu' ta~ quiá^- dsea` Israel cóo~gui jaléng^ 'nú', dsea` Israel i líng' dsea` fariseo, có' jmang^ i jmicaam~ 'nú'! Có' cuø'na' Fidié~ cóo` lajee~ guí~ lajii~ e catñiñ~ quiá^- jalé' e ro'na' do fa' jalé' oo` quiá^- jmiñi~ jogui jalé' e jié', jo dsu' ja` jmití'na' e júu^ quiu' ta~ quiá^- Fidié~ e niing~gui e quiá^- jial ni'é- dsea` røø cóo~gui dsea` rúíñ' jogui jial nilí fñ~ líng~ dsea` jaléng^ dsea` rúíñ' jogui jial dseáng^- nijmitir~ jalé' e iing~ Fidié~. Jo jalé' e nab e laniing~gui e 'né- nijmití'na' lifa' ja` 'naang'na' ca' jalé' e catíng~ Fidié~ e nicuø'na're do. 24 i'Nú'gui líng'na' lafa' dsea` tiuung~ i jéeng` jaang'gui dsea` tiuung~- i jo tiim'ba' ngí'na' jalé' e ú'na' e laco' ja` niníng'na' lu' ping'^, jo dsu' nám'ba' i jó' féng^ i sií camello!

25 'iE ngi~ fñib^ 'nú', jaléng^ tifa' quiá^- júu^ quiu' ta~ quiá^- dsea` Israel cóo~gui jaléng^ 'nú', dsea` Israel i líng' dsea` fariseo, có' jmang^ i jmicaam~ 'nú'! Có' 'nú' lí'^ i ru' guiá^- jalé' cuéé'~ huí' quiá^- jii' lí'^ caluu~, jo dsu' e téé'~ dsí' do jmang^- jalé' e nicajmee-na' ii cóo~gui jalé' e lí' ó'na' e sea' fí' jmigüí. 26 i' tñu~ 'nú', dsea` fariseo! Có' la'uii~ jang^- rúu'na' lí'^ lí' dsíib' jalé' cuéé'~ huí' quií-na' do, jo lajoguiba' nijé~ tee' fí' caluu~ cajo.

27 'iE ngi~ fñib^ 'nú', jaléng^ tifa' quiá^- júu^ quiu' ta~ quiá^- dsea` Israel cóo~gui jaléng^ 'nú', dsea` Israel i líng' dsea` fariseo, có' jmang^ i jmicaam~ 'nú'! Có' 'nú' líng'na' laco'gui la lí' lí' si'aang~ 'líi~ e jlo'^jiu tee' lí'- caluu~, jo dsu' lí'- lí' dsíí' layaang~ móo' 'líi'ba' téé'~ cóo~gui jalé' e 'lí'^ e jié'. 28 Jo dseáng^- lajob líng' 'nú' cajo, có' guiúm~ba' jnéeng-na' jóøng~ dsea` 'nú' lí'- caluu~, jo dsu'

dseáng' lico' jmicaam~ba' cóo' jalé' e fó'na' jogui
jmang' e 'lib' í' áa'na'.

29 'jE ngi~ fñb^ 'nú', jaléng' tifa' quiá'- júu^
quiú' ta~ quiá'- dsea` Israel cóo'gui jaléng' 'nú',
dsea` Israel i líng' dsea` fariseo, co' jmang'^ i
jmicaam~ 'nú'! Co' jmo'na' lí si'aang' jaléng'
dsea` i café' cuaiñ~ quiá'- Fidié~ mali~gui eáng'
jogui jmo'na' e silii~jlo' lí si'aang' jaléng' dsea` i
ca'ée' guiú- cóo' Fidié~, 30 jogui fó'na' lala: "Facó'
jneá'^ calisé'naa' lajee~ e caliséng' 'lii~ dsea` áang'
quí'naa', joba' ja' cajmicóo'naa' jóng e cajnga'
dsea' quiá'- i dsea` i café' cuaiñ~ quiá'- Fidié~
mali~gui eáng' do." 31 Jo cóo' jii~ e júu^ nab
cuø'na' lí e dsea' sijú^ba' líng' i dsea` i cajngang'
i dsea` i café' cuaiñ~ quiá'- Fidié~ mali~gui do.
32 Jo co' lajob líí, joba' 'nú' jmité'na' náng lajii~ e
nicanaang' 'lii~ dsea` cóøng' qui'na' cajméer'.

33 'jNú' líng'na' jóo' mi' guíng'- ¿jial nili'na'
e nileáng'na' lajii~ iihuí' e ni'ling'na' fí lí 'li'??
34 Joba' fñi~ i 'nú' e jnea~ nisín^n jee~ 'nú' jaléng'
dsea` i fé' cuaiñ~ quiá'- Fidié~ jogui jaléng' dsea`
i tíng' eáng' cóo'gui jaléng' dsea` i e' jalé' júu^
quiá'- dsea' góo'naa' dsea` Israel; lifa' 'nú', ni-
jngám'^ba' jogui nitáang~na' fí dse' crúub^ i líng'
i dsea' í, jogui i líng'guiiñ' do nibøøng'na'r fí
dsíí sinúu^ guá' jogui ni'øøng~na'r fí lacoø' fñi lí
guiliñ'. 35 Jo lajoba' iihuí' e eám' ni'ling'na' e
jáa' quiá'- Fidié~ uii~ quiá'- jalé' jmi'øøng~ i dsea`
i guiúng~ e nicatuu' fí ni' guóo' uø- la. Jo e jo
canaang' mi~ catuu' jmi~ Abel i líng' jaang' dsea`
guiúng~ fí quini~ Fidié~ jo cartí mi~ catuu' jmi~
Zacarías, jóo' jaang' dseañu' i calisi Berequías, co'

ḡ dsea` íb` ḡ cajngang` 'nú` cáang` nife` quiá`- siguí`
guá`- fé` e si` fí Jerusalén. ³⁶ Jḡ dseáng`- e jáb`- e
fíi`-i 'nú` e ḡ dsea` ḡ seeng` jmíi` na, í`bing` ḡ ní`íng`
iihuí` uii` quiá`- lajalé` e jḡ.

*Mi` caqui` Jesús uii` quiá`- dsea` seeng` fí` fí`
Jerusalén*

(Lc. 13:34-35)

³⁷ Jḡ mí` cangí` jḡ, cajíng`-gui Jesús e júu` la:

-ḡfíi`b` 'nú`, dsea` seeng`na` fí` Jerusalén, fíi`b`
'nú`, dsea` seeng`na` fí` Jerusalén! Co` 'nú` ḡ seeng`
e fí` fíi` lab ḡ cajngang` jaléng` dsea` ḡ café` cuaiñ`
quiá`- Fidiéé` , jḡgui` cuub` casí`lloo`na` cajo jaléng`
dsea` ḡ casíng` dsea` do ḡ guíá` júu` quiá`r`- jee` 'nú`.
Jḡ ja` ñii`- j`ó`gui` née`~ cali`iin`n e nito` fíi`n`n 'nú`
lí` lacogui` to` fíi`ng` jaang` tui`iee` jaléng` tuyuu`
quiáa`-re` fí` nú`- cuéé`re`, jḡ dsu` ja` cali`iing`na`
lajḡ. ³⁸ Jḡba` latí` lana jḡ` ḡ niliseeng`gui` fí` guá`-
quíi`na` la. ³⁹ Jḡba` fíi`-i 'nú` e jḡ`nimáang`gui` jnea`~
cartí`mí` nifo`na` lala: “ḡjuguíá`-jiu` quiá`- ḡ dsea` ḡ
casíng` Fidiéé` fí` jmí`güi` la cuaiñ` quiá`r`!”

24

*Mi` cajíng`- Jesús e ní`íng`- guá`- fé` e si` fí`
Jerusalén*

(Mr. 13:1-2; Lc. 21:5-6)

¹ Jḡ mí` cangí` jḡ, mí` tí` lí` cagüi`íi` Jesús fí` dsíi`
sináú` guá`- jḡ mí`fíng` ní`iuuiñ` fí` ngam`bre, mí`
tí` lí` cangoquíéng` ḡ dsea` quiá`r`- do fí` lí` ngóor`
jḡ canaiñ` do jḡḡr`- la`úung` e guá`- fé` do. ² Jḡba`
lalab casí`- Jesús ḡ dsea` í`:

-ḡSu jḡḡr` 'nú` jial` jlo` e guá`- si` na? Jḡ dsu` e
já`-ba` e fíi`-i 'nú` e jíi`~ coḡ` cuu` jḡ`nijé`- sí`fíng`gui`

rúng^l quiá^l- e guá^l- e móo⁻na' si^l na lana; co^l lajib⁻ ni'íng⁻ jo jii^l coo⁻ jo⁻ e nijé⁻gui.

Jalé^l e li⁻ mi⁻ tí^l lí⁻ ná^l-gui e ni'íng⁻ jmigüí^l
(Mr. 13:3-23; Lc. 21:7-24; 17:22-24)

³ Jo mi⁻ cangí^l jo, cangób⁻ Jesús fí^l yá^l^ mó^l e sii⁻ Olivos colíng⁻ cōo^l~ dsea⁻ quiá^lr⁻. Jo mi⁻ caguiliñ⁻ fí^l jo, job caguá^l Jesús, jo lajee⁻ job cangoquiéng^l i dsea⁻ quiá^lr⁻ do fí^l lí⁻ guiiñ^l do lí⁻ coo⁻ yaaiñ⁻, jo cajíñ^l- casí^lr⁻ dsea⁻ do lala:

—Ii⁻naa^l fa^l 'na⁻ nijmée^l~ jnea^l júu[^] ¿lí⁻ nidsijée^l lajalé^l e la? ¿E⁻ jalé^l e nilili⁻ jéeng^lgui mi⁻ tí^l lí⁻ ná^l-gui niñí^ltu 'na⁻ fí^l jmigüí^l la jogui mi⁻ tí^l lí⁻ nití⁻ í^l e ni'íng⁻ jmigüí^l?

⁴ Joba^l cañí^l Jesús quiá^l- i dsea⁻ quiá^lr⁻ do jo casí^l-reiñ^l:

—Jii^l e laba^l fí^l-i 'ná^l; jmiñiing^l óo^lna^l e jii^l- jaang⁻ dsea⁻ ja⁻ güijmigó^lñ⁻ 'ná^l'. ⁵ Co^l fí^lm'bing^l i nijalíng⁻ i nijmigó⁻ jo nijíñ^l': "Jneab⁻ i dsea⁻ i sijeeng⁻na^l do i nicá⁻ ní^lfí⁻ quií⁻na^l"; jo fí^lm' dsea⁻ nilí^lr⁻ i niligøng⁻. ⁶ Jo 'ná^l ninúu[^]na^l júu[^] e sea⁻ 'nií⁻ fí^l la fí^l na; jo dsu^l ja⁻ føng^lna^l mi⁻ nití⁻ í^l lajo, co^l jobi uing⁻ jogui co^l dseáng^l- 'né⁻ e nidsijéeb^l lajalé^l e jo; dsu^l o^l ie⁻ jo nití⁻ í^l e ni'íng⁻. ⁷ Co^l ie⁻ jo jaléng^l dsea⁻ nitíñ⁻ cōo^l~ dsea⁻ rúíñ^l, jogui coo⁻ fí^l nitíng⁻ cōo^l~ coo⁻gui fí^l, jogui nilisea⁻ oo⁻ fí^l la fí^l na, jogui jmiguiab^l lí⁻ nijø⁻ uø⁻ e eáang^l cajo. ⁸ Jo jobi lí⁻ uim⁻bi jóng⁻ mi⁻ nimó[^]na^l e nidsijée^l jalé^l e iihuí^l jo.

⁹ 'Jo job mi⁻ nitóø⁻ jaléng^l 'ná^l e laco^l nijmihuíñ⁻ 'ná^l cartí^l nijngáiñ^l- 'ná^l. Jo ie⁻ jo lajím⁻ dsea⁻ jmigüí^l nilí^l 'ní^l nííñ⁻ 'ná^l uí^l~ jnea⁻.

¹⁰ Jo ie⁻ jo fí^lm' dsea⁻ nitá⁻bre e já^l- lííñ⁻ júu[^] quié⁻e

jogui nilí 'ní' níng⁻ rúng[^] dsea jogui ni'níñ⁻ lajeé[^] la'ó' rúñ[^] cajo. ¹¹ Jo fím[^] dsea[^] nijalíñ⁻ mi[~] tí lí[~] jo e nijmígóor[^] e fé'r[^] cuaiñ[~] quiá⁻ Fidiée[^], jo fím[^] dsea[^] nilí'r[^] i niligøøng[^]. ¹² Jo ie[~] jo dseáng⁻ jmang⁻ jalé[^] e 'lí'[^] ba' nijmé⁻ dsea[^], joba' fím[^] dsea[^] nitú[^] bre e jmi'neáaiñ[^] jaléng[^] dsea[^] rúñ[^]'. ¹³ Jo dsu[^] i dsea[^] i nité[^] e siñ[^] teá[^] fí[^] guiú⁻ lata[~] cóo[^] jnea[^], joba' í'bing[^] i nileáng[^] jee[^] dsee⁻ quiá⁻ mi[~] tí lí[~] jo. ¹⁴ Jo e júu[^] la quiá⁻ jial[^] quié[^] Fidiée[^] nifí[^] quiá⁻ dsea[^] nini⁻ fí[^] la'úng⁻ fí[^] jmígüí[^] e laco[^] nilicuí[^] dsea[^] e júu[^] jo; jo joguib[^] mi[~] nití⁻ í[^] e ni'íng⁻ jmígüí[^] jóng.

¹⁵ Jo malí[~] gui eáang[^] i dsea[^] i café[^] cuaiñ[~] quiá⁻ Fidiée[^] i calisí[^] Daniel cajme'r[^] fí[^] ni[~] jì[^] quiá'r⁻ cuaiñ[~] quiá⁻ cóo[^] e 'lí'[^] eáang[^] e nisí[^] dsea[^] fí[^] dsí[^] guá⁻ fé[^] e si[^] fí[^] Jerusalén fí[^] lí[~] lí[^] e guá⁻ güeang[^] quiá⁻ Fidiée[^]. Jo mi[~] nimó[^] na' e jo e fí[^] lí[~] güeang[^] quiá⁻ Fidiée[^] do —jaléng[^] 'nú[^] i í[^] e jì[^] la 'né⁻ ningám[^] ba'—, ¹⁶ joba' mi[~] nití⁻ e í[^] jo, jaléng[^] dsea[^] i neáang[^] fí[^] lí[~] se[^] Judea güicuú[^] bre fí[^] jee[~] mó[^] jóng. ¹⁷ Jogui i dsea[^] i dsiing[~] yú[^] 'núu[^] mi[~] tí lí[~] jo, ja' güi'í[^] dsí[^] r[^] fa' e nijgiáang[^] guir e laco[^] nidsi'uóø'r[^] jalé[^] e sea[^] quiá'r⁻. ¹⁸ Jogui i dsea[^] i taang[~] fí[^] jee[~] mó[^] e jmóor[^] ta[~], joba' ja' güi'í[^] dsí[^] r[^] fa' e niqing[^] guir fí[^] quiá'r⁻ e faco[^] dsiquiéer[^] si[^] r[^]. ¹⁹ Joba' ifiib⁻ eáang[^] jaléng[^] dseamí[^] i quiéng[^] yuu[^] ie[~] jo osi i jéng[^] yuu[^] i cu[^] tú[^] é! ²⁰ Jo mii[~] na' Fidiée[^] e ja[^] nidsitíng[^] e ni'uøng[^] na' e cui[^] na' lajee[^] jii[^] güi⁻ osi lajee[^] jmi[~] e jmi'íng[^] dsea[^] góo[^] na' é; ²¹ dsuco[^] ie[~] jo gab[^] eáang[^] nilisea[^] iihuí[^] e ja[^] mí[^] canga[^] dsea[^] lajii[^] mi[~] catiroo[^] jmígüí[^] o'gui fa' niní[^] guir calé[^] catú⁻ cajo. ²² Jogui faco[^] Fidiée[^] nijmér⁻ e nili'í[~] eáang[^] e nidsijéé[^] jalé[^] e jo, joba' jii[^] jaang[^] jo i[^] nileáng[^] gui

jóng faco' lajo. Jo dsu' ja` nijmi'hiĩñ~ e jo uí' e fñ-
líiñ- jaléng` dsea` quiá'r- i nicaguíñ` do.

23 Jo song ie~ jo nijmigóøng` dsea` 'nú' jo ni-
jĩñ': "Jøø-, i lab i dsea` i sijeeng`na' do i nicá-
nifí qui-`na'", osi "Jøø-, dob nisiñ' é", jo dsu' ja`
já- güilíng`na' jóng. 24 Co' ie~ jo fñm' dsea` ni-
jalíiñ- jo nijmigóor` e líiñ' i dsea` í, jogui seem`bi
i nijmigóor` e líiñ' dsea` i fé` cuaiñ~ quiá- Fidiée`
cajo; jogui eám' nijmér- jalé' e li~ jogui jalé' e
quí'r~ jmñ~ e dsigá`dsí' dsea`. Jo nijmér- lajo e lico'
nijmigóo`bre jo quiáb'-jiu nijmigóøiñ` la quié`gui
i dsea` i nicaguíng` Fidiée` do, dsu' ja- lí' jmér-
lajo. 25 Jo quié`na' cuente røø` quiá- jalé' júu^ e
nicafá'-a na lana quiá- jalé' e nidsijée` cøøng`gui.
26 Joba' ie~ jo, ja` güiligóøng`na' mi~ nisí' dsea` 'nú'
lala: "Jøø`na', e dob táang` i dsea` i sijeeng`na' do
fí ni~ guóo'~ uó- quiá'", jo dsu' ja` güilíng`na' fa' e
nigüi'néng`na'r; osi nisí'bi dsea` 'nú' lala é: "E lab
si'maang` i dsea` í", jo dsu' ja` já- güilíng`na' e jo.
27 Dsuco' lí'^ laco' lí' mi~ lijñ~ güi'ñiá^ e jnéeng- fí yá'^
jmigüi' e jøø- dsea` lajhiĩñ, lajob lí' cajo mi~ nigáa`tu
jneá~, dsea` lín'n jaang` dsea` jmigüi' i já- fí ñifí-.
28 Co' e já'-ba' fá'a, e jié' li~ ráang` jó'` líi~, fí job
seáng' jaléng' tujlíi`.

Jial mi~ nijáa`tu i dsea` jmigüi' i jáa' fí ñifí-

(Mr. 13:24-37; Lc. 21:25-33; 17:26-30, 34-36)

29 Jo cajíng'-gui Jesús e júu^ la:

—Jo mi~ tí li~ casúung- e iihuñ' jo, joba' jo` ji~ iee`
nilisea`gui o'gui si' cajo fa' nicuø-guir jir~, jogui
jaléng` núu' nijjúiñ` cartí guóo'~ uó-, jogui Fidiée`
nijmér- e niguiá'- jalé' e sea` fí yá'^ jmigüi'. 30 Jo
ie~ jmñ~ job mi~ nilisea` li~ fí yá'^ jmigüi' e tí li~

nigáa'túu fí jmiǵüî la, jnea~ dsea` lín'n jaang` dsea` jmiǵüî, jo lajîm` dsea` seeng` fí la'úng- fí jmiǵüî niqúir- uí~ e 'gór', jo joguiba' mi~ nimáang`na' jnea~, dsea` lín'n jaang` dsea` jmiǵüî ì jáa' fí ñiff-, e nigáa'a e niqúin`n jee~ cabøø~ jní' cóo~ e niing- jî e 'gøng' quiá'- Fidiée'. ³¹ Jogui nisíng- Fidiée' jaléng` ángeles ì líng' guotîr- e nijîúúñ'- do teá' lúu' trompé'^ fí yá'^ jmiǵüî e laco' lajîng` dsea` jmiǵüî ì nilíng` dsea` quiá'r- niseáiñ' colíng~ mi` nití- e í' jo.

³² Jo cajíng'- gui Jesús e júu^ la:

—Lanagui ni'ée^e 'nú' coo` júu^ quiá'- 'ma` güñí': Co' mi~ ninaang` iée` jalé' guo' quiá'-, jo mifíng` canaang` e iáb` jalé' má'^ quiá'- cajo, joba' nilí'^ 'nú' e nijaquiéem' jîi` jmî' jóng. ³³ Jogui lajob lí' e júu^ la cajo, co' mi~ tí lí~ nidsijéé' la-jalé' e nicafá'-a na, joba' niñí'ba' jóng e quiáb'- nijaquiéeng' e nigáa' jnea~, dsea` ì líng' jaang` dsea` jmiǵüî ì jáa' fí ñiff-. ³⁴ Co' dseáng'- já'-ba' fá'a e dseáng'- nidsijéeb' jalé' e jo ná'-gui e nijúung- jaléng` dsea` ì seeng` lajee` lana. ³⁵ Jo tóob` jmî~ ni'íng- la'úng- yá'^ jmiǵüî cóo~gui la'úng- guóo'- uó-, lifa' júu^ quié- e ja` tóo` jmî~ fa' e ja` nilití~.

³⁶ 'Jo jîi~ jaang` dsea` jmiǵüî ñir' e~ jmî~ jogui e~ oor~ e nidsijéé' e jo, co' jî'gui jaléng` ángeles quiá'- Fidiée' dsea` guíng~ ñiff- ja` ñí' e jo, o'gui jnea~ ñii- cajo. Co' dseáng'- lajîi~ Tiquí'ii' dsea` guíng~ ñiff-, jîi~ í'bing' dseáng'- ñí' e jo.

³⁷ 'Jo mi~ tí lí~ nití- í' e nigáa'túu fí jmiǵüî la, jnea~ dsea` lín'n jaang` dsea` jmiǵüî ì jáa' fí ñiff-, nilí' lí'^ laco'gui calí- ie~ lami~ cateáang` Noé fí jmiǵüî la. ³⁸ Co' ie~ jo, lajee` e nú'-gui e ca'á' jmî~

fi' la'úng- fi' guóo'~ uó-, í' gøb' dsea` laco' si'í, jogui cúin' guóor' cajo, lí' cõb` mi~ catí í' e ca'í- Noé fi' dsí' cõo` móo' e dsée- cõo`~ jaléng' dsea` sináú^ quiá'r-; ³⁹ jo dsu' lajee~ e ja` ñiing~ dsíib' dsea~, mi~ catí í' e ca'á' jmi~ fi' la'úng- fi' guóo'~ uó-, jo job lí~ cajúng- lajaléng' dsea` lí' cõo` gui'ná' i seeng` fi' jmi'güí. Jo dseáng'- lajob dseáng'- nidsijée'tu calé' catú- mi~ tí lí~ nigáa'túu fi' jmi'güí la, jnea~ dsea` lín'n jaang` dsea` jmi'güí i jáa' fi' ñiff-. ⁴⁰ Co' ie~ jo gáng- dsea` taang~ jmóo' ta~ quiá'- fi' jee' mó': jo jaaiñ' do nidsém'-bre, jogui jaang`guiñ' do nijé-bre. ⁴¹ Jogui lajobi cajo gáng- dseamí teáng'~ ta~ dsí: jo jaaiñ' do nidsém'-bre, jogui i jaang`gui do nijé-bre.

⁴² 'Joba' fíi-i 'nú', ñiing~ áa'na' contøøng-, co' cõo` lajee~ ja' lí'na', lanab mi~ nigüéeng-túu. ⁴³ Jo e laba' iin~n e ñí'na', faco' jaang` dsea` niñir' e' í' niguiéé' jaang` ñi fi' quiá'r-, joba' nigüéa'bre e jmóor' í' 'nur~, jo ja` nilí' i ñi do fa' ni'uó'r- jalé' e sea` quiá'- i dsea` do. ⁴⁴ Joba' lajob cajo, dseáng'- contøøm- 'né- e siñiim~ áa' 'nú'; co' jíi'~ lajee~ ja` ñiing~ áa'na', lanab mi~ nigüéeng-túu fi' Jmi'güí la, jnea~ dsea` i jáa' fi' ñiff- e lín'n jaang` dsea` jmi'güí.

Jaang` dsea` 'léeng' i guiúng- cõo`~gui jaang`gui dsea` 'léeng' i soo` dsí'

(Lc. 12:41-48)

⁴⁵ Jo mi~ cangí e jo, cajíng'-gui Jesús e júu^ la:

—Lalab lí' quiá'- jaang` dsea` 'léeng'~ i núu'~ jalé' ta~ quiu' fii~ jogui i guiúng- cõo'~ jaléng' dsea` 'léeng'~ rúin' i caguaang-gui. Co' mi~ cagüí'í' i fii~ do e nidsér- fi' lí' jíé', caguiar' ni~ i dsea` 'léeng'~ i núu'~ do lajaléng' i seeng` quiá'r- e laco'

nicuó¹-reiñ¹ do e nidó¹iñ¹- mi[~] nití⁻ í¹ lajo. ⁴⁶ Joba' juguiá⁻jiu quiá⁻ i dsea`'léeng[~] i jmóo` ta[~] laco¹ catáng⁻ mi[~] niguieng¹ fir[~] e cár[~] cuenta. ⁴⁷ Joba' jmí^{taa} ó^ona¹ e i fir[~] do dsíng⁻ guiá⁻ nijmér⁻ jo nicuó¹-reiñ¹ do e nine¹- niñ[~] latø^m- sinú^u quiá⁻r⁻ có^o gui jalé¹ e sea`fí jo. ⁴⁸ Jogui dsu¹ song i dsea`'léeng[~] do líiñ[~] jaang` dsea`'léeng[~] i soo` dsí¹ jo í dsí¹ e ja` mí guieng¹ fir[~] lajee[~] jo, ⁴⁹ joba' nináiñ[~] e nijmeáiñ[~] ga` jaléng¹ i dsea`'léeng[~] rú¹iñ[~] i caguaang⁻gui do, jogui e niseáiñ[~] rú¹iñ[~] có^o jaléng¹ dsea` jmóo` ta[~] í¹ e laco¹ ni¹í¹ nidó¹-r⁻ colíng[~], ⁵⁰ jo dsu¹ co^o lajee[~] e ja` ñiing[~] dsí¹r¹, lanab mi[~] nití⁻ í¹ e niguieng¹ tu¹ i dsea` fir[~] do; ⁵¹ joba' i dsea` do iihu¹b¹ nicuó¹-r⁻ i dsea`'léeng[~] do, co¹ nibí¹m⁻ breiñ¹ do jee[~] jaléng¹ dsea` i jmicaang[~] e jmóor[~] jalé¹ e iing[~] Fidié[~] fí¹ lí[~] nijmér⁻ ta[~] qui¹ jogui ta[~] t^u maja[~] uí¹ jalé¹ iihu¹ e ni¹iñ[~] do.

25

Coo` júu[^] já⁻ e lafa' júu[^] cuento quiá⁻ guíng⁻ simí[^]

¹ Jo cajíng¹-gui Jesús e júu[^] la:

—Lab nifá[^]duu jial lí¹ mi[~] tí¹ lí[~] jo, mi[~] Fidié[~] nicár[~] nifí¹ quiá⁻ dsea` jmigüí. Co¹ e jo lí¹ laco¹ guíng⁻ simí[^] i ca'uøøng[~] quie¹ jmacó[~] jí¹ candí[^] e cango¹iñ[~] dseañ^u i cung¹ guó[~]. ² Jo dsu¹ 'ñíng⁻ lajee[~] i simí[^] do ñiing[~] dsí¹r¹ jogui i 'ñíng⁻gui do ja` ñiing[~] dsí¹r¹. ³ Joba' i simí[^] i ja` ñiing[~] dsí¹ do ca'uøøm⁻bre quier¹ jí¹ candí[^] quiá⁻r⁻ e cango¹iñ[~] i dseañ^u i cung¹ guó[~] do, jo dsu¹ jí¹ jmicoo[~] e a` dsí¹ candí[^] quiá⁻bre quier¹ co¹ jo` quie¹guir fa¹ e seáng⁻gui; ⁴ jo dsu¹ i simí[^] 'ñíng⁻ i ñiing[~] dsí¹ do ca'uøøm⁻bre cajo e quier¹ jí¹ candí[^] quiá⁻r⁻ jo lífa¹

quie'bir coo` sí'gui e co' quier' e a~ jmicoo`. ⁵ Jo co' cali'ñm~ i dsea` cung' guó` do e ja` niguiéiñ', joba' lajñm` i simí` do nicaquiáiñ'- lajee` jo. ⁶ Jo coob`, mi~ catí la iñ- guitu' guienúu', jo guicatá'- mñí~ lí'- caluu` jo guicafé` dsea`: "¡Jmijnée` áa'na!, co' nab nijang' i dsea` cung' guó` do; jogui ñilíng-na' e niñi'líng-na're!" ⁷ Jo lajñm` i simí` do caráaiñ- jo caguiar' guiá- jì candí` quiá'r- lajaang' lajaaññ. ⁸ Joba' i simí` i ja` ñiing~ dsí' do casí'r- i simí` i ñiing~ dsí' do: "Fa' jgiée` óo' 'nú' fa' nijmi'óøng'jia' jnea'^ jmicoo` quií-na', dsuco' cadseáb- jmicoo` quiá'- candí` quií-naa' jo jo` iing~ nicó'." ⁹ Jo dsu' cañi' i simí` i ñiing~ dsí' do: "U~, ja` nijmi'óøng'naa' 'nú' co' ja` nilíng' quií-naa' o'gui quií-na' cajo. Co' guiá-gui quií-na' e nigüilíng-na' fí' tieen~ e nigüileáa'na' e jmicoo` e 'né'na' do." ¹⁰ Jo lajee` cangolíng- i simí` i ja` ñiing~ dsí' do fí' tieen~ e cangoleáar~ jmicoo` quiá'r-, lajee` job mi~ caguiéng'- i dseañu' i cung' guó` do, jo i simí` i ñiing~ dsí' do cangotáam~ bre jmñ~ colíng~ cóo' i dsea` cung' guó` do, jo ca-jní'bre 'núu'. ¹¹ Jo mi'mñng- guijia lajo caguilím tu i simí` i ja` ñiing~ dsí' do i cangolíng- fí' tieen~ do, jo guicatór- caluu` 'núu' jo guicajíñ'-: "¡Fí'ii', fí'ii', fa' jgiée` o' e ná'go 'núu'!" ¹² Jo dsu' guicañi' i dseañu' do jo cajíñ'-: "E já'-ba' e fñ-i 'nú', simí`, ja` cuín'n 'nú'."

¹³ Jo cajíng'- gui Jesús:

—Jo co' lajob líí, joba' fñ-i 'nú' e jmiñiing~ áa'na!, co' ja` ñí'na' e~ jmñ~ jogui e~ oor~ e nigüéeng- jnea~, dsea' lán'n jaang' dsea' jmigüi i jáa' fí' ñiff-.

Coó` júu^ já'- e lafa' júu^ cuento quiá'- dsea` 'léeng'-

i ca'íng' cuu

(Lc. 19:11-27)

¹⁴ Jo mi~ cangí jō, cajíng'-gui Jesús e júu^ la:

—Jo mi~ Fidiée~ quier' nifí' quía'- dsea, jō e jō lí' laco' jaang` dseañu^ i cagüi'í' cangó- fí' lí' huíí-. Jo dsu' lajee~ e nú'-gui e nigüi'í' nidsér-, jō cató'r- jaléng^ i dsea` jmóo` ta~ quía'r- do, jō cacuø'reiñ' do cuu- e laco' nijméiñ'- do ta~ e nilisea'gui e dsí' quía'- e cuu- do. ¹⁵ Jo jaang` i dsea` 'léeng'~ quía'r- do cacuø'r' 'ñiá` mil cuu-, jogui jaang` cacuø'r' tú- mil cuu- lajō, jogui i jaang`gui do cacuø'r' coob` mil cuu-, jō lajì gaam`biñ' do cangíiñ' cuu- lí^ jialco' jíí~ bí seem`bre. Jo ngí joguiba', cagüi'í' i dseañu^ do e cangó'r- fí' lí' huíí-. ¹⁶ Jo i dsea` 'léeng'~ i cangíng` 'ñiá` mil cuu- do, eám' guiá- cajméer` ta~ cóo~ e cuu- do, jō calí'-bre jíe'gui 'ñiá` mil lajō. ¹⁷ Lajobi cajo i dsea` 'léeng'~ i ca'íng' tú- mil e cuu- do cajmée`bre ta~ cóo~ do, jō calí'-bre jíe'gui tú- mil e cuu- do cajo. ¹⁸ Jo dsu' i dsea` 'léeng'~ i cangíng` cóo` mil e cuu- do, cango'mea`bre fí' nú'- uó-.

¹⁹ 'Jo mi~ cangígui lajō, caguiém'-tu i fiir~ do, jō casí'r- lajaang` lajaang` i dsea` 'léeng'~ quía'r- do e niguiéeiñ'- do cuente lajíí~ e nicajméer` cóo~ cuu- e cangíiñ' do. ²⁰ Jo la'uii~ caguié- i dsea` 'léeng'~ i cangíng` 'ñiá` mil e cuu- do, jō cajá'r' fiir~ 'ñiá'gui mil lajō e calí'r-, jō casí'r- dsea` do: “Fí'i, 'nu` cacuøø~ jnea` 'ñiá` mil cuu-, jō nicajmé-baa ta~ cóo~ e jō, jōba' lana nicalí'-i 'ñiá'gui mil lajō e dsí.” ²¹ Jōba' cañí i fiir~ do: “'Nuab` jaang` dsea` 'léeng'~ i guiúng-, có' cajmee-ba' ta~ røø` cóo~ lajíí~ capí^ cuu- e cangín'. Jōba' lana jmiguiab` jalé' e sea` quíe-e e nicuøøø` 'nu` e nine'^ ní^, jō lana

røøb` nijmi'iaáng` dsi'naa' náng.” 22 Jo jo` huóø` li'hi` i dsea` 'léeng' i ca'íng' tú` mil e cuu` do caguiér` jo casí'r` fiir`: “Fíi'i, 'nua` cacuóø` jnea` tú` mil cuu`, jo cajmé`-baa ta` cóo` e jo, jo lana nical' i tú`-gui mil e cuu` do e dsí.” 23 Joba' cañí` i fiir` do: “'Nua` jaang` dsea` 'léeng' i guiúng` cajo, có' tii'm'ba' jmée` ta` røø` cóo` capí` cuu`, joba' jmiguiub` jalé` e sea` quié` e e nicuóø` 'nua` e nine` ní`, jo lana røøb` nijmi'iaáng` dsi'naa' náng.” 24 Jo jo` huóø` li'hi` guié` i dsea` 'léeng' jaang`gui do i cangúng` cóo` mil e cuu` do, jo lalab casí'r` fiir`: “Fíi'i, ñi'baa guiá` e jaang` dsea'ña` i ue` dsí' líng' 'nua` e lí` tii'n` sitín` lajii` ta` cajmée` dsea` jiém`, jogui e ú` có' jalé` ta` jmóo` dsea` jiéng` cajo. 25 Joba' cafóm'baa 'nua`, jo fí' ná' uób` ca'meáa e cuu` e cacuóø` jnea` do. Jo lana lab quiee` e lajii` e cuu` jo.” 26 Joba' cañí` i fiir` do quiá` i dsea` 'léeng' quiá'r` do: “'Nua` lin' jaang` dsea` 'léeng' i soo` dsí' jogui i fí', jo song niñi'ba' guiá` e jnea` sitín` lajii` ta` cajmée` dsea` jiéng' jogui e gú' gó'ø` jalé` ta` jmóo` dsea` jiéng', 27 joba' zjiali' ja` ca'í' o' fa' mi` caguite` cuu` quié` e fí' banco? Joba' mi` cagüean` n, ca'ím'baa lajii` cuu` quié` e jogui e dsí quiá` cajo.” 28 Joba' casí'r` jaléng`gui i dsea` i teáng` do ie` jo, jo cajíñ`: “Gui`na' e cóo` mil cuu` quiá` i dsea` 'léeng' fí' na, jo cuóø` na` i dsea` 'léeng' i quié` gui` mil e cuu` na. 29 Dsuco` i dsea` i sea` quiá`, jmiguiugui`b niñiñ` e nilisea, joba' lalím` nilisea` quiá'r`. Jo dsu` i dsea` i ja` sea` quiá`, nigüeáb` lajii` e capí`jiu e sea` quiá'r` do. 30 Jogui i dsea` 'léeng' fí' na guing`na'r fí' caluu` fí' li` nua` só', jo fí' job niquí'r` jogui nitár` majar` cajo.”

Jial nilí mĩ nitĩdsí í' quíá' dsea` jmigüü'

³¹ Jō cajíng' guí Jesús e júu^ la:

—Jō mĩ tí lí nití í' e nigáá' jnea~, dsea` lín'n jaang` dsea` jmigüü' i jáá' fí ñiff~, nigáá'túu dsu' e niquín~n jee~ jalé" e jlo^ e niing~ 'gøng' quíá' Fidiée~ jogui colíing~ cóo'~ jaléng" ángeles i líng' guotii~ Fidiée~, jō joguib mĩ niníi fí ée^ quíe~ e lí niing~ jlo^ quíá' Fidiée~. ³² Jō lajím` dsea` seeng` fí la'úng~ fí jmigüü' niseáiñ' fí quinií~, jō jneab~ dsea` ni'naan~ dsea` jie~ fí lí catíiñ~ la-jaang` lajaaiñ' lí^ laco'gui la jmóo` jaang` dsea` i jmóo` í' jo'se" mĩ 'náaiñ` jaléng" jo'se" jee~ jaléng" jo'chí'. ³³ Jogui jaléng" i dsea` i líng' lafa' i jo'se" do niguién'~n lí' lí dsée' laco' guin~n, jogui jaléng" i dsea` i líng' lafa' i jo'chí' do niguién'~n lí' lí tuung~ laco' guin~n. ³⁴ Joba' jnea~, dsea` lín'n i dseata~ dsea` féng' do, nifíi~ jaléng" dsea` i neáng' lí^ lí dsée' laco' guin~n jō nifá'a: "Jaléng" 'nú", ñilíng~na' fí la, có' 'nú'bing' i nicajmigüeang'^ Tiquié'e dsea` guing~ ñiff~, joba' íng'~na' lajalé" e catíng~na', có' lajob' nisi'líng^na' quíá'r~ lajii~ latí mĩ caguiar' uíing~ jmigüü'. ³⁵ Dsuo' la-jeé' cataan~n cóo'~ 'nú" fí jmigüü', mĩ cadseá~ jmi'aan~, jogui 'nú" cacuóø'~ba' jnea~ e cagø'ø; jogui mĩ cadseá~ jmijmín~, cacuóø'~ba' jnea~ jmi~ cagú'~u; jogui cangfíbí cajo laco' ngí jaang` dsea` i jáá' fí caluu~, jō dsu' cacuóø'~ba' jnea~ lí ca-jmí'íin~n. ³⁶ Jogui calí'né~bí sí' i, jō cacuóø'~ba' jnea~; jogui casá'bí e calidsée!~e, jō cató' fíim'ba' jnea~; jogui calú'bí 'nuñí^, jō dsu' cagui'ee~ba' jnea~ cajo." ³⁷ Joba' jaléng" i dsea` í' i cajmée` jalé" e íing~ Tiquié'e dsea` guing~ ñiff~ nijmingúr

lala jo nijñĩ: “Fí'ii, ¿lí caneeng~naa' 'nũ e jmi'aan', jo cacuóø'~baa' 'nũ e caquíé'? Jogui ¿lí caneeng~naa' 'nũ e jmi'jmi'n', jo cacuóø'~baa' 'nũ jmi' e calí'? 38-39 Jogui ¿lí caneeng~naa' 'nũ e lin' lafa' jaang`dsea` i jáa' fí caluu', jo cacuóø'~baa' 'nũ cajo lí cajmi'lin'? Jogui ¿lí caneeng~naa' 'nũ e cali'né' sí', jo cacuóø'~baa' 'nũ e jo cajo; jogui e dsée' osi e iuun' fí 'nũñí' é, jo cango'ee'ba' 'nũ cajo?” 40 Joba' ie~ jo jnea~, dsea` lín'n dseata~ dsea` féng', lalab ningñi- quiá'r: “E já' e fñi' 'nú' e lajalé' e cajmicóo'~na' i dsea` i líng' lafa' rún'n i dseáng' ja` niing- jii' capí', joba' lajaléb' e jo quié- jneab~ cajmee~na' cajo.”

41 'Jogui jnea~ i líng' dseata~ dsea` féng' do nifñi' jaléng' i dsea` i neáng' lí' lí tuung~ laco' guiin~n: “Do güilíng' 'nú' lí' do, co' Fidié' nicabíim-bre 'nú', jo dob catíng' 'nú' fí ni' jì lí coo' jì e jo' tóo' jmi' yu' fí lí nicajme' Fidié' lí catíng' fii' i 'líng'^ colíng~ cóo' jaléng' ángeles i 'líng'^ quiá'r- cajo. 42 Co' cadseáb- jmi'aang- jnea~ lajee~ cataan~n cóo'~ 'nú' fí jmi'güi' la, jo dsu' ja' cacuóø'~na' jnea~ e cagó'ø; jogui cadseá-bi jmi'jmi'n- cajo, dsu' 'nú' ja' cacuóø'~na' jnea~ jmi' e cagú'-u; 43 jogui cang'fbi laco'gui jaang`dsea` i jáa' fí caluu', dsu' 'nú' ja' cacuóø'~na' jnea~ lí cajmi'lin~n; jogui cali'né'-bñi sí'i, dsu' 'nú' ja' cacuóø'~na' jnea~ sí'i; jogui calidsée'~bñi jogui ca'úu'u 'nũñí' cajo, dsu' 'nú' ja' cagui'ee'na' jnea~.” 44 Joba' i dsea` i neáng' lí' lí tuung~ do nijming'ir' lala: “Fí'ii, ¿lí caneeng~naa' 'nũ e cadseá- jmi'aan', osi e cadseá- jmi'jmi'n' é, osi e lin' laco' jaang`dsea` i jáa' fí caluu', osi e 'né-

sí' é, osi e dsée'~ osi e iuun'~ fí' 'nuñí'bi é, jo ja' cajmicóo'~naa' 'nu'?" ⁴⁵ Joba' ie~ jo lalab ningñ'~ quiá'r~, jnea~ dsea' lín'n dseata~ dsea' féng': "E já'~ e fí'~i 'nú' e jalé' e ja' cajmée'~na' cóo'~ jaang' dsea' i lán'g' lafa' rún'n i ja' niing~ jí'~ capi'^, joba' lajob cajo ja' cajmee'~na' cóo'~ jnea~." ⁴⁶ Joba' jaléng' i dsea' î fí' lí' 'lib'^ nidsilíñ' fí' lí' ni'íñ' iihuñ' e ja' tóo' jmiñ' nité'. Jo dsu' jaléng' gui dsea' i ja' dsee' røøng' fí' quini' Fidiée', í'bing' i nidsigüea' car' ngongñ' jmiñ' cóo'~ dsea' do fí' ñiff'.

26

Mi' casñng' jaléng' dsea' jial e nisáñ' Jesús

(Mr. 14:1-2; Lc. 22:1-2; Jn. 11 :45-53)

¹ Jo mi' cangî e cajíng' Jesús jalé' e júu' na, lalab casí'r~ i dsea' quiá'r~ do:

² —Jí'~ laco' ní' 'nú' e tú' jmiñ'~ba' 'né'~gui e nití' e jmiñ' Pascua. Jo ie~ jmiñ' job mi' nijáng' dsea' jnea~, dsea' cagá' a fí' ñiff' e lín'n jaang' dsea' jmiñ'güi, jo niteáñ' jnea' fí' dse' crúu' cartí' nijngáñ' jnea~.

³ Jo ie~ job cajo, jaléng' fii' jmidsea' quiá'r~ dsea' Israel cóo'~gui jaléng' dsea' cóøng'~ quiá'r~ caseáng' rúñ' fí' lí' guing' fii' jmidsea' laning~ i sii' Caifás quiu'r' ta~, ⁴ jo casíñ'~ cuaiñ' quiá'r~ jial nilí'r' e nijmiñ'gøøñ' Jesús e laco' nisáñ' dsea' do jo lajoba' nijngáng'~neñ'. ⁵ Jo dsu' síñ' e iñ'~ jmér' lajo lajee' e o' e jmiñ' jo, dsuco' jial fíng nitá'~ dsea' mñ'.

Mi' ca'é'e jaang' dseamî jmiñ' jmeafñ' fí' mogui' Jesús

(Mr. 14:3-9; Jn. 12 :1-8)

6 Jø lajee˘ job cangó˘tu Jesús fí˘ coo˘ fii˘ e sii˘ Betania; jø lajee˘ táaiñ˘ fí˘ jø, dob dsitiiñ˘ fí˘ quiá˘˘ jaang˘ dseañu˘ i˘ sii˘ Simón i˘ nicalíng˘ jmoñu˘ li˘ fí˘ ngúu˘ táang˘ lamí˘ jéeng˘gui. 7 Jø lajee˘ guing˘ Jesús fí˘ job mi˘ tí˘ li˘ cangoquiéeng˘ jaang˘ dseamí˘ fí˘ li˘ guiiñ˘, jø quieñ˘˘ do coo˘ sítí˘ li˘ a˘ jmi˘ jmeafi˘ e˘ mo˘ eáang˘. Jø lajee˘ e guing˘ Jesús gø˘bre mi˘ ca˘ée˘ i˘ dseamí˘ do e jmi˘ jmeafi˘ e˘ quier˘ do fí˘ mogui˘ dsea˘ do. 8 Jø mi˘ tí˘ li˘ cangá˘ i˘ dsea˘ quiá˘r˘ do e cajmée˘ i˘ dseamí˘ do lajø, eáam˘ caliguíiñ˘ jø cajíiñ˘˘:

—¿Jialí˘ jmi˘í˘ i˘ dseamí˘ na e jmi˘ jmeafi˘ e˘ mo˘ eáang˘ na? 9 Cofa˘ mi˘ ja˘ cajmées˘ lana, jmiguiab˘ cuu˘ nicóng˘ na faco˘ e cango˘niñ˘, jø e cuu˘ jø nili˘íng˘ ta˘ e nilicóo˘˘ jiu˘ jaléng˘ dsea˘ tiñíng˘.

10 Jø dsuco˘ Jesús lí˘bre lajii˘˘ e sáing˘ i˘ dsea˘ do, joba˘ casí˘˘ reiñ˘ do lala:

—¿Jialí˘ fí˘˘ 'nú˘' leáang˘ i˘ dseamí˘ la? Co˘ coo˘ e guíu˘ba˘ nicajméesiñ˘ na quie˘e. 11 Co˘ contøom˘ niliseeng˘ jaléng˘ dsea˘ tiñíng˘ jee˘ 'nú˘', dsu˘ jnea˘gui cateá˘ba˘ caga˘ee˘ nii˘ fí˘ jee˘ 'nú˘'. 12 Co˘ e jmi˘ jmeafi˘ e˘ ca˘ée˘ i˘ dseamí˘ la fí˘ ngúu˘ táan˘ lí˘ lafa˘ e nicasúuiñ˘ jnea˘ e jmeafi˘ quiá˘˘ mi˘ ni˘ú˘u fí˘ dsí˘ tó˘ ée˘. 13 Co˘ e já˘ e fii˘ i˘ 'nú˘' e doñí˘ jíe˘ fí˘ ni˘ guóo˘˘ uø˘ fí˘ jmi˘güí˘ li˘ niguiá˘ dsea˘ júu˘ quiá˘˘ jial laang˘ dsea˘ jee˘ jalé˘ dsee˘ quiá˘r˘, ninib˘˘ júu˘ cajø quiá˘˘ lajii˘˘ e cajmées˘ i˘ dseamí˘ na cóo˘˘ jnea˘, joba˘ lajjob niguiéng˘ dsí˘ dsea˘ ír˘.

Mi˘ camí˘ Judas Iscariote cuu˘ e quiá˘˘ nijáiñ˘˘ Jesús

(Mr. 14:10-11; Lc. 22:3-6)

14 Jo ie~ jo jaang` lajee` dsea` guitúung` quiá'- Jesús i sii` Judas Iscariote cangór- fí lí~ neáng` jaléng` fii~ jmidsea` quiá'- dsea` góor` dsea` Israel, 15 jo cangosí'~reiñ' do lala:

—¿Jial tí' cuu- guía' óó'na' e nicuó'^na' jnea~ jo nijmee~ e úung` e nijóø'n~n Jesús fí jaguóo'na'?

Joba' cañí' i fii~ jmidsea` do jial tí' niquír- jo cajíñ'-:

—Niquí-baa' quí'- guiguí' cutes`.

16 Jo latí' ie~ job canaang` i Judas do e 'nó'r' jial laco' nicuó- quiá'r- e nijáiñ' Jesús fí jaguó` jaléng` i dsea` do.

Mi~ cagó' Jesús í' canuu` cóo'~ dsea` guitúung` quiá'r-

(Mr. 14:12-25; Lc. 22:7-23; Jn. 13 :21-30; 1 Co. 11 :23-26)

17 Jo ie~ jmii~ la'uii~ quiá'- e jmii~ e gø' dsea` Israel íñí'^ e ja` quie'^ quiéng` do, cangoquiéng` i dsea` guitúung` do fí lí~ sing' Jesús jo cajmingí'r- dsea` do:

—Fí'ii', ¿jie~ fí lí~ iing` 'nu` e nidsiguiá^naa' guiú- e niquiee~ee' colíing~ e quiá'- e jmii~ Pascua?

18 Joba' cañí' dsea` do quiá'- i dsea` quiá'r- do jo casí'-reiñ':

—Güilíng-na' fí' e fiñ la, jo mi~ niguilíng-na' fí quiá'- i dseañu` la, sji~na're lala: “Lalab jing'- Tífa' quí-naa': Nijaquíem' e nití- í' quié-e, joba' ngóo'ó fí sináú^ quí'- jo fí job lí~ nijmee~ e jmii~ Pascua colíing~ cóo'~ jaléng` dsea` guitúung` quié-e.”

19 Joba' cajméeb` i dsea` guitúung` do laco' jji~ ta` caquiú' Jesús e nijmér-, jo cagua'bre guiá- lajii~ e nidó'r- do quiá'- lajii~ e jmii~ e nijaquíéng` do.

20 Jo mi~ tí lí~ canuu~ e jmi~ jo, cangim' Jesús fí mes~ coling~ cóo~ i dsea` guitúung` quiá'r~ do. 21 Jo lajee~ e nineáaiñ' gø'bre mi~ tí lí~ cajíng'- Jesús lala e sí'r~ i dsea` quiá'r~ do:

—E já'- e fíi~ i 'nú' e jaang` lajee~ 'nú' nijáng' jnea~ fí jaguó` dsea` i 'ní' níng~ jnea~.

22 Jo mi~ canúu~ i dsea` guitúung` quiá'r~ do lajo, dsíng'- fí'í^ calíñ~, jo canaaíñ` casí'r~ dsea` do i~ lajee~ ír' nijmé~ ta~ jo, jo lalab cajíng'- lajaang` lajaaíñ`:

—Fí'i', ¿su o' jnea~, faa~aa'?

23 Jøba' cañí' Jesús quiáiñ'- do:

—Lí^ jaang` i gø' cóo~ jnea~ fí coo` cuéé~ huí', íb` nijáng' jnea~ do. 24 Co' dseáng'- nisi'í^ba' e lajo nidsingín~n jnea~, dsea` i cajá~ fí ñifí~ e lín'n jaang` dsea` jmigüí, lí^ laco'gui la fé' fí ní~ jì quiá'- Fidiéé~. Jo dsu' je ngí~ fíib^ i dsea` i nijáng' jnea~ do! Co' guiá~ guib quiá'- i dsea` í^ fa' mi~ ja` caliséiñ`.

25 Jo i Judas i niguia' guiá~ e nijáiñ' dsea` do, jo 'ñaia'biñ' do cajíñ'- casí'r~ Jesús lala:

—Fí'i', ¿su o' jnea~, faa~aa', i nijmé~ lajo?

Jøba' cañí' Jesús quiáiñ'- do:

—'Nub` nicaféé'~gui' lajo.

26 Jo lajee~ e neáaiñ' gø'r' íbre mi~ catíng~ Jesús coo` íñí^, jo cacuø'r' gui'máang'~ Fidiéé~, jo lí~ jo caméer` jmá~ ca'ná^ quiá'- lajaang` lajaang` i dsea` guitúung` quiá'r~ do jo cajíñ'- casí'- reiñ':

—Quié'na' e na, co' e nab ngúu' táan`n.

27 Jo ngí jo catíñ~ coo` cóo^ e a~ jmí^ mí^ huíng` jø', jo mi~ cangí e cacuø'r' gui'máang'~ Fidiéé~, jo joguiba' cacuø'r' lajaang` lajaang` i dsea` guitúung` quiá'r~ do jo casí'- reiñ' do:

—Í'na' lajɨng`na' e la, ²⁸ co' e lab jmi'øøn⁻ e nitù` mi~ nitán⁻ n fí dse' crúu[^] e laco' ni'íng⁻ dsee⁻ quiá'⁻ lajaléng[^] dsea` jmigüí[^]. Jo e jo lí' júu[^] tigua[~] e 'mí⁻ e jmiró` Fidié[~] cóo'[~] dsea` jmigüí[^]. ²⁹ Dsu' e já'⁻ e fí⁻i 'ná' e jo` nidúu[~]guí jmi'[^] mí[^] huíng[^] jó'[^] cartí mi~ ni'né[^]túu' colíng[~] e jmi'[^] mí[^] huíng[^] jó'[^] e 'mí⁻ mi~ nití⁻ í' e Tiquié[^] e Fidié[~] nicár[~] nifí quiá'⁻ lajaang` lajaang` dsea`.

Mi~ cajmé^e Jesús júu[^] e nijíng⁻ Tú[^] Simón e ja⁻ cuiñ` dsea` do

(Mr. 14:26-31; Lc. 22:31-34; Jn. 13 :36-38)

³⁰ Jo mi~ cangí jo, ca'ø' quiá'⁻ e jmiféiñ' Fidié[~], jo ca'uøøm`bre jo cangolíng[^]tur fí' mó' Olivos.

³¹ Jöba' cajíng⁻ Jesús casí'r⁻ i dsea` quiá'r⁻ do lala:

—Lajim[^] 'ná' nitiúum`ba' jnea[~] e uøø` na; co' lalab tóo` fí' ni~ jì' quiá'⁻ Fidié[~] lí' fé' lala: “Ni-jngám⁻ dsea` i fii[~] i néé' ni~ jo'se", jöguí jaléng[^] jo'se" quiá'r⁻ lí[^] nisojøm`bre'.”

³² Jo cajíng⁻ guí Jesús lala:

—Dsu' mi~ tí' lí' níngí e nijí'túu jee[~] jaléng[^] 'lí[~], jo jéem`baa ninii~i fí' lí' se' Galilea jo fí' jöb nijí'tu rú'naa' calé' catú⁻.

³³ Jo cañí' Tú[^] Simón quiá'⁻ Jesús:

—Dsu' song i caguaang⁻ do nitiúuiñ⁻ 'næ', Fí'i, dsu' jnea[~] ja' nijmee[~] e lajo.

Jöba' cañí'tu Jesús quiáiñ⁻ do:

³⁴ —E laba' jmitaa[^] o', Tú[^] Simón, e uøø` na, nú'⁻ guí e niquí'⁻ tuidsée[^], 'næ' nifo[^] 'ní' ya' e ja cuiñ[^] jnea[~].

³⁵ Jöba' cañí' Tú[^] Simón quiá'⁻ Jesús:

—Fí'i, nañí' fa' nijngáng⁻ dsea` jnea[~] uii[~] 'næ', dsu' ja' nijmee[~] e lajo.

Jō lajōb fé' i dseá` quiá' Jesús i caguiaang`gui do cajo.

*Mi` caféng' Jesús Fidié` fí' cōō` lí' sii` Getsemaní
(Mr. 14:32-42; Lc. 22:39-46)*

³⁶ Jō mi` cangî jō, cangób` Jesús colîng` cōō` dseá` quiá'r` fí' cōō` lí' sii` Getsemaní e née' fí' mó' Olivos, jō lalab casí'r` i dseá` do mi` caguiliñ` fí' jō:

—Lab nijá'` 'nú' la lajee` ninii` jnea` nifōn`n Tiquié`e Fidiéé`.

³⁷ Jō jíi` Tú` Simómbing' jéeiñ` cōō`gui lajì gáng` i jōō` jaang` dseañu' i sii` Zebedeo, jō mi` catî fí' jō, canaang` e fí'lb` líng' Jesús jogui lijiuung` dsír' cajo, ³⁸ jō casí'r` i dseá` gaang` do lala:

—Dsíng'` lí'i e fí'í` lín'n dseáng'` lafa' jō seem`baa fí' jmigüi` la lín`n. Jō lab nijá'` 'nú' lajee` jō, jō ja` jmigüîng` yaang`na' jō e sijnéeb` áa'na' cōō` jnea`.

³⁹ Jō cangób` Jesús cartí' dogui capí'` laco' cajé' i dseá` quiá'r` do, jō fí' jōb catúuiñ` cartí' cajnúu` nir` fí' ni` uó` jō canaaíñ` féiñ' Fidiéé` lala:

—Tea` , leaang` jnea` lajii` iihuí' e nijaquíéeng` quié`e; jō dsu' ja` güilí' laco' iing` jnea`, cō' güilíb` dseáng'` laco' iing` 'nu` e nilí'.

⁴⁰ Jō mi` cangî jō, caquim'` tur lí' caseáaiñ` i dseá` quiá'r` do, jō cadséng`neiñ' do e teiñ'` güim`bre. Jōba' cajíng'` Jesús casí'r` Tú` Simón:

—¿Su dseáng'` ja` téb'` 'nú' fa' e ja` nigüíng`na' e neáang`jiu' e sijnéé` áa'na' cōō` jnea` jíi` cōō` oor`?
⁴¹ ¿Jialí'` güîng` 'nú'? Jminá` ráang`na' jō féeng`na' Fidiéé` dseá` guíng` ñifí` uii` quí`na' yaang`na', jō lajōba' ja` dseáang` e nijiúng`na' fí' ni` dsee`. Cō'

eáam' iing~na' e nité'na' e sijnéé`áa'na', dsu' ngúu' táang`na' ja` cuø' fí' e nijmee`na' lajo.

42 Jo mi'míng`guijiu lajo cangób`tu Jesús e fí' jo e catí' tú`ya' e féiñ' Fidiéé` jo cajíñ' lala:

—Teaa~, song ja` niquí'`jmíi`fa' e nileán`n jee` jalé` iihuí' e nijaquíéeng' quié`e, joba' lí'`güilíb` laco' iing`'nu' e nilí'.

43 Jo mi` tí' lí' caquing`tur fí' lí' caseáaiñ' i dsea` quiár` do, cadséng`neiñ' e güim`tuiñ' do, co' dseáng` eáam' ja` lí' güíñ'. 44 Jo cangób`tur e catí' 'ní' ya' e cangoféiñ' Fidiéé`, jo dob caseáaiñ' i dsea` quiár` do e güíñ', jo camí'`tur Fidiéé` laco' nicajíñ'` lamí` jéeng`gui do. 45 Jo mi` cangí' jo, caquim`tur fí' lí' caseáaiñ' i dsea` quiár` do jo lalab casí'`reiñ' do:

—¿Su dseáng` mí' 'noo`biteng'`'nú' e jmi'íng`na'? Joba' fí'`i 'nú' e lanab catí' í' e nijáng` dsea` jnea` fí' jaguó` jaléng` dsea` dsee` dsea` qui', jnea` dsea` i cajá` fí' ñifí' e lín`n jaang` dsea` jmigüí'. 46 Jo jminá` ráang`na' jo má`aa', co' nijaquíéem' i dsea` i nijáng` jnea` do.

Mi` casáng' dsea` Jesús

(Mr. 14:43-50; Lc. 22:47-53; Jn. 18:2-11)

47 Jo lajee` gui'ná'^ sing' Jesús fé'r', job mi` caguié` Judas Iscariote, jaang` lajee` i dsea` guitúung` quiá'` Jesús, jo caguié` colíing` cóo'` i fíing` dsea` i quié' jalé'`ñisu' cóo'`gui jalé'`'ma'. Jo jaléiñ' do ngolíñ'`lajíi'` ta` quiu' jaléng` fii` jmidsea` quiá'` dsea` Israel cóo'`gui jaléng` yáui` dsea` cóong` quiár`. 48 Co' i Judas do jéem' nicajmea'r' júu^ i dsea` ngolíng` cóo'r` do jo casí'`reiñ' lala:

—Iñ` nimáang~ 'nú' i nichá^u ni~, íb` Jesús; jo séng'na're ladsifí'.

⁴⁹ Jo lajob cajmée` Judas, cangoquiéem`bre fí lí` sing' Jesús mi~ caguiér~ jo casí'r~ dsea` do:

—¡Cá^, Tifa'!

Jo mífing` cachu'r` ni~ dsea` do.

⁵⁰ Joba' cañíi` Jesús quiá^- dsea` do:

—Ruu^, jmeeb~ lajii~ ta~ cañí^-.

Jo ladsifí' lanab cangoquiéeng' i dsea` caguaang~gui do, jo casam'bre dsea` do jogui catór~.

⁵¹ Jo lajee` jo, jaang` lajee` dsea` quiá^- Jesús caguir` ñisú^` quiá'r~ jo caquiú'r` cataang` logua~ i dsea` 'léeng'~ quiá^- i jmidsea` laniing~ do. ⁵² Joba' cajíng'~ Jesús casí^- reiñ':

—Te^tu ñisú^` quií^- ée^ quiá^-, dsuco` i dsea` i táng` cóo^~ ñisú^`, cóo^` e job nijúuiñ` cajo. ⁵³ ¿Su ja` ñí^ 'nú` e cuøm` fíi~ jnea~ Tiquié^e, jo nimú^n`nre lí'gui guitúung` 'lé' 'lée` i líng` ángeles i líng` guotiir~, jo ladsifí' lanab nisíñ~? ⁵⁴ Jo dsu' faco' lajo, ¿jial niliti~ jóng lajii~ e fé' fí' ni~ jì quiá^- Fidiée^? Co' lajaléb' e jo dseáng'~ 'né` e nidsijéeb' dseáng'~.

⁵⁵ Jo mi'míng~ guijiú lajo cajmingi^- Jesús i dsea` i caguilíng~ do jo casí^- reiñ':

—¿Jialí' cañilíng~ 'nú' e quié^na' jalé^` ñisú^` jogui jalé^` 'ma` e cañiséng'na' jnea~? Co' cañilíng~na' e lafa' jnea~ lín'n jaang` íi. Dsu' lacoj` jmíib~ ie~ lami~ jéeng'gui do táang` jnea~ e ee` fí' guá^- fé^, jo ja` cateá~ óo'na' fa' caséng'na' jnea~ ie~ jo. ⁵⁶ Jo dsu' lajalé^` e na nidsijéé' jmíi~ na e lí^ laco' niliti~ laco' fé^ fí' ni~ jì quiá^- Fidiée^ e cajme' dsea` i café^` cuaiñ~ quiá'r~ malíi~ gui eáang'.

Jø ie~ jø jaléng' i dsea` quiá'r- do cacuí`bre, jø ñiab' Jesús caseáng'guir do.

*Mi~ caguiéng'- Jesús fi' quini~ jaléng' dsea` cóøng'~
(Mr. 14:53-65; Lc. 22:54-55, 63-71; Jn. 18 :12-14,
19-24)*

⁵⁷ Jø catób- i dsea` do Jesús jø cangojeáaiñ^ dsea` do fi' quini~ i jmidsea` laniing- quiá'- dsea` Israel i sii Caifás, co' fi' job nisiseáng' jaléng' tifa' quiá'- júu^ quia' ta~ quiá'- dsea` Israel cóo'~gui jaléng' yúu~ dsea` cóøng'~ quiá'r- cajo. ⁵⁸ Jø cangám'- Tú^ Simón ti'leáaiñ' laco' cangoliñ` téer` Jesús carti' caguiliñ' fi' sigui' quiá'- e 'núu' li~ guing~ i jmidsea` laniing- do. Jø dob jii~ caje' Tú^ Simón e fi' sigui' do coling~ cóo'~ jaléng' i jmóo` í` guá'- e sijeeiñ` lajii~ júu^ nitigua~ quiá'- i jmidsea` laniing- do cóo'~ Jesús.

⁵⁹ Jø jaléng' fii~ jmidsea` cóo'~gui lajiiing` i dsea` cóøng'~ i quia' ta~ quiá'- dsea` Israel do 'nó'r' jial e laco' niguié'r' e ní'náñ- Jesús cóo'~ júu^ e o' já'-, jø lajoba' nilí'r' e nijngáiñ'- dsea` do. ⁶⁰ Jø dsu' ja' cadsé'r' jial laco' nijmér- lajo, nañí' fa' fím' dsea` caguiling- e 'náñ- Jesús cóo'~ e júu^ lajo cajo. Jø mi'máing- guijia lajo caguiling- gáng-gui dsea` jiéng' ⁶¹ jø cajíng' í`:

—I nabi i dseañu' i cajíng'- e tím`bre quí'r' guá'- quiá'- Fidiéé~, jøgui nijmé'-tur calé' catú- cóo'~ 'ní' jmí~.

⁶² Jø caróo- i jmidsea` laniing- do jø cajmingí'r- Jesús lala:

—¿Jiali' ja` ngíi'- jii~ coo'? ¿E~ fó' lajii~ e júu^ e fé' i dsea` na uii` quií'^?

63 Ds_u Jesús tiib⁻ cajer', ja'e cañir`jíi[~] coo`. Joba' cajíng⁻ tu_i jmidsea` laniing⁻ do:

—La'eáang' cóo[~] Fidiée[~] dsea` jí[~], lana quiú[~] ta[~] e nijméé[^] júu[^] já⁻ su 'n_u i líng' i jóo' Fidiée[~] camíng[~] do i nisíng⁻ Fidiée[~] i nicá` nifí' quí⁻ii'.

64 Joba' cañíi` Jesús quiáin⁻ do:

—'N_ub` nicafée[~]gui'. Jo fíi⁻i 'ná[^] lana e nimáam[~]ba' jnea[~], i líng' i dsea` i jáa' fí' ñifí⁻ e lán'n jaang` dsea` jmigüi', e guin⁻n lí⁻ lí' dsée' laco' guing[~] Fidiée[~] dsea` féng' dsea` ñíng' i 'gøng' eáang', jogui nimáam[~]ba' jnea[~] cajo mi[~] nigáatúu fí' jmigüi' e quín⁻n jee[~] cabøø[~] jníi'.

65 Jo mi[~] canúu⁻ i jmidsea` laniing⁻ do lajo, lico' casíin[~] sí[^]bre e cuø' lí⁻ e liguíim⁻bre jo cajíin⁻:

—Lajíi[~] júu[^] e nicafé[^] i dseañ^u' na gab` fé'r` uíi⁻ quiá⁻ Fidiée[~], jo jo` i 'neáng⁻guíi' fa' i ni'níng⁻gui ír', co' 'náb[^] nicaná^u-gui' lajíi[~] júu[^] ga' e nicafé'r'.

66 Joba' çjial í' óo' 'ná[^] cuaiñ[~] quiá⁻ e júu[^] jo?

Joba' cañíi` i dsea` 'leáang⁻ do:

—E jáb⁻ e óo`bing' na dsee⁻, joba' dseáng⁻ 'né⁻ e nijúum⁻bre.

67 Jo canaiñ` 'ñíim⁻bre dsea` do jogui jmihuám⁻brein[^] cajo, jogui i líng[~]gui dsea` bár⁻ moni[~] dsea` do 68 jo sí[^]r` lala:

—Song já⁻ e 'n_u lin[^] i dsea` i sijeeng[~]naa' do i nicá` nifí' quí⁻naa', joba' jmee⁻ júu[^] lana i⁻ cabøøng⁻ 'n_u!

Mí' cajíng⁻ T^u Simón e ja` cuíiñ` Jesús

(Mr. 14:66-72; Lc. 22:56-62; Jn. 18:15-18, 25-27)

69 Jo lajee[~] jo, dob guing[~] T^u Simón fí' siguí' fí' lí[~] sí[^] 'n_u i jmidsea` laniing⁻ do fí' lí[~] qui^ur'

ta~. Jo lajee~ jo jaang` dseamf i nijmoo` ta~ e fi` jo cangoquieein` fi` li~ guing~ Tú^ Simón jo casí`-reiñ':

—'Nu` cangi`ba' cajo cóo`~ Jesús i seeng` fi` Galilea, ¿já^ leaa`~?

70 Jo Tú^ Simón cañír` quiá'- i dseamf do jo cajíñ'- casí'-reiñ':

—Ja` ñii` ee` e fi` jnea~ na, dseamf.

71 Jo mi'ming`guijiu lajo cangoquieeng` Tú^ Simón fi` o'nú^ quiá'- e 'núu` li~ guing~ i jmidsea` laniing` do e quiu'r` ta~, jo fi` job` jiéng`gui jaang` dseamf cangá^- quiá'r~, jo cajmea'r` júu^ jaléng` i dsea` caguiaang`-gui do jo casí'-reiñ':

—I dseañu` na cangi`bre cóo`~ Jesús i seeng` fi` Nazaret cajo.

72 Jo caleáb` catú^- cañí` Tú^ Simón jo cajíñ'-:

—Ni~ fi- ja i dseañu` do cuíng` jnea~ la, dseamf.

73 Jo mi'ming`-guijiu lajo i dsea` i neáng` quiá'- dogui cangoquieein` fi` li~ sing` Tú^ Simón jo casí'-reiñ' do:

—'Nu` dseañu` e já'-ba' e ngi` cóo`~ Jesús cajo, cóo`~ lajú`~ jial fó`, nabi nicuø` li~.

74 Joba' cañí`tu Tú^ Simón jo casí'-reiñ' do:

—iDseáng'- e jáb'- ni~ fi- e ja i dseañu` do cuíng` jnea~ la!

Jo ladsifí lanab caqui' jaang` tuidsée^. 75 Jo joguib mi~ cadse'- dsí' Tú^ Simón e lajob` cajíng'- Jesús lamí~ jéng`gui mi~ cajíñ'- casí'r~ dsea` do lala: “Lajee~ e nú'-gui e niquí'- jaang` tuidsée^, 'nu` nifo` 'ní ya` e ja` cuín` jnea~.” Jo cagüi`ñb` Tú^ Simón fi` caluu~, jo caqui'r` dseáng'- e ngocáng` dsír' uí`~ e calíñ` fi`í^ eáng`.

27

Mi~ caguiéng'~ Jesús fí' quini~ dseata~ Pilato
(Mr. 15:1; Lc. 23:1-2; Jn. 18 :28-32)

¹ Jo mi~ tí' lí~ cajneá~ e jmi~ jo, lajaléng'~ fii~ jmid-sea` cóo'~gui lajaléng'~ yáa'~ dsea` cóøng'~ quiá'~ dsea` Israel casíiñ~ røø` quiá'~ jial laco' niguié'r e nijngáiñ'~ Jesús. ² Jo cató~bre dsea` do e 'ñúuiñ'~ jo cangojeáaiñ^ fí' quini~ jaang` dsea` i sii` Pilato i líng' jaang` dseata~ romano.

Mi~ cajúng~ Judas Iscariote

³ Jo i dseañu` i sii` Judas Iscariote, i dsea` i cajáng'~ Jesús fí' jaguó` jaléng'~ i dsea` do, mi~ cangár~ e jaléng'~ i dsea` í' tí' lí~ nijngám'~ bre Jesús, joba' job mi~ tí' lí~ calilí'r^ lajii'~ dsee~ e ca'éer` do, jogui cajo'~ dsíir' cóo'~ lajii'~ e nicajméer` do, joba' cajáb'tur i fii~ jmidsea` do cóo'~gui jaléng'~ i yáa'~ dsea` cóøng'~ quiá'~ dsea` Israel do lajii'~ e guigui' í' cutee` e ca'íñ' quiá'~ e cajáiñ' Jesús do, ⁴ jo lalab cajíñ'~ casí'~reiñ'!

—Nica'ee~baa dsee~ e nicajáan!~n fí' ni~ 'mó~ jaang` dseañu` i ja` røøng` dsee~ jii'~ capí'.

Joba' i dsea` do cañíir` quiáiñ'~:

—¿E~ cuaiñ~ qui~ jnea'^ e cajmee~ 'nu` lajo? i Cuaiñ~ quiib~ 'nu` e jo!

⁵ Jo i Judas do fí' dob cabír` e cuu~ do fí' dsíi' sináa^ guá'~ fé' jo cagüi'í' bre jo cangote'r` si` luur~ e cangojngáang'~ 'ñia'r'.

⁶ Jo jaléng'~ i fii~ jmidsea` do casitím'bre e cuu~ do jo cajíñ'~:

—E cuu~ la nisi'li^ cóo'~ jmi'øøng~ dsea`, jo ja` cuøøng` fa' e nidsitoo'~gui fí' dsíi' guóo' lí~ dsi'ma~ cuu~ quiá'~ guá'~.

7 Jo job mi~ casiiñ~ røø` e nilár~ coo` uó~ cóo~ e cuu~ do; jo e uó^ jo sii` Uó~ li~ uø' Dsea` Guóo~ quiá~ e Jmóor` Tu'. Jo job li~ cajme'r' coo` codsii~ li~ ni'áaiñ~ jaléng` dsea` i jalíng~ fí' caluu~ i lingiing~ júung~ fí' fi~ do. 8 Joba' e uó~ do sii`bi cajo latí lana Uó~ li~ Catuu` Jmi'øøng~. 9 Jo job calití laco' jii~ e cajíng~ i dsea` i calisí Jeremías, jaang` i café` cuaiñ~ quiá~ Fidié~ mali~gui eáang~, mi~ cajíñ~ lala: “Cacá~bre laji` guigui` cutee` lí^ laco'gui lajii~ 'móo~ cacuø` dsea` Israel, 10 jo cóo~ e cuu~ job calár~ e guóo~ uó~ e sii` Uó~ li~ uø' dsea` Guóo~ quiá~ e Jmóo` Tu', lí^ laco'gui ta~ e caqui~ Fíi.”

Mi~ caguiéng~ Jesús fí' quini~ dseata~ Pilato
(Mr. 15:2-5; Lc. 23:3-5; Jn. 18:33-38)

11 Jo mi~ caguiéng~ Jesús fí' quini~ i dseata~ i sii` Pilato do, jo í cajmingí'r~ Jesús:

—¿Su e já~ba' e 'nu` lin' dseata~ dsea` féng` i quie` nifí' quiá~ jaléng` dsea` góo` dsea` Israel?

—'Nub` nicafé~gui! —cañí` Jesús.

12 Jo lajee~ e teáang~ i fii~ jmidsea` do cóo~gui jaléng` yú~ dsea` cóøng~ e jmóor` dsee~ quiá~ Jesús, dsu' dsea` do ja` e ngír` jii~ coo` quiá~ i dsea` í. 13 Jo uí~ joba' cajmingí` dseata~ Pilato cajmingí'r~ Jesús jo cajíñ~:

—¿Su ja` nuu' lajii~ dsee~ e cuø' i dsea` na 'nu`?

14 Jo dsu' Jesús ja` cañír` jii~ camí^ júu^ quiá~ dseata~ do; joba' i dseata~ do eáam` cangogá` dsír` jo jo` ñir` e~ nijmé~gui.

Mi~ cahuí` ta~ e nijúung~ Jesús
(Mr. 15:6-20; Lc. 23:13-25; Jn. 18:38-19:16)

15 Jo lajee[~] e jmi[~] e gø' dsea` Israel iñí[^] e ja`
 quie[^] quíeeng` jo tñng` i dseata[~] do e láaiñ` jaang`
 dsea` sijñng` 'nñí[^] lí[^] doñí` ii` i niguíng` dsea` fi[~].
 16 Jo ie[~] jo ni'iuung⁻ jaang` dsea` i nínica`lée' eáang`
 i sii` Jesús Barrabás. 17 Jøba' cajíng` i dseata[~] do
 cajmingí'r⁻ dsea` fi[~]:

—¿I⁻ dsea` iing[~] 'ná' e nilaan⁻? ¿Su Jesús
 Barrabás ofa' Jesús i sii` Dsea` Jmáang⁻ dob é?

18 Jo dsu' calilí[^] i dseata[~] do e cajáng` i dsea` do
 Jesús uí[~] e dsihuím`bre quiá⁻ dsea` do.

19 Jo lajee[~] guing[~] i dseata[~] Pilato do fí lí quiu'r⁻
 ta[~], lajee[~] job caguié⁻ júu[^] quiá⁻ i dseam[^] quiá'r⁻
 do jo sí[^] reiñ': "Ja` e jmoo' jí[^] cøø` cøø⁻ i dseañu' i
 ja` dsee⁻ røøng` na, dsu' dsi'lóo[^] bi gab` caquí` uí[~]
 quiá'r⁻."

20 Jo dsu' jaléng` i fi[~] jmidsea` do cøø[^] gui jaléng`
 yúu[~] dsea` cøøng[~] cacøøiñ⁻ dsí' jaléng` dsea` fi[~] e
 laco' nileáng` i Barrabás do jogu[^] e nijúum⁻ Jesús.

21 Jo dsu' i dseata[~] Pilato do cajmingí⁻tur calé[^]
 catú⁻ dsea` fi[~] jo cajíñ⁻:

—¿I⁻ lajee[~] i dseañu' gáng⁻ la iing[~] 'ná' e nilaan⁻?
 ¿Su Jesús ofa' Barrabás?

Jøba' i dsea` fi[~] do cañír` jo cajíñ⁻:

—¡Leaang⁻ Barrabás!

22 Jo caleá` catú⁻ cajmingí[^]tu dseata[~] Pilato jo
 cajíñ⁻:

—Jo ¿e[~]gui nijmee[~] jnea[~] jóng cøø[^] Jesús i sii`
 Dsea` Jmáang⁻ la?

Jøba' lajim` i dsea` fi[~] do cañír` jo cajíñ⁻:

—¡Güitáiñ⁻ fí` dse[^] crúu[^]!

23 Jøba' cañí[^] dseata[~] Pilato quiá⁻ i dsea` fi[~] do
 jo cajíñ⁻ casí⁻ reiñ':

—¿E~gui e ga` e nicajméer` e catíñ~ lajō?

Jō dsu' caleáb`tu cacuø' i dsea` fiñ` do 'goo` jō cajíñ`-:

—iGüitáñ~ fí dse` crúu`!

24 Jō coob` mi~ jo` ñi` dseata~ Pilato e~ nijmé`-gui, co' dseáng`- gab` ta' i dsea` do mii` e mir` e nitáng` Jesús fí dse` crúu`, joba' caquiur` ta~ dsea` quiar` e cangoquieñ` jmii` jō carur` guóor` fí quini` jaléng` dsea` fiñ` jō cajíñ`-:

—Ja` dsee` quie` e lajii` 'mó` nitáng` i dseañu` la, co' cuaiñ` quii` 'nú` yaam`ba' na.

25 Jōba' lajim` dsea` fiñ` cañiir`:

—iJneab`^ coling` cóo`~ jaléng` jōo`naa' nine`- ni`naa' lajii` 'mó` quia` i dseañu` na!

26 Jō dseata~ Pilato caleám`bre Barrabás; jō caquiur` ta~ e cabøøm` Jesús, jō mifing` cajám`bre dsea` do e quia`- nitáñ`- do fí dse` crúu`.

27 Jō jaléng` 'lée` quia`- i dseata~ do catø`-bre Jesús fí 'nufi` jō casíñ` yaaiñ` lacúng` lajín` laco' sing` dsea` do. 28 Jō i 'lée` do ca'uø`bre si`^ Jesús jō ca'iañ` dsea` do coo` jmáang` 'mi' e nú`. 29 Jōgui catá'r` coo` lí`^ corona e líi` cóo`~ layaang` tóo` fí mogui~ dsea` do, jōgui coo` sii` cacuø'r` dsea` do jō casaiñ`- do fí guóor` dséé'. Jō mi~ cangî jō, casir` uø` jnir` fí quini` dsea` do jō lóøiñ` dsea` do jō sir` lala:

—iMajmiféng`naa' dseata~ dsea` féng` quia`- dsea` Israel!

30 Jōgui 'ñiim`bir dsea` do cajo, jō cóo`~ e sii` e cacuø'r` dsea` do, cóo`~ e jōb canaaiñ` bár` fí mogui~ dsea` do. 31 Jō mi~ cangî e jmóor` ta~ lóøng` dsea` do, cajéb`tur e jmáang` 'mi' do jō caquíng`tur dsea`

do siiñ[^] e lamĩ[~] qui^r, jò cajéem[^]bre dsea[^] do fí[^] lí[^] nitáin[^] fí[^] dse[^] crúu[^].

Mĩ[~] catáng[^] Jesús fí[^] dse[^] crúu[^]

(Mr. 15:21-32; Lc. 23:26-43; Jn. 19:17-27)

³² Jò lajee[~] e ningolín[^] jéeiñ[^] dsea[^] do, cajín[^] jaang[^] dseañu[^] guiá[^] fí[^] i sii[^] Simón[^] i niseeng[^] fí[^] cõ[^] fii[^] e sii[^] Cirene; jò caqui^u i dsea[^] i jéeng[^] Jesús do ta[^] i dseañu[^] i e cajéeiñ[^] do crúu[^] quiá[^] Jesús.

³³ Jò mi[~] caguilín[^] fí[^] cõ[^] lí[^] sii[^] Gólgota e guóng[^] Cuõ[^] Mogui[~] 'Li[~], ³⁴ jò fí[^] job[^] cacuø^r Jesús jmá[^] mí[^] huñng[^] jø[^] e tí[^] e sicáang[^] cõ[^] jmá[^] dsi[^] e guí[^]; jò cõ[^] ni[^]ba[^] caliⁱing[^] dsea[^] do caⁱr[^], jò jò caliⁱing[^] guir[^] fa[^] caⁱr[^] guir.

³⁵ Joba[^] mi[~] tí[^] lí[^] nicateáaiñ[^] Jesús fí[^] dse[^] crúu[^], i 'lé[^] do canaaín[^] cóor[^] e laco[^] nigüeáng[^] i nilí[^] i nicó[^] e si[^] dsea[^] do. ³⁶ Jò mi[~] cang[^] jò, dob caguár[^] e jmóor[^] í[^] Jesús lajee[~] táang[^] dsea[^] do fí[^] dse[^] crúu[^]. ³⁷ Jò fí[^] yú[^] gui[~] dsea[^] do catéer[^] cõ[^] lí[^] tó[^] júu[^] e fé[^] e[~] uiing[^] quiá[^] e jmáng[^] dsea[^] ír[^] lado, jò lalab tó[^]: “I lab Jesús, dseata[^] dsea[^] féng[^] quiá[^] dsea[^] Israel.”

³⁸ Jò gáng[^] ii[^] catáng[^] fí[^] dse[^] crúu[^] coling[^] cõ[^] Jesús cajo, jmá[^] jáng[^] crúu[^] la jaaiñ[^] do, jaaiñ[^] do táaiñ[^] lí[^] lí[^] dsée[^] jò jaang[^]guiñ[^] do lí[^] lí[^] tuung[^]. ³⁹ Jò jaléng[^] dsea[^] i ngúing[^] fí[^] lí[^] táang[^] Jesús fí[^] dse[^] crúu[^] do, gab fé^r uii[~] quiá[^] dsea[^] do jò lico[^] guia^r mogui[~]bre jøøiñ[^] dsea[^] do jò fé^r:

⁴⁰ —'Nu[^] dsea[^] fó[^] e niqui[^] guá[^] jò nijmée[^]tu[^] calé[^] catú[^] cõ[^] 'ní[^] jmii[~]. Jò song[^] já[^] e 'nu[^] lin[^] Jó[^] Fidié[^] i camñng[^] do, joba[^] jleaang[^] uø[^] lí[^] táan[^] na jóng!

41 Jo lajobi jaléng^l fi~ jmidsea` cajo cōo^l~gui jaléng^l tifa^l quiá^l- júu[^] quiá^l ta~ quiá^l- dsea` Israel cōo^l~gui jaléng^l yáa^l~ dsea` cōong^l~ quiá^l-r- lōøm⁻bre dsea` do jo fé^l-r:

42 —Caleáam⁻bre jaléng^l dsea` jiéng^l jo lajo güileáang^l 'ñia^l-r' lana. Jo song já^l- e líiñ^l dseata~ dsea` féng^l quiá^l- dsea` Israel, joba^l güijgiáng^l 'ñia^l-r' lí táaiñ^l fí dse^l crúu[^] na jo lajoguiba^l já^l- nilí^l~ii' jóng e líiñ^l i Jōó^l Fidié^l camúng^l~ do. 43 Jo song dseáng^l- já^l- líiñ^l e Fidié^l seeng^l cōo^l-r~, joba^l íb⁻ catúng⁻ nileáng^l ír⁻ lana song dseáng^l- já^l- e iing^l~neiñ^l; cō^l nicajím^l-bir e líiñ^l i Jōó^l Fidié^l camúng^l~ do, ¿já^l leáa^l~?

44 Jo jì^lgui jaléng^l i ñi^l i táang^l cáang^l Jesús do, gab^l fé^l-r uii^l~ quiá^l- dsea` do cajo.

Mi~ cajúng⁻ Jesús

(Mr. 15:33-41; Lc. 23:44-49; Jn. 19:28-30)

45 Jo mi~ tí^l lí^l catí^l guieñí^l- jo cartí^l la ñi^l 'ni' e ca'lóo⁻ dseáng^l- canuu^l sób^l fí e guóo^l~ uó⁻ jo. 46 Jo lajee^l job^l mi~ ca'lóo⁻ Jesús e teá^l jo cajíñ^l-:

—Elí, Elí, ¿lama sabactani? —e guóng^l~: Fidié^l quié⁻e, Fidié^l quié⁻e, ¿jali^l~ nicatiun^l jnea^l~?

47 Jo i líng^l i dsea^l i teáng⁻ do ie~ jo canúur⁻ e cajíng^l- Jesús lajo, joba^l cajíñ^l-:

—I Líí[^] tó^l i dsea^l na, jaang^l dsea^l i café^l cuaiñ^l quiá^l- Fidié^l malí^l~gui eáang^l.

48 Jo ladsifí^l lanab jaang^l lajee^l i dsea^l do cangór⁻ güí^llí^l jo cangoquier^l cōo^l joo^l jo cajmí^llear^l cōo^l~ jmí^l^ mí^l^ huíng^l jó^l^ e tí^l jo caquidsir^l fí cōo^l yá^l^ síi⁻ jo ca'úuiñ^l fí mo'oo⁻ dsea^l do e laco^l niyúñ^l-.

49 Jo dsu^l i dsea^l caguiaang⁻gui do cajíñ^l-:

—Jéeng`gui cateá`, ne`duu' su nigüéeng` i Líí` do i nileáng` ír`.

⁵⁰ Jo Jesús caléb` catú` ca'óor` teá` lado, jo ngf` jo cajúm`bre. ⁵¹ Jo ladsifí` lajob calí` tú` dseá`- joo` e 'mi' e í' guiá`^ joo` guá`- fé` e si' fí' Jerusalén, co' casíng` catí' yá`^ jogui cartí' uii~. Jogui cajo cajó`^ uó` jogui cafiing` jalé`^ cuu~ cóo`~, ⁵² jogui jalé`^ ée` li~ teáng`^ 'lii~ canab; jogui fíim` jaléng`^ dsea` quiá`- Fidiée` i nicajúng` lamí` jéeng`gui cajíb`tur. ⁵³ Jo mi~ cangf` e cají`tu Jesús, jo jaléng`^ i dsea` i cají`tu do cangolíiñ`^ fí' Jerusalén fí' li~ líí` fíi` güeang`^ quiá`- Fidiée`, jo fíim` dsea` i cangáng` ír` fí' jo.

⁵⁴ Jo mi~ cangá` i fii` 'lée` do cóo`~gui jaléng`^ i dsea` i teáng` cóo`r` do ijmoo`í` Jesús jial cajó`^ uó` jogui cóo`~ jalé`^ e calí`gui do, joba' eáam` cafó`iñ`^ jóng` jo cajíiñ`^:

—E nijáb`- e i dseañu` na líiñ` i Joo` Fidiée` camíng`^ do.

⁵⁵ Jo ie~ jo dob teáng` i fiing` dseamf` i joo`- catí` huíi` i nicajalíng` cóo`~ Jesús catí' li~ se' Galilea jogui i nicajmicoo`~ quiá`r`^ cajo. ⁵⁶ Jo jee~ jaléng`^ i dseamf` í` quiéng` Yá` i seeng` fí' Magdala, jogui Yá` niquiá`^ Tiáa~ cóo`~ Sé^, jogui niquiá`^ jaléng`^ joo` yúu`~ Zebedeo cajo.

Mi~ ca'áng` Jesús

(Mr. 15:42-47; Lc. 23:50-56; Jn. 19 :38-42)

⁵⁷ Jo mi~ tí' li~ ngóo` ca'í` núu`^, caguié` jaang` dseañu` i sea` cuu` eáang` i sii` Sé^ i seeng` fí' cóo` fíi` e sii` Arimatea, jo í` cangi`bre cóo`~ Jesús lamí` jéeng`gui cajo. ⁵⁸ Jo i dseañu` í` cangó`-bre fí' li~ guiing` dseata` Pilato jo cangomir` fí' e fa' ni'áam` bre

Jesús. Jɔba' cacuøb' i dseata~ Pilato do fí lajo. ⁵⁹ Jo cangojgiám' i Sé^ do Jesús fí lí táaiñ' fí dse' crúu^, jo caquiñ' dsea' do cóo'~ cóo' 'mí' té' e niguó^, ⁶⁰ jo cango'áam'bre dsea' do fí cóo' dsí' tó' lí ja' ii' mí' áang' jii'~ jaang'; jo uø'~ quiá'~bre lí' lí' ca'áaiñ' dsea' do, jo ja' mí' ngóó' eáang' caquiær' ta' e calí' e too' éé' do. Jo mí' tí' lí' calí', caquiéer' cóo' cuu'~ e dsée' e otoo' éé' do jo cangám'~bre jóng. ⁶¹ Dsæ' i Yá^ i seeng' fí Magdala do cóo'~gui i Yá^ jaang'gui do, dob cajer' fí quini' e too' éé' e lí' ca'áng' Jesús.

Mí' cajmée' dsea' í' oo' éé' quiá'~ Jesús

⁶² Jo mí' tí' lí' cajneá' e jmíi' cóo'gui do, jo ie' jo cangotíng' jmíi' e jmi'íng' jaléng' dsea' Israel, job mí' cangolíng' jaléng' fi' jmidsea' quiá'~ dsea' Israel colíng'~ cóo'~ jaléng' dsea' Israel i líng' dsea' fariseo fí lí' guíng' dseata~ Pilato jo casí'~ reiñ' do:

⁶³ —Dseata~ quí'ii', tóob' dsi'naa' e ie' lamí' seeng'gui i dsea' i jmi'góo' do cajíñ' e mí' níng'f' ní' jmíi' e cajúñ'~, nijíb'tur calé' catú'. ⁶⁴ Jo uíing' e joba' síi'~naa' 'næ' e nijmé' dsea' íb' e lí' ca'áng' dsea' do lajee' 'ní' jmíi', có' jial fíng' lajee' dsea' quiá'~bre nijalíng' e uøø' jo niguím' bre dsea' do, jo mí' nilicøng'gui lajo nijmi'góor' e nicajíb'tu dsea' do. Jogui song' nilí' lajo, joba' eáang'guib' ga' nilí' jóng' laco'gui latí' mí' uii' do.

⁶⁵ Joba' cañí' dseata~ Pilato jo cajíñ'~:

—Lab teáang' 'lée' i cuøøng' lí' jmeáang'~na' ta' i nijmé' í' oo' éé'. Jo güilíng'~na' colíng' cóo'r' jo güijmee'~na' í' car' jíé' jii'~ lí' quí'~ jmíi' fí jo.

⁶⁶ Jo cangolíng'~biñ' do cóo'~ i 'lée' do jo cajméer' lí' fí' e cuu' fé' e jní' e oo' éé' do e laco' ja' ii' cuøøng'

ninea⁻; jo dob caseáaiñ' 'lée⁻ i caguá cajmée' í e fí jo.

28

Mi~ caji'tu Jesús

(Mr. 16:1-8; Lc. 24:1-12; Jn. 20:1-10)

¹ Jo mi~ tí lí~ cangi e jmi~ e jmi'ing' jaléng' dsea Israel e lí^ lí' ngóó' nijneá' e jmi~ la'uii~ quia⁻semaan~, jo cangojòø^ Yá^ i seeng' fí Magdala cóo'gui i Yá^ jaang'gui do fí lí~ ca'áng- Jesús. ² Jo lajee~ job mi~ cajó' uó⁻ e eáang', co' jaang' ángel i lãng' guotii~ Fidiée~ cajgáng- fí yá^ jmi'güi ie~ jo, jo cangoquieeiñ' fí oo⁻ ée' quia⁻ Jesús, jo cajér' e cuu~ fé' e jni' e oo⁻ ée' do, jo fí ni~ job caguár'. ³ Jo dseáng'- jlo^ jing' i ángel do lí^ laco'gui la jnéeng- jì mi~ jmi'jneá' güi'ñiá^ jì~re', jogui jlo^ tee' si'r^ cajo dseáng'- lí^ laco' la tee' joo' dseáng'- . ⁴ Jo i 'lée⁻ i teáng- jmóo' í e oo⁻ ée' do dsing'- cajléiñ- dsu' uii' e 'gó'r' jo jì'gui cartí' ca'íng- dsíir'. ⁵ Jo i ángel do casí'r- i dseamf do jo cajíñ'-:

—Ja' fòøng'~na' jii'~ coo', co' ñi'baa guiú⁻ e Jesús dsea 'náng'na' i cajúng- fí dse' crúu^ do. ⁶ Jo dsu' jo iuuiñ- fí la lana, co' nicají'bre lí^ laco'gui cajíñ'- ie~ lami~ cangi' cóo' 'nú' do. Ñilíng-na' ñijòø-na' fí lí~ ca'áang- dsea' ír'. ⁷ Joba' fii~ i 'nú' lana, güilíng'tu' lajminá- jo güi'jmée'~na' júu^ jaléng' dsea' quia'r- e nicají'b'tur jo jéeng'guir nidsér- fí lí~ se' Galilea laco'gui 'nú', jo fí job nimáang~na're. Jo jii'~ lanab júu^ quiee- quii-na' lana.

⁸ Joba' i dseamf do caquim'-bre lajminá- e fí oo⁻ ée' do, jo lajee~ jo dseáng'- 'gó'bre jogui dseáng'-

dsíng' iáang` dsíir' cajo. Jò jmináb` cangolíin` e cangocóor` e júu` do fí` quini` jaléng` i dsea` quiá'- Jesús do. ⁹ Jò jo` huóø` líh~ lajo, coob` mí` cajmijnéeng` 'ñia' Jesús fí` quini` i dseamf` do jò caféng` neiñ' do. Jò cangoquiém`bi i dseamf` do cajo fí` lí` sing' dsea` do jò canaaiñ` do ríir` tíi` dsea` do jò lajee` jò jmiféng` neiñ'. ¹⁰ Joba' cajíng'- Jesús casí'r- i dseamf` do:

—Ja` fóøng` na' jii~ coo, jò güilíng` na' lana jò güisii~ na' jaléng` dsea` quié` e i líng` laco' rún` n e güidsilíin` fí` lí` se' Galilea lajminá`, jò fí` job nijí' rú` naa' cóo'r~.

Lajii~ júu` quiá'- 'léé` e casí'r- fii~ jmidsea`

¹¹ Jò lajee` e ngolíng` i dseamf` do, i líng` i 'léé` i teáng` jmóo` í` do caguilíin` fí` jee` fii` jò casí'r- jaléng` i fii~ jmidsea` do laji` e calí` do. ¹² Joba' i fii~ jmidsea` do cangolíim` bre e cangosiin` cóo' jaléng` yúu~ dsea` cóøng` quiá'- dsea` Israel cuaiñ` quiá'- lajii~ júu` e nisea` quiá'- Jesús do. Joba' casíin` e cacuø'r` jmiguiú` cuu- i 'léé` do ¹³ jò casí'- reiñ' do lala:

—Lalab júu` nijmitíng` na', e lajee` uóø` e teng` na' güim` ba', caguilíng` i dsea` quiá'- Jesús do jò caguíim` bre dsea` do fí` dsíí` tó` éé`. ¹⁴ Jogui song nilíin` dseata~ lajii~ e júu` jò, joba' jneab` nine~ naa' jial laco' nisíng` naa' cóo'r~ e laco' ja` ni` uíng` huíng` quíi` na'.

¹⁵ Jò ca'ím` i 'léé` do e cuu- do jò cajmée` bre lajii~ júu` e nisínú'r`. Jò lajob jii~ líí` júu` e ngí` cartí` jmíi~ na jee~ jaléng` dsea` Israel.

*Lajii~ júu` e ca'íi` Jesús quiá'- dsea` quiá'r-
(Mr. 16:14-18; Lc. 24:36-49; Jn. 20 :19-23)*

16 J_oba' laj_ob cajmée` i dsea` guijáng` quiá'- Jesús do, cangolím`bre fí lí` se' Galilea j_o cangolín` fí c_oo` yú` mó` fí lí` caquiá' Jesús ta~. 17 J_o mi` tí` lí` cangáin` Jesús, eáam' cajmiféin' dsea` do, j_o dsu' seem`bi i líing` cajo i ja` já'- líing` e dsea` do Jesús. 18 J_o cangoquiém' Jesús fí` quiá'- gui laco' teáain'- do j_o casí'r` dsea` do lala:

—Fidiée` nicacuø'r` jnea~ e niquiá'`u ta~ fí latøng` fí` ñifí` jogui fí` ni~ guóo`~ uø` la. 19 J_oba' güilíng`na' fí` jalé` fí` e sea` fí` jmigüí, j_o jmee`na' e niquí'- jíng` yaang` dsea` e laco' ni`uúin` dsea` quié`e; jogui mifíng` seaang`na'r` jmí` la'eáang` cóo`~ júu` quiá'- Tiquié`e Fidiée` jogui la'eáang` cóo`~ jnea~, i J_oor' camíng` do, jogui la'eáang` cóo`~ Jmiguí` quiá'- Fidiée` cajo, 20 jogui ée`na'r` jial laco' nijmitir` lajalé` e júu` quiá'- Fidiée` e nicafí` i 'ná` e nijmití`na'. Jogui güilíin`na' guiá` e seem`baa cóo`~ 'ná` laco` jmí` laco` jmí~, j_o dseáng`- laj_ob nilí` car` ngongí` jmí~.

J_o laj_ob nilí`.

J_o lanab jíí` lí` júu` quiá'- Fidiée` e cajme' Mateo.

Júu 'má e cacuo fidié
New Testament in Chinantec, Comaltepec
(MX:cco:Chinantec, Comaltepec)

copyright © 2002 Wycliffe Bible Translators, Inc.

Language: Chinantec, Comaltepec

Translation by: Wycliffe Bible Translators, Inc.

Chinanteco, Comaltepec [cco], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Comaltepec

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cliv

2014-04-22

PDF generated using Haiola and XeLaTeX on 21 Feb 2024 from source files
dated 29 Jan 2022

30c6f873-0dee-5863-8883-ba3c5eaa988c